

ა(ა)იპ-სოხუმის სახელმწიფო უნივერსიტეტი
ჰუმანიტარული ფაკულტეტი

სპეციალობა – საქართველოს ისტორია

იოსებ ალიმზარაშვილი

„ლეკიანობა“ და ქართლ-კახეთის
სამხედრო-თავდაცვითი სისტემა

XVIII – XIX ს. 30-იანი წლები

წარდგენილია ისტორიის დოქტორის აკადემიური
ხარისხის მოსაპოვებლად

სამეცნიერო ხელმძღვანელი: ისტორიის დოქტორი,
სოხუმის სახელმწიფო უნივერსიტეტის
ასოცირებული პროფესორი
ავთანდილ კილასონია

შესავალი

„ლეკიანობა“ ქართულ ისტორიოგრაფიაში ერთმნიშვნელოვნად უარყოფით მოვლენადაა შეფასებული. ეს პროცესი საქართველოში საუკუნეზე მეტ ხანს გრძელდებოდა და მისი თანამედროვე თუ მომდევნო პერიოდის მკვლევარ-მოგზაურთაგან (როგორც ქართველი, ისე საქართველოში მყოფი უცხოელი) არ დარჩენილა ვინმე, რომ ამ საკითხს მეტ-ნაკლებად არ შეხებოდა. მიუხედავად ამისა, დღემდე არსებობენ პასუხგაუცემელი კითხვები, რის ახსნასაც ქვემოთ შევეცდებით.

XIX და XX საუკუნის 90 წლის განმავლობაში საქართველო რუსეთის იმპერიის შემადგენელი ნაწილი იყო, ამიტომ ეს მოვლენა განიხილებოდა და ფასდებოდა იმგვარად, როგორადაც ეს იმპერიის ინტერესებს ესაჭიროებოდა. როგორც ჭარ-ბელაქანისა და მთიანი დაღესტნის ისტორიის ცნობილი მკვლევარი ი. პეტრუშევსკი მიუთითებდა: „მთელი მთიანი დაღესტნის მოსახლეობის (განურჩევლად – ავარების, წახურების და სხვ.) „მონათვლა“ ლეკებად, ხოლო „ლეკის“ გაიგივება დაუნდობელ მკვლევებსა და მძარცველებთან, თვითმპყრობელი იმპერიის ერთადერთ მიზანს ემსახურებოდა: გაემართლებინა რუსეთის მიერ კავკასიის ანექსია და რუსეთის კულტურულ მისიას – დაეცვა ქრისტიანი საქართველო და სომხეთი „მუსულმანი ბარბაროსებისაგან“.

ამ ფონზე ძალზე მოსახერხებლად გამოიყურებოდა მთელი დაღესტნელი მოსახლეობის წარმოჩენა ავაზაკებად, რომელთაგან საქართველოს დაცვა მხოლოდ რუსეთის ძლიერ ხელს შეეძლო.

XVI-XVIII საუკუნეებში საქართველოსა და ჩრდილო-კავკასიას შორის მართლაც დაიძაბა ურთიერთობები, მაგრამ „ლეკიანობა“ იზოლირებული მოვლენა არ ყოფილა და იგი ახლო აღმოსავლეთსა და ამიერკავკასიაში, ირანოსმალეთსა და რუსეთის იმპერიებში ხსენებულ პერიოდში განვითარებული სოციალ-პოლიტიკური და ეკონომიკური ვითარების ერთობლიობაში უნდა განვიხილოთ.

ცნობილია, რომ საუკუნეების განმავლობაში ჩრდილო-კავკასია ფარად უდგა საქართველოს (როგორც ბუნებრივად, ისე ფიზიკურად) და რამდენიმე გამონაკლისის გარდა (სკვითების, კიმირიელების, ხაზარების თავდასხმები), ქართველი მეფეები ამ ფაქტორს თავის სასარგებლოდ იყენებდნენ. პოლიტიკუ-

რი ქორწინებებიც ქართველ გვირგვინოსნებს უმეტესწილად ჩრდილო-კავკასიელებთან აკავშირებდათ (ფარნავაზი, საურმაგი, ფარსმან ქველი, გიორგი I, ბაგრატ IV, დავით აღმაშენებელი, გიორგი III, თამარი, ლევან კახთა მეფე, ვახტანგ VI და სხვები). ძალზე იშვიათად გადაუტანიათ ქართველებს დიდი ბრძოლები, რომელშიც ჩრდილო-კავკასიელები მოკავშირეების, ან დაქირავებულების სახით ქართული დროშის ქვეშ არ იბრძოდნენ (მათ შორის ლეკებიც, – ლეკების წინააღმდეგ).

მაშ რატომ მოხდა, რომ XX საუკუნის 90-იან წლებში საქართველოზე თავსმობხვეულ ეთნო-კონფლიქტებში ოსებსა და აფხაზებთან, ჩრდილო-კავკასიელმა ხალხებმა ქართველების მიმართ უარყოფითი დამოკიდებულება გამოამჟღავნეს და ქართულ ჯარში (აფხაზური, ან ოსური მხარისაგან განსხვავებით) არც ერთი ჩრდილო-კავკასიელი მოხალისე არ იბრძოდა? პირიქით, აფხაზეთში ქართველების წინააღმდეგ თავისი დაუნდობელი მოქმედებებით სწორედ ჩრდილო-კავკასიელები გამოირჩეოდნენ. ამ შემთხვევაში უთუოდ გასათვალისწინებელია რუსეთის ფაქტორი, იძულება და ფულადი დაინტერესება, მაგრამ რუსების მიმართ დამოკიდებულებას იგივე ჩეჩნები, ჩერქეზები, ყაბარდოელები, დაღესტნელები და ჩრდილო-კავკასიის სხვა ხალხები ხომ დღესაც დაუფარავად გამოხატავენ?

სამწუხაროდ, იგივე განმეორდა რუსეთ-საქართველოს 2008 წლის საომარი მოქმედებების დროს, როდესაც ჩრდილო-კავკასიელებმა ქართველების მიმართ კვლავ ინდეფერენტიზმი გამოამჟღავნეს. უფრო მეტიც, რუსულ არმიას მათი ნაწილი წინ მოუძღოდა ქართული მიწების ოკუპაციის დროს.

ჩვენი აზრით, ზემოთქმული რუსული იმპერიის (ჯერ ცარიზმის, შემდეგ კომუნისტური და ნეო-კომუნისტური) 200 წლიანი მიზანმიმართული მოქმედებების ნაყოფია. გავიხსენოთ, XIX საუკუნის 30-50-იან წლებში შამილის წინააღმდეგ ბრძოლებში სწორედ რუსულ ჩინებსა და ორდენებს დახარბებული ქართველები გამოირჩეოდნენ განსაკუთრებული სიმამაცით. თუმცა, ამ შემთხვევაში მხოლოდ ჩინ-მედლები არ იყო მთავარი. რუსეთი მოხერხებულად სარგებლობდა იმ ქართველი მოსახლეობის განწყობილებით, რომელთაც გამუდმებული „ლეკიანობის“ პირობებში არაერთი ახლობელი ჰყავდათ დაკარ-

გული და შურისძიებისათვის მიზეზი საკმაოდ ჰქონდათ¹. ხსებულის კარგი მაგალითია მეფისნაცვალ მ. ვორონცოვის მიერ 1845 წლის დარგოზე, შამილის წინააღმდეგ ლაშქრობა, რომელშიც ქართველების საკმაოდ დიდი რაოდენობა იღებდა მონაწილეობას, თანაც საკუთარი ინიციატივით. ლაშქრობის ერთ-ერთი მონაწილის – დიმიტრი მეღვინეთხუცესიშვილის თქმით, მათი მოტივაცია სწორედ იმით იყო განპირობებული, რომ ქართველებს კარგად ახსოვდათ ლეკების მიერ ქართლ-კახეთის საუკუნოვანი ძარცვა-რბევა, ამიტომ „აღტაცებულნი მხიარულებით ულოცვიდით ჩვენ ურთიერთთა, ვითარცა წინსვლასა და დაცემას იმათ მტერთა ზედა, რომელთაგან მოოსრებაი ჯერეთცა არ გვაქვს დავიწყებული“². იგივე პათოსია დაღესტნელების წინააღმდეგ ბრძოლის დიდი გამოცდილების მქონე გრიგოლ ორბელიანის მიერ ძმის – ილიკოსადმი 1848 წლის 16 აგვისტოს ტურჩიდალიდან გამოგზავნილ წერილშიც: „სალტას, ქუდალას, ყუპპას, კოპორს იდგენენ ორი ათასი კომლი კაცი, მგონია უფრო მეტი (საუბარია ადგილობრივ მოსახლეობაზე – ი.ა.); ახლა სად არიან, რა იქმნენ? – წლეულს გერგებილიც ამ გვარად გალეწეს (რუსებმა – ი.ა.); დარჩა მხოლოდ ცარიელი სალი კლდე. – მამა-ვაცხონე, ეს სულ საქართველოს სისხლის დაღადისია“³.

უახლოესი მეზობლების სისხლისღვრითა და წაკიდებით ყველაზე მეტად ჩვენი დიდი ჩრდილოელი მეზობელი იყო დაინტერესებული, რადგან იმპერიის შენარჩუნების მთავარი გეგმა სწორედ მცირე ერებს შორის დაპირისპირებასა და რუსეთის მომრიგებლის როლში ყოფნა წარმოადგენს და ამის გაგებას ორ ათეულ წელზე მეტი დასჭირდა.

უკანასკნელ ოცწლეულში განვითარებული მოვლენების, მოძმე ერებს (ქართველების, ოსების, აფხაზების) შორის „ჩატეხილი ხიდის“, ურთიერთდაპირისპირებისა და შუღლის გამო, ერთმანეთის შესახებ მხარეები მხოლოდ ნეგატიური ინფორმაციის მოგროვებას და გამოქვეყნებას ცდილობდნენ, ხოლო ჩვენი დანარჩენი ჩრდილო მეზობლები (დაღესტნელები, ყაბარდოელები, ჩერქეზები, ჩეჩნები) ამ პროცესებში რატომღაც განზე იდგნენ და სანამ საქმე შეიარაღებულ დაპირისპირებამდე არ მივიდა, არ ჩაერივნენ. როგორც ითქვა, ეს

¹ გიორგი ანნაბაძე. თანამედროვე საქართველოსთვის ჩრდილოკავკასიური ფაქტორის ჩამოყალიბების ისტორიული წინაპირობები (2008 წლამდე). – კრებ.: „ჩრდილო კავკასია და საქართველო“, ნაწ. I, თბ., 2012, გვ. 6.

² ხელნაწერთა ეროვნული ცენტრი, დიმიტრი მეღვინეთხუცესიშვილის პირადი საარქივო ფონდი № 30; QD-986; საბუთი 18.

³ გრიგოლ ორბელიანი. წერილები, ტ. I, აკაკი გაწერელიას რედ. თბ., 1936, დოკ. №123, გვ. 183.

ყველაფერი ყველაზე მეტად იმპერიის წისკვილზე ასხამდა წყალს. საბოლოოდ ისე გამოვიდა, რომ ამ კინკლაობასა და ცილისწამებაში ქართველებიც, აფხაზებიც, ოსებიც და მთლიანობაში ჩრდილო-კავკასიელებიც წაგებულნი დარჩნენ. ორივე მხარეს გაიზარდა თაობა, რომელსაც მხოლოდ უარყოფითი წარმოდგენა, მეტიც, მტრული დამოკიდებულება ჰქონდა ახლო მეზობლების შესახებ. რჩებოდა შთაბეჭდილება, რომ ემოციურ და „ცხელ“ კავკასიაში მშვიდობის დამყარება მხოლოდ რუსეთის ძლიერ ხელს შეეძლო.

დღეს, როდესაც აქტიურად განიხილება კავკასიის ერთიანობის იდეა, ზემოხსენებული მოვლენები („ოსიანობა“, „ლეკიანობა“ და სხვა) თავიდან არის გადასახედი და შესაფასებელი გასაგები მიზეზების გამო, კავკასიის დაპყრობის რუსეთიდან „შემოთავაზებული“ „ნაკლები ბოროტების“ იდეა სამუდამოდ წარსულს უნდა ჩაბარდეს. ნიშანდობლივია, რომ იგივე ლეკები დაუნდობლად ებრძოდნენ ქართლში „ოსმალობისას“ ოსმალებს, „ყიზილბაშობის“ დროს – ყიზილბაშებს, ხოლო 1801 წლიდან რუსებს, ქვეყნის დამოუკიდებლობისათვის მებრძოლ ალექსანდრე, იულონ, ფარნაოზ ბატონიშვილებთან და სოლომონ II-სთან ერთად, რითაც ერთგვარად არყევდნენ მათ ბატონობას აღმოსავლეთ საქართველოში ამდენად, „ლეკიანობა“ ქართველების წინააღმდეგ მიმართულ კერძო მოვლენად არ უნდა განვიხილოთ.

სწორედ ამიტომ, გარდა წინამდებარე ნაშრომისა, „ლეკიანობის“ პროცესის შეფასების საკითხს ჩვენ კიდევ არაერთგან შეგვხვთ.¹

¹ იხ: ჩვენი პუბლიკაციები: **იოსებ ალიმბარაშვილი**. ლეკიანობა აღმოსავლეთ საქართველოში, თბ., 2011; **სოსო ალიმბარაშვილი**. ომარ-ხანის თავდასხმები საქართველოზე, თბ., 2007; **სოსო ალიმბარაშვილი**. აღმოსავლეთ საქართველოს თავდაცვითი სისტემა XVIII საუკუნის II ნახევარში, თბ., 2008; **იოსებ ალიმბარაშვილი**. კაკაბეთთან (ნიახურას) ბრძოლის შეფასების საკითხისათვის. – *ახალი ტრენდები განათლებაში: კვლევა და განვითარება*. – გორის სასწავლო უნივერსიტეტის IV საერთაშორისო კონფერენცია. თბ., 2011, გვ. 398-402; **იოსებ ალიმბარაშვილი**. ქართლ-კახეთის ურთიერთობა ოსმალეთთან XVIII ს-ის 70-იან წლებში და რუსეთი. – *გორის სასწავლო უნივერსიტეტისა და შავი ზღვის საერთაშორისო უნივერსიტეტის პროფესორ-მასწავლებელთა ერთობლივი სამეცნიერო კონფერენციის მასალები*, 30.03.2012. გვ. 11-13; **იოსებ ალიმბარაშვილი**. ზედაველას ბრძოლები. – *განთიადი* № 5-6. ქუთაისი, 2008, გვ. 153-162; **იოსებ ალიმბარაშვილი**. ქართული ჯარის ისტორიიდან (შიდა ქართლის სამღვეროები). – *გორის სასწავლო უნივერსიტეტის ისტორიისა და არქეოლოგიის ცენტრის შრომათა კრებული*, № 3. თბ., 2012, გვ. 7-17; **იოსებ ალიმბარაშვილი**. შამილის „ნიზამი“ და დავით ბატონიშვილის „სამართალი“. – *ისტორიული რეპრეზენტაცია: თეორიული მიმართულებები და კონკრეტული კვლევები*. აკადემიკოს **მარიამ ლორთქიფანიძის** დაბადებიდან 90-ე წლისთავისადმი მიძღვნილი საერთაშორისო კონფერენცია. 16-17 ნოემბერი, 2012, თბილისი თეზისები, გვ. 29-31; **იოსებ ალიმბარაშვილი**. ქართული ეკლესიის როლი ქვეყნის თავდაცვაში. – *კათალიკოს-პატრიარქ კირიონ II-ისადმი მიძღვნილი IV სამეცნიერო კონფერენცია*. გორი, 04.02. 2012; **იოსებ ალიმბარაშვილი**. რამდენიმე საარქივო დოკუმენტი ქართლ-კახეთში კრწანისის ბრძოლის შემდეგ შექმნილი ვითარების შესახებ. – *გორის სახელმწიფო სასწავლო უნივერსიტეტის პროფესორ-მასწავლებელთა სამეცნიერო კონფერენცია*, გორი 11.07.2012; **И. Алимбарашвили**. Кровавая месть горцев на Се-

ქართველ ხალხს მტერთან ბრძოლის დიდი გამოცდილება ჰქონდა, მაგრამ „ლეკიანობა“ თავისი ბუნებით, ხასიათითა და შინაარსით ყველასაგან გამორჩეული და ტრაგიკული იყო.

არაბებმა საქართველოში 300 წელი იბატონეს, მაგრამ მათი ბატონობის უღელს, ძირითადად ბარის მოსახლეობა გრძნობდა. „დიდი თურქობა“ უმძიმესი იყო, თუმცა, მხოლოდ რამდენიმე წელიწადს გაგრძელდა, შემდეგ კი ქვეყანას დიდი დავით აღმაშენებელი მოეველინა, რომელმაც დაუღალავი ენერგიითა და ღონისძიებებით არა თუ შეძლო „ნადიდთურქალ“ საქართველოში მათი შედეგების ლიკვიდაცია, არამედ ქვეყანა აღმავლობის გზაზე დააყენა. მონღოლთა ასწლიან ბატონობას გიორგი ბრწყინვალემ მოულო ბოლო და ივერია ხელახლა გააბრწყინა.

წარმოუდგენელი ზიანი მიადგა საქართველოს თემურ-ლენგის შემოსევების შედეგად, მაგრამ ისიც ინტერვალებით 17 წელიწადს გაგრძელდა, რის შემდეგ ალექსანდრე დიდმა პოლიტიკური, ეკონომიკური და დემოგრაფიული ღონისძიებებით ნაწილობრივ მაინც შეძლო ქვეყანა ჩიხიდან გამოიყვანა.

ქართველი მეფეები ასევე მეტ-ნაკლები წარმატებებით ახერხებდნენ „ოსმალთა-ყიზილბაშობის“ შედეგების ლიკვიდაციას. სულ სხვა იყო ქვეყნისათვის „ლეკიანობა“. „მონღოლობის“ მსგავსად, ისიც ქრონოლოგიურად დაახლ. 100 წელს გაგრძელდა, მაგრამ თუ არაბები, მონღოლები, ოსმალები და ყიზილბაშები საქართველოს დაპყრობისას იძულებულნი ხდებოდნენ მოსახლეობის გადასახადების გადამხდელუნარიანობაც გაეთვალისწინებინათ, „ლეკიანობა“, თავისი მტაცებლური ბუნებით, მწიფე თავთავს შესეულ უამრავ „მკალს“ შეიძლება შევადაროთ, რომელმაც მთლიანობაში გამოფიტა და სისხლისგან დაცალა ქვეყანა.

მათი შემოსევების ინტენსივობა იმდენად მაღალი იყო, რომ ლეკთა ერთ რაზმს გამოდევნებული ქართველები გზაში მარბიელთა სხვადასხვა რაზმებს აწყდებოდნენ. მომხვდურთათვის არ არსებობდა გამოუყენებელი ნივთი, საგანი და საქონელი, თუნდაც უმნიშვნელო ფასეულობის. ისინი თანაბარი ხალისით იტაცებდნენ ბავშვს, ქალს, მამაკაცს, პირუტყვს... აკადემიკოსი ნიკო ბერძენიშვილი დაღესტნელების თარეშთან დაკავშირებით წერდა: „ქართლ-კახეთში არ დარჩენილა არც ერთი სოფელი, არც ერთი კუთხე, რომ ლეკებს არ აეოხრე-

верном Кавказе. – *კავკასიის არქეოლოგია, ეთნოლოგია, ფოლკლორისტიკა*. საერთაშორისო სამეცნიერო კონფერენციის მასალები. ქ. ახალციხე, 26-30.07.2012.

ბინათ. ერთი მეორის სარბევად ლეკები მოჰყავდათ ქართველ ფეოდალებს, აჯანყებულ ქართველთა დასასჯელად ლეკები მოჰყავდათ ოსმალებს; დაბოლოს, უპატრონოდ ქცეულ ქვეყანაში ლეკები დაუპატიუებლადაც მოდიოდნენ, თავს ესხმოდნენ მხარეებს, სოფლებს და თან მიჰყავდათ და მიჰქონდათ ყველაფერი, რასაც კი მოიხელთებდნენ“.¹

ქართველი კაცი ყველა ჩრდილო-კავკასიელ მომხდურს „ლეკს“ უწოდებდა, მაგრამ სინამდვილეში ისინი განვითარების არაერთგვაროვან საფეხურზე მყოფ სხვადასხვა ტომებს (ლეკები, ლაკები, ავარიელები, წახურელები, დარგოელები, ყაიტაგელები, დიდოელები და სხვ.) წარმოადგენდნენ, რომლებსაც მხოლოდ მიზანი – სხვისი ქვეყნის (ამ შემთხვევაში ქართლ-კახეთის) ძარცვარბევა და ნადავლი აერთიანებდათ. ზემოაღნიშნულ მიზეზთა გამო, XVIII – XIX ს. I მესამედის საქართველოს ისტორიის ქართველ თუ უცხოელ მეკლევარსა და მოგზაურთაგან არ დარჩენილა ვინმე, რომ ამ თემას მეტ-ნაკლებად არ შეხებოდა, ხოლო საქართველოში ყოფნისას მისი სუსხი საკუთარ თავზე არ ეგრძნო.

ნაშრომი ეყრდნობა გამოქვეყნებულსა და გამოუქვეყნებელ დოკუმენტებსა და სხვა სახის წყაროებს, ქართველი მეფეების, ბატონიშვილების, ქართული, რუსული და ირან-ოსმალური დიპლომატიური კორპუსის მიმოწერას, XIX ს. ქართულ და რუსულ პრესაში დაბეჭდილ წერილებსა და სტატიებს.

ლეკიანობის შესახებ ძალზე მდიდარი დოკუმენტური და ნარატიული მასალებია თავმოყრილი საქართველოს ეროვნულ საისტორიო არქივში, ხელნაწერთა ეროვნულ ცენტრში, სხვადასხვა ქალაქების ისტორიულ-ეთნოგრაფიულ მუზეუმებში, კავკასიის არქეოგრაფიული კომისიის მიერ გამოცემულ „აქტებში“ (*„Акты Собранные Кавказскою Археографическою Коммисиею“*; т. I-XII).

როდესაც „ლეკიანობის“ საკითხს ვხვებით, გვერდს ვერ ავუვლით XVIII და XIX ს. I მესამედში საქართველოში მყოფ რუს და ევროპელ მოგზაურთა და ოფიციალურ პირთა: იოჰან გიულდენშტედტის, ედუარდ აიხვალდის, იაკობ რაინგის, დე გრაი დე ფუას, ბურნაშოვის, იაზიკოვის ცნობებს და ჩანაწერებს.

იოჰან გიულდენშტედტი გარკვეული დროის განმავლობაში (1772 წ. დასაწყისში) ლეკიანობის „ცხელ წერტილში“ – ახალგორში ცხოვრობდა და ვით ქსნის ერისთავთან და იძულებული იყო, უსაფრთხო გადაადგილებისათვის

¹ ნიკოლოზ ბერძენიშვილი. XVIII ს. საქართველოს ისტორიიდან. – *საქართველოს ისტორიის საკითხები*, ტ. II. თბ., 1965, გვ. 154.

მისთვის 50, 100 და მეტი კაციისაგან შემდგარი რაზმები ეთხოვა. იგი ამის მიზეზსაც განმარტავს: „სწორედ ლეკები იყვნენ, რომელთა გამოც საქართველოში მოგზაურობისას მე ასეთი ძლიერი დაცვა მჭირდებოდა და მათ ზოგი ექსკურსია ჩამიშალეს კიდევცო“.¹ თავის ნაშრომში გერმანელი მეცნიერი არაერთგან მიუთითებს ქართლში ლეკიანობით გამოწვეულ მძიმე შედეგებზე.²

გიულდენშტედტის მოგზაურობიდან 50 წლის შემდეგ ასევე ძლიერი დაცვის თანხლებით გადაადგილდებოდა ედუარდ აიხვალდიც. ლეკიანობით შექმნილ ვითარებაზე ასევე ხშირად საუბრობენ იაკობ რაინფესი და ედუარდ აიხვალდი, თუმცა ამ მოვლენის გამომწვევ მიზეზებს ისინი მარტივად ხსნიან. ისიც უნდა ითქვას, რომ ორივე მათგანი საკითხის შეფასებისას, ძირითადად რუს ავტორთა ცნობებს (იაზიკოვი, ბურნაშოვი, ბუტკოვი და სხვ.) ეყრდნობა.³

ფრანგი დიპლომატი დე გრაი დე ფუა XVIII ს. 70-იანი წლების დასაწყისში იმყოფებოდა საქართველოში და ერთი პერიოდი ტოტლებენის ადიუტანტი იყო. იგი თავის მემუარებში რუსეთ-თურქეთის 1768-74 წლების ომის დროს საქართველოში განვითარებულ მოვლენებს აღწერს და მათ შორის ლეკიანობის საკითხსაც ეხება.⁴

რუსი ავტორებდან ქართლ-კახეთსა და დაღესტნელებს (შამხალს) შორის თავდაპირველ ურთიერთობებზე ცნობებს გვაწვდიან ს. ბელოკუროვი და მ. პოლიევქტოვი⁵. იაზიკოვი⁶ და ბურნაშოვი⁷ აღწერილი მოვლენების თანამედროვენი იყვნენ, რაც მათ აღწერილობას დამაჯერებლობას მატებს. მომდევნო პერიოდის და შედარებით გვიანდელი ხანის რუს ავტორთაგან საქართველოში „ლეკიანობის“ პროცესზე გარკვეულ ინფორმაციას გვაწვდიან პ. ბუტკოვის,⁸ ნ.

¹ გიულდენშტედტის მოგზაურობა საქართველოში. ტ. II. გერმანული ტექსტი ქართული თარგმანითურთ გამოსცა და გამოკვლევა დაურთო *გია გელაშვილმა*. თბ., 1966. გვ. 81.

² გიულდენშტედტის მოგზაურობა საქართველოში. ტ. I. თბ., 1962. გვ. 3; 13; 47; 53; ტ. II. გვ. 155 და სხვ.

³ **იაკობ რაინფესი**. მოგზაურობა საქართველოში. გერმანულიდან თარგმნა, შესავალი და საძიებლები დაურთო *გია გელაშვილმა*. თბ., 2002, გვ. 14, 19, 27, 67, 126, 168; *ედუარდ აიხვალდი საქართველოს შესახებ*. (XIX ს. პირველი მეოთხედი) გერმანულიდან თარგმნა, შენიშვნები და საძიებლები დაურთო *გია გელაშვილმა*. თბ., 2005. გვ. 18, 258-259, 301.

⁴ ის: *დე გრაი დე ფუა საქართველოს შესახებ*. ფრანგულიდან თარგმნა, შესავალი, შენიშვნები და საძიებლები დაურთო *ჯუმბერ ოდიშელმა*. თბ., 1985.

⁵ **С. Белокуров**. Сношения России с Кавказом в 1578-1613 г, вып. I; **М. Полиевктов**. Материалы по истории Грузино-Русских взаимоотношения 1614-1640 г. Тб., 1937.

⁶ **А. Цагарели**. Грамоты и др. исторические документы относящиеся по Грузии, т. I. СПб., 1891.

⁷ **С. Бурнашев**. Картина Грузии или описание политического состояния царств Карталинского и Кахетинского. Тифл., 1896.

⁸ **П. Бутков**. Материалы для новой истории Кавказа с 1722 по 1803 г. ч. I; ч. II, СПб., 1869.

დუბროვინის,¹ ს. ბრონევსკის,² ნ. სმირნოვის,³ ვ. პოტოს,⁴ ო. მარკოვას⁵ შრომე-
მები. უნდა ითქვას, რომ შეფასება-დასკვნების გაკეთებისას მათი მხრიდან
ტენდენციურობა იშვიათი არ არის. ლეკიანობის პრობლემას მათი უმრავლე-
სობა შედარებით ობიექტურად აფასებდა 1801 წლის მოვლენების შემდეგ, რო-
დესაც აღნიშნული საკითხი საქართველოში უშუალოდ საიმპერატორო კარის
მოსაგვარებელი გახდა.

ევროპელ და რუს ავტორთა გარდა, საქართველო-ჩრდილო-კავკასიისა და
ირან-ოსმალეთის ურთიერთობის შესახებ ჩვენთვის საინტერესო პერიოდში სა-
ყურადღებო ცნობები აქვთ თურქ ავტორებს: გურჯი ზადეს, ქუჩუკ ჩელები ზა-
დესა და აჰმედ ჯევედეთ ფაშას. პირველი ორი მათგანი XVIII ს. 20-30-იანი
წლებში ქართლ-კახეთში განვითარებულ მოვლენებს ეხება,⁶ ხოლო ჯევედეთ
ფაშა ამავე საუკუნის 70-80-იან წლების მდგომარეობას ასახავს.⁷ ამასთან,
გურჯი ზადესა და ქუჩუკ ჩელები ზადეს თხრობის სტილი აღმოსავლური მა-
ღალფარდოვანებით გამოირჩევა და აღწერილი მოვლენებისას საკუთარი ქვეყ-
ნის მიმართ შეფასებებში გადაჭარბებულნი არიან, ჯევედეთ ფაშას მიერ მოტა-
ნილი ცნობები შედარებით ზუსტია, რაც მისი განათლებითა და სხვადასხვა
თანამდებობებზე ყოფნით უნდა აიხსნას (ჯევედეთ ფაშას სხვადასხვა დროს
ოსმალეთის განათლებისა და იუსტიციის პოსტები ეკავა, რაც საშუალებას
აძლევდა „პორტას“ უმაღლესი კარის კანცელარიის მასალებით ესარგებლა).

დადესტნისა და ჭარ-ბელაქანის სოციალ-პოლიტიკური და ეკონომიკური
ისტორიის განხილვის თვალსაზრისით მნიშვნელოვანი მასალაა გადმოცემული
„დადესტნის ისტორიაში“⁸ ჩრდილო-კავკასიელი, რუსი და ქართველი ავტორე-

¹ **Н. Дубровин.** История войны и владычества Русских на Кавказ. т. II, III, СПб., 1886.

² **С. Броневский.** Новейшие географические и исторические известия о Кавказе. ч. I. М., 1823.

³ **Н. Смирнов.** Политика России на Кавказе в XVI-XIX веках. М., 1958.

⁴ **В. Потто.** Кавказская война в отдельных очерках эпизодах легендах и биографиях. т. I, от древнейших времен до Ермолова. вып. I. СПб., 1885.

⁵ **О. Маркова.** Россия, Закавказье и международные отношения в XVIII веке. М., 1966.

⁶ **გურჯი ზადე.** თბილისის დაპყრობის წიგნი. თურქული ტექსტი ქართული თარგმანით, შესავ-
სავლითა და შენიშვნებით გამოსცა **ცისანა აბულაძემ** თბ., 1975; **ნოდარ შენგელია,** ოსმალთ
ისტორიკოსი ჩელები ზადე თბილისისა და გორის ციხეების დაპყრობის შესახებ. აკად. **სერგი
ჯიქიას** 70 წლისთავისადმი მიძღვნილი საიუბილეო კრებული. – *აღმოსავლური ფილოლოგია*,
ტ. III, თბ., 1973.

⁷ **Джевдет паша.** Описание события в Грузии и Черкасии по отношению к Оттоманской империи от 1192 года по 1202 год хиджри. (1775-1784). Перевод на русск. язык **М. А. Гамазова.** – *Русский Архив.* М., 1888, кн. I. #3.

⁸ *История Дагестана*, т. I. М., 1967.

ბის: ს. ხაშაევის,¹ ი. პეტრუშევსკის,² გ. ჩანგაშვილის,³ თ. პაპუაშვილის⁴ ნაშრომებში. „ლეკიანობის“ ბუნების შესასწავლად აუცილებელია თვით ჩრდილოკავკასიელი ტომების ეკონომიკურ-პოლიტიკური და დემოგრაფიული მდგომარეობის, მათი ყოფა-ცხოვრების, ტრადიციების გაცნობა, რის შესახებაც ძვირფასი მასალებია თავმოყრილი „კავკასიელ მთიელთა ნარკვევებში“⁵

ქართლ-კახეთში ლეკიანობის საკითხის განხილვისას ოსმალეთთან, ირანთან და რუსეთთან ურთიერთობას ვერ ავცდებით. ამ მხრივ ავტორების სიმცირეს ნამდვილად არ განვიცდით. აღსანიშნავია ა. ცაგარელის,⁶ მ. პოლიევქტოვის,⁷ იასე ლორთქიფანიძის,⁸ იასე ცინცაძის,⁹ გ. პაიჭაძის,¹⁰ ო. გიგინეიშვილის,¹¹ ნ. შენგელიას,¹² ს. შარაშენიძის,¹³ დ. ჯანელიძის¹⁴ შრომები.

ლეკიანობის საკითხის შესასწავლად ძვირფასი დოკუმენტებია თავმოყრული ისიდორე დოლიძის მიერ გამოცემულ „ქართული სამართლის ძეგლებში“ (ტ. I-VIII), თედო ჟორდანიას, ავთანდილ იოსელიანის, შოთა ლომსაძის „ქრონიკებში“¹⁵ ნიკო ბერძენიშვილის, ივანე ჯავახიშვილის, ექვთიმე თაყაიშვილის რედაქციით გამოქვეყნებულ სხვადასხვა მასალებში,¹⁶ ვალერიან მაჭარაძის,

¹ **Х. Хашаев**, Общественный строй Дагестана в XIX веке. М., 1961.

² **И. Петрушевский**. Джаро-белаканские вольные общества в первой трети XIX столетия. Тифл., 1934.

³ **გიორგი ჩანგაშვილი**. საინგილო. თბ., 1970.

⁴ **თენგიზ პაპუაშვილი**. ჭარ-ბელაქანი. თბ., 1972.

⁵ იხ: *Сборник сведений о кавказских горцах*. Т. I-IX; Тифл., 1868-1876.

⁶ **А. Цагарели**. Грамоты и др. исторические документы относящиеся по Грузии. т. I СПб., 1891; т. II, вып. I. Груз. тексты с 1768-1801 гг. СПб., 1898; т. II, вып. II, СПб., 1902.

⁷ **М. Полиевктов**, Материалы по истории Грузино-Русских взаимоотношения 1614-1640 г. Тб. 1937.

⁸ **იასე ლორთქიფანიძე**, მასალები საქართველოს ისტორიისათვის (მე-18 საუკ.). – *მასალები საქართველოსა და კავკასიის ისტორიისათვის (მსკი)*. ნაკვ. II. თბ., 1940.

⁹ **იასე ცინცაძე**. ორი საბუთი რუსეთ-საქართველოს ურთიერთობათა ისტორიიდან. – *ენიმე-ს მოამბე*. №V-VI, 1940; **იასე ცინცაძე**. აღა-მაჰმად ხანის თავდასხმა საქართველოზე (1795). თბ., 1969; **იასე ცინცაძე**. 1783 წლის მფარველობითი ტრაქტატი. – *მასალები რუსეთ-საქართველოს ურთიერთობათა ისტორიისათვის*. თბ., 1960.

¹⁰ **გიორგი პაიჭაძე**. რუსეთ-საქართველოს ურთიერთობის ისტორიისათვის (XVIII ს. I მეოთხედი). თბ., 1960.

¹¹ **ოთარ გიგინეიშვილი**. ნარკვევები ოსმალეთის ისტორიიდან. თბ., 1982.

¹² **ნოდარ შენგელია**. XV-XIX საუკუნეების საქართველოს ისტორიის ოსმალური წყაროები. თბ., 1974.

¹³ **ზურაბ შარაშენიძე**. ირანი XVIII საუკუნის მეორე ნახევარში. თბ., 1970.

¹⁴ **დავით ჯანელიძე**. საქართველო და აღმოსავლეთი XVIII ს. თბ., 1984.

¹⁵ იხ: *ქრონიკები და სხვა მასალა საქართველოს ისტორიისა და მწერლობისა*. შეკრებილი, ქრონოლოგიურად დაწყობილი და ახსნილი **თედო ჟორდანიას** მიერ. წიგნი III (1700 წლიდან XIX ს-ის 60 – იან წლებამდე). გამოსაცემად მოამზადეს **გივი ჟორდანიამ** და **შოთა ხანთაძემ**. თბ., 1967; *საქართველოს ისტორიის ქრონიკები XVI-XIX სს. ავთანდილ იოსელიანის რედ.* თბ., 1980; **შოთა ლომსაძე**. გვიანი შუა საუკუნეების საქართველოს ისტორიიდან. *ახალციხური ქრონიკები*. თბ., 1973

¹⁶ იხ: *დოკუმენტები საქართველოს სოციალური ისტორიიდან. (XV – XVIII სს.)*. **ნიკოლოზ ბერძენიშვილის** რედ., ტ. I თბ., 1940; ტ. II, თბ., 1953; **ივანე ჯავახიშვილი**. საქართველოს ეკო-

თეიმურაზ ბოცვაძის, დავით გვრიტიშვილის, მამია დუმბაძის, ავთანდილ კილასონიას, შოთა ლომსაძის, დარეჯან მეგრელაძის, იასე ცინცაძის, ვახტანგ გამრეკელის, სარგის კაკაბაძის შრომებში.¹

მნიშვნელოვან ფაქტობრივ მასალას გვაწვდიან საკითხის ირგვლივ XVIII საუკუნეში მოღვაწე ავტორები და ისტორიკოსები: ვახუშტი ბაგრატიონი, სეხნია ჩხეიძე, პაპუნა ორბელიანი, ომან ხერხეულიძე.² თეიმურაზ, იოანე, დავით, ბაგრატ, ვახტანგ ბატონიშვილები.³ გადმოცემული მასალის ობიექტურობის, სიზუსტისა და ანალიზის თვალსაზრისით ჩამოთვლილთაგან უპირატესობა ვახუშტი ბატონიშვილსა და პაპუნა ორბელიანს აქვთ.

ბუნებრივია, ქართველი ხალხი „ლეკიანობის“ მოვლენისადმი გულგრილი ვერ დარჩებოდა, ამიტომ მთელი XVIII საუკუნის განმავლობაში ქართველ მე-

ნომიკური ისტორიის ძეგლები (XIII-XIX ს.ს.). წიგნი II. თბ., 1974; *საქართველოს სიძველენი. ექვთიმე თაყაიშვილის* რედაქციით. ტ. I. ტფ., 1920; ტ. II, ტფ., 1909, ტ. III, ტფ., 1910.

¹ **ვალერიან მაჭარაძე.** მასალები XVIII საუკუნის მეორე ნახევრის რუსეთ-საქართველოს ურთიერთობის ისტორიისათვის. ნაწილი II. თეიმურაზ მეორის ელჩობა რუსეთში. თბ., 1968; ნაწილი III. რუსეთ-თურქეთის ომი 1768-1774 წლებში და საქართველო. თბ., 1988; **თეიმურაზ ბოცვაძე.** საქართველო-დაღესტანის ურთიერთობის ისტორიიდან (XV-XVIII ს.ს.) თბ., 1968; **თეიმურაზ ბოცვაძე.** საქართველო-ყაზახეთის ურთიერთობის ისტორიიდან (XVI-XVIII ს.ს.) თბ., 1968; **თეიმურაზ ბოცვაძე.** ჩრდილო კავკასიის ხალხები საქართველოს საგარეო პოლიტიკაში. XV-XVIII სს. თბ., 1990; **დავით გვრიტიშვილი.** ფეოდალური საქართველოს სოციალური ურთიერთობის ისტორიიდან (ქართლის სათავადოები). თბ., 1955; **დავით გვრიტიშვილი.** ნარკვევები საქართველოს ისტორიიდან, ტ. II, ტ. III. თბ., 1968; **მამია დუმბაძე.** აღმოსავლეთ კახეთის (საინგილოს) ისტორიიდან (XIX ს. რეფორმამდელი პერიოდი). თბ., 1953; **ავთანდილ კილასონია.** აღმნიანებით ვაჭრობა საქართველო-კავკასიაში XVI-XVIII საუკუნეებში. თბ., 2006; **შოთა ლომსაძე.** სამცხე-ჯავახეთი. (XVIII საუკუნის შუაწლებიდან XIX საუკუნის შუა წლებამდე). თბ., 1975; **დარეჯან მეგრელაძე.** დაღესტან-საქართველოს ურთიერთობის ისტორიიდან. – *მაცნე.* საქართველოს მეცნიერებათა აკადემიის საზოგადოებრივ მეცნიერებათა განყოფილების ორგანო, ისტორიის სერია. № 6. თბ., 1967. **დარეჯან მეგრელაძე.** მასალები XVIII ს-ოციანი წლების ქართლ-კახეთის ისტორიისათვის. – *მასალები საქართველოსა და კავკასიის ისტორიისათვის*, ნაკვ. 33. თბ., 1960; **იასე ცინცაძე.** კაპიტან ოთარ თუმანოვის მოსხენებითი ბარათები. – *თბილისის სახელმწიფო უნივერსიტეტის შრომები.* ტ. XXVII. თბ., 1946; **В. Гамрекели,** Вопросы взаимоотношения Восточной Грузии с Северным Кавказом в XVIII веке. Автореферат докт. диссертации. Тб., 1972; **სარგის კაკაბაძე.** კრწანისის ომი. თბ., 1991

² **ბატონიშვილი ვახუშტი.** აღწერა სამეფოსა საქართველოსა. – *ქართლის ცხოვრება* IV. ტექსტი დადგენილი ყველა ძირითადი ხელნაწერის მიხედვით **ს. ყაუხჩიშვილის** მიერ. თბ., 1973; **სეხნია ჩხეიძე.** საქართველოს ცხოვრება. **ზაქარია ჭიჭინაძის** გამოცემა. ტფ., 1913; **პაპუნა ორბელიანი.** ამბავნი ქართლისანი. ტექსტი დაადგინა, შესავალი, ლექსიკონები და საძიებლები დაურთო **ელენე ცაგარეიშვილმა.** თბ., 1981; **ომან ხერხეულიძე.** მეფობა ირაკლი მეორისა. ტექსტი გამოსაცემად მოამზადა, გამოკვლევა, ლექსიკონი და საძიებელი დაურთო **ლელა მიქიაშვილმა.** თბ., 1989.

³ **თეიმურაზ ბაგრატიონი.** ახალი ისტორია. ტექსტი გამოსაცემად მოამზადა, გამოკვლევა და საძიებლები დაურთო **ლელა მიქიაშვილმა.** თბ., 1983; **იოანე ბაგრატიონი.** ქართლ-კახეთის აღწერა. ტექსტი გამოსაცემად მოამზადეს, გამოკვლევა და საძიებლები დაურთეს **თინა ენუქიძემ** და **გურამ ბედოშვილმა.** თბ., 1986; **დავით ბატონიშვილი.** ახალი ისტორია. **თამარ ლომოურის** გამოცემა. თბ., 1941; **დავით ბატონიშვილი.** მასალები საქართველოს ისტორიისათვის (1744-1840 წწ.). ტფ., 1906; **ბაგრატ ბატონიშვილი.** ახალი მოთხრობა. **თამარ ლომოურის** გამოცემა. თბ., 1941; **ისტორიებრივი აღწერა ...თხზული საქართველოს მეფის ირაკლის ძის ვახტანგის მიერ.** **ს. კაკაბაძის** გამოცემა. ტფ., 1914.

ფეთა (ვახტანგ VI, თეიმურაზ II, ერეკლე II, გიორგი XII) თავდაცვის სფეროში გატარებულ ღონისძიებათაგან უმრავლესობა სწორედ ლეკთა თავდასხმების წინააღმდეგ იყო მიმართული. თუ XVIII საუკუნემდე ქართველი კაცი ციხე-კოშკებს მიუვალ ხეობებში აგებდა, რათა მტრისათვის შეუმჩნეველი და მიუდგომელი ყოფილიყო, აღნიშნული პერიოდისათვის თავდაცვითი ნაგებობების მშენებლობა უშუალოდ დასახლებულ პუნქტებსა და თითოეულ ქალაქ-სოფელში გახდა აუცილებელი, რამდენადაც „ლეკიანობისაგან“ არც ერთი მათგანი დაზღვეული არ იყო და მოსახლეობას სწრაფად დახიზვნა უნდა მოესწრო.

ქართული საფორტიფიკაციო საქმის შესწავლაში უდიდესი წვლილი შეიტანეს პ. ზაქარაიამ¹, ვ. ბერიძემ², შ. მესხიამ³, ა. გაბიჩვაძემ⁴, ს. მაკალათიამ⁵, ი. მეგრელიძემ⁶, ს. ბეზსონოვმა⁷ და ა. შ. ასევე დიდძალი მასალაა თავმოყრილი „საქართველოს ისტორიის ნარკვევებში“, „საქართველოს ისტორიისა და კულტურის ძეგლთა აღწერილობის“ V და II ტომებში⁸, ცირა დადიანის რედაქციით რედაქციით გამოცემულ კრებულებში: „შიდა ქართლი“ (ტ. I, II, III, IV) და სხვ. „ლეკიანობის“ შესახებ მუდმივად აქვეყნებდა მასალებს XIX საუკუნის ქართული და ადგილობრივი რუსული პრესა („დროება“, „ივერია“, „ცნობის ფურცელი“, „Kavkaz“ და სხვ.).

„ლეკიანობა“ იმდენად მნიშვნელოვან მოვლენას წარმოადგენდა XVIII ს. ქართლ-კახეთის ისტორიაში, რომ მომხდურების წინააღმდეგ მებრძოლი გმირების შესახებ უამრავი ლექსი და თქმულება შეიქმნა,⁹ მოსახლეობის აღ-

¹ პარმენ ზაქარაია. ქართული ციხე-ქალაქები, ციხე-სიმაგრეები, ციხე-დარბაზები, ციხე-გალავნები, კოშკები. თბ., 2004; პარმენ ზაქარაია. საქართველოს ძველი ციხე-სიმაგრეები. თბ., 1988.

² ვახტანგ ბერიძე. ძველი ქართული ხუროთმოძღვრება. თბ., 1974; ვახტანგ ბერიძე. XVI-XVIII საუკუნეების ქართული ხუროთმოძღვრება, ტ. I. თბ., 1983.

³ შოთა მესხია. საისტორიო ძიებანი, ტ. II. თბ., 1983, ტ. III. თბ., 1986.

⁴ ა. გაბიჩვაძე. გორის ციხე ერეკლე II-ს დროს. – საისტორიო მოამბე. I. თბ., 1945.

⁵ სერგი მაკალათია. ლეხურის ხეობა, თბ., 1964; სერგი მაკალათია. ძამის ხეობა. თბ., 1961; სერგი მაკალათია. ფრონეს ხეობა. თბ., 1963; სერგი მაკალათია. ქსნის ხეობა, თბ., 1963; სერგი მაკალათია. ტანას ხეობა, თბ., 1963; სერგი მაკალათია. თუშეთი, თბ., 1983; სერგი მაკალათია. ფშავი. თბ., 1983; სერგი მაკალათია. ხევსურეთი. თბ., 1984; სერგი მაკალათია. მესხეთ-ჯავახეთი. თბ., 1938.

⁶ იოსებ მეგრელიძე. სიძველეები ლიახვის ხეობაში, ტ. I. თბ., 1984; ტ. II, თბ., 1997.

⁷ С. В. Безсонов. Крепостные сооружения в бассейне большой Лиахви. – Известия Юго-Осетинского научно-исследовательского института краеведения, кн. III. Цхинвали, 1933.

⁸ საქართველოს ისტორიისა და კულტურის ძეგლთა აღწერილობა. ტ. V. თბ., 1990; ტ. II. თბ., 2004.

⁹ იხ.: გახეთი „დროება“, 06.06 1875. №63; 22. 08. 1878. №169; 07. 06. 1879. № 118; 08. 06. 1879. № 119; გაზ. „ივერია“, 30. 11. 1890. №255; ქართული ხალხური პოეზია. საგმირო ლექსები. ტ. II. ნაკვ. I. თბ., 1974. გვ.128; 232-233; 502-503; ქართული ხალხური საუნჯე. ტ. I. თბ., 1991. გვ. 59; 256-257; ბაგრატ ბატონიშვილი. ახალი მოთხრობა, გვ. 50; ალექსანდრე ჯამბაკურ-ორბელიანი. დაღესტნიდან ლეკების გამოსვლა და სხვა ამბები, გამოცემული სარგის კაკაბაძის მიერ,

ფრთოვანებას იწვევდა „ლეკების სულთამსუთავის“ – გიორგი თელისძის, პაატა თემურიშვილის, გოგია ხამხაძის, თამრო ვაშლოვანელის, თინა წავკისელის, მაია წყნეთელის ლეკებთან ბრძოლის პირადი მაგალითები, ამასთან, კონკრეტული ავტორები თუ ხალხის წიადიდან წამოსული თქმულებები და ლექსები საყვარელ გმირებს ხშირად დაუჯერებელ და წარმოუდგენელ ამბებსაც მიაწერდნენ,¹ მაგრამ ასევე აფასებდნენ დაღესტნელთა საბრძოლო თვისებებს, როგორც ღირსეულ მოწინააღმდეგეებს, რამაც ქართულ ფოლკლორშიც სათანადო სახვა ჰპოვა.²

ცალკე აღნიშვნის ღირსია ერეკლე II-ის როლი ამ საქმეში. შეიძლება ითქვას, რომ მას მთელი სიცოცხლის განმავლობაში ხმალი ქარქაშში არ ჩაუგია და ხანგრძლივი ცხოვრების უდიდესი ნაწილი სწორედ ლეკების წინააღმდეგ ბრძოლას შეაღია. ამ ფაქტს ერთნაირად აღნიშნავდა ქვეყნის მტერ-მოყვარე მეფის მემკვიდრე ომან ხერხეულიძე წერს: „ხოლო ესევეთარნი გამარჯვებანი ირაკლი მეფისაგან უანგარიშონი არიან და ამაღ ყოველნივე ვერ მოვიხსენიეთ, არამედ ისინი აღვრიცხეთ, რ(ომელ)ი ღირსად ხსოვნისა იყო და სხვანი მრავალნი წვრილნი გამარჯვებები დავიდუმეთ“.³ იმდროინდელი ევროპული პრესა ერეკლეს „აღმოსავლეთის დიდ გმირად“ და „მამაც ვაჟკაცად“ მოიხსენიებდა.⁴ პოლკოვნიკი ბურნაშოვი ერეკლეს „განსაცვიფრებლად საქმიანს“ უწოდებს, რომელსაც „დღე და ღამ არ ეძინა“.⁵ ვ. პოტოს შეფასებით, როგორც მეომარი, ერეკლე – „ჭეშმარიტად რაინდი, სახალხო მეფე და სწორუპოვარი მეომარი“;⁶ ხოლო ფრანგი პეისონელის მიხედვით: „ნამდვილი მეფე იყო თავის სასახლეში და სარდალი თავის ჯარში“.⁷ თვით ოსმალეთის სულთანი თავის ქვეშევრდო-

ტფ., 1914, გვ. 20-21; **ქსენია სინარულიძე**. ქართული ხალხური საისტორიო სიტყვიერება. II. თბ., 1964 და ა.შ.

¹ ცნობილი ქართველი პოეტი ბესარიონ გაბაშვილი ლექსში: „რა მიირეწა სოფელმან“, ვინმე აქალოს შვიდკაციანი რაზმით ავლაბართან შეიდასი ლეკის დამარცხებას მიაწერს (*იხ*: ბესიკი. თხზულებანი. ტექსტი, შენიშვნები, ლექსიკონი *აღუქსანდრე ბარამიძისა და ვარლამ თოფურისა* რედ. თბ., 1962, გვ. 79-80); გაზ. „*დროების*“ მიხედვით, მცხეთელი გოგია ხამხაძე დართისკართან მარტოღმარტო ამარცხებს მაჰმადა ბელადს, თავის 9 ვაჟთან ერთად (*დროება*, 06.06. 1875. №63) და ა. შ.

² **გიორგი ანჩაბაძე**. საქართველოს სამხედრო ისტორიის საკითხები (1921 წლამდე), თბ., 2010, გვ. 185.

³ **ომან ხერხეულიძე**. მეფობა ირაკლი მეორისა, გვ. 67.

⁴ **ილია ტაბაღუა**. საქართველო საერთაშორისო არენაზე XVIII ს. II ნახევარში (ერეკლე II-ის საგარეო პოლიტიკის ისტორიიდან). თბ., 1979, გვ. 58-59.

⁵ **С. Бурнашев**. Картина Грузии..., გვ. 10.

⁶ **В. Потто**. Кавказская война..., т. I, вып. I. გვ. 258.

⁷ *მოთხრობა ახლანდელს არეულობაზე სპარსეთსა და საქართველოში – პეისონელისა*. თარგმანი **სიმონ დოლობერიძისა**. – *მოამბე*. №X. ტფ., 1905, გვ. 10.

მებს აფროთხილებდა: „ხელი არ ეხლოთ ხარისათვის, რომელიც წევს (იგულისხმება ერეკლე II – ი.ა.) და არ ეიძულებინათ წამომდგარიყო“¹ და ა. შ.

მოძიებული საარქივო მასალების, ნარატიული და დოკუმენტური წყაროების, წერილებისა და არსებული ლიტერატურის საფუძველზე წინამდებარე ნაშრომში გაშუქებულია აღმოსავლეთ საქართველოში ლეკთა გამუდმებული შემოსევების შედეგად შექმნილი სოციალ-ეკონომიკური და პოლიტიკურ-დემოგრაფიული ვითარება XVIII საუკუნესა და XIX ს. I მესამედში, ქართლ-კახეთის ბრძოლა დაღესტნელი მოძალადეების წინააღმდეგ, ლეკიანობით გამოწვეული შედეგები და ლეკიანობის წინააღმდეგ გატარებული სამხედრო-თავდაცვითი ღონისძიებები. შეგნებულად შევიტანეთ საუკუნეზე მეტი ხნის განმავლობაში მიმდინარე „ლეკიანობის“ პროცესი ქრონიკების სახით, რათა მკითხველს უკეთ გაეცნობიერებინა, რას წარმოადგენდა ეს მოვლენა აღმოსავლეთ საქართველოსათვის.

ჩვენი კვლევის ობიექტს მხოლოდ ქართლ-კახეთი წარმოადგენდა, მაგრამ აღნიშნულ პერიოდში საქართველოს სხვა კუთხეებში განვითარებულ პროცესებსაც შევეხეთ, რამდენადაც „ლეკიანობა“ მეტ-ნაკლებად საქართველოს ყველა მხარეს შეეხო.

მიუხედავად ზემოთ ჩამოთვლილი წყაროებისა და ლიტერატურის სიმრავლისა, „ლეკიანობის“ პრობლემის შეფასებისას საბჭოთა პერიოდის ავტორთა დიდი უმრავლესობა იძულებული იყო რუსული ფაქტორი გაეთვალისწინებინა, რაც მთელი რიგი ობიექტური მიზეზების სხვაგვარად წარმოჩენის მიზეზი ხდებოდა. დღეისათვის იძულების ეს ფაქტორი აღარ არსებობს, ამიტომაც ვფიქრობთ, რომ საკითხი მთელ რიგ ასპექტებში თავიდანაა შესაფასებელი.

ჩვენ შევეცადეთ კვლევისას შეგვესწავლა, სამზეოზე გამოგვეტანა და წარმოგვედგინა ამ რთული და საქართველოსათვის ტრაგიკული მოვლენის საკუთარი ხედვა. გაგვეანალიზებინა და შეგვეფასებინა ის საკითხები, რომლებიც ამ პრობლემის გადაჭრას უშლიდა ხელს.

¹ Н. Смирнов. Политика России на Кавказе в XVI-XIX веках, გვ.130.

თავი I. „ლეკიანობის“ არსი, ბუნება და ექსპანსიის მიზეზები

1. ლეკიანობის არსი და ბუნება

„ლეკიანობა“ იზოლირებული მოვლენა არ ყოფილა¹ და მისი მიზეზები მთიანი დაღესტნისათვის დამახასიათებელი საშინაო და საგარეო პროცესების ერთობლიობაში უნდა განვიხილოთ.

XVII-XVIII საუკუნეებისათვის ჩრდილო-აღმოსავლეთ კავკასიის მოსახლეობა, ძირითადად, ორი ტიპის საზოგადოებად იყოფოდა. პირველი ერთიანდებოდა სასოფლო-სათემო კავშირებში. ასეთები ჩვენს მეზობლად იყვნენ: ჭარის, თალის, ბელაქანის, მუხახის, ჯინიხის, კარადულაკის, ბაშ-სუვაგალის, წახურის საზოგადოებები.² მათ შორის, ძალითა და გავლენით გამოირჩეოდა ჭარის საზოგადოება. ისინი ადრევე გადალიზმის ხანაში იყვნენ და მმართველობის საზოგადოებრივი ფორმებით გამოირჩეოდნენ. ჭარსა და დაღესტანში სასოფლო თემების – „ჯამათის“ არჩევნები ყოველწლიურად ტარდებოდა. იგი ცნობილი გვარების წარმომადგენელთაგან კომპლექტდებოდა და თანდათანობით მემკვიდრეობით ფორმას იძენდა,³ მაგრამ, იერარქიის მიუხედავად, ხალხის ინტერესები დაცული იყო, მაგ. საქართველოში მოღვაწე მინისტრ-რეზიდენტ ბურნაშოვს ერეკლე განუმარტავდა: „როდესაც ჩვენი მორჩილებისგან გავიდნენ (ლეკები – ი.ა.), მასუკან არავის მორჩილნი ყოფილან და ყოველ წელიწადს აღარჩევენ რაოდენთამე კაცთა და ისინი განაგებენ ყოველს საქმეს ხალხის

¹ **В. Гамрекели.** Вопросы взаимоотношения Восточной Грузии с Северным Кавказом в XVIII веке, Докт. диссертация. Тб., 1972, გვ. 597.

² **И. Петрушевский.** Джаро-белаканские..., გვ. 9; **А. И. Фонь-Плотто.** Природа и люди Закатальского округа – *Сборник сведений о Кавказских горах*, вып. IV. Тифл., 1870, გვ. 8.

³ **И. Петрушевский.** Джаро-белаканские..., გვ. 35.

თანხმობით, და თუ ხალხსა არა ნებავს, არ გაიგონებენო“.¹

ამ ფაქტს საქართველოში მყოფი უცხოელებიც აღნიშნავენ. იაკობ რაინგის მიხედვით, ყოველი პარასკევი მათთვის (ჭარის, წახურის, კატეხისა და თალისათვის) არჩევნების დღე იყო, როდესაც მეჩეთებში მიდიოდნენ საერთო კრებაზე ხალხის უხუცესთაგან წინამძღოლის ასარჩევად, რომელიც მოწოდებული უნდა ყოფილიყო მეომარი ახალგაზრდობის სურვილების შესასრულებლად,² ეღუარდ აიხვალდი ჭარ-ბელაქანის თავისუფალ თემთა საზოგადოებრივი წყობის აღსანიშნავად „განთქმულ რესპუბლიკურ ბარბაროსულ სამფლობელოებს“ მიუთითებს.³

ჯამაათი ერთობლივად ატარებდა საკანონმდებლო, აღმასრულებელ და სასამართლო („შარიათის“) ფუნქციას.⁴ მთელი მიწის იურიდიულ მესაკუთრედ იგი ითვლებოდა.⁵ სოფლის სასამართლოს შეადგენდნენ სოფლისა და თოხუმების ქვეხები და იმამი. ისინი, როგორც წესი, საქმეების განხილვისას ტრადიციებითა და ადათებით ხელმძღვანელობდნენ.⁶ სასოფლო საზოგადოება შედგებოდა 2-4 თოხუმისაგან (სათემო კავშირისაგან). დაღესტნურ თოხუმებს, სხვა კავკასიელი ხალხებისაგან ენდოგამიის მკვეთრად გამოკვეთილი ბატონობა გამოარჩევდა.⁷ თოხუმები ასევე ვალდებულნი იყვნენ თემში ტრადიციების დაცვაზე, მაგ. თუ თოხუმის რომელიმე წევრი ისე გარდაიცვლებოდა, რომ „მოსისხლესაგან“ სისხლის აღებას ვერ მოასწრებდა, სისხლის აღების ვალდებულება თოხუმის დანარჩენ წევრებზე გადადიოდა. თითოეული სრულწლოვანი ჭაბუკი თოხუმის სრულფასოვან წევრად ითვლებოდა. ჰქონდა საარჩევნო ხმის უფლება და შეეძლო საკუთარი კანდიდატურა დაეყენებინა სამხედრო მეთაურის არჩევნებში სასოფლო თემის ყრილობაზე. მოგვიანებით, ქვეხის, ან ქედხუდის თანამდებობამ იურიდიულად არა, მაგრამ ფაქტობრივად მემკვიდრეობითი სახე მიიღო, ცნობილი გვარებისა და ოჯახების პრეროგატივად იქცა და ქედხუდის სიკვდილის შემთხვევაში, მემკვიდრედ მისი უფროსი ვაჟი ცხადდებოდა.⁸

თემში მოსახლეობის უმრავლესობას შეადგენდნენ თავისუფალი უზდენე-

¹ საქართველოს ეროვნული საისტორიო არქივი, ფონდი 1449; საქმე 2277.

² იაკობ რაინგსი. მოგზაურობა საქართველოში, გვ. 203.

³ ეღუარდ აიხვალდი საქართველოს შესახებ, გვ. 284.

⁴ И. Петрушевский. Джаро-белаканские..., გვ. 36.

⁵ И. Петрушевский. Джаро-белаканские..., გვ. 42.

⁶ И. Петрушевский. Джаро-белаканские..., გვ. 34; А. И. Фонь-Плотто. Природа и люди Закатальского округа, გვ. 9.

⁷ И. Петрушевский. Джаро-белаканские..., გვ. 32.

⁸ И. Петрушевский. Джаро-белаканские..., გვ. 33.

ბი, რომელთაც საკუთარი მეურნეობა და მიწის ნაკვეთები ჰქონდათ. სწორედ ისინი წარმოადგენდნენ მთიანი დაღესტნის ძირითად მწარმოებლურ ძალას.¹ თუმცა, მათი შემადგენლობა ქონებრივი თვალსაზრისით ერთგვაროვანი არ იყო. ნაწილი მდიდრდებოდა და თემის წარჩინებულ ნაწილს უერთდებოდა, ხოლო ძირითადი მასა დატაკდებოდა და სხვაზე დამოკიდებული ხდებოდა.

მეორე ტიპის საზოგადოებას ეს პროცესი გავლილი ჰქონდა და ნახევრად დამოუკიდებელ სახანოებად იყვნენ ჩამოყალიბებულნი. ასეთები იყო: ავარიის, ყაზი-ყუმუხის, ყარაყაიტაგის უცმის, კუმიკების² და სხვ. წვრილი სამფლობელოები. სახანოებში XVIII საუკუნისათვის უკვე არსებობდა იურიდიულად ჩამოყალიბებული ფეოდალთა კატეგორია ხანებისა და ბეგების სახით. საზოგადოების ძლიერ და წარჩინებულ ნაწილს ასევე შეადგენდნენ რელიგიის მსახურები, ხოლო მოსახლეობის ძირითად და ეკონომიკურად არასტაბილურ ნაწილს – გლეხები და მონები. წარჩინებულებსა და დამოკიდებულ თანასოფლელებს შორის უზღვენებს შუალედური მდგომარეობა ეკავათ. მათ, გლეხებისგან განსხვავებით, პიროვნული თავისუფლება ჰქონდათ, მაგრამ სოციალური არასტაბილურობით ხასიათდებოდნენ. მცირე ნაწილი ახერხებდა წარჩინებულებამდე აღზევებას, ძირითადი ნაწილი კარგავდა პირად თავისუფლებასა და ყმის დონეზე დეგრადირდებოდა. სწორედ ეს მასა იქცა იმ აქტიურ ძალად, საიდანაც გამოვიდნენ ადამიანებზე მონადირე კრიმინალები.³

ს. ბრონევსკი დაღესტნელ თავისუფალ თემთა გაერთიანებას „ფედერაციულ რესპუბლიკებს“ უწოდებს და ასეთებს თორმეტს ასახელებს, რომელთა სათავეში ავარიის ხანი იდგა.⁴ ხსენებულ ავტორს, აიხვალდის მსგავსად, თემთა ასეთი გაერთიანება იმდროისათვის ფედერაციულ-დემოკრატიული მმართველობის საუკეთესო ნიმუშად მიაჩნია.⁵

მიუხედავად თავისი „დემოკრატიული თვითმმართველობისა“, თემის მმართველობის შინაგანი პრინციპი მაინც ბატონობა-მორჩილებაზე იყო დამყარებული, მაგ.: თემში შემაჯავლი სოფლები, აკსაკალების პირველსავე მოთხოვნაზე ვაღდებულნი იყვნენ ომსა და თარეშებში ერთმანეთს მიშველებოდნენ,⁶ მაგ.

¹ **В. Гамрекели.** Вопросы взаимоотношения Восточной Грузии., გვ. 38.

² **Х. Хашаев,** Общественный строй Дагестана в XIX веке. М., 1961, გვ. 5.

³ **ავთანდილ კილასონია.** ადამიანებით ვაჭრობა საქართველო-კავკასიაში XVI-XVIII საუკუნეებში. თბ., 2006, გვ. 76.

⁴ **С. Броневский.** Новейшие географические и исторические известия о Кавказе. ч. I. М., 1823, გვ. 40.

⁵ **С. Броневский.** Новейшие географические и исторические известия о Кавказе, გვ. 40.

⁶ **Х. Хашаев,** Общественный строй Дагестана..., გვ. 239.

ილია ორბელიანის ცნობით, შამილის მოწოდებაზე თითოეული კომლი ვაღ-
დებული იყო საბრძოლველად გამოეყვანა იარაღის ხმარების შემძლებელი
თითო სული რამდენიმე დღის სამყოფი სურსათით და ერთი ცხენით. ვისაც
ცხენი არ ჰყავდა, უნდა გაეღო ფული. თუ ფულიც არ ჰქონდა, იგი ვაღდებუ-
ლი იყო მიწა, ან სხვა რამ გაეყიდა და ისე შეესრულებინა ვაღდებულება. წი-
ნააღმდეგ შემთხვევაში, მათ ორმოში პატიმრობა ელოდათ. თვით ბავშვებსაც
კი ნაბრძანები ჰქონდათ იარაღის ტარება, რათა გაწაფულიყვნენ და მეომართა
რიგებში დროულად ჩამდგარიყვნენ.¹

სახელმწიფოს მართვის თეოკრატიული და მკაცრად ცენტრალიზებული
ბუნება ჩრდილო-კავკასიელთა თითქმის ყველა ბელადისათვის (ნურსალ-ბეგი,
ომარ-ხანი, ყაზი-მოლა, ჰამზათ-ბეგი, შამილი) მეტ-ნაკლებად დამახასიათებელი
იყო, მაგრამ იმამის გარდა, ყველა დანარჩენი მოხელესათვის რელიგიური და
სამხედრო უფლებები მკვეთრად იმიჯნებოდა.² XVI-XVIII საუკუნეებში, ერთი
მხრივ ჭარის უბატონო (თავისუფალი) თემებისა და მეორე მხრივ მთის დაღეს-
ტნის მოსახლეობაში ფეოდალიზაციის პროცესის დაჩქარებამ, კერძო საკუთ-
რებისადმი მძლავრი მისწრაფება გააჩინა და მეზობელი ქართლ-კახეთისა და
ჩრდ. აზერბაიჯანის მოსახლეობის ძარცვა-რბევაში გამოიხატა. როცა ქვეყნის
შიგნით მისათვისებელი აღარაფერი დარჩა, დეკლასირებული უმრავლესობა
ქვეყნის გარეთ ეძებდა გამდიდრების წყაროს. ეს ტენდენცია განსაკუთრებით
XVIII საუკუნიდან ხდება თვალშისაცემი. დაწინაურებული ან გადატაკებული
უზდენების ინტერესთა თანხედომამ საერთო მიზნის გარშემო მათი კონსოლი-
დაცია გამოიწვია. სწორედ ამაშია აღნიშნულ საუკუნეებში მთიელთა ექსპან-
სიის წყარო.³

როგორც ითქვა, დაღესტნელების ჩრდილოეთით ლაშქრობები ჯერ კიდევ
წინა საუკუნეებში აღიკვეთა რუსეთის მძლავრი იმპერიის მიერ, ამიტომ ამ
„ღვარცოფმა“ ძირითადად სამხრეთელი მეზობლები „წალეკა“. დროთა განმავ-
ლობაში მოთარეშე უზდენტა შემადგენლობა იცვლებოდა. ერთნი ძარცვა-რბე-
ვის წყალობით გარკვეული ქონების დაგროვებას ახერხებდნენ და თავს ანე-
ბებდნენ ამ „ხელობას“, მაგრამ მოდიოდნენ სხვები, ანუ ხდებოდა ავაზაკთა
ბუნებრივი კვლავწარმოება, ამიტომ „ლეკიანობა“ არ ცხრებოდა, თავის ორბი-

¹ ილია ორბელიანი. რვა თვე შამილის ტყვეობაში, თარგმნა, წინასიტყვაობა დაურთი და
ტექსტი დასაბეჭდად მოამზადა *ელიზბარ უბილაგამ*, თბ., 1991, გვ. 86-87

² იხ: იოსებ ალიმბარაშვილი. შამილის „ნიზამი“ და დავით ბატონიშვილის., გვ. 29-31.

³ ავთანდილ კილასონია. ადამიანებით ვაჭრობა საქართველო-კავკასიაში, გვ. 78.

ტაში ახალ-ახალ მასებს ითრევდა და რეგიონისათვის გადაუჭრელ პრობლემად რჩებოდა.¹ თანდათანობით ეს „ხელობა“ მთიელებში პროფესიად იქცა და ბელადთა განსაკუთრებული ინსტიტუტი ჩამოყალიბდა, რომლებიც შემოიყრიდნენ 10-დან 300 კაცამდე და გამუდმებულ თავდასხმებს ახორციელებდნენ.²

მთიელთა ექსპანსიის ფორმას მნიშვნელოვნად განსაზღვრავდა დაღესტნის მეზობლად არსებული პოლიტიკური და ეკონომიკური ვითარება. მთელ რიგ შემთხვევებში ლეკები მართლაც ჩამოდიოდნენ ქართლ-კახეთში და დგებოდნენ მოსამსახურებად, მსახურობდნენ დაქირავებულ ჯარში და სხვ. მაგრამ ქვეყნის წარმოებითი შესაძლებლობანი იმდენად დიდი არ იყო, რომ მთლიანად აეთვისებინა მთის ჭარბი ენერჯია და მშვიდობიან შრომაში გამოეყენებინა.³ სამართლიანად აღნიშნავდა დავით გვრიტიშვილი, რომ „ლეკიანობა“ მარტო საქართველოსათვის კი არ იყო დამღუპველი, არამედ საკუთარი ქვეყნისთვისაც. საქმე ისაა, რომ „ლეკიანობა“ მეურნეობის ძირითად დარგად სხვისი ქვეყნის ძარცვას გულისხმობდა და საკუთარი ქვეყნის საწარმოო ძალების განვითარებას გამორიცხავდა, ამასთან ერთად მუდმივი ომები არა მარტო მოწინააღმდეგეს, არამედ საკუთარ ხალხსაც ანადგურებდა, ფიზიკურად სპობდა“.⁴

სამეფო-სამთავროებად დაშლილი, პოლიტიკურად სუსტი, მაგრამ მდიდარი რესურსების მქონე მეზობელი საქართველო ეკონომიკური განვითარების საპირისპირო პოლუსზე მყოფ დაღესტნელ მოსახლეობას საშუალებას აძლევდა, რომ „სოციალ-პოლიტიკური და ეკონომიკური საკითხები დროებით მაინც გადაეჭრა“;⁵ სხვანაირად სიდატაკე და შიმშილით სიკვდილი მოელოდათ, რასაც აღნიშნავდნენ კიდევ მათი წარმომადგენლები 1731 წ. დეკემბერში რუს გენერალ რუმიანცევთან შეხვედრისას: „ქურდობა და ძარცვა-თარეში ჩვენი ხელობაა ისევე, როგორც თქვენთვის ხვნა-თესვა და ვაჭრობა. ძარცვა-რბევით ცხოვრობდა ჩვენი მამა-პაპა და თუ მათ ხელობას მივატოვებთ, რასაც ჩვენგან რუსები მოითხოვენ, შიმშილით დავიხოცებით“.⁶ ლეკთა მტაცებლურ ბუნებაზე მიუთითებდა თურქი ისტორიკოსი გურჯი ზადეც: „სიკვდილი და სხვისი

¹ **В. Гамрекели.** Вопросы взаимоотношения Восточной Грузии., გვ. 620.

² **В. Гамрекели.** Вопросы взаимоотношения Восточной Грузии., გვ. 40-41.

³ **В. Гамрекели.** Вопросы взаимоотношения Восточной Грузии., გვ. 618.

⁴ **დავით გვრიტიშვილი.** ნარკვევები საქართველოს ისტორიიდან. ტ. III. თბ., 1968, გვ. 181.

⁵ **თეიმურაზ ბოცვაძე.** ჩრდილო-კავკასიის ხალხები საქართველოს საგარეო პოლიტიკაში XV-XVIII სს. თბ., 1990. გვ. 17-18.

⁶ **В. Потто.** Кавказская война в отдельных очерках, эпизодах, легендах и биографиях. т. I. от древнейших времянь до Ермолова. вып. I. СПб., 1885, გვ. 43.

მოკვლა (ლეკებს – ი.ა.) ვაჭრობაზე მეტად ამხიარულებთო“.¹ უფრო მეტიც, ლეკებისათვის მთავარი ფულის გადახდა იყო და ხშირად ისინი ერთმანეთის წინააღმდეგ ბრძოლაზეც არ ამბობდნენ უარს.

XX ს. დამდეგს (1901 წ.) ზურაბ ავალიშვილი საკითხის შეფასებისას წერდა: „დაღესტნელთა ჯგუფებმა, რომელთა მოწოდებაც ძარცვა-რბევა და თარეში იყო, მიატოვეს წარმოების მშვიდობიანი ფორმები – მიწათმოქმედება, ხელოსნობა და მათ სისტემატურ ხელობად – ძარცვა-თარეში, ტყვეების მოპოვება და თანხის საფასურად დაქირავება იქცა. მოწვევებს ძარცვა-რბევის მიზნით ისინი იღებდნენ აღტაცებით და ხალხისით. თავის მხრივ მართაღნიც იყვნენ, რადგან არსებობა მათ მხოლოდ ამ გზით შეეძლოთ.

თანდათანობით XVII-XVIII საუკუნეებში ლეკთა პარტიების გამოჩენა ჩვეულებრივ ამბად იქცა. ეს იყო მწარე სიმართლე ქართლ-კახეთისათვის, რომელთაც სამხრეთით ქმედებისას, არასოდეს ჰქონდათ უსაფრთხო ზურგი უზრუნველყოფილი“.²

ჩრდ. კავკასიელი ტომების ექსპანსიის ერთ-ერთი მიზეზი მთის მკაცრი პირობები და კლიმატი იყო. მოსახლეობის დიდი ნაწილისათვის მეურნეობის ძირითადი დარგად მესაქონლეობა იქცა, მხოლოდ მცირე ნაწილი მისდევდა მიწათმოქმედებას, მათაც მოწვეული მოსავალი მხოლოდ 3-4 თვეს ჰყოფნიდათ³, ხოლო ვისაც არც ერთის საშუალება ჰქონდა: „სამხედრო ბელადები ადვილად შემოიყრიდნენ ხოლმე თავისუფალ მთიელებს და „სავაშკაცო საშოვარზე“ (ტყვისა და ალაფის მოპოვება) მოუძღოდნენ მათ“.⁴ მათი შემოსევების სიჭარბე-სიმცირეს მნიშვნელოვნად განსაზღვრავდა მკაცრი ზამთარი და მოუსავლიანი წლებიც.

მთიან დაღესტანში მიწათმოქმედების დაბალ დონეს, მიწის ნაკლებობის გარდა, სარწყავი სისტემების არ არსებობაც განაპირობებდა, რადგან მთის ჩქარი მდინარეები ირიგაციის საშუალებას არ იძლეოდა.⁵ ეკონომიკურ განვითარებას ასევე მნიშვნელოვნად აფერხებდა რთული რელიეფი და უსაფრთხო

¹ გურჯი ზადე, თბილისის დაპყრობის წიგნი. თურქული ტექსტი ქართული თარგმანით, შესავალითა და შენიშვნებით გამოსცა *ცისანა აბულაძემ*. თბ., 1975. გვ. 41.

² **З. Авваловь.** Присоединение Грузии кь Россий. СПб 1901, გვ. 17.

³ **დარეჯან მეგრელაძე**, დაღესტან-საქართველოს ურთიერთობის ისტორიიდან. – *მაცნე*. საქართველოს მეცნიერებათა აკადემიის საზოგადოებრივ მეცნიერებათა განყოფილების ორგანო, ისტორიის სერია. № 6. თბ., 1967, გვ. 122.

⁴ **ნიკოლოზ ბერძენიშვილი**. საქართველოს ისტორიის საკითხები, ტ. II, გვ. 154.

⁵ **И. Петрушевский.** Джаро-белаканские..., გვ. 27.

გადაადგილებისათვის საჭირო გზების არქონა.¹ ჩრდილო-კავკასიელთა თარეშის ინტენსივობა განპირობებული იყო იმითაც, რომ მთიან დაღესტანში მამაკაცის როლი ოჯახურ მეურნეობაში ტრადიციულად ძალზე სუსტი იყო და სასოფლო-სამეურნეო სამუშაოებს, შინაური პირუტყვის მოვლას და ა. შ. ძირითადად, ქალები უძღვებოდნენ.² სამაგიეროდ, სულის ხსნის მიზნით, ისინი ძარცვა-გლეჯასა და თარეშს „ჰაზავათის“ (წმინდა ომი ურწმუნოთა წინააღმდეგ) ნაწილად მიიჩნევდნენ, რაც მეზობლად მდებარე საქართველოში რთული არ იყო.³

„ლეკიანობის“ ბუნება და მიზეზები კარგად ჩანს გრიგოლ ორბელიანის საკუთარი ძმებისადმი დაღესტნიდან მოწერილი წერილებიდანაც: „აქაური ხალხისა რა ვითხრა. შინ ზარმაცნი, ზანტნი, დიდრონ ტყაპუჭებში დათვების მსგავსნი ჰყრიან ამ დღით გარეთა. აბა ესენივე ნახე მაშინ, როცა დაიძახებენ ჰარაის! იმ წამს საიღამ ეძლევათ ის სიმარდე, ის სიმკვირცხლე, დაუღალაობა სირბილში? აბა გაასწარ ცხენითო“, სწერდა ილია ორბელიანს.⁴ „მეტად გამხმარი ქვეყანა არის, უშეშო, უბალო, უტყეო“, ამიტომაც „კაცის კვლა მეტად ადვილად სცოდნიათო“, ამ სიტყვებით უხასიათებდა დაღესტანს მეორე ძმას ზაქარიას გრიგოლ ორბელიანი.⁵

„ლეკიანობის“ ეკონომიკური ფაქტორის აღნიშვნისას, აუცილებლად გასათვალისწინებელია დაღესტნელთაგან ტყვეებით მოვაჭრეთა მთავარი „ინვესტორი“ – თურქეთი. საქმე ის არის, რომ XVII-XVIII საუკუნეებში ტყვეებით ვაჭრობა მსოფლიოში ყველაზე შემოსავლიან „პროფესიად“ იქცა. ქართული „პროდუქტი“ სტამბოლ-კაიროს ტყვეთა ბაზრებზე საკმაოდ კონკურენტუნარიანი იყო, ამიტომ თურქი მოხელეები ფულს ხალისით დებდნენ და აფინანსებდნენ დაღესტნელ აბრაგთა მტაცებლურ ლაშქრობებს ქართლ-კახეთში.

გარდა ეკონომიკური მოტივაციისა, დაღესტნელთა შემოსევებს პოლიტიკური, რელიგიური და სოციალური ფაქტორებიც განაპირობებდა. დიდი და ძლიერი მეზობელი რუსეთის არსებობა პატარა დაღესტნის პოლიტიკურ ინტერესებში არანაირად არ ჯდებოდა.

¹ თეიმურაზ ბოცვაძე. დაღესტანი XVIII ს. – წიგნში: **ზურაბ ანჩაბაძე, თეიმურაზ ბოცვაძე, გიორგი თოგოშვილი, მარინე ცინცაძე.** ჩრდილო კავკასიის ხალხთა ისტორიის ნარკვევები, ნაკვ. I. თბ., 1969, გვ. 248.

² **Н. Львов.** Домашняя и семейная жизнь дагестанских горцев. – *Сборник сведений о Кавказских горах*, вып. III. Тифл., 1870, გვ. 3; 10-11; 14-15.

³ **Н. Львов.** Домашняя и семейная жизнь дагестанских горцев, გვ. 3.

⁴ **გრიგოლ ორბელიანი.** წერილები, ტ. I, დოკ. №58; გვ. 79-81.

⁵ **გრიგოლ ორბელიანი.** წერილები, ტ. I, დოკ. №37; გვ. 70.

ლოგიკურია, რომ ლეკები ქართლში არანაკლები აგრესიით ებრძოდნენ „ყოზილბაშობისას“ – სპარსელებს, „ოსმალობისას“ – თურქებს, ხოლო XVIII ს.80-იანი წლებიდან – რუსებს. საქართველოში გაბატონებით ზემოწამოთვლილი დიდი ქვეყნები უშუალოდ უმეზობლდებოდნენ დაღესტანს, რაც მათ ინტერესებში არ შედიოდა, ამიტომ ლეკი ბელადები ერეკლე მეფეს მიმართავდნენ: „ჩვენ გვირჩევნია თქვენ დაგვიჭიროთ და მიგვისიოთ თქვენი ქვეყნის მტერს, ვიდრე სხვამ დაგვიჭიროს და თქვენი ქვეყანა გვანადგურებინოსო“.¹

დაბოლოს, ყაჩაღობა და თარეში თავისუფლებისმოყვარე მთიელისათვის, ვაჟკაცობის, ჯიგიტობის სინონიმად იქცა. როგორც ითქვა, ძარცვა-რბევასა და თარეშს დაღესტნელი მთიელები „ჰაზავათის“ (წმინდა ომის) ნაწილად მიიჩნევდნენ. საქართველოზე წამოსული ნურსალ-ბეგი თანამოძმეებს, მხარდაჭერის შემთხვევაში, სამუდამო კეთილდღეობას პირდება: „სულ მე გამომყევით, ქართლსა და კახეთს დავიჭერთ და იმდენ ტყვეებსა და საქონელს გაშოვნინებთ, რომ შვილიშვილამდე გეყოსთო“.²

ამდენად, უხეში შეცდომა იქნებოდა „ლეკიანობა“ მხოლოდ ეთნიკურ ჭრილში განგვეხილა. დაღესტნელებისათვის მთავარი ტყვე-ნადავლის ხარისხი და ფასი იყო და არა მისი ეროვნული კუთვნილება. ჩვენი უბედურება სწორედ იმაში მდგომარეობდა, რომ ზემონათქვამ ტყვეთა ბაზრებზე ქართველი ყველაზე მეტად ფასობდა. რაც შეეხება რელიგიურ ფაქტორს, დაღესტნელები არანაკლები ხალისით არბევდნენ ჩრდ. ირანისა და მეზობელ ჩეჩნების ერთმორწმუნე პროვინციებსაც,³ თუმცა, მათ თავდასხმებს საქართველოს ქრისტიანულ მოსახლეობაზე ყურანიც „ახალისებდა“.

„ლეკიანობის“ წყარო ხშირად სოციალური ხასიათის იყო და იოლი გამდიდრების მოსურნე დაღესტნელი ფეოდალების ამბიციებიდან მომდინარეობდა. „დაღესტნის ისტორიაში“ ვკითხულობთ: „დაღესტნელი ფეოდალები მოტყუების გზით, არცთუ იშვიათად დაშინებითა და ძალადობით აიძულებდნენ უბრალო მოსახლეობას ლაშქრობებში მონაწილეობას, რითაც წყვეტდნენ მათ ინტენსიური მეურნეობისაგან და წირავდნენ ტანჯვა-წამებისა და ხშირად – სიკვდი-

¹ შოთა ლომსაძე. სამცხე-ჯავახეთი (XVIII საუკუნის შუაწლებიდან XIX საუკუნის შუა წლებამდე). თბ., 1975, გვ. 51.

² პაპუნა ორბელიანი. ამბავნი ქართლისანი. ტექსტი დაადგინა, შესავალი, ლექსიკონები და საძიებლები დაურთო ელენე ცაგარეიშვილმა. თბ., 1981, გვ. 226.

³ ილია ორბელიანი. რვა თვე შამილის ტყვეობაში, გვ. 75.

ლისთვისაცო“.¹

აღნიშნულთან დაკავშირებით დადესტნელი ავტორი – ხ. ხაშავეი წერდა: „დადესტნელ ხალხს საქართველოს დაპყრობა მიზნად არასოდეს გაუხდია. ნუცალ-ხანისა (ნურსალ-ბეგი – ი.ა.) და ომარ-ხანის მტაცებლურ შემოსევებთან მათ საერთო არაფერი ჰქონდათ. პირიქით, როგორც ამას წყაროები გვიდასტურებენ, დადესტნელი მთიელები არაერთხელ გამოსულან ქართველი ხალხის მოკავშირის როლში უცხო დამპყრობლების წინააღმდეგო“.²

მართლაც, პროფ. რ. მაგომედოვი, წიგნში: „დადესტანი. ისტორიული ეტიუდები“, სათანადო საბუთებზე დაყრდნობით გადმოგვცემს, თუ როგორ იბრძოდნენ ნურსალ-ბეგისა და ომარ-ხანის ძალმომრეობის წინააღმდეგ ადგილობრივი ტომების – ოროტინელების, ანწუხელების, ინხოელების, იგალელების წარმომადგენლები.³

ქართველებისათვის რიცხობრივად ჭარბ მტერთან ბრძოლა უცხო არ იყო. ბრძოლისას მტერი ხშირად ორჯერ, სამჯერ და უფრო მეტადაც გვჭარბობდა, მაგრამ გამარჯვების სასწორი უმეტესწილად ჩვენს მხარეს იხრებოდა. ლეკის წინააღმდეგ ბრძოლა კი ქვეყანას უჭირდა, რადგან იმათი ბრძოლის ტაქტიკა ქართველისათვის მიუღებელი იყო. დადესტანს საქართველოსთან გამოცხადებული ომი არასოდეს ჰქონია. მარბიელთა თარეში ომის კანონებს არ ექვემდებარებოდა. ტრადიციულად, საქართველოში ლაშქრის შეკრება ხდებოდა მეფის დაძახილზე. არსებობდა „ქუდზე კაცის“, „კომლზე კაცის“ წესიც, მაგრამ ასეთი ლაშქრის თავმოყრისათვის რამდენიმე დღე იყო საჭირო. ლეკები დიდი ლაშქრით იშვიათად მოდიოდნენ, ბრძოლას გაურბოდნენ და ძირითადად მცირერიცხოვანი ბრბოებით ქურდულად თავს ესხმოდნენ მშვიდობიან სოფლებს, ყანაში, ვენახსა და ტყეში გასულ გლეხებს, შინ დარჩენილ მათ ოჯახებს, გზად მიმავალ მგზავრებს, იალაღზე გასულ მწყემსებს. მათი თავდასხმების რიცხვი, როგორც წესი, იზრდებოდა მოსავლის აღების დროს, მცირეწლოვანებისა და მოხუცების ამარა დარჩენილთ უწიოკებდნენ სახლ-კარს, ტეხდნენ ციხეებსა და ეკლესია-მონასტრებს, მიჰქონდათ და მიჰყავდათ ყველაფერი, რის წადებასაც მოასწრებდნენ და მოახერხებდნენ. სანამ ქართველი მღევარი შეიყრებოდა, ხშირად ისინი ახერხებდნენ მიუვალი და დაფარული ბილიკებით და-

¹ *История Дагестана*. т. I. М., 1967, გვ. 384.

² *Из истории взаимоотношений Дагестана с Россией и народами Кавказа* (сборник статей). Под ред. проф. **В. Г. Гаджиева**. Махачкала, 1982, გვ. 34.

³ **Р. Г. Магомедов**. Дагестан. Исторические этюды. Махачкала, 1971, გვ. 164.

დესტანში ან ახალციხეში გადასვლას, იქ კი უსაფრთხოდ გრძნობდნენ თავს. მათი მუდმივი თარეშით გაბეზრებული ერეკლე II რუსებს სწერდა: „ლეკები მშიერი მგლებივით ჩვენზე კბილებს ილესავენო“.¹

ტოტლებენის ადიუტანტის ფრანგი დე გრაი დე ფუას შეფასებით, დაღესტნელებს უბრალო ადამიანის გამოსასყიდ ფასად დაწესებული ჰქონდათ 40 ხარი. ერთი ხარი ოცდაათიდან ას ცხვრამდე ღირდა და ცხენი ადამიანზე ძვირად ფასობდა². ცხადია, ფრანგ მოგზაურს ზერელე წარმოდგენა ჰქონდა საქართველოდან წაყვანილ ტყვეთა რეალურ ფასზე. როგორც ითქვა, სტამბოლ-კაიროსა და ყირიმის ტყვეთა ბაზრებზე კავკასიიდან წაყვანილ „პროდუქტს“ საკმაო შემოსავალი მოჰქონდა.

ოსმალეთის უმაღლეს კარს შესაბამისი სტრატეგია ჰქონდა შემუშავებული, რათა კავკასიიდან ტყვეთა სყიდვის პროცესი უწყვეტი ყოფილიყო. როგორც ითქვა, იგი სიმდიდრესა და ძალაუფლებას ერთდროულად უზრუნველყოფდა და ამ საქმეში „მოცდენა“ არ შეიძლებოდა, ხოლო რუსების საქართველოში დამკვიდრების შემდეგ მან პოლიტიკური დატვირთვაც შეიძინა.

გატაცებული ტყვე-საქონლის „რეალიზაცია“ ხშირად აქვე ხდებოდა. ლეკებს ეს გარემოება აწყობდათ კიდევ, რადგან ერთი მხრივ „საქონელს“ ადვილად „ანადგებდნენ“ და მეორე მხრივ, ეს „საქონელი“ მათი „სამოქმედო“ სარბიელის შიგნით რჩებოდა და მისი კვლავ მოპოვება კიდევ შეიძლებოდა.³

ლეკების წინააღმდეგ ბრძოლას ართულებდა ისიც, რომ მათ შესანიშნავად იცოდნენ დაღესტნიდან გადმოსასვლელი უამრავი გზა-ბილიკი, თანაც მთაში მგზავრობას მიჩვეული ჩრდილო-კავკასიელები ამას დაუბრკოლებლად და საოცრად სწრაფად ახერხებდნენ. როგორც ჯ. აფციაური წერს: „სამზერ კოშკებს თვალი და ყური დაღესტნის ბილიკებისაკენ ჰქონდათ, მეციხოვნეებსაც შუბლთან მუდამ გაშლილი ხელი ედგათ, მაგრამ ლეკები თითქოს ეშმაკის ცხენებზე ისხდნენ, უჩინმაჩინის ქუდებს იხურავდნენ, ხან კახეთის სოფლებს აატირებდნენ, ხან კიდევ ქართლისა და იმერეთის გზებზე სტოვებდნენ სისხლისა და დაუჭედავი ულაყების კვალს“.⁴ წინასწარ არავინ იცოდა, როდის, საიდან და რა რაოდენობის ლეკი დაეცემოდა თავს.

¹ **А. А. Цагарели.** Грамоты и другие исторические документы 18 столетия относящиеся к Грузии, т. I. СПб., 1891, გვ. 408.

² *დე გრაი დე ფუა საქართველოს შესახებ.* ფრანგულიდან თარგმნა, შესავალი, შენიშვნები და საძიებლები დაურთო *ჯუმბერ ოდიშელმა.* თბ., 1985, გვ. 40.

³ **ნიკოლოზ ბერძენიშვილი.** საქართველოს ისტორიის საკითხები, ტ. VI. თბ., 1964. გვ. 371.

⁴ **ჯემალ აფციაური.** თეიმურაზი. თბ., 1991, გვ. 17.

იესე ბარათაშვილი „ცხოვრება-ანდერძის“ დასაწყისშივე ხაზს უსვამდა იმ გარემოებას, რომ „ავი დრო იყო, ყოველდღე დამხობას მოველოდით, ლეკისა-გან აკლებასა, საქართველოს სრულიად დაჭერასა. კარგი არა ჩნდა მეფის ჭკუისა და ღვთის მოწყალების მეტი. ყოველდღე დიდ ჯარებს გამოველოდით და საქართველოს წაღეკას და ჩვენს აკლებასა და დატყვევებასაო“.¹ გამუდმებული თავდასხმების წინააღმდეგ საჭირო იყო ამ ბილიკების, გზა-ხეობების ჩაკეტვა, სანაპირო ციხეებში ჯარის სისტემატური დგომა და მზადყოფნა ყოველი შემოსევისათვის, რაც იმდროინდელ საქართველოში შეუძლებელი ხდებოდა. ლეკთა მარბიელი რაზმების თავდასხმებისათვის ყველაზე ხელსაყრელი დრო ზაფხული და შემოდგომა იყო, თუმცა, უამინდობაც არ აფერხებდათ.

გზა-ბილიკებისა და გადმოსასვლელების კარგად ცოდნა ლეკებს საშუალებას აძლევდა დღისით თუ ღამით, ნებისმიერი ამინდის პირობებში, დაუბრკოლებლად გადმოსულიყვნენ ჩრდ. კავკასიიდან. ედუარდ აიხვალდის ცნობით, იმის გამო, რომ ლეკები ძირითადად მთებში გადაადგილდებოდნენ, სადაც „უმეტესად მზეს სქელი ნისლი ფარავს“ და ძნელია სასურველი მიმართულების ამოცნობა, ისინი იყენებდნენ განსაკუთრებულ კომპასსა და ჭოგრიტს.² მათი ძირითადი პლაცდარში კახეთზე თავდასასხმელად ჭარ-ბელაქანი იყო. ალაზანს გადმოლახავდნენ, ყარაღაჯის ციხესთან (სიდნაღთან ახლოს) ამოუყვებოდნენ ივრის ხეობას და საგურამომდე აღწევდნენ.³

ქართლში ისინი ჩრდილოეთიდან, ძირითადად არაგვის ხეობით და ღართისკარის გავლით შემოდისდნენ, ხოლო ახალციხის მხრიდან უფრო „ფართო ასპარეზი“ ჰქონდათ: ბორჯომის, ძამის, ატენის, მანგლისის ხეობებს მოედებოდნენ და თავს ესხმოდნენ წინასწარ შერჩეულ სხვადასხვა ადგილებს. **(ლეკთა შემოსევების ძირითადი მიმართულებების რუკა, იხ. აქვე, დანართი № 2).**

ლეკთა სამოძრაო გზა-ბილიკები საქართველოში იმდროისათვის მყოფ უცხოელთათვისაც არ იყო უცხო. რუსი ისტორიკოსი ს. ბრონევესკი ლეკთა მოძრაობის შესახებ აღნიშნავს: „ლეკებს ტყვეები ჭარიდან გადაჰყავდათ საქართველოზე, ტყეებისა და მთების ფარული გზებითა და ბილიკებით ახალციხეში, ხოლო იქიდან – შავი ზღვის ნავსადგურებში: ბათუმსა და ფოთში. ტყვეების გამრავლების მიზნით, ისინი იყოფოდნენ პატარ-პატარა რაზმებად. ერთნი ტყვე-

¹ იესე ბარათაშვილი. ცხოვრება-ანდერძი. – ქართული პროზა. ტ. V. თბ., 1983, გვ. 610.

² ედუარდ აიხვალდი საქართველოს შესახებ, გვ. 270-271.

³ *Акты Собранные Кавказскою Археологическою Коммисиею*, т. I, ч. II. Тифл., 1866, გვ. 337.

ებს აცილებდნენ, მეორენი მიდიოდნენ ახლების მოსატაცებლად. დაღესტნელები ცდილობდნენ იმავე ზაფხულის ან შემოდგომის დადგომამდე დაბრუნებულყვნენ ჭარში. წინააღმდეგ შემთხვევაში, თუ ზამთარი მოუსწრებდათ, გადადიოდნენ ახალციხეში და შედიოდნენ ახალციხის ფაშას სამსახურში, იმ პირობით, რომ ნება მიეცემოდათ ძარცვა-თარეშის ქართლში მოსაწყობად, რაზედაც უარს არასოდეს იღებდნენ.¹ ჭარი ასევე სატრანზიტო პუნქტს წარმოადგენდა საქართველოში ნაშონი ტყვეების შირვანსა და ბაქოში გადასაყვანად.²

ცნობილი გერმანელი მეცნიერი ი. გიულდენშტედტი, რომელიც ერთი პერიოდი ლეკიანობის „ცხელ წერტილში“ – ქსნის საერისთავოში ცხოვრობდა და იძულებული იყო ძლიერი დაცვის თანხლებით გადაადგილებულიყო, წერს: „ილტოზის ახლოს, ქსნისა და ნარეკავს შორის მიდის ჩვეულებრივი გზა ლეკებისა, რითაც ისინი არაგვიდან, მჭადიჯვარზე გავლით, მიდიან მთით ლამისყანამდე და ქრცხინვალამდე“.³ ი. რაინეგსის ცნობით, წინათ აყვავებული, სიცოცხლით სავსე საგურამო იშუამად ლეკების საყაჩაღო კუთხედ იყო გადაქცეული, რადგან დასავლეთით მათ ქართლისაკენ სხვა გზა არ ჰქონდათ.⁴

როგორც ითქვა, ჩრდილო-აღმოსავლეთიდან შემოსული ლეკების კონცენტრირება ძირითადად ღართისკარში ხდებოდა. პლატონ იოსელიანის გადმოცემით, ლეკები ქართლს ღართისკარიდან დაეცემოდნენ, ტყვეებით დატვირთულნი ახალციხეს გადადიოდნენ და უკან მობრუნებულნი, ისევ ღართისკარს ბინავდებოდნენ უშიშრად. ასეთი მდგომარეობა საქართველოში ვახტანგ VI-ისაგან მოყოლებული 1817 წლამდე გაგრძელდა. „ამა წელიწდიდამ შეწყდა ლეკი და შევიდა თვისთა კლდეთა შინა და ხეობათა, სადაცა ეწია მას ძალი რუსეთისა და შემდგომად გრძელ-ჟამითისა ბრძოლისა დაამორჩილა და დაამშვიდა“.⁵ ს. ბრონევესკი ლეკიანობის დასასრულად 1800 წელს მიიჩნევს: „...ჭარსა და ახალციხეს შორის საქართველო იქცა თავისი მძვინვარე მეზობლების დაუცველ მსხვერპლად და ეს მდგომარეობა გაგრძელდა 1800 წლამდე“.⁶

იოსელიან-ბრონევესკისეულ „ლეკიანობის“ ქრონოლოგიას ჩვენ ვერ გავიზიარებთ. ჭარ-ბელაქანისა და ჩრდ. კავკასიის საკითხი რუსეთმა ვერ გადაჭრა

¹ **С. Броневский.** Новейшие географические и исторические известия о Кавказе. ч. I, გვ. 314-315.

² **И. Петрушевский.** Джаро-белаканские..., გვ. 29.

³ *გიულდენშტედტის მოგზაურობა საქართველოში.* ტ. I. გერმანული ტექსტი ქართული თარგმანითურთ გამოსცა და გამოკვლევა დაურთო **ვია გელაშვილმა.** თბ., 1962, გვ. 53.

⁴ **იაკობ რაინეგსი.** მოგზაურობა საქართველოში, გვ. 151.

⁵ **პლატონ იოსელიანი.** ცხოვრება გიორგი მეცამეტისა. თბ., 1978, გვ. 76.

⁶ **С. Броневский.** Новейшие географические и исторические известия о Кавказе. ч. I. გვ. 315.

1817 და მით უფრო, 1800 წელს. „ლეკიანობა“ ამის შემდეგაც საკმაო ხანს რჩებოდა საიმპერატორო კარისათვის სერიოზულ პრობლემად, რაშიც ქვემოთაც დაგრწმუნდებით. ჩვენი ნათქვამის დასტურად მოვიშველიებთ ცნობილ გერმანელ მოგზაურსა და მეცნიერს – ედუარდ აიხვალდს, რომელმაც 1826-27 წლებში იმოგზაურა საქართველოში და საკუთარი თვალით ნანახ-განცდილს შემდეგნაირად აფასებს: „მიუხედავად იმისა, რომ საქართველოს აღმოსავლეთ ნაწილში რუსთა მფლობელობა კარგა ხნის დამყარებული იყო, ლეკების მხრიდან არა მარტო ქართველების, არამედ რუსი ჯარისკაცების მოტაცება გამოსასყიდის მიზნით, ჩვეულებრივ ამბავს წარმოადგენდა. ამასთან, ქართველები შედარებით უფრო ძვირად ფასობდნენ, რადგან სასოფლო სამუშაოებში გამოსადეგნი იყვნენ“.¹

ქართლში ლეკების გარდა სხვებიც აბრაგობდნენ, მაგ.: ოსები, მაგრამ „ლეკიანობა“ „ოსიანობას“ მხოლოდ მეკობრული ბუნებით ჰგავდა. „ოსიანობა“ ძარცვა-თარეშთან ერთად ქართლში მიგრაციასაც გულისხმობდა, ასე აღმოჩნდნენ ოსები ჯერ ზემო ქართლში – სამაჩაბლოში, ხოლო თანდათანობით მთელ აღმოსავლეთ საქართველოს მოედნენ და დასახლდნენ საამილახვროში, სამუხრანბატონოში, საციციანოში და სხვაგან. „ლეკიანობა“ სხვის მიწა-წყალზე დამკვიდრებას მიზნად ნაკლებად ისახავდა, მათ ნადავლი და მისგან მიღებული შემოსავალი უფრო აინტერესებდათ. ისინი შემოდისდნენ, იტაცებდნენ, მიდიოდნენ და უკან მხოლოდ ახლის მოსატაცებლად მოდიოდნენ. საუკუნეების განმავლობაში ლეკებმა, ოსებისაგან განსხვავებით, მხოლოდ ისტორიული ჰერეთის ნაწილი – საინგილო დაიკავეს. ამაშიც „ლომის წილი“ შაჰ-აბას I-ს მიუძღოდა, რომლის მთავარი მიზანი – მთლიანი საქართველოს „ამოგდება“, ხოლო ელისუს სასულთნოს შექმნა მისი დიდი პოლიტიკის ერთი შემადგენელი ნაწილთაგანი იყო.

„ლეკიანობა“ „ოსიანობისაგან“ სხვა მხრივაც განსხვავდებოდა. ჯერ ერთი, დაღესტნელთა ქართლ-კახეთზე თავდასხმები ქართველების მხრიდან ჭარში საპასუხო ლაშქრობებსაც იწვევდა, რასაც მათი მხრიდანაც არანაკლები მსხვერპლი მოსდევდა. მაგ.: ქართველებთან ბრძოლებს შეეწირნენ ლეკთა ბელადები: ალი-ფოლადი, კოხტა ბელადი, მუსა ბელადი, ალი ბელადი, ყოყა ბელადი, თვით ომარ-ხანი ნიახურასთან მიღებული ჭრილობისაგან გარდაიცვალა და სხვ. ბუნებრივია, უფრო მაღალი იყო მსხვერპლი რიგით დაღესტნე-

¹ ედუარდ აიხვალდი საქართველოს შესახებ, გვ. 18, 258-259, 301.

ლებში. შემთხვევითი არ არის, რომ მათ სასაფლაოებზე მამაკაცთა მხოლოდ ორი პროცენტი იყო დასაფლავებული.¹

ოსების ქართველებთან ასეთ შეტაკებებს მათ მკვიდრ სამოსახლოში – ჩრდ. კავკასიაში მასიური ხასიათი არ ჰქონია. როგორც ითქვა, ისინი ლეკიანობით დაცლილ ქართულ მიწა-წყალზე ჩამოდიოდნენ და უმეტეს შემთხვევაში მშვიდობიანად სახლდებოდნენ. ეს ფაქტი ხშირად ქართველი მეფეების ინიციატივითაც ხდებოდა, რაც რამდენიმე მიზეზით იყო განპირობებული: შეთხვევებული მოსახლეობის მომრავლება, სასოფლო-სამეურნეო და თავდაცვით სტრუქტურებში ჩაბმა და სხვ.

2. ქართლ-კახეთისა და იმიერ-კავკასიის ხალხთა ურთიერთობა XV-XVIII საუკუნეებში. ლეკთა ექსპანსიის მიზეზები

საქართველოსა და ჩრდილო-აღმოსავლეთის კავკასიელ ტომებს (ლეკები, ხუნძები, ვეინახები, ავარიელები, დიდოელები, ჩეჩნები, ყაბარდოელები და ა.შ.) შორის ურთიერთობა ადრეული საუკუნეებიდან იღებს. იმიერ-კავკასიელთა დაქირავებას სამხედრო მიზნით, როგორც ქართველი მეფეების მხრიდან, ისე მათ წინააღმდეგ, ხშირად ჰქონდა ადგილი. ლეონტი მროველის ცნობით, ჯერ კიდევ აზოს წინააღმდეგ აჯანყებულმა ფარნავაზმა და ქუჯიმ დაიქირავეს ლეკები, ოსები და „განიმრავლეს სპანი“², რომლებიც სიხარულით გამოემართნენ, რადგან აზოსათვის ხარკის მიცემა არ სურდათ.

ლეკები ჰყვლია დაქირავებული 1177 წელს გიორგი III-ის წინააღმდეგ აჯანყებულ დემნა ბატონიშვილსაც.³ ცნობილია, რომ ფარცხისის ბრძოლაში (1569 წ.) სიმონ მეფის წინააღმდეგ მის გამაჰმადიანებულ და მოღალატე ძმას – დაუდ ხანს ლეკებიც ახლდა, რომელიც შაჰ თამაზის დავალებით გადმოუყვანია განჯა-შამახის ბეგლარბეგს დაუდ ხანთან.⁴ 20 ათასი ლეკი მოიწვია 1723 წელს თბილისის ასაღებად ვახტანგ VI-ის წინააღმდეგ აჯანყებულმა კონსტანტინე მაჰმადყული ხანმა. ლეკების მონაწილეობით არკვედნენ ურთიერთობებს XVIII ს. I ნახევარში ოსმალ-ყიზილბაშთა წინააღმდეგ აჯანყებული შანშე ქსნის ერისთავი და გივი ამილახვარი.

¹ სარგის კაკაბაძე. ქართველი ხალხის ისტორია 1783-1921. თბ., 2003, გვ. 23.

² ლეონტი მროველი. ცხოვრება ქართველთა მეფეთა... – ქართლის ცხოვრება. I. ტექსტი დადგენილი ყველა ძირითადი ხელნაწერის მიხედვით სიმონ ყაუხჩიშვილის მიერ. თბ., 1955, გვ. 23.

³ ისტორიანი და აზმანი შარავანდედთანი. ქართლის ცხოვრება. II. ტექსტი დადგენილი ყველა ძირითადი ხელნაწერის მიხედვით სიმონ ყაუხჩიშვილის მიერ. თბ., 1959, გვ. 19.

⁴ ბატონიშვილი ვახუშტი. აღწერა სამეფოსა საქართველოსა, გვ. 408.

1803 წ. 10 თებერვალს პ. ციციანოვის მიერ ალექსანდრე I-სადმი გაგზავნილი წერილის მიხედვით, ალექსანდრე, იულონ და ფარნაოზ ბატონიშვილები 1803 წ. გაზაფხულზე ლეკების დახმარებით ცდილობდნენ რუსებისაგან წართმეული ტახტის აღდგენას.¹ ასევე ჩრდილო-კავკასიელთა იმედი ჰქონდა 1813 წ. თებერვალში რუსების წინააღმდეგ აჯანყებულ ალექსანდრე ბატონიშვილს, რომელიც ერთგულებისაკენ მოუწოდებდა დიდი ღიახვის მოსახლეობას და აცნობებდა, რომ ხევსურეთში ლეკის, ღლიღვის, ჩაჩნის, ჭანთოის, თუშის, ფშავის, ხევსურის ჯარს კრეფდა და რუსებზე მისვლას აპირებდა² და სხვა.

განსაკუთრებით გაძლიერდა და მრავალმხრივი გახდა იმიერ და ამიერკავკასიას შორის ურთიერთობები განვითარებულ ფეოდალურ, ანუ საქართველოს „ოქროს ხანის“ პერიოდში. ამ დროისათვის იმიერკავკასიის მთიანი ნაწილის მოსახლეობის ძირითადი ნაწილი საქართველოს დროშის ქვეშ შემოდოდა ყმაღნაფიცობის პირობით. პოლიტიკური თვალსაზრისით ჩრდილო კავკასია საქართველოსათვის იყო სანდო ზურგი, რომლიდანაც მას დამატებითი სამხედრო ძალის იმედი ჰქონდა უცხოელ დამპყრობთა მოსაგერიებლად.³

სხენებულ პერიოდში მნიშვნელოვან გავლენას ახდენდა ჩრდილო კავკასიაზე მაღალგანვითარებული ქართული კულტურაც. მონღოლთა ასწლიანმა ბატონობამ ეს ურთიერთობები ვერ მოსპო. XIII ს. 80-იან წლებში ცნობილი ქართველი საეკლესიო მოღვაწეების პიმენ სალოსისა და ანტონ ნაოხრებელის ძის სამისიონერო მოღვაწეობის შედეგად ქრისტიანობა იმდენად ფართოდ გავრცელდა დაღესტანში, რომ XIV საუკუნეში ხუნძახში ეპისკოპოსი იჯდა. საქართველოს გავლენის გავრცელებას ამ ტერიტორიაზე დაღესტანში აღმოჩენილი ქართული წარწერებიც ადასტურებენ.⁴

მდგომარეობა რადიკალურად შეიცვალა თემურ-ლენგის რვაგზის (1386 – 1403 წწ.) შემოსევების შედეგად. 1394 წელს მორიგი ლაშქრობისას თემური არაგვის ხეობას შეესია, ამ დროს აცნობეს, რომ ჩრდილო-კავკასიაში მისი დაუძინებელი მტერი თოხთამიში გამოჩნდა. ლანგ თემურმა საქართველოს თავი მიანება, დარუბანდის გზით იმიერკავკასიაში გადავიდა და დღევანდელ ჩრდილო-ოსეთის ტერიტორიაზე სასტიკად დაამარცხა ოქროს ურდოს ლაშქა-

¹ *Акты Собранные Кавказскою Археологическою Коммисиею* т. I. ч. II. Тифл. 1866, გვ. 69; док. №111.

² *ეროვნული საისტორიო არქივი*, ფონდი 1448; საქმე: 9376.

³ **გიორგი ანჩაბაძე**. თანამედროვე საქართველოსთვის ჩრდილოკავკასიური ფაქტორის, გვ. 6.

⁴ *საქართველოს ისტორია. ნოღარ ასათიანისა და მარიამ ლორთქიფანიძის* რედ. თბ., 2001. გვ. 157; **თეიმურაზ ბოცვაძე**. საქართველო-დაღესტანის ურთიერთობის., გვ. 202 და სხვ.

რი, ხოლო შემდეგ ჩერქეზ-ოსებს მიუბრუნდა. მემატინე შემზარავი სიტყვებით გადმოგვცემს ამ ამბავს: „განვლეს სპათა (თემურის – ი.ა.) მათ დარუბანდი, ლეკეთი და მივიდნენ ოსეთს, მოსწყვიდნეს, ტყვე-ჰყვეს და მოიქცნენ წინაშე თემურისავე. ესე ჰყო თემურმან, რამეთუ უწყოდა. რამეთუ მეფე (საქართველოს – ი.ა.) ძალას იცემს მუნიდამ. ხოლო კვალად იტყვიან, მიერთგან იწოდოლ ჩერქეზი და იქმნაო მაჰმადიანობა მათ შორის“.¹ არანაკლებ მძიმე იყო საქართველოსათვის თემურის ლაშქრობათა პოლიტიკური შედეგი. მას მეზობელი ქრისტიანული ქვეყნები და მოკავშირეები (სომხეთი, ალბანეთი) ჩამოშორდნენ და მომთაბარეთა აგრესიის პირისპირ იგი მარტო აღმოჩნდა.

განსაკუთრებით საზიანო საქართველოსათვის იმიერ-კავკასიელი მთიელი მოკავშირეების ჩამოცილება იყო, სადაც ქრისტიანული სარწმუნოების ნაცვლად მაჰმადიანობამ მოიკიდა ფეხი და საქართველოს გარშემო მუსულმანური გარემოცვის რკალი შეიქმნა.²

საქმე მხოლოდ რელიგიაში არ იყო. ივანე IV მრისხანეს მიერ ასტრახანის სახანოს დაპყრობით (1556 წ.), რუსეთი უშუალოდ გაუმეზობლდა კავკასიას. მოსკოვის სამთავროს გარშემო გაერთიანებული რუსეთი აშკარად იწყებს მოკავშირეების ძებნას ამიერკავკასიაში. პირველი ამ მხრივ კახეთის სამეფო აღმოჩნდა, რომლის გავლით რუსეთი განჯა-შემახასთან აბრეშუმით ვაჭრობდა და დიდ სარგებელსაც იღებდა. ეს გზა დაღესტან-საშამხლოზე გადიოდა. საშამხლოს მთავარი ოსმალეთის სულთნის ვასალი იყო, რომლის უშუალო მითითებით შამხლის რაზმები იკლებდნენ კახეთის სასაზღვრო რაიონებს, ამიტომ რუსეთის შემოსვლით ჩრდ. კავკასიაში კახეთიც დაინტერესებული იყო. ჩრდილო-კავკასიაში რუსეთის ჯარის ჩაყენება გამოიწვევდა საშამხლოს მოწყვეტას ოსმალეთისაგან და მას მოაქცევდა ორ ქრისტიანულ სახელმწიფოს შორის, რის შემდეგ მისი ალაგმვა ადვილად მოხერხდებოდა.³

დაღესტან-რუსეთის სავაჭრო ურთიერთობები თავდაპირველად მშვიდობიანად მიმდინარეობდა. იგი განსაკუთრებით გამოცოცხლდა რუსების მიერ თერგზე ციხე-სიმაგრეების ჩადგმის შემდეგ. სამაგიეროდ, მათ შორის პოლიტიკური ურთიერთობები წარიმართა დაძაბულად, რადგან კავკასიაში დაღესტნის სტრატეგი-

¹ ბატონიშვილი ვახუშტი. აღწერა სამეფოსა საქართველოსა... გვ. 182.

² კარლო ტაბატაძე. ქართველი ხალხის ბრძოლა უცხოელ დამპყრობთა წინააღმდეგ XIV-XV საუკუნეთა მიჯნაზე. – საქართველოს ისტორიის ნარკვევები, ტ. III. თბ., 1979, გვ. 719.

³ ელდარი მამისთვალიშვილი. საქართველოს სავაჭრო პოლიტიკური ურთიერთობანი XV საუკუნის მეორე ნახევარსა და XVI საუკუნეში (ევროპული წყაროების მიხედვით). თბ., 1981, გვ. 311-312.

ულმა მნიშვნელობამ ყველა მის მიმართ დაინტერესებული ქვეყნის: თურქეთის, ირანისა და რუსეთის მისადმი ინტერესი გაამძაფრა. მას შემდეგ, რაც XVI საუკუნის 80-იან წლებში შამხალმა ხანმოკლე ყოყმანის შემდეგ თურქული ორიენტაცია მიიღო, „რუსეთ-დაღესტანის ურთიერთობები წყდებოდა იარაღის ძალით“.¹

კახეთში ლეკთა ჩამოსახლება დაიწყო ლევან კახთა მეფის (1518-1574) დროიდან. ლევანს მეორე ცოლად შამხლის ასული ჰყავდა და გარკვეული ვალდებულებებით ჩრდილო-კავკასიელთა კახეთში ჩამოსახლება მეფისავე ინიციატივით ხდებოდა. მშვიდობიანი პროცესი ლევანის მემკვიდრის ალექსანდრე II-ის გამეფებისთანავე გაფუჭდა. კახეთის მეფემ დედინაცვლის სამშობლოსთან (ალექსანდრე ლევანს პირველი ცოლისგან ჰყავდა) კავშირს რუსებთან „ფიცის წიგნი“ (1587 წ.) არჩია, რომლის მიხედვით, კახეთი რუსეთის მფარველობაში შედიოდა იმ პირობით, რომ რუსები საგარეო მტრებისაგან დაიცავდნენ. მალე (1588 წ.) ალექსანდრემ მოსკოვში ახალი ელჩობა გააგზავნა და წერილი გაატანა, რომელშიც რუსთ ხელმწიფეს შამხლის წინააღმდეგ ჯარის გაგზავნასა და საშამხლოს დაკავებას სთხოვდა.² რუსებმა ეს ხელშეკრულება საკუთარი მიზნებისათვის გამოიყენეს. 1588 წელს თერგის პირას ციხესიმაგრე ააგეს, ხოლო 1593-94 წლებში ხვოროსტინინის მეთაურობით დაღესტანშიც ილაშქრეს, მაგრამ რუსეთმა მაშინ საშამხლოსა და დაღესტანთან წარმატებას ვერ მიაღწია, კახეთს კი მეზობლებთან დალაგებული ურთიერთობები აუშალა.

XVI საუკუნის 80-იან წლებში ალექსანდრე II თევდორე მეფისადმი, მოსკოვის პატრიარქისადმი და ბორის გოდუნოვისადმი მიწერილ არაერთ წერილში იუწყება, რომ შამხალის წინააღმდეგ ბრძოლა ქვეყანას უჭირს, რადგან ისინი ბრძოლას გაურბიან და ტყვე-ალაფით დატვირთულნი მიუვალ მთებში იმალებიან.³ ხუთასი „ენიჩარი“, რომელიც ალექსანდრეს ჰყავდა,⁴ ლეკ-აბრაგთა რბევისაგან ქვეყანას ვერ იცავდა.

XVI ს. II ნახევარი „ლეკიანობის“, როგორც პროცესის გარდამტეხ ნიშნულად შეიძლება მივიჩნიოთ. იმიერკავკასიელ მთიელთა მარბიელ ლაშქრობებს ადრეც ჰქონდა ადგილი, მაგრამ ადრე მათ ამიერკავკასიაში „საყრდენი“ არ ჰქონდათ. გატაცებული ტყვეები კავკასიონს იქით გადაჰყავდათ და იქიდან

¹ Н. Накашидзе. Грузино-Русские политические отношения в первой пол. XVII века. Тб., 1968, გვ. 35.

² ვიქტორ გუჩუა. კახეთის სამეფოს ურთიერთობა რუსეთთან. – საქართველოს ისტორიის ნარკვევები, ტ. IV, გვ. 146.

³ С. Белокуров. Сношения России с Кавказом в 1578-1613 г., вып. I, გვ. 225, 233-234.

⁴ С. Белокуров. Сношения России с Кавказом в 1578-1613 г., вып. I, გვ. 171.

ხდებოდა მათი გამოსყიდვა ახლობლების მიერ, მაგრამ უკვე ხსენებული საუკუნის 60-იანი წლებიდან სიტუაცია იცვლება. 1562 წელს შაჰ-თამაზი წახურის მფლობელ ადი-კურკულ-ბეგს ერთგული სამსახურის სანაცვლოდ, საგანგებო ფირმანით ხელშეუხებლობას ჰპირდება და ქართველ ხელისუფალთ უთვლის, რომ „მის მიწებს არაფერ შეეხოს“.¹

შაჰ-აბას I-ის მიერ აღექსანდრე კახთა მეფისათვის კაკენისელის ჩამორთმევითა და იმ ადგილებში ბორჩალუს თურქმანული ტომების ჩამოსახლებით კახეთს საბოლოოდ მოერღვა ზურგი. აბასის გამანადგურებელ ლაშქრობებს შედეგად ის მოჰყვა, რომ აღმოსავლეთ საქართველოს მოსახლეობა კატასტროფულად შემცირდა. ამით ისარგებლეს ლეკებმაც, შაჰის წაქეზებით ნაოხარ კახურ სოფლებში ჩამოსახლება დაიწყეს და როგორღაც გადარჩენილი მოსახლეობის ძარცვა-რბევას მიჰყვეს ხელი.

ქვეყანაში შექმნილმა მძიმე პოლიტიკურმა და სოციალ-ეკონომიკურმა ვითარებამ, საშინაო და საგარეო ფაქტორებმა, ხელსაყრელი პირობები შექმნა გაძლიერებული რუსეთის მიერ შევიწროებული ჩრდილო კავკასიური ტომების საქართველოში გადმოსახლებისათვის.² რუსების მოკავშირე კახეთის მეფეს არც თურქები სწყალობდნენ. 1609 წელს სულთანმა ოსმან II-მ ადი-კურკულ-ბეგის ვაჟს - ალი-სულთანს ერთგული სამსახურის სანაცვლოდ სოფლები: კახი, მეშაბაში, ზერნა, ლექეთი, ყუმი და ალაგიოზი (ალი-ბეგლო) უწყალობა³. ასე გახდა კახეთის განაპირა მხარე იმიერკავკასიელ მარბიელთა პლაცდარმი აღმოსავლეთიდან.

„ლეკიანობის“ მეორე ფრონტი ქართლს სამხრეთიდან გაეხსნა. 1625 წელს „ბრწყინვალე პორტამ“ ყოფილ სამცხე-საათაბაგოს ტერიტორიაზე ახალციხის საფაშო შექმნა, რომელიც ლეკ-ოსმალთა ქართლში შემოსევების ძირითადი დასაყრდენი გახდა. რუსეთის გააქტიურებამ კავკასიაში აშკარად გააღიზიანა, ერთი მხრივ – თურქეთი და დაღესტანი, ხოლო მეორე მხრივ – სპარსეთი, რომელიც ბოლომდე ისედაც არ ენდობოდა არც დაღესტანს (ადანაშაულებდა თურქეთთან კავშირში) და არც საქართველოს (ადანაშაულებდა რუსეთთან კავშირში). მ. პოლიევქტოვი ხსენებულთან დაკავშირებით წერდა: „ირანი ყო-

¹ **И. П. Линевич.** Бывшее елисуйское султанство, *Сборник сведений о Кавказских горцах*, вып VII, Тифл., 1873. გვ. 6-7.

² **გიორგი ოთხმეზური.** შიდა ქართლში ოსთა ჩამოსახლების საკითხისათვის. – *კავკასია და კავკასიელები*. სამეცნიერო კონფერენცია (მოსხენებათა მასალები). თბ., 2009, გვ. 23.

³ **И. П. Линевич.** Бывшее елисуйское султанство, *Сборник сведений о Кавказских горцах*, вып VII, გვ. 7.

ველთვის ეჭვით აღეგნებდა თვალს „დაღესტნის ვალს“, რომელიც უზრუნველყოფდა კასპიისპირეთის გზის უშიშროებას, და „გურჯისტანის ვალს“ – გარკვეულ საპირწონეს თურქეთთან ურთიერთობაში. თავის მხრივ, ეს ორივე მხარე (დაღესტანი და ქართლ-კახეთი – ი.ა.), ყოველთვის ცდილობდა ირანთან ურთიერთობისას დამოუკიდებელი პოლიტიკის შენარჩუნებას. ამავე დროს მუდმივად ჰქონდათ ურთიერთშორის დაძაბული ურთიერთობა დაღესტნელ მთიელთაგან აღმოსავლეთ საქართველოში მტაცებლური თარეშების გამო.¹ მალე კახეთში ჩამოსახლებულებმა ადგილობრივი მოსახლეობის ისლამზე ძალით მოქცევა დაიწყეს, ამიტომ თეიმურაზ I-ის მიერ 1635 წელს რუსეთში მივლინებული ნიკიფორე მიტროპოლიტის სამეფო კართან მთავარი სათხოვარი ლეკების წინააღმდეგ ბრძოლაში დახმარებაა. ოთხი წლის შემდეგ თეიმურაზი კვლავ სთხოვდა რუსებს შემწეობას, ლეკთა გადმოსასვლელ გზებზე ციხეები აეგოთ და იქ ჯარი ჩაეყენებინათ.²

შედარებით მშვიდობიანი გამოდგა როსტომ-ხანის მმართველობის (1632-1658) პერიოდი. ხოსრო-მირზა „სპარსეთის კაცი“ იყო და ლეკებიც ვითარების გამწვავებას ერიდებოდნენ, მაგრამ 1656 წელს როსტომს კახეთი ჩამოართვეს და განჯის ხანს სელიმს გადასცეს, რომელმაც „მოიყვანა ელნი და დასხნა შიგნით და გარე კახეთს ...და იყო ჭირი დიდი მათგან კახეთსა შინა და ქურდთა და ლეკთაგან“.³ ამ ამბავს ბახტრიონის ცნობილი აჯანყება მოჰყვა.

1677 წელს ყიზილბაშთაგან დანიშნულმა ბეჟან ხანმა „მისცა ნება და ძალი ლეკთა და დაუწყეს კახეთს კირთება და ტყვევნა, არა თუ ლაშქრით, არამედ ავაზაკობით, კუალად აღაზუაუნა უმეტეს ჭარელნი და ელნი“.⁴ კიდევ უფრო მძიმე ასატანი იყო ის ფაქტი, რომ კახელებს „შემომასპინძლებულთათვის“ პასუხის გაცემა არ შეეძლოთ. „რამეთუ მოჰკლან კახთა ლეკნი ანუ თათარნი შერისხავდა ხანი ანუ მოაკვდინებდა ...რამეთუ არა ჯერ არს გიაურთაგან მუსლიმანის სიკვდილი“. სამაგიეროდ, იგივე ქმედებისათვის ჩამოსახლებულებს „სისხლი“ არ ეთხოვებოდათ: „თუცა მოკლან თათართა კახი არა რაი ავნოს, რამეთუ „ესრეთ ჯერ არს“ და იყო ამით ჭირი დიდი“ – წერს ვახუშტი ბატო-

¹ М. Полиевктов. Материалы по истории Грузино-Русских взаимоотношений 1614-1640 г. Тб., 1937, გვ. VIII-IX.

² М. Полиевктов. Материалы по истории Грузино-Русских взаимоотношений..., გვ. 117.

³ ბატონიშვილი ვახუშტი. აღწერა სამეფოსა საქართველოსა., გვ. 189.

⁴ ბატონიშვილი ვახუშტი. აღწერა სამეფოსა საქართველოსა., გვ. 189.

ნიშვილი.¹

სპარსეთის, თურქეთისა და რუსეთის საერთო-კავკასიურმა ინტერესებმა XVIII საუკუნეში კიდევ უფრო დაძაბა მათ შორის ურთიერთობები. საქართველო ამ ქვეყნების ინტერესების ეპიცენტრში იყო. თუმცა, საქართველო-დაღესტანის ურთიერთობებში იყო მშვიდობიანი მომენტებიც. საქართველოში ჩამოსული ლეკები ქართველ თავადაზნაურობას უდგებოდნენ მსახურებად², ეწეობოდნენ მიწის მუშებად, მკალაგებად, ნახშირის გამომწვევებად, ქვის მთლელებად, მკერავებად, დურგლებად, საქონლის მწყემსებად და ა.შ. დროდადრო ისინი აქტიურ ვაჭრობასაც ეწეოდნენ, განსაკუთრებით დიდი მოთხოვნა იყო საქართველოში ლეკურ ნაბდებზე, შალზე, იარაღზე, სამკაულებზე³ შემოჰქონდათ ბეწვეული, – წელიწადში დაახლ. 100 საპალნე⁴ მოგვიანებით დიდი რაოდენობით – აბრეშუმის პარკი.⁵ ასევე პოპულარული იყო ყაბარდოული ხურჯინები,⁶ შემოჰყავდათ ჩერქეზული ჯიშის ბედაურები.⁷ აღსანიშნავია, რომ თვით ერეკლე II ხშირად ლეკური ნაბდით იმოსებოდა⁸ და სხვ. სამაგიეროდ, დაღესტანსა და ჭარში სისტემატურად გაჰქონდათ მარცვლეული,⁹ იარაღის დასამზადებელი ნედლეული (მაგ. სპილენძი), ოქრო და ვერცხლი,¹⁰ მარცვლეული, ღვინო და არაყი.¹¹

საქართველოს სამეფო კარზე სათანადოდ ჰქონდათ გაცნობიერებული კავკასიის ქედის გადაღმა მცხოვრებ მთიელებთან მჭიდრო კავშირის დამყარების დიდი სამხედრო-პოლიტიკური მნიშვნელობა, ამიტომ ქართველ მეფე-მთავართა და ჩრდ. კავკასიის მმართველ დინასტიებს შორის პოლიტიკური ქორწინებები იშვიათი არ იყო.

ასე რომ ქართლ-კახეთისა და ჩრდილო-კავკასიელი ხალხების ურთიერთობები, მით უფრო ეკონომიკური – არ შეიძლება უარყოფითად შევაფასოთ. რაც შეეხება პოლიტიკურს (მეზობელი ქვეყნების ურთიერთობების „იარაღის

¹ ბატონიშვილი ვახუშტი. აღწერა სამეფოსა საქართველოსა... გვ. 189.

² ქართული სამართლის ძეგლები, ტ. IV, გვ. 138-139, დოკ. 74.

³ თეიმურაზ ბოცვაძე. საქართველო-დაღესტანის ურთიერთობის ისტორიიდან, გვ. 195-196.

⁴ ედუარდ აიხვალდი საქართველოს შესახებ. გვ. 47.

⁵ ედუარდ აიხვალდი საქართველოს შესახებ. გვ. 284.

⁶ თეიმურაზ ბოცვაძე. საქართველო-ყაბარდოს ურთიერთობის ისტორიიდან (XVI-XVIII სს.) თბ., 1968, გვ. 126.

⁷ ნიკოლოზ ჯავახიშვილი. ნარკვევები ქართველი და ადიღელი ხალხების ურთიერთობის ისტორიიდან. თბ., 2005. გვ. 154.

⁸ დარეჯან მეგრელაძე. დაღესტან-საქართველოს ურთიერთობის ისტორიიდან, გვ. 120.

⁹ И. Петрушевский, Джаро-белаканские..., გვ. 29.

¹⁰ ედუარდ აიხვალდი საქართველოს შესახებ, გვ. 47.

¹¹ დარეჯან მეგრელაძე. დაღესტან-საქართველოს ურთიერთობის ისტორიიდან. გვ. 119.

ძალით“ გადაწყვეტას), ხშირად ეს საკითხი ამ ქვეყნებისგან დამოუკიდებლად ბევრად შორს – სტამბოლში, ისპაჰანსა თუ მოსკოვ-პეტერბურგში იგეგმებოდა და იქვე წყდებოდა, საბოლოოდ კი ამ „იარაღით“ მხოლოდ ახლო მეზობლები (საქართველო და ჩრდილო კავკასია) ზარალდებოდნენ.

ქართლ-კახეთში ლეგიონობამ განსაკუთრებით ინტენსიური ხასიათი მიიღო XVIII – XIX ს. პირველ მესამედში, თუმცა, ამ მოვლენის ფესვები გაცილებით ადრე უნდა ვეძიოთ. XV საუკუნეში ოსმალეთის მიერ ბიზანტიის იმპერიის დაპყრობით, საქართველოს ჩრდილო და სამხრეთ დასავლეთით, ევროპისაკენ საუკუნოვანი გზა გადაეკეტა, „ბრწყინვალე პორტამ“ შავი ზღვა საკუთრად აქცია, არსებობა შეწყვიტა ტრაპიზონის იმპერიამ, ყირიმის სახანო ოსმალეთის დაქვემდებარებაში მოექცა, ევროპიდან აზიისაკენ მიმავალმა სავაჭრო გზებმა კავკასიიდან სამხრეთით გადაინაცვლა ან აფრიკის შემოვლით შეიცვალა, ამიტომ საქართველომ ევროპისათვის სტრატეგიული პარტნიორისა და სატრანზიტო ქვეყნის ფუნქცია დაკარგა.

ჩრდილო-კავკასიის მრავალრიცხოვანი ტომები სუნიტური ოსმალეთის გავლენის ქვეშ მოექცნენ, შესაბამისად, მისი პოლიტიკის გამტარებელნი გახდნენ და ქართლ-კახეთის მდიდარი კუთხეები, გამუდმებული შემოსევებისა და ტყვეთა სყიდვით, შემოსავლის ძირითად წყაროდ გაიხადეს.

არც სამხრეთ-აღმოსავლეთით იყო ხელსაყრელი ვითარება. თემურ-ლენგის იმპერიის ნანგრევებზე აღმოცენებული, ჯერ „შავბატკნიანთა“ და „თეთრბატკნიანთა“ თურქმანული სახელმწიფოები, ხოლო მოგვიანებით მათ ადგილას გაძლიერებული სეფიანთა ყიზილბაშური ირანი ადრე თუ გვიან საქართველოს მტრობას განაახლებდა. მდგომარეობას ისიც ართულებდა, რომ ევროპისათვის ირანი ოსმალეთის წინააღმდეგ მოკავშირედ მოიაზრებოდა და ჩვენი „პრეტენზიები“ ირანის მისამართით, მათთვის მიუღებელი იყო.

საქართველოს უშუალო მეზობლებიდან აზერბაიჯანი (აღბანეთი) ჯერ კიდევ IX საუკუნეში მოექცა მაჰმადიანური გარემოცვის ქვეშ და მასზე დაყრდნობა ადარ შეიძლებოდა. ერთადერთი ქრისტიანი ქვეყანა სამხრეთით სომხეთი იყო, მაგრამ მასაც დიდი ხნით ადრე ჰქონდა სახელმწიფოებრიობა დაკარგული და ძლიერ მოკავშირედ ვერც იგი გამოდგებოდა. ასე რომ სამხრეთით წარმოქმნილ ორ უძლიერეს სახელმწიფოს: ირანსა და ოსმალეთს სამეფო-სამთავროებად დაშლილი საქართველო სრულფასოვანი პარტნიორის გარეშე შერჩა. მიუხედავად ამისა, მათი დამოკიდებულება ქართული პოლიტი-

კური ერთეულების მიმართ ერთგვაროვანი არ ყოფილა და სიტუაციიდან გამომდინარე იცვლებოდა.

1555 წელს ამასიის ზავით ირანმა და ოსმალეთმა საქართველო შუაზე გაიყვეს და მათი პრეტენზიები ქართული ქვეყნების დამოუკიდებელ საგარეო თუ საშინაო პოლიტიკის მიმართ კიდევ უფრო აგრესიული გახდა. XVII-XVIII საუკუნეების განმავლობაში ირანელი მბრძანებლების პოლიტიკამ აღმ. საქართველოს, ჭარელი და დაღესტნელი ფეოდალების მისამართით გარკვეული სახეცვლილება განიცადა. შაჰ-აბას I-ის დროს ეს იყო აღმოსავლეთ საქართველოს მიმართ დაუფარავი აგრესია და გამოცხადებული ომი დაღესტნელებთან კავშირში, ხოლო ნადირ-შაჰის მმართველობისას, პირიქით – დაღესტანზე ლაშქრობა ქართველებთან ერთად.

თუ შაჰ-აბას I 1616 წელს ლეკებს მოუწოდებდა: „მნებავს წარმოტყუებნა და იავარ-ყოფა სრულიად სანახებისა ამის, კახეთს მე ავერი, რაც მანდ ხიზანი ქალი და კაცი შემოვიდეს, დაატყუე[ვენ]“¹ და ამისათვის ჯილდოს მიიღებოთ, 1741 წელს დაღესტანზე სალაშქროდ სამზადისში მყოფი ნადირ-შაჰი ქართველ ფეოდალებს ასევე მითითებებს აძლევდა, ლეკებისათვის საკუთარ მიწაზე ცხოვრების პირობები მოესპოთ, ხოლო მათი პროტექცია სხვა პირობების შეთავაზების შესახებ არ მიეღოთ.²

XVIII ს. შუა ხანებში ირანს თავისი გასჭირვებოდა და საქართველოსთვის არ ეცადა, მაგრამ საუკუნის ბოლოსათვის მათი მბრძანებლების პოზიცია ისევ შეიცვალა. ქერიმ-ხანი (70-იანი წლების ბოლოს), ალა-მაჰმად-ხანი და ბაბა-ხანი (90-იანი წლების ბოლოს) აქტიურად მოუწოდებენ ლეკებს საქართველოზე სათარეშოდ.

„ლეკიანობის“ ფონზე ოსმალეთის ურთიერთობა აღმოსავლეთ საქართველოს მიმართ, სხვაგვარად წარიმართა. ამასიიდან (1555 წ.) მოყოლებული 1723 წლამდე, მცირე გამონაკლისების გარდა, ოსმალეთი ქართლ-კახეთს ირანის „საკუთრებად“ ცნობდა და მისთვის დიდი განსხვავება არ ჰქონდა, ლეკები ირანელებს არბევდნენ, თუ ქართველებს. ამ დროის განმავლობაში „ბრწყინვალე პორტას“ მიერ დაღესტნელთა ფართომასშტაბიანი ოპერაციების დაფინანსების შესახებ ცნობები არ გვაქვს. მდგომარეობა რადიკალურად შეიცვალა

¹ ბერი ეგნატაშვილი. ახალი ქართლის ცხოვრება. – ქართლის ცხოვრება. ტ. II. ტექსტი დადგენილი ყველა ძირითადი ხელნაწერის მიხედვით *სიმონ ყაუხჩიშვილის* მიერ. თბ., 1959, გვ. 401.

² В. Гамрекли. Вопросы взаимоотношения Восточной Грузии с Северным Кавказом..., გვ. 30.

1723 წლიდან. ქართლში „ოსმალბის“ დამყარების შემდეგ, „ბრწყინვალე პორტა“ უშუალოდ გაუმეზობლდა დაღესტანს და ლეკების თავდასხმები ოსმალებზე ისევე გახშირდა, როგორც მანამდე ირანელების, ან კახელების წინააღმდეგ. ქართლ-კახეთის მეფეების მიერ რუსეთის იმპერიის კავკასიაში მოწვევების განახლებისთანავე (1752 წლიდან), ოსმალეთ-დაღესტნის კავშირი ძველებურად აქტუალური გახდა, ხოლო 70-იანი წლებიდან ამ კავშირში შესამჩნევ როლს თამაშობდა ახალციხის სულეიმან ფაშაც.

ირან-ოსმალეთის განსაკუთრებული გაღიზიანება გამოიწვია XVI საუკუნის ბოლოდან რუსეთის როლის გააქტიურებამ კავკასიაში. რუსეთის მხრიდან ერთმორწმუნე საქართველოსადმი დახმარების მრავალჯგუფის მტკიცების მიუხედავად, ირანი, ოსმალეთი და ჩრდ. კავკასიის სხვა ხალხები კარგად ხვდებოდნენ, რომ რუსეთს რეალურად კავკასიაში საქართველოს ხსნა კი არა, იმპერიის ზრდა აინტერესებდა. მას შემდეგ, რაც რუსეთი კავკასიას „გაუმეზობლდა“ და დაღესტანს ჩრდილოეთით სარბიელი გადაეკეტა, მისი უარყოფითი ენერჯია მთლიანად სამხრეთით წარიმართა. თუმცა, დაღესტნელი ფეოდალები ერთ რომელიმე ორიენტაციას არასოდეს ამჟღავნებდნენ. ისინი მუდმივად ლავირებდნენ ირან-თურქეთსა და რუსეთს შორის იმგვარად, რომ რაც შეიძლება მეტი სარგებელი თვითონ ენახათ.¹

ზემოთ ჩამოთვლილმა მიზეზებმა ერთ დროს მშვიდობიანი მეზობლები: ქართლ-კახეთი და ჩრდილო-კავკასიის ხალხები შეურიგებელ მტრებად აქცია, მაგრამ წინააღმდეგობათა კვანძში რამდენიმე ძირითადი მიზეზი მაინც გამოსაყოფია:

ა) XV-XVI საუკუნეებიდან იწყება ოსმალეთის იმპერიის სწრაფი ზრდა, რაც მნიშვნელოვანწილად სამხედრო სფეროს რეორგანიზაციით იყო განპირობებული. სულთნებმა უარი თქვეს არმიის შეკრების ტრადიციულ მეთოდებზე, რომელიც ვილაიეთებიდან დადგენილი რაოდენობის მეომრების (ძირითადად მაღალი და საშუალო წოდების), დაპყრობილი ტერიტორიებიდან იძულებით გამოყვანილ მოსახლეობასა და დაქირავებულ ჯარს ეყრდნობოდა. არმიის ძირითად ბირთვად იქცნენ ე. წ. „იანიჩრები“. ისინი ბავშვობიდანვე სამხედრო სკოლებში გადიოდნენ ფიზიკურ და სულიერ წვრთნას და პროფესიონალ სამხედროებად ყალიბდებოდნენ. „იანიჩრების“ სამხედრო სკოლების შექმნა, ძირითადად, სწორედ ბავშვობიდან ტყვედ წაყვანილი ვაჟებით ხდებოდა. საამი-

¹ X. Хашаев. Общественный строй Дагестана в XVIII веке, გვ. 27.

სოდ საუკეთესო „ნედლეულის“ ბაზა – კავკასია, ხოლო ამ „ნედლეულის“ მიმწოდებელი დაღესტანი იყო. არანაკლები მოთხოვნა იყო კავკასიიდან ტყვედ წაყვანილ „მამელუკებზე“ ოსმალეთის სამხრეთით, ეგვიპტეში. ყველაზე ძვირად სწორედ აქ ფასობდნენ ქართველები.¹ არც ირანში უჩიოდნენ „გურჯების“ ნაკლებობას. ცნობილია, რომ XVI-XVII საუკუნეებში შაჰის კარზე უმრავლესობას სწორედ ქართლ-კახეთიდან სხვადასხვა დროს იძულებით წაყვანილი თუ საკუთარი ნებით გაქცეულები წარმოადგენდნენ.

ბ) რუსეთის იმპერიის საქართველოში დამკვიდრებით ჩრდ. კავკასიის ხალხები ძლიერი ქრისტიანული ქვეყნის გარემოცვაში ექცეოდნენ, რასაც მათგან განსხვავებული სარწმუნოების თავისუფლებისმოყვარე მთიელები იოლად არ შეურიგდებოდნენ, ისინი იმასაც კარგად ხვდებოდნენ, რომ საქართველოს დაპყრობის შემდეგ მათი რიგიც დადგებოდა და არც შემცდარან.

გ) რუსეთის იმპერიის სამხრეთით ზრდა, თავისთავად ზღუდავდა ოსმალეთის გავლენის არეალს, ამიტომ „ბრწყინვალე პორტა“ თანდათანობით აშკარად თუ ფარულად აქეზებდა და აფინანსებდა დაღესტნელ მთიელთა რაზმებს საქართველოს წინააღმდეგ სათარეშოდ.

დ) იგივე სიტუაცია იყო საქართველოს სამხრეთ-აღმოსავლეთით, სადაც რუსეთის მზარდ ინტერესებს აგრესიით პასუხობდა სპარსეთი.

ე) მას შემდეგ, რაც ქართლ-კახეთის მეფეებმა საბოლოო ორიენტირი რუსეთზე გააკეთეს, ირანი და ოსმალეთი „უნისონში“ მოქმედებდნენ საქართველოს წინააღმდეგ და აქტიურად იყენებდნენ ერთმორწმუნე ჩრდილო-კავკასიას და ახალციხის საფაშოს. შაჰი და სულთანი საქართველოს ისევ საკუთრად მიიჩნევდნენ, ამიტომ ზედმეტ მოზიარეს, ბუნებრივია, ვერ ეგუებოდნენ.

ვ) ჩრდ. კავკასიის გეოგრაფიული მდებარეობის, კერძოდ, მთის მკაცრი პირობების, მიწის სიმცირისა და მოუსავლიანობის გამო, მოსახლეობის გარკვეული ნაწილისათვის ცხოვრების „სახსრად“ სწორედ ძარცვა-თარეში და ტყვეებით ვაჭრობა იქცა, მიუხედავად იმისა, რომ სიცოცხლის რისკი ძალზე დიდი იყო. საგულისხმოა, რომ დაღესტნელები თანაბარი ხალისით მოდიოდნენ, როგორც ქართლ-კახეთის სათარეშოდ, ისე ქართველი მეფეების დროშის ქვეშ დაქირავებულთა სახით.

ზ) დაბოლოს, ქართლ-კახეთში მუდმივ „ლეკიანობას“ ძალზე ნოყიერ ნიადაგს უქმნიდა ადგილზე არსებული არასტაბილური პოლიტიკური ვითარე-

¹ ავთანდილ კილასონია. ადამიანებით ვაჭრობა საქართველო-კავკასიაში..., გვ. 322.

ბა და მუდმივი დაპირისპირებები. ურთიერთ შურით დაბრმავებული ქართველი ფეოდალების ნაწილი საკუთარ ბედნერებას სხვის უბედურებაში ეძებდა. ეს ფაქტი ყველაზე ცხადად მისმა თანამედროვემ ვახუშტი ბატონიშვილმა იგრძნო: „არამედ შურითა ურთიერთათა ქართველთათა იყო უუფროსესნი ჭირნი და არითმიან და ძრცვიდიან ოსმალნი შესმენითა მათითა, კუალად უმეტესად ოკრებითა და ტყუევობითა ლეკთათა“.¹ შანშე ქსნის ერისთავისა და გივი ამილახვრის მუდმივ დაპირისპირებას ნ. ბერძენიშვილი შემდეგი სიტყვებით აფასებს: „შანშე ლეკებით საამილახვროს აწიოკებდა, ამილახორი ყიზილბაშებით ქსნის ხეობის გლეხებს სპობდა და ორივენი კი ქართლის გაოსრებას ჩიოდნენო“.² მაჩაბლებსა და ფავლენიშვილებს შორის XVI ს. 20-იან წლებში დაწყებული დაგა მხოლოდ XVII ს. შუა ხანებში დასრულდა.³ ასევე დაუნდობელი ბრძოლა წარმოებდა საკაძეებსა და ჯავახიშვილებს შორის⁴ და ა. შ.

აღსანიშნავია ისიც, რომ საქართველოში იმ დროისათვის არსებული სოციალ-ეკონომიკური და პოლიტიკური სისტემა (სათავადობად დაშლილ-დაქუცმაცებული ქვეყანა, მძიმე დემოგრაფიული ვითარება, ეკონომიკის განვითარების დაბალი დონე, მუდმივი ჯარის არ არსებობა და სხვ.) ნოყიერ ნიადაგს ქმნიდა ლეკთა გამუდმებული თარეშისათვის და არ იძლეოდა ამ პრობლემის გადაჭრის საშუალებას. საკმარისი იყო ამ სისტემის თუნდაც რომელიმე სემენტი შეცვლილიყო (მაგ. XVIII ს. 70-იან წლებში, როცა ერეკლე II-მ გააუქმა ქსნისა და არაგვის საერისთავოები, გავლენის ქვეშ მოაქცია საამილახვრო-საბარათიანო, ხელი მიჰყო სამთამაღნო წარმოებას, შექმნა „მორიგე ჯარი“), რომ მისი სასიკეთო შედეგი ქვეყანას უმაღლეს ეტყობოდა და ლეკთა შემოსევებიც მნიშვნელოვნად იკლებდა.

„ლეკიანობა“ მნიშვნელოვნად ასუსტებდა ქართული ჯარის ეფექტურობასა და შესაძლებლობებს. ქართველი ხელისუფალნი არაერთხელ გამხდარან იძულებულნი, ან საერთოდ შეეკავებინათ თავი საკუთარი ქვეყნის სამხრეთ ტერიტორიებზე მოქმედებისას, ანდა სამხედრო ძალის მნიშვნელოვანი ნაწილი ზურგის დასაცავად დაეტოვებინათ.⁵

ქვეყნის ხსნა და სიძლიერე მის გაერთიანებაში იყო, რასაც კარგად

¹ ბატონიშვილი ვახუშტი. აღწერა სამეფოსა საქართველოსა., გვ. 510.

² ნიკოლოზ ბერძენიშვილი. საქართველოს ისტორიის საკითხები, ტ. II, გვ. 171.

³ გიორგი ოთხმეზური. შიდა ქართლის მცირე სათავადოები (XV-XVV სს.), დისერტაცია ისტორიის მეცნიერებათა დოქტორის სამეცნიერო ხარისხის მოსაპოვებლად. თბ., 1999, გვ. 96.

⁴ გიორგი ოთხმეზური. შიდა ქართლის მცირე სათავადოები., გვ. 125.

⁵ В. Гамрекели. Вопросы взаимоотношения Восточной Грузии с Северным Кавказом., გვ. 24.

ხვდებოდა საქართველოს სამეფო კარი, მაგრამ ეს კარგად იცოდა მტერმაც (რომელიც საქართველოს არასოდეს აკლდა, როგორც სამხრეთით, ისე ჩრდილოეთით), ამიტომ, როგორც კი ამის წინაპირობა შეიქმნებოდა (მაგ. XVIII ს. 80-იანი წლების ბოლოს), საპასუხო ენერგიული ქმედებები მათი მხრიდან არ აყოვნებდა. სამწუხაროდ, ისინი ამას ადვილად ახერხებდნენ ფართო აგენტურისა თუ ქვეყნის საშინაო საქმეებში უშუალო ჩარევის სახით.

ევროპისაგან „ზურგნაქცევმა“ საქართველოს სამეფო კარმა ქვეყნის ხსნის მთელი იმედი XVIII საუკუნეში რუსეთს დაუკავშირა, რაც დიდმა და ძლიერმა ქვეყანამ თავის სასარგებლოდ გამოიყენა.

ზემოთქმული განსაკუთრებით მწვავედ გამოსცადა საკუთარ თავზე ერეკლე II-მ სიცოცხლის ბოლო წლებში. ის საბოლოოდ დარწმუნდა, რომ რუსეთი, რომელიც გარეგნულად საქართველოს თითქოს ყოველთვის „მფარველად“ ევლინებოდა, რეალურად შორსმომავალი პირადი მიზნებისათვის იბრძოდა და არა საქართველოს გადასარჩენად. ერეკლე იმასაც მიხვდა, რომ რუსეთის ინტერესებში შედიოდა არა ძლიერი საქართველო, რომელიც საკუთარი ძალით მოახერხებდა „ლეკიანობის“ პრობლემის გადაჭრას, არამედ სუსტი, რუსეთს „მავედრებელი“. აქედან გამომდინარეობდა საქართველოს მეფეებისა და ელჩების დახმარების მიღების მიზნით თხოვნაზე მუდმივი „მოუცლელობა“. საიმპერატორო კარი ყოველთვის ახერხებდა წარმოეჩინა, რომ პრობლემებს წყვეტდა არა ქართლ-კახეთი, არამედ რუსეთი.

შეცდომა იქნება „ლეკიანობის“ პრობლემა მხოლოდ ეთნიკურ და ისიც, უარყოფით ჭრილში განგვეხილა. ეს ფაქტი XIX-XX საუკუნეების განმავლობაში რუსული ხელისუფლების მიზანმიმართული პოლიტიკის შედეგი იყო. როგორც ი. პეტრუშევსკი მიუთითებს, მთელი მთიანი დაღესტნის მოსახლეობის (განურჩევლად – ავარების, წახურების და სხვ.) „მონათვლა“ ლეკებად, ხოლო „ლეკის“ გაიგივება დაუნდობელ მკვლელებსა და მძარცველებთან, თვითმპყრობელი იმპერიის მიზანს ემსახურებოდა, რათა გაემართლებინა რუსეთის მიერ კავკასიის ანექსია და რუსეთის კულტურულ მისიას – დაეცვა ქრისტიანული საქართველო და სომხეთი „მუსულმანი ბარბაროსებისაგან“.¹

ამ ფონზე ძალზე მოსახერხებლად გამოიყურებოდა მთელი დაღესტნელი მოსახლეობის წარმოჩენა ავაზაკებად, რომელთაგან საქართველოს დაცვა მხოლოდ რუსეთის ძლიერ ხელს შეეძლო.

¹ И. Петрушевский, Джаро-белаканские..., გვ. 9.

მართლაც, წინამდებარე ნაშრომში არაერთგან შევხვდებით საქართველო-ჩრდილო კავკასიელი მოსახლეობის კოალიციის მცდელობას რეგიონში მყარად ფეხმოკიდებული რუსეთის იმპერიისაგან თავის დაღწევის მიზნით, რომლებიც, სამწუხაროდ, ყოველთვის მარცხით სრულდებოდნენ.

თავი II. „ლეკიანობა“ ქართლ-კახეთში (XVIII ს.-XIX ს-ის 30-იანი წლები)

1. ლეკიანობა აღმოსავლეთ საქართველოში XVIII საუკუნის I ნახევარში

ლეკთა შემოსევებმა აღმოსავლეთ საქართველოში სისტემატური ხასიათი XVIII საუკუნის 10-იანი წლებიდან მიიღო და XIX საუკუნის I მესამედამდე გასტანა. განსხვავება მხოლოდ იმაში იყო, რომ შემოსევების ინტენსივობა წლების მიხედვით იზრდებოდა, ან იკლებდა.

საუკუნის დასაწყისი კლასობრივი ბრძოლის გამწვავებითაც აღინიშნა, რის გამოც ქვეყანაში „მრავალი შფოთი და ცილობა“ შეიქმნა. ვახტანგ ჯანიშინის იძულებითი წესით მოსახლეობის „მყრელობას“ და „უღებების“ (დამატებითი გადასახადების) დადებას თავიდანვე დიდი წინააღმდეგობა შეხვდა. „გლეხის კაცის თავხედობა ვერ მოვშაღეთო“, ამბობდა მათი ნამოქმედართ შეშფოთებული ვახტანგ VI.¹

ბატონყმური ჩაგვრითა და ძალმომრეობით შევიწროებული გლეხები ხსნას ალაზანს გაღმა გაქცევასა და „გალეკებაში“ ეძებდნენ. ნ. ბერძენიშვილის განმარტებით: „კახელი გლეხები „ლეკობაში“ უბატონობას ხედავდნენ“.² ქართველთა „გალეკების“ ერთ-ერთი მიზეზი ავარიელთა თემებში არსებული მიწის ინდივიდუალური საკუთრების ფორმა იყო. დამკვიდრებული წესის მიხედვით, მიწის გაყიდვისას თოხუმები ჯერ ახლობლებს ეკონტაქტებოდნენ, ხოლო მათი უარის შემთხვევაში მიწის ყიდვა-გაყიდვა თავისუფალი იყო.³ ჭარის თავისუფალ საზოგადოებებში ასევე ყველას ჰქონდა უფლება, ქართველი ინგილო-

¹ მანანა ქიქოძე, სოციალური ურთიერთობის მოწესრიგების ცდები, კლასობრივი ბრძოლა XVIII ს. პირველ მეოთხედში. – საქართველოს ისტორიის ნარკვევები, ტ. IV. თბ., 1973, გვ. 397.

² ნიკოლზ ბერძენიშვილი. XVIII ს. საქართველოს ისტორიიდან, გვ. 188.

³ И. Петрушевский, Джаро-белаканские..., გვ. 24-25.

ებისა და თურქი მუგალების ჩათვლით, გამოეთავისუფლებინა ტყის თავისუფალი სივრცე და საახლო მიწათმოქმედებით ესარგებლა.

თუმცა, „გაღვიწყებული“ კახელი გლეხების უბატონო მდგომარეობა მალე ახალი ბატონებით შეიცვალა. ადგილობრივი მოსახლეობის მიერ დამორჩილებული ინგილოები, რელიგიურის გარდა, მძიმე სოციალურ ჩაგვრასაც განიცდიდნენ. მაგ. ისინი, ასევე ჭარელების გავლენის ქვეშ მოქცეული თურქ მუგალებთან შედარებით, კეშკელური სამართლის მიხედვით, მიწით სარგებლობისათვის ელისუს სულთანს 3-ჯერ მეტ გადასახადს უხდიდნენ.¹

1711 წელს ქართლის მეფე ქაიხოსრო ავღანების წინააღმდეგ ბრძოლაში დაიღუპა და ვახტანგ VI გასამეფებლად ირანში გაიწვიეს, სადაც 1719 წლამდე „მოუგვიანდა“. ქართლს დროებით, ჯერ მისი უმცროსი ძმა სვიმონი (1712-1714 წ.წ.) მართავდა, შემდეგ – გამაჰმადიანებული იესე (ალი-ყული-ხანი – 1714-1717 წ.წ.), ხოლო ბოლოს – ვახტანგის ვაჟიშვილი ბაქარი (1717-1719 წ.წ.).

ლეკები ქართლში ბაქარის გამეფებისთანავე (1717 წ. ზაფხული) შემოვიდნენ 8000 ცხენოსნით, მოარბიეს ბოლნისისა და ქციის ხეობა. მათ წინააღმდეგ ბაქარმა ბიძამისი სვიმონი გაგზავნა 300 მხედრით. ქართველებმა ლეკთა მეწინავე რაზმი დაამარცხეს, მაგრამ მალე დაღესტნელებმა ერთიანად შემოუტიეს და მარნეულამდე გამოდევნეს. ქართველები თბილისს შემოიქცნენ. ლეკებმა ქართლი მოაოხრეს, ალაფი წაიღეს და ჭარში მხოლოდ ძლიერი სიცხეებისა და უწყლოობის გამო დაბრუნდნენ.²

აქამდე ლეკთა შემოსევების ძირითადი „სარბიელი“ ქართლ-კახეთი იყო და მათ შეტევებს ჩრდილო-ირანის მიმართულებით შემთხვევითი ხასიათი ჰქონდა, ამიტომ ირანის შაჰის კარზე ამ ამბებს აუღელვებლად ხვდებოდნენ, მაგრამ XVIII ს. 10-იანი წლებიდან ირანის დიდი ვეზირის ფათალი-ხანის გარდაცვალებისთანავე (იგი წარმოშობით დაღესტნიდან იყო და სამშობლოში დიდი გავლენით სარგებლობდა), დაღესტნელებმა უფრო ინტენსიურად შეუტიეს ირანის პროვინციებს, მათი მოთარეშე ურდოები დიდი რაოდენობით „ჩახსდნენ“ დარუბანდში, განჯაში, შემახასა და ქართლ-კახეთში.³ კრიტიკულ ვითარებაში ირანისათვის „დაღესტნური პრობლემის“ მოსაგვარებლად ქართლის

¹ **И. Петрушевский.** Джаро-белаканские..., გვ. 31.

² **მოსე ჯანაშვილი.** საქართველოს ისტორია. მეორე გამოცემა **ზაქარია ჭიჭინაძისა.** ტფ., 1894, გვ. 385; **ს. კაკაბაძე.** საქართველოს ისტორია. ახალი საუკუნეების ეპოქა (1500-1810). ტფ., 1922, გვ. 139.

³ **ლოვარდ ტუხაშვილი.** პოლიტიკური ვითარება XVIII ს. პირველ ოცწლეულში. – *საქართველოს ისტორიის ნარკვევები*, ტ. IV, გვ. 408.

მეფე მოიაზრებოდა. სწორედ ამ მიზეზით შეიძლება აიხსნას, რომ შაჰმა ჰუსეინმა 1719 წელს ვახტანგი საქართველოში დააბრუნა.

აღნიშნულ წლებში მძიმე მდგომარეობა იყო კახეთშიც. 1709 წელს გარდაიცვალა ირანს მეოფი კახეთის მეფე ერეკლე I ნაზარალიხანი და მისი მემკვიდრე დავითი (იმამყულიხანი – 1709-1722 წწ.) ტახტზე დასამტკიცებლად ირანში გაიწვიეს. კახეთში დროებით მმართველად დანიშნული თეიმურაზ ბატონიშვილის მცირეწლოვნებით ლეკებმა ისარგებლეს და უპატრონი ქვეყანაში მარბიელ თარემს ყოველდღიური ხასიათი მისცეს. 1715 წელს ირანიდან კახეთში დაბრუნებულ დავით იმამყულიხანს საგანგაშო მდგომარეობა დახვდა: „ამის უფრო საქმის გაჭირება აღარ იქნება, რომ ამ ქვეყანას არის, დღე ძვირად გავა, რომე ომი და ცემა არსად იქნასო“, ჩიოდა კახეთის მეფე ვახტანგ VI-სთან.¹ „ლეკიანობას“ რომ ვერაფერი მოუხერხეს, კახელებმა ალავერდელ მიტროპოლიტ ნიკოლოზის რჩევით, ქვეყნის ხსნის „ორიგინალური“ გზა მოიფიქრეს და დაასკვნეს, რომ დაღესტნელ-ჭარელებისთვის ქართლზე სათარემოდ გზა მიეცათ იმ პირობით, რომ კახეთს თავს დაანებებდნენ, მაგრამ ლეკებთან ზავი კახელებს თუშებმა ჩაუშალეს. ლეკების საქონელს დაეცნენ და მწყემსებიანად გაიტაცეს. „ზავის დარღვევის“ გამო, ჭარელებმა პრეტენზია კახელებს წაუყენეს. იმამყული ხანს განსაკუთრებული ზომების მიღება დასჭირდა, რომ თუშებს ნადავლი უკან დაებრუნებინათ.

როდესაც მარტომ ვერაფერი მოუხერხა, 1720 წლის გაზაფხულზე იმამყულიხანი ვახტანგ VI-ს წერილს უგზავნის ერთობლივი მოქმედების გადაუდებელი საჭიროების შესახებ: „თუ ამავე ზაფხულ თქვენისა და ჩემის გარჯით ქვეყნებს არ შევინახავთ ლეკნი უფრო ბევრს ავს იქმენ და ქვეყნებს დაასუსტებნო“.² მისი ვახტანგისადმი მიწერილი შემდეგი წერილებიდან³ ჩანს, რომ ამ დროისათვის კახეთი „ლეკიანობის“ წინააღმდეგ სრულიად უუნაროა. თუ აქამდე კახეთში ძირითადად, ჭარელნი, თალელნი, პირაქითა ლეკები ლაშქრობდნენ, 1721 წლის შემოდგომიდან მათ გულხადარასა და პირიქითა ლეკებიც შეერთებიან, ხოდაშენს, საყდრიონს, „სამაყნოს“ ერთიანად თავს დასცემიან და მოუოხრებიანთ.⁴

¹ დარეჯან მეგრელაძე. მასალები XVIII ს. ოცდანი წლების ქართლ-კახეთის ისტორიისათვის. – მასალები საქართველოსა და კავკასიის ისტორიისათვის (მსკი), ნაკვ. 33. თბ., 1960. გვ. 167.

² დარეჯან მეგრელაძე. მასალები XVIII ს. ოცდანი წლების..., გვ. 153, დოკ. 6.

³ დარეჯან მეგრელაძე. მასალები XVIII ს. ოცდანი წლების..., დოკ. 9; 11; 14; 15 და სხვ.

⁴ დარეჯან მეგრელაძე. მასალები XVIII ს. ოცდანი წლების..., გვ. 165, დოკ. 15.

ლეკთა შემოსევებისაგან თავის დაცვის მიზნით, ვახტანგ VI-ს ჯარი ჩაუყენებია ლილოზე, მაგრამ დავით კახთა მეფისათვის ვერც ეს გამოდგა დიდი ნუგეში: „...მერმე წიგნი გებოძათ და თქუენი ლილოზედ გამოსვლა გებრძანათ. მართალს მოგახსენებ თქვენს კახეთში გამობძანება, დიად ქვეყნების სარგებელი და ჳელმწიფის დავლათის სამჯობინარო არის, მაგრამ თქუენც მოგეხსენებათ: ლილო ჩვენზედ და აქეთ კახეთზედ შორს არის, თორემ თქუენის ჯარით გამობძანების უკეთესი რა იქნების და მაშინც ხომე თქუენს გამობძანებას ბევრი სარგებელი აქვს. ასეთი ალაგებიც არის ლილოს გარდა ჯარის სადგომი სხვაგან, რომე ქართლზედ მიმავალს ჯარსაც წინ გარდაუდგება იქიდამე და კახეთსაც არგებსო“, წერდა დავით იმამყული-ხანი ვახტანგს.¹ 1719 წლის დეკემბერში საფურცლეში (დღ. ნატახტარში) ქართლისა და კახეთის მეფეების ოფიციალური შეხვედრა მოეწყო, სადაც დაღესტნელების წინააღმდეგ ერთობლივი ბრძოლის გეგმა შეიმუშავეს. ვახტანგ VI-მ კახეთში საბარათიანოს ჯარიც გაგზავნა ერასტი ყაფლანიშვილის მეთაურობით, მაგრამ ამ ლაშქრობას წარმატება არ მოჰყოლია და ლეკთა შემოსევები ჩვეულებისამებრ გაგრძელდა.

1721 წელს ირანის შაჰმა ვახტანგ VI სამხრეთ აზერბაიჯანის სპასალარად დანიშნა და მის ხელში დიდი სამხედრო ძალა აღმოჩნდა. ირანის მოთხოვნითვე, ამ ჯარით ვახტანგი გაემგზავრა განჯის სახანოსაკენ, სადაც ადგილობრივი სუნიტი მოსახლეობის ხელშეწყობით ლეკთა მრავალრიცხოვანი ბრბოები იყვნენ განლაგებულნი. ქართველებმა რამდენიმე ბრძოლაში სასტიკად დაამარცხეს ლეკები და ჭარ-ბელაქანს მიაღვინეს.

დაღესტნელთა თარეშის აღკვეთას ირანისათვის არსებითი მნიშვნელობა კი ჰქონდა, მაგრამ არანაკლებ საშიშროებას წარმოადგენდა ქართველების წარმატება. როგორც ამ ამბების უშუალო მონაწილე სეხნია ჩხეიძე გადმოგვცემს, ირანში ფიქრობდნენ: „თუ მეფემ ვახტანგ ჭარი დაიჭირა, ქვეყანასაც (ირანსაც – ი.ა.) ის დაიჭერსო“;² ამიტომ შაჰმა ვახტანგს დაღესტნელთა წინააღმდეგ ლაშქრობა მოაშლევინა და თბილისში დაბრუნება უბრძანა სწორედ იმ დროს, როდესაც ქართველთა გამარჯვება ეჭვს არ იწვევდა. „უფროსოდა რა, ვახტანგის გაძლიერებას, შაჰმა თვითონვე ჩაშალა ვახტანგის მიერ 1720 წლის შემოდგომაზე ლეკების წინააღმდეგ წარმატებით დაწყებული კამპანია იმ საბაბით, რომ ჭარელებმა მასთან დანაშაული აღიარეს და ერთგულების ფიცი მის-

¹ დარეჯან მეგრელაძე. მასალები XVIII ს. ოციანი წლების... გვ. 166-167, დოკ. 16.

² სეხნია ჩხეიძე. საქართველოს ცხოვრება. ტფ., 1913, გვ. 33.

ცესო“¹ – მიუთითებდა ო. მარკოვა. შაჰის ასეთი ვერაგული ბრძანებით განრისხებულმა მეფემ საჯაროდ დაიფიცა, რომ აღარასოდეს შეასრულებდა შაჰის ბრძანებას და ეს ფიცი მას სიცოცხლის ბოლომდე აღარ დაურღვევია.²

ვახტანგის ჭარიდან უშედეგოდ მობრუნების შემდეგ კახეთი კიდევ უფრო მძიმე მდგომარეობაში აღმოჩნდა და კახელ გლეხთა „გაღეკების“ პროცესი კვლავ განახლდა. „თქვენმა გაბრუნებამ ქვეყანას გული გაუტეხა ...მოგესხნებათ მრავალჯერ მტრისაგან მოთხრილი და შეწუხებული გლეხი ადვილად მოტყუვდება. ამათ ლეკის პირი დაიჭირეს და რომელიც ლეკს მიუდგენ ისინი ქვეყანას მტერობენ და ეს საქმე კემწიფის დოვლათის საზიანო არის“, – იწერებოდა კახთა მეფე.³

თავის უუნარობას იმამყულიხანი ლეკების წინააღმდეგ ბრძოლის სირთულით ხსნიდა: „გლეხი კაცი სრულ მუშაობაში არის: კვნაში, ვენაჯის მუშაობაში“, რის გამოც ჯარი დაფანტულია და მომხდურები ამით სარგებლობენ. „მერმე დაღისტანს გარდა ყაბალა, შაქი და სხვა იმათშივე გარშემო სოფლები შემოიმატეს“ და მარტო კახეთი მათ წინააღმდეგ რას გააწყობსო და ვახტანგს აფრთხილებდა, „თუ ამავე ზაფხულს კახეთს მშველელი არ გამოუჩნდება, დანარჩენი ჭარში გახიზნულებიც „ლეკის პირს მისცემენ“ და მერე ამათი დამარცხება შეუძლებელი იქნებაო.⁴

ვითარება არც სამხრეთ-აღმოსავლეთით იყო ქართლ-კახეთისათვის სანუგეშო. 1711 წელს სეფიანთა ირანის წინააღმდეგ აჯანყება დაიწყო ლეკებისა და დაღესტნის სხვა ხალხთა მეთაურმა ჰაჯი დაუდმა, რომელსაც მიემხრო ყაზი-ყუმუხის მფლობელი სურხაი-ხანი. ო. მარკოვას შეფასებით, ლეკების თავდასხმები აზერბაიჯანის ირანულ სახანოებზე დაკავშირებული იყო არა მხოლოდ ანტიირანულ, არამედ ანტიფეოდალურ მოძრაობასთან – მიმართული ირანელი მმართველებისა და ფეოდალების მკაცრი მოპყრობის წინააღმდეგ. ლეკების ეს გამოსვლები XVIII ს. I მეოთხედში ირანისათვის წარმოადგენდა რეალურ საშიშროებას, მით უფრო, რომ იგი თურქეთის მხარდაჭერით სარგებლობდა.⁵

თურქეთი ირანში არსებულ ყველა წინააღმდეგობას მოხერხებულად იყე-

¹ **О. Маркова.** Россия, Закавказье и международные отношения в XVIII веке. М., 1966, გვ. 103.
² **ლოვარდ ტუნაშვილი.** პოლიტიკური ვითარება XVIII ს. პირველ ოცწლეულში, გვ. 413.
³ **დარეჯან მეგრელაძე.** მასალები XVIII ს. ოციანი წლების., გვ. 160, დოკ. 11.
⁴ **დარეჯან მეგრელაძე.** მასალები XVIII ს. ოციანი წლების., გვ. 163, დოკ. 14.
⁵ **О. Маркова.** Россия, Закавказье..., გვ. 102-103.

ნებდა და მის „იარაღად“ დაღესტანი იქცა. მით უფრო, რომ ეს ორივეს (თურქეთსაც და დაღესტანსაც) აწყობდა. თურქეთს იმიტომ, რომ მის ტრადიციულ მეტოქეს – ირანს კიდევ უფრო ასუსტებდა, ხოლო დაღესტანისათვის მთავარი მიზანი ძარცვა-რბევა და მისგან მიღებული ნადავლი იყო. თურქეთი ხვდებოდა, რომ თუ მისთვის შექმნილ ხელსაყრელ მომენტს არ გამოიყენებდა, ამ მომენტით მისი მეორე, შედარებით ძლიერი მეტოქე – რუსეთი აუცილებლად ისარგებლებდა, ამიტომ, ლეკიანობის გამომწვევმა მიზეზებმა დაღესტანის გარემოც იზინეს თავი, კერძოდ, თურქეთ-ირანის მტრული ურთიერთობის სფეროში. ასეთ ვითარებაში დაღესტანთან დამოკიდებულების საკითხმა ვახტანგისათვის გადამწყვეტი მნიშვნელობა მიიღო.¹

ირანის ლტოლვილი შაჰი ჰუსეინი გამოუვალ სიტუაციაში ჩავარდა. მას იმის ძალაც არ შესწევდა ავღანების ბელადის მაჰმუდ ხანის (მირ-ვეისის შვილი) შეტევები დამოუკიდებლად შეეჩერებინა, არა თუ ჩრდილოეთიდან ზღვასავით წამოსული დაღესტნელების მრავალრიცხოვან ბრბოებს დახვედროდა. ასეთ შემთხვევაში მისთვის ერთადერთ იმედად ისევ ქართლის მეფე იქცა, მაგრამ ვახტანგს ჰუსეინის ვერაგობა მწარედ ახსოვდა. იგი ფიცის ერთგული დარჩა, შაჰის თხოვნა არაფრად ჩააგლო და მთელი იმედი პეტრე I-ის კასპისპირეთში წამოწყებულ ლაშქრობას დაუკავშირა.

1722 წ. 2 ივლისს პეტრე I ვახტანგს ბორის თურქესტანოვის (თურქესტანიშვილის) საშუალებით მართლაც ატყობინებდა, რომ მალე იგი სპარსეთის საზღვრებს მიაღებოდა და ვახტანგს უთვლიდა, საჩქაროდ ლეკებს დასცემოდა.² 1722 წ. 19 სექტემბერს ვახტანგ VI საპასუხო წერილში პეტრე I-ს ირანზე ლაშქრობის მზადყოფნას აუწყებდა: „ღმით ოცს მარიამობას, განჯას ჩავალთ. ვინც იქაურნი სომეხნი და თათარნი არიან იმათს ჯარსაც შემოვიყრიოთ, იქიდან ლეკთ მტერობას დავუწყებთ, თქვენის დიდებულის ბძძანების მაყურებელნი ვიქმნებითო“.³

ვახტანგის იმედი მართლაც არ ჩანდა უსაფუძვლო. რუსეთის საიმპერატორო კარს სერიოზული საბაზი გააჩნდა კასპისპირეთში ლაშქრობის დასაწყებად. რუსი ვაჭრები, რომლებიც ამიერკავკასიის ქვეყნებთან და ირანთან ვაჭ-

¹ ვარლამ დონდუა. დავით გურამიშვილი და საქართველოს ისტორია. თბ., 1959, გვ. 75.

² ივანე ჯავახიშვილი. დამოკიდებულება რუსეთსა და საქართველოს შორის მე-XVIII-ე საუკუნეში. ტფ., 1919, გვ. 9.

³ М. Броссе. Переписка на иностранных языках Грузинских царей с Российскими государями от 1659 г. по 1770 г. СПб., 1861, гв. 140.

რობდნენ, ჯერ ერთი, გზებზე მიმოსვლისას მთიელი დაღესტნელების თავდასხმების მუდმივი საფრთხის ქვეშ იმყოფებოდნენ და მეორეც – ირანელი მმართველები, რომლებიც რუსეთის ამიერკავკასიაში დამკვიდრებას ეწინააღმდეგებოდნენ, რუსი ვაჭრების მიმართ თვითნებობდნენ,¹ რუსებისათვისაც ნათელი გახდა, რომ თუ ირანში შექმნილ ვითარებით არ ისარგებლებდნენ, მაშინ ამიერკავკასია და კასპიისპირა აბრეშუმით მდიდარი რაიონები შეიძლება თურქეთის ხელში მოქცეულიყო. როგორც ზურაბ ავალიშვილი შენიშნავდა: „მთავარი პოლიტიკური სტიმული რუსეთისათვის ირანის წინააღმდეგ ლაშქრობისა, იყო იმის საშიშროება, რომ ირანის დასუსტებით კასპიის ზღვის ნაპირებზე თურქეთი დამკვიდრდებოდა“.² თუმცა, თურქეთის აშკარა გაღიზიანებას რუსეთი ამ ეტაპზე მაინც ერიდებოდა. პორტასთან ურთიერთობის დაძაბვა მის ინტერესებში არ შედიოდა და საბაბი ადვილად გამოძებნა. პეტრე დიდმა ისარგებლა იმით, რომ შემახაში ლეკები და კუმიკები თავს დაესხნენ რუს ვაჭრებს, გაძარცვეს და დახოცვეს ისინი, ამიტომ 1722 წელს ლაშქრობა წამოიწყო კასპიისპირეთში. თურქებისათვის რომ ეჭვის საფუძველი არ მიეცათ, რუსეთის იმპერატორმა შესთავაზა, რომ იქ პორტასაც გაეგზავნა დამკვიდრებლად თავისი კომისარი“.³

სულთნის კარზე „ჩრდილოელთა“ დიპლომატიური ხრიკებს კარგად ხვდებოდნენ, ამიტომ პეტრე I-ს მალევე მოსთხოვეს შეეჩერებინა სამხედრო მოქმედებები ერთმორწმუნე და თურქეთის მფარველობაში შესული ლეკების წინააღმდეგ და გაეყვანა ჯარები დაღესტნიდან.⁴ ასეთ ვითარებაში რუსეთის ინტერესი საქართველოსადმი მეორეხარისხოვნად იქცა, მისთვის მთავარი ირან-ოსმალეთთან ურთიერთობების „დალაგება“ იყო. უარის მიღების შემდეგ, ირანის დევნილმა შაჰმა ჰუსეინმა ვახტანგი გადაყენებულად გამოაცხადა და ქართლი კახეთის მეფეს კონსტანტინე მაჰმადყული-ხანს გადასცა. მან 17 ათასი ლეკი დაიქირავა, მათ „დიდძალი ვერცხლი აღუთქვა“⁵ და თბილისს თავს დაესხა. კონსტანტინემ 1723 წ. 4 მაისს დედაქალაქი აიღო და ლეკებს გააძარცვინა. მაჰმადყული-ხანმა ესეც არ იკმარა და თბილისის მცხოვრებლებს 40 ათასი

¹ შოთა ლომსაძე. სამცხე-ჯავახეთი. (XVIII საუკუნის შუაწლებიდან XIX საუკუნის შუა წლებამდე). თბ., 1975, გვ. 20-21.

² ზურაბ შარაშენიძე. ირანი XVIII საუკუნის მეორე ნახევარში. თბ., 1970, გვ. 4.

³ З. Авваловъ. Присоединение Грузии къ Россiи, გვ. 55.

⁴ Н. Смирнов. Политика Россiи на Кавказе в XVI-XIX веках. М., 1958, გვ. 66.

⁵ ბატონიშვილი ვახუშტი. აღწერა სამეფოსა საქართველოსა, გვ. 503.

თუმანი შეაწერა, რომელსაც დაქირავებული ლეკებისათვის იყო შეპირებული.¹

სანამ იგი ქართლის საქმეებს აგვარებდა, კახეთში ლეკებს „ძალა ექნათ“, დიდი ჯარით გაღმა მხარში ჩამოსულიყვნენ და იქაურ სოფლებს აოხრებდნენ.² შექმნილი მდგომარეობით ისარგებლეს ოსმალებმა და იბრაჰიმ ფაშას 50 ათასიანი ჯარი თბილისისაკენ დაიძრა. თურქებმა თბილისი უბრძოლველად დაიკავეს. 1723 წლის 10 ივლისს თურქების სულთანს აჰმედ III-ს მიართვეს თბილისისა და გორის ციხეების გასაღებები.³ ქართლში ე. წ. „ოსმალობა“ დაიწყო. ვახტანგისათვის ისიც ცნობილი გახდა, რომ 1724 წლის 22 ივნისს რუსეთს თურქებთან სტამბოლში ზავი დაედო, რომლის ძალითაც მთელი საქართველო ოსმალეთის გავლენის სფეროში რჩებოდა.

ყოველმხრივ შევიწროებულ ქართლის მეფეს საკუთარ ქვეყანაში აღარ დაედგომებოდა და 1724 წლის 15 ივლისს 1200 კაციანი ამალით რუსეთს გაემგზავრა, რის შემდეგ, „ქართლი ერთბაშად დაიცალა პროგრესულად მოაზროვნე ადამიანებისაგან“.⁴ შექმნილი არეულობით ისარგებლეს ლეკებმა და დაეცნენ დიღომს, დუშეთს, თელავს... დაარბიეს და ტყვე-ნადავლი გაიტაცეს.

ოსმალებმა ქართლის სათავეში ვახტანგის გამაჰმადიანებული ძმა, ნაშიიტარ (ალიყული ხანი) – გასუნიტებული (მუსტაფა) იესე დანიშნეს, რომელიც არაქართულ საქმეში თურქებს ისეთივე გულმოდგინებით ემსახურებოდა, როგორც მანამდე (ვახტანგის ირანში ყოფნისას) – სპარსელებს. ამ ფაქტით განაწყენებული კონსტანტინე ოსმალებს განუდგა და იესეს წინააღმდეგ წამოვიდა. იესემ და ოსმალებმა თავი გორის ციხეს შეაფარეს.

1724 წ. 26 სექტემბერს სოფ. ხიდისთავ-ატენის გასაყარზე – ზედაველას ველზე, კონსტანტინესა და იესე-ოსმალებს შორის მოხდა სასტიკი ბრძოლა, რომელშიც კონსტანტინე დამარცხდა. მაჰმადყული-ხანმა თავს გაქცევით უშველა, მაგრამ ქართველთა მოჭრილი თავები ოსმალებმა თბილისში ცხრა ურმით წაიღეს.⁵ ოსმალთა ბატონობა ქართლში კიდევ უფრო გამყარდა. 1724 წელს ჭარელებმა დადესტნელები შეიკავშირეს და თელავს შემოადგნენ. ბრძო-

¹ სარგის კაკაბაძე, საქართველოს ისტორია ახალი საუკუნეების ეპოქა..., გვ. 137.

² დარეჯან მეგრელაძე. მასალები XVIII ს. ოცდანი წლების..., გვ. 172, დოკ. 19

³ მურმან პაპაშვილი. დადესტნის როლი რუსეთ-საქართველოს პოლიტიკურ ურთიერთობაში 1722-1724 წწ. – საქართველო და ევროპის ქვეყნები (პოლიტიკური, ეკონომიკური, კულტურული ურთიერთობები) თბ., 1991, გვ. 143-144.

⁴ თამარ ოთხმეზური. აღმოსავლეთ საქართველო 1723-1735 წ.წ. („ოსმალობა“). ნაშრომი ისტორიის მეცნიერებათა კანდიდატის სამეცნიერო ხარისხის მოსაპოვებლად. თბ., 1975, გვ. 76.

⁵ ამ ბრძოლის შესახებ, დაწერ. იხ: იოსებ ალიმბარაშვილი. ზედაველას ბრძოლები, გვ. 153-162. 162.

ლები ერთ კვირას გაგრძელდა, ბოლოს სძლიეს კახელებმა „აოტნეს და აღი-
ღეს ალაფნი მათნი“.¹ ლეკთა მძლავრობის გამო ამავე წელს დავით გარეჯში
ბერთუბნის ლავრა დაიწადა.²

1727 წელს გარდაიცვალა იესე. ოსმალებმა ქართლი დაანაწევრეს, ერას-
ტი ყაფლანიშვილს სომხით-საბარათიანო მისცეს, მცხეთის ზემოთ – ბაგრატ
ციციშვილს, ზემო ქართლი – გივი ამილახორს, ქვეყანა აღწერეს და მძიმე გა-
დასახადები დააკისრეს. კონსტანტინე კახთა მეფემ ოსმალთა წინააღმდეგ
კვლავ ლეკების გამოყენება სცადა და მოურიგდა: ლეკებმა კახეთი დატოვეს,
სამაგიეროდ მეფემ (კონსტანტინემ) მათ საკუთარ ქვეყანაზე გზა გაუხსნა. მარ-
თალია, ლეკებს საბოლოოდ არც ამის შემდეგ შეუწყვეტიათ კახეთის ძარცვა-
რბევა³, მაგრამ ამერიდან ისინი უმთავრესად მაინც „უბატონო და მდიდარ“
ქართლს ესხმოდნენ თავს და არბევდნენ⁴. ძალზე მძიმე მდგომარეობაში ჩავარ-
დნილა ამ დროს გორი. ვახუშტი ბატონიშვილის გადმოცემით: „ჟ-დ (ჟამად –
ი.ა.) მეფის ვახტანგის ჟამსა იყო ცარიელი (გორი – ი.ა.) შემდგომად დაიპყრეს
ურუმთა, მერმე შანადირ დაარღვივა ციხე; არამედ დაძალყოფილი ოსმალთა,
და ლეკთა, და ყიზილბაშთაგან შემცირდა ქალაქიცა“.⁵

ქართლში ამ დროს შექმნილი მდგომარეობის გამომხატველია ერთი წერი-
ლი, რომელიც ოთარ ერისთავს გაუგზავნია რუსეთში თავისი ძმის – რომანოზ
არქიმანდრიტისათვის: „...საქართველოს დიად საქმე გაუჭირდა. ჯერ ლეკი მო-
უხდა, ქალაქი (თბილისი – ი.ა.), მონასტრები, სიონთა ღთის-მშობელი დაწვეს,
საყდრები და ქვეყანა ა(ა)ოვრეს, წავიდნენ. ახლა არზრუმის ფაშა ჩამოვიდა
მძლავრის ლაშქრითა, ქალაქი გორი, სურამი დაიჭირა. ამისგან უფრო ქრისტიან-
ობას საქმე აღარ გაუჭირდების. რაც ბატონები იყვნენ ან თავადები, ქალაქს

¹ ბატონიშვილი ვახუშტი. აღწერა სამეფოსა საქართველოსა, გვ. 623.

² საქართველოს ისტორიის ქრონიკები, გვ. 57.

³ 1727 წელსვე, კახეთისა და მთლიანად საქართველოს ისტორიაში მოხდა უადრესად მნიშვნე-
ლოვანი და ქართველთათვის უარყოფითი ფაქტი. ოსმალეთის სულთანმა საგანგებო ფირმანით
„საშვილიშვილოდ“ დაუმტკიცა ჭარულ ლეკებს მათ მიერ მინატაცები ქვეყანა (იგულისხმება
საინგილო – ი.ა.) იმ სამსახურისათვის, რომელიც „ჭარელებმა მართლმორწმუნეთა ფადიშაჰს
ისლამის გაგრძელების საქმეში აჩვენეს“.

ნ. ბერძენიშვილის განმარტებით, „გადამახრის ლეკური „უბატონო თემები“, ამრიგად მებატო-
ნე თემებად იქცნენ. დაპყრობილი ქართული სოფლები ჭარელებმა მძიმედ დაბევრეს და თან-
დათან აიძულეს ქართველი მოსახლეობა მაჰმადიანობა მიედოთ. აი ამ დამორჩილებულ დაბეგ-
რილ გლეხს ეწოდა ინგილო. განსხვავებით ტერმინ „ლეკისაგან“, რომელშიც უპირატესად მე-
ბატონე ან თავისუფალი იგულისხმებოდა, დამოუკიდებლად იმისაგან, თუ ვინ იყო ის წარმო-
შობით: ავარიელი, წახურელი თუ ქართველი („გალეკებული“) – ასე რომ „ლეკი“ და „ინგი-
ლო“ უფრო სოციალური შინაარსის ცნებებია, ვიდრე ეთნიკური“ (დაწვრ. იხ. ნიკოლოზ ბერ-
ძენიშვილი საქართველოს ისტორიის საკითხები. ტ. III. თბ., 1966, გვ. 273-274).

⁴ ნიკოლოზ ბერძენიშვილი. საქართველოს ისტორიის საკითხები. ტ. II, გვ. 164-165

⁵ ბატონიშვილი ვახუშტი. აღწერა სამეფოსა საქართველოსა, გვ. 367.

არიან, იმათთან კვლში ჩაიყარეს, ღმერთმან იცის რა იქნების: თქვენი გავიგონეთ „რომანოზ ხუთასის რუსით კვეხედ მოვაო“. ათასი იყოს, შვიდასი იყოს რუსი, მოგვართვით სარდლითა, წამობძანდი, ხევის სამზღვარზედ რომ მობძანდე, მიბძანე წინმოვეგებებით, მოასხი, სიმაგრეები, ციხეები მაგათ დავაჭერინოთ, აგების ქრისტიანობა კიდევ ღმერთმა შეიბრალოს: კახეთიც ჩვენსკენ არს: ქრისტეს სარწმუნოება სიმხნე და მკნეობა შენც ახლა გამოგიჩნდების და ძმასა, თორემ სათათროდ რომ მოგკედეთ, კვლმწიფე (რუსეთის – ი.ა.) ნუღარ გაგვიწყრების. თუ გვიშველიან ეს არის თუ არა და მშვიდობითო“.¹

წერილიდან გამომდინარე, ოთარ ერისთავი ამჯერად ოსმალებსაც განდგომია და საქართველოს ბედ-იღბალი რუსეთზე მიუხდვია, მაგრამ მასაც ტყუილად ჰქონდა „ხუთასი რუსის“ იმედი. ჯერ ერთი, წერილის შინაარსიდან ჩანს, რომ ქართლის თავადთა დიდი ნაწილი ოსმალთა სამსახურშია შესული, ციხეები და სტრატეგიული ობიექტებიც მათ უჭირავთ და რომც შემოსულიყო, ხუთასი რუსი იმ დროისათვის მხოლოდ „ცეცხლზე ნავთს დაასხამდა“, მეორე – დასტურდება, რომ ქართლის უმადლეს წრეებში აბსოლუტურად მცდარი წარმოდგენა ჰქონდათ რუსეთის რეალურ პოლიტიკურ გეგმებზე, და მესამე, ოთარ ერისთავს, როგორც ბრძოლებში გამოცდილ კაცს, ისიც უნდა გაეთვალისწინებინა, რა შეიძლებოდა მოჰყოლოდა ქვეყნისათვის იმ შემთხვევას, თუკი წერილი ოსმალთა ხელში აღმოჩნდებოდა.

მართლაც, სამთავის-გორის ყოფილი მიტროპოლიტი რომანოზ არაგვის ერისთავი 1728 წელს ქართლში „მოკავშირეების“ გარეშე დაბრუნდა, რუსებთან კავშირი ლეკებმა ერისთავებს ძვირად დაუსვეს. სახლ-კარი და მამული – აუოხრეს და გაუვერანეს, ახლობლები დაუხოცეს. რის შემდეგ იძულებულნი გახდნენ, უკვე საბოლოოდ, ისევ რუსეთისათვის შეეფარებინათ თავი.

ძმების ზემოსხენებული თავგადასავალი ნათლად მიგვანიშნებს, რომ ლეკებისათვის სოციალური, პოლიტიკური და რელიგიური იერარქია არაფერს ნიშნავდა და მთავარი ნადავლი იყო.

ამასობაში ლეკები უკვე მთელ ქართლ-კახეთს იყვნენ მოდებულნი. ისაყფაშა, უსუფ ფაშა, ოსმან ფაშა (ქართლის გამგებლები 1727-35 წლებში) ოსმალ-ქართველთა ჯარით ამაოდ დასდევდნენ მათ მუხრანთან, ნადარბაზევთან, ნინბისთან, დიდგორთან, თელათგორთან, ქვიშხეთთან, სურამთან, წრომთან, მეჯვრისხევთან... ლეკთა სხვა რაზმები იმავე დროს საციციანოს, თრიალეთს, სა-

¹ М. Броссе. Переписка..., გვ. 154-155.

ბარათიანოს, ქიზიყს აწიოკებდნენ.

1735 წელსვე „ოსმალთა“ „ყიზილბაშობით“ შეიცვალა, მაგრამ ქართლის მდგომარეობა არ გაუმჯობესებულა.

ლეკებისათვის სულ ერთი იყო, ქართლში ყიზილბაშები იბატონებდნენ, თუ ოსმალები, მათთვის ყველაზე მისაღები მტრის ძალმომრეობით დაძაბუნებული და წინააღმდეგობის უნარს მოკლებული ქვეყანა იყო. ამჯერად მათ სპარსელების წინააღმდეგ დაიწყეს ბრძოლა და არც ამ ეტაპზე დააყარეს ქართლ-კახეთს ხეირი. დაეცნენ ყელქცეულს, დირბს, ხვედურეთს, ბებნისს, დუშეთს, აიკლეს და უამრავი ტყვე-ნადავლი წაიყვანეს. ამას თან დაერთო ის ფაქტი, რომ ნადირ შაჰმა 1739 წელს დაღესტნის წინააღმდეგ ლაშქრობა წამოიწყო და ქართველებს ირანის ჯარისათვის დიდძალი სურსათი შეაწერა, თანაც ამ სურსათის გადასატანად პირველად 3 ათასი უღელი ხარი მოითხოვა, მეორე ჯერზე – 2 ათასი ურემი, 300 ათასი კოდი პური ცალკე გაიგზავნა,¹ რამაც ქართლის მოსახლეობა უმძიმეს მდგომარეობაში ჩააგდო.

ნადირ-შაჰის დაღესტან-ჭარში ლაშქრობის ნამდვილი მიზეზი – ერთი მხრივ, ქართველების დამოუკიდებლობისათვის ბრძოლა, და მეორე მხრივ, დაღესტან-ჭარის ურჩობა იყო. შაჰმა იცოდა, რომ ჭარის დამორჩილების გარეშე ამიერკავკასიის მდიდარი ქვეყნების შენარჩუნება შეუძლებელი იქნებოდა,² მაგრამ ნადირი დაღესტანში სამარცხვინოდ დამარცხდა და ჯავრის ყრა ქვეშევრდომებზე მოინდომა, რასაც ყიზილბაშთაგან ქართველ თავადთა ნაწილის განდგომა მოჰყვა. აჯანყებას კვლავ ქსნის ერისთავი შანშე ჩაუდგა სათავეში. ირანის მბრძანებელმა შანშეს სხვა ქართველი ფეოდალები – გივი ამილახვარი, მუხრანბატონი და სხვები დაუპირისპირა.

რუსები „ოსმალთა“ – „ყიზილბაშობისას“ ქართლში განვითარებულ მოვლენებს მუდმივად თვალს ადევნებდნენ და სიტუაციას აკონტროლებდნენ. ამას ისინი ადვილად ახერხებდნენ მთელ კავკასიაში დაგზავნილი ფართო აგენტურის საშუალებით. „ლეკიანობა“ კი „ყიზილბაშობის“ ფონზეც ჩვეული ტემპით გრძელდებოდა, ამჯერად ოსმალთა წაქეზებითა და ხელშეწყობითაც. დაღესტნელები დაეცნენ ალგეთის ხეობას, კუმისს, ციხე-ქვაბს, სოღანლულს, საკირისა და ატენის ციხეებს... მდგომარეობას ისიც ამწვავებდა, რომ ისინი მხოლოდ საკუთარი ინიციატივით არ მოდიოდნენ და ხან ერეკლესთან დაპი-

¹ სარგის კაკაბაძე. საქართველოს ისტორია. ახალი საუკუნეების ეპოქა..., გვ. 162.

² თეიმურაზ ბოცვაძე. ჩრდილო კავკასიის ხალხები საქართველოს საგარეო..., გვ. 173.

რისპირებული აბდულა-ბეგი იწვევდა, ხან თეიმურაზის წინააღმდეგ მებრძოლი გივი ამილახორი და ხანაც ბარძიმ არაგვის ერისთავთან გადაკიდებული შანშე ქსნის ერისთავი.

ქვეყნისათვის ერთგვარი შეღავათი ის იყო, რომ ერეკლემ ირანში არეულობით ისარგებლა, მეტეხის და ნარიყალას ციხეები აიღო და იქ მდგომი ირანული გარნიზონი საკუთარ ქვეყანაში გაისტუმრა. „ყიზილბაშობა“ ქართლში „სულს დაფავდა“. 1749 წელს თეიმურაზიც დაბრუნდა სპარსეთიდან. მამამ და შვილმა ერთად დაიწყეს ლეკებისაგან გავერანებული ქვეყნის მშენებლობა. ასე დამთავრდა XVIII საუკუნის პირველი ნახევარი ქართლში, რომლის დიდი ნაწილი ლეკებმა ოსმალ-ყიზილბაშებთან ბრძოლას მონაწილეობა მიიღეს.

ზემოთ ნათქვამიც ცხადყოფს, რომ ლეკების შემოსევები ქართლში „ოსმალობის“ დროსაც არ შეწყვეტილა, მაგრამ თუ ადრე ოსმალები აქეზებდნენ და აფინანსებდნენ კიდევ ლეკებს ქართლის სარბევად, რათა მისი დასუსტებით თავიანთი მდგომარეობა განემტკიცებინათ, ახლა სიტუაცია შეიცვალა, ნ. ბერძენიშვილის შეფასებით: „ლეკები ახლა უკვე სულთნის მხარეს არბევდნენ“,¹ ამიტომ „კონფლიქტი“ მათ შორის გარდაუვალი გახდა. საქმე ისაა, რომ დაღესტან-ოსმალეთის პოლიტიკური კავშირი XVIII ს. 20-იანი წლების დასაწყისში შემთხვევითი არ იყო. რელიგიური ერთიანობის გარდა, ამ ურთიერთობებს წმინდა პრაქტიკული ხასიათი ჰქონდა.

ერთი მხრივ, თურქეთი მოხერხებულად იყენებდა დაღესტნისა და ირანის რელიგიურ (სუნიტურ-შიიტურ) შუღლს და ლეკებს მუდმივად აქეზებდა ირანის ჩრდილოეთ პროვინციებზე სათარეშოდ, რითაც ტრადიციულ მეტოქეს კიდევ უფრო ასუსტებდა. მეორე, დაღესტნის საშუალებით თურქეთი აქტიურად ეწინააღმდეგებოდა რუსეთის დამკვიდრებას ამიერკავკასიაში. და მესამეც, ლეკები მუდმივად უზრუნველყოფდნენ თურქეთის ტყვეთა ბაზრებს საქართველოში ნაშონი ძვირფასი „ნედლეულით“, რასაც მისთვის დიდი შემოსავალი მოჰქონდა.

ეს პირობები ჩრდილო კავკასიელებს სავსებით აკმაყოფილებდათ, რადგან მათ ფიზიკურ არსებობას ძარცვა-რბევით ნაშონი ნადავლი და ტყვეების გაყიდვით მიღებული შემოსავალი განაპირობებდა. თურქეთი, არა თუ ხელს უშლიდა, არამედ უხვად აფინანსებდა დაღესტნელთა თარეშს, რითაც მათ ცხოვრების „სახსრით“ მუდმივად უზრუნველყოფდა.

¹ საქართველოს ისტორია. ნიკოლოზ ბერძენიშვილი, ივანე ჯავახიშვილი, სიმონ ჯანაშია. ნაწ. I. უძვ. დროიდან XIX საუკუნის დამდეგამდე. თბ., 1948, გვ. 439.

ამრიგად, ეს ურთიერთობები წმინდა პრაქტიკულ-გამოცენებითი ხასიათის იყო და სულაც არ მომდინარეობდა ერთმანეთისადმი რაიმე სიმპათიით. როგორც ო. გიგინეიშვილი წერდა: „ოსმალები იყენებდნენ თავისი ინტერესების სასარგებლოდ არა ლეკებს, არამედ ლეკიანობას, როგორც სოციალურ მოვლენას“.¹ ქართლში „ოსმალობის“ დამყარების შემდეგ თურქებსა და დაღესტნელებს შორის მოკავშირეობის აუცილებლობა მოიშალა. ოსმალებმა ქართლში გაბატონება დაღესტნის გარეშე მოახერხეს, ირანს მოცემული დროისათვის თავისი პრობლემები ჰყოფნიდა, რუსეთს საქართველოსათვის კვლავ „არ ეცალა“, ამიტომ ჩრდილო-კავკასიელთა ძველებურად ძარცვა-თარეში, ამჯერად „თავის საპატრონოში“ – ქართლში, თურქეთისათვის უკვე მიუღებელი იყო. თავის მხრივ, არც დაღესტნელები იღებდნენ ხელს ტრადიციულ „ხელობაზე“. საქმე ისაა, რომ ლეკებისათვის მისაღები იყო მისგან შორს მყოფი თურქეთი. მას შემდეგ, რაც ოსმალებმა ქართლი დაიპყრეს, ისინი ჩრდილო-კავკასიას უშუალოდ გაუმეზობლდნენ და გამორიცხული არ იყო, რომ მის დაპყრობასაც მოინდომებდნენ. ამიტომ დაღესტნურ-თურქულმა მოკავშირეობამ ამ ეტაპზე აზრი დაკარგა.

1735 წლიდან სპარსელების მიერ ქართლიდან ოსმალების განდევნამ და „ყიზილბაშობის“ დამკვიდრებამ დაღესტნელების ორიენტაცია ისევ შეცვალა. დაღესტნურ-თურქულ დუეტს თანამშრომლობის საფუძველი კვლავ გაუჩნდა. ახლა მათთვის საერთო მტერი სპარსეთი იყო, ამიტომ ერთად „დაუწყეს ცემა“, როგორც ყიზილბაშებს, ისე საქართველოს“.²

უცნაურია, მაგრამ ფაქტია, რომ „ოსმალობა-ყიზილბაშობის“ დროს ლეკები, მართალია ველური ფორმებით, მაგრამ მაინც საქართველოს ერთგვარ სამხედრო მოკავშირედ გვევლინებოდნენ. XVIII ს. 20-იანი წლებიდან მოყოლებული 40-იანი წლების პირველ ნახევრამდე ქართლ-კახეთის ისტორია სავსეა ლეკების – ჯერ ოსმალებთან, ხოლო შემდეგ ყიზილბაშებთან ბრძოლის მაგალითებით და ამ ბრძოლებში უმეტესწილად სწორედ ლეკები იმარჯვებდნენ. მართალია, ისინი ქართლ-კახეთისათვის ისეთივე მტრულ ძალას წარმოადგენდნენ, როგორსაც ოსმალ-ყიზილბაშები, მაგრამ საქმე სხვა რამეში იყო. ქართლში ჯერ ოსმალების, ხოლო შემდეგ ყიზილბაშების გაბატონებით ლეკებს „ნადავლში“ მოზიარე გაუჩნდათ, ამიტომ, ისინი აქ ყოფნისას დაუნდობლად ებრძოდნენ „ოსმალობისას“ – ოსმალებს, ხოლო „ყიზილბაშობისას“ – ყიზილბაშებს. სამართლი-

¹ ოთარ გიგინეიშვილი. ნარკვევები ოსმალეთის ისტორიიდან. თბ., 1982, გვ. 60.

² თეიმურაზ ბოცვაძე. ჩრდილო კავკასიის ხალხები საქართველოს საგარეო., გვ. 170.

ანად მიანიშნებდა თ. ბოცვაძე: „პარადოქსალურად არ უნდა გვეჩვენოს იმის აღნიშვნა, რომ „ოსმალობისა“ და „ეიზილბაშობის“ პერიოდში ლეკთა შემოსევებიც კი, რომლებიც აუცილებელ შეჯახებას იწვევდა გაბატონებულ ოსმალებთან თუ ეიზილბაშებთან, რამდენადმე არყევდა მათ ბატონობასო“.¹ XVIII საუკუნის II ნახევარში დაღესტნელების ბრძოლის „ობიექტი“ კვლავ შეიცვალა და მათი „სამიზნე“ ქართველები და მათი მოკავშირე რუსები გახდნენ.

2. „ლეკიანობა“ ქართლ-კახეთში XVIII საუკუნის II ნახევარში.

იმიერ-კავკასიელ მთიელთა ექსპანსიის გაძლიერება

XVIII ს. 50-ანი წლები ქართლ-კახეთისათვის იმედიაანად დაიწყო. ქვეყანამ „ოსმალობა“-„ეიზილბაშობის“ მძიმე უღელი მოიშორა, მამა-შვილი: ერეკლე და თეიმურაზი შეთანხმებულად მართავდა ქვეყანას და ქართლ-კახეთის გაერთიანება მხოლოდ დროის ამბავი იყო. მათ გზიდან ჩამოიცილეს ტახტის მოცილე აბდულა ბეგი, თავადების დიდი ნაწილიც მორჩილების გუნებაზე მოიყვანეს, მაგრამ „მოურჩენელი სენი“ – „ლეკიანობა“ კიდევ უფრო საგრძნობი და ინტენსიური გახდა. მხოლოდ ერეკლე-თეიმურაზის მონდომება ამ პრობლემის გადასაჭრელად საკმარისი არ იყო, ქვეყნად არსებული სოციალურ-ეკონომიკური და პოლიტიკური სისტემა საკითხის გადასაჭრელად მოუმზადებელი აღმოჩნდა.

ლეკთა შემოსევებს განსაკუთრებით ინტენსიური ხასიათი მიეცა 1754-1760 წლებში. მთელი ქვეყანა მათი ბრბოებით აივსო. გარდა უამრავი წერილი შეტაკებისა, ამ პერიოდში ხუნძახის მმართველმა ნურსალ-ბეგმა ორჯერ მოახერხა დიდი ლაშქრის შეკრება, ნადავლის იმედით მთელი დაღესტანი აიყოლია და პირობა მისცა: „სულ მე გამომყევით, იმდენი ცხვარ-ძროხა გაშოვნინოთ შვილის-შვილამდე გეყოთო“, მაგრამ ორჯერვე დამარცხდა (1754 წელს მჭადიჯვართან, 1755 წელს ყვარელთან) და ისევ ნაცადი გზა – ქურდ-ავაზაკობა აირჩია: „ორი-სამი ათასი კაცით ქართლში დიდროვანს ტყეებსა და სამაგრეებში დადგა, ყაზახობდა და ქურდობდა, სოფლის სოფლამდის გზებზე დიად ძალას შერებოდა. საქართველოს ჯარი მეფეებს ახლდა, მაგრამ მინდვრად ვერ

¹ თეიმურაზ ბოცვაძე, საქართველო-დაღესტანის ურთიერთობის ისტორიიდან, გვ. 169.

დაახელეს შესაბამელად, ხან ერთს სიმაგრეში დგებოდა, ხან მეორეში“.¹

ქართლ-კახეთში მდგომარეობის შესწავლის მიზნით რუსულ ხელისუფლებას 1754-56 წლებში თბილისში კაპიტანი ოთარ თუმანოვი (თუმანიშვილი) გამოუგზავნია, რომლის მოხსენებით ბარათებში ლეკთა თარეშს დიდი ადგილი აქვს დათმობილი. დღეისათვის რთულია იმის დადგენა, თუ ვინ აწვდიდა თუმანიშვილს ასეთ დეტალურ ინფორმაციას (იგი უთუოდ ქართლ-კახეთის სამეფო კართან დაახლოებული პირი ჩანს), ფაქტია, რომ დავალება მას საკმაოდ „გულმოდგინედ“ შეუსრულებია. იგი დაწვრილებით ამცნობს „დამკვეთს“, როდის, სად, რომელ გზაზე, დღისით თუ ღამით რამდენი კაცი მოკლეს, დაჭრეს, ან ტყვედ წაიყვანეს ლეკებმა, რამდენი – ხარი, ძროხა თუ ცხენი გაირეკეს, რამდენი ლეკი დაატყვევეს ან მოკლეს ქართველებმა და ა. შ.

მართალია, თუმანოვი თავის მოხსენებით ბარათებში ძირითადად სტატისტიკით კმაყოფილდება და ამ წლებში ლეკიანობის გააქტიურების მიზეზებზე არაფერს ამბობს, მაგრამ იმ დროს ქვეყნად შექმნილი მდგომარეობის ანალიზისათვის საინტერესო წყაროს წარმოადგენს. მასში ნათლად ჩანს ლეკიანობის ბუნება და ხასიათი. 1754 წლის 1 დეკემბერს რუსეთის საგარეო საქმეთა სახელმწიფო კოლეგიისადმი გაგზავნილი მოხსენების მიხედვით, მარტო ქართლ-კახეთში ხუთი თვის მანძილზე (1754 წ. 30 ივნისი – 1754 წ. 1 დეკემბერი), ლეკები 52-ჯერ შემოჭრილან, რომლის შედეგად – დაუკონკრეტებელი მონაცემების გარდა, დაუჭრიათ და მოუკლავთ 145 ქალი და კაცი, ტყვედ წაუყვანიათ – 227; გაუტაციათ 620 სული საქონელი.²

იგი სხვა წერილებშიც დიდ ადგილს უთმობს ქართლში ლეკების თარეშს, 1755 წლის 7 თებერვალს გაგზავნილი მოხსენების მიხედვით, 17 დეკემბერს (1754 წ.) მარნეულის გზიდან ლეკებს ქურდულად წაუყვანიათ ოთხი ტყვე, ოცდაექვს დეკემბერს თხილოვანის გზიდან – სამი, ხოლო ოცდაცხრა დეკემბერს ვაყიდან – თერთმეტი.³

იყო წარმატებებიც, მაგ. მჭადიჯვარ-ყვარელის გარდა, აღნიშნულ წლებში ლეკებთან ბრძოლები მოხდა სკრასთან და ღართისკართან (1756 წ.), ქვიშხეთთან და მჭადიჯვართან (1757 წ.), აგნევთან, ცხინვალსა და ატოცთან (1758 წ.). ერეკლე-თეიმურაზმა მნიშვნელოვანი გამარჯვებები მოიპოვეს ლეკთა ბელა-

¹ იასე ცინცაძე. კაპიტან ოთარ თუმანოვის მოხსენებითი ბარათები. – *თბილისის სახელმწიფო უნივერსიტეტის შრომები*. ტ. XXVII. თბ., 1946, გვ. 23, დოკ. №10.

² იასე ცინცაძე. კაპიტან ოთარ თუმანოვის მოხსენებითი ბარათები. გვ. 17-19, დოკ. № 7.

³ იასე ცინცაძე. კაპიტან ოთარ თუმანოვის მოხსენებითი ბარათები გვ. 21, დოკ. № 8.

დებზე: კოხტასა და ჩონჩოლ-მუსაზე, მაგრამ მუდმივმა თავდასხმებმა ქართლ-კახეთი მნიშვნელოვნად დაასუსტა და დაღესტნელებმა საქართველოშივე, ზედახენში, სამშვილდეში, წალკაში, თრიალეთსა და სხვაგან გაიჩინეს ბინა.¹

რას უნდა მივაწეროთ „ლეკიანობის“ ასე გააქტიურება XVIII ს. 50-იან წლებში? ჩვენი აზრით, იგი რამდენიმე მიზეზით იყო განპირობებული:

1. აღნიშნულ წლებში ჩრდილო-კავკასიაში რთული ეკონომიკური ვითარება შეიქმნა. მცირემიწიანობისა და მოუსავლიანობის გამო, შიმშილით სიკვდილის შიში მოსახლეობის დიდ ნაწილს აიძულებდა ლუკმა-პური ძარცვა-რბევით ეშოვა, საქართველო კი მათთან ყველაზე ახლომდებარე ქვეყანა იყო;
2. ეკონომიკურს უკავშირდებოდა სოციალური საკითხიც. დაღესტნელი ფეოდალები აიძულებდნენ ქვეშევრდომებს მუდმივად მოეწყოთ საქართველოში თარეში, რათა ამით თავიანთი ფინანსური მდგომარეობა გაეუმჯობესებინათ, რასაც შესავალში დაწვრილებით შეგვხვით;
3. ერეკლე-თეიმურაზის აჯი ჩაღაბისაგან ორგზის ძლევამ თურქეთი და დაღესტანი მიახვედრა, რომ მამა-შვილი სამხედრო თვალსაზრისით არც ისე ძლიერნი იყვნენ, როგორც გარეგნულად ჩანდნენ;
4. ათანასე ამილახვრისა და სვიმონ მაყაშვილის უშედეგო ელჩობამ რუსეთში (1752 წ.), რომელიც დაღესტან-ოსმალეთს, ბუნებრივია, მხედველობიდან არ გამორჩენია, მიახვედრა, რომ რუსეთისა და საქართველოს ინტერესები ამ ეტაპზე: „არათუ ემთხვეოდა, არამედ ეწინააღმდეგებოდა კიდევ“² ამიტომ ქართლ-კახეთის რბევით, რუსეთთან ურთიერთობა არ გაურთულდებოდათ;
5. XVIII საუკუნის 50-იან წლებში ქართლ-კახეთს „ოსმალთა-ყიზილბაშობის“ უღელი უკვე მოშორებული ჰქონდა. თუ აქამდე დაღესტნელების „სამიზნე“ ქართლში ბატონობის დროს ოსმალ-ყიზილბაშები იყვნენ, ახლა მათი „სათარეშო ობიექტი“ და შედარებით სუსტი ქართლ-კახეთი მთლიანად მათ განკარგულებაში მოექცა და მოღავე-შემცილებელი აღარავინ ჰყავდათ;
6. „ლეკიანობის“ ხელისშემწყობი ფაქტორი შეიქმნა ადგილზეც. მათი მუდმივი თავდასხმების გამო 1756 წელს საქართველოში „დიად პურ-

¹ დარეჯან მეგრელაძე. დაღესტან-საქართველოს ურთიერთობის ისტორიიდან, გვ. 132.

² თეიმურაზ ბოცვაძე. ჩრდილო-კავკასიის ხალხები საქართველოს საგარეო..., გვ. 181.

ძვირობა შეიქმნა და შიმშილობა“¹, რის გამოც მასიური ხასიათი მი-
ეცა ყმების გაყიდვის პროცესს.

შექმნილი ვითარებიდან გამოსავლის მოძებნის მიზნით 1760 წ. 1 აპრილს თეიმურაზ II რუსეთს გაემგზავრა. ქართლის მეფე ელისაბედ პეტრეს ასულს თავის არასახარბიელო მდგომარეობას მოახსენებდა: „...ძალის დადების ჩემის განწესებად არ ძალგვიძს, რომელსამე არა მცირედ ლეკნი შლიან თვისთა მტერობივის მოცვივნით საქართველოსა და საკახეთოსა შინა ქუეყანასაო...“² ქართლის მეფე გულდაჯერებული იყო, რომ რუსებისაგან სესხს მიიღებდა და ირანთან გართულებულ ურთიერთობას მოაგვარებდა.

თეიმურაზის რუსეთში წასვლის ნამდვილი მიზანი საქართველოს მეზობ-
ლებისათვის უცნობი არ დარჩენილა. ახალციხის უსუფ ფაშა დარუბანდის
შამხალს ატყობინებდა, თეიმურაზი რუსეთში დადესტნელების საჩივლელად
წავიდა, რომ ისინი ავიწროებენ და ძარცვავენ მის ქვეშევრდომებს, ამიტომ
რუსეთის მთავრობას დადესტნელების წინააღმდეგ ჯარი უნდა გამოსთხოვო-
სო. ფაშა ასევე სთხოვდა შამხალს, შეეტყო, მართალია თუ არა ეს ხმები და
თეიმურაზს ხომ არა აქვს აზრად დადესტანს დაეცესო.³ ქართლის მეფეს სი-
მამრის (ვახტანგ VI-ის) მსგავსად იმედგაცრუება ელოდა. თეიმურაზ II 1762
წელს რუსეთშივე გარდაიცვალა და ასტრახანში, მიძინების ტაძარში, ვახტანგ
VI-ის გვერდით დაკრძალეს. ერეკლემ ამ ცნობის მიღების შემდეგ თავი
ქართლ-კახეთის მეფედ გამოაცხადა.

1768 წელს დაიწყო რუსეთ-თურქეთის ომი. ამ ომში საიმპერატორო კარი-
სათვის სერიოზული მნიშვნელობა ჰქონდა საქართველოს პოზიციას. იმერეთის
მხარდაჭერის გარანტია რუსეთმა აღრევე გაინაღდა, რაც შეეხება ქართლ-კა-
ხეთს, მისი თურქეთის საწინააღმდეგოდ ომში ჩაბმა რუსეთს საეჭვოდ მიაჩ-
ნდა, რადგან ერეკლეს თავისი სამფლობელოების დაცვა მხოლოდ ლეკებისა-
გან სჭირდებოდა და თურქეთის მეზობლობის სიმძიმეს არ გრძნობდა,⁴ თანაც
1770 წლის 1 თებერვლის რელაციით ტოტლებენი იმპერატრიცა ეკატერინე II-ს
ატყობინებდა: „...თურქეთის ახალციხის ფაშა თავისი წარგზავნილების საშუა-

¹ დოკუმენტები საქართველოს სოციალური ისტორიიდან, ტ. II, ბატონყმური ურთიერთობა (XV-XIX სს., ნიკოლოზ ბერძენიშვილის რედ., თბ., 1953, გვ. 61, დოკ. 91.

² ვალერიან მაჭარაძე. მასალები XVIII საუკუნის მეორე ნახევრის რუსეთ-საქართველოს ურთი-
ერთობის ისტორიისათვის. ნაწილი II. თეიმურაზ მეორის ელჩობა რუსეთში. თბ., 1968. გვ. 453;
დოკ. № 148.

³ იასე ლორთქიფანიძე. მასალები საქართველოს ისტორიისათვის (მე-18 საუკ.) – მასალები სა-
ქართველოსა და კავკასიის ისტორიისათვის (მსკი). ნაკვ II. თბ., 1940, გვ. 15.

⁴ ვალერიან მაჭარაძე. ასპინძის ბრძოლა. თბ., 1957. გვ. 38.

ლებით ძვირფასი საჩუქრებითა და დიდი დაპირებებით ცდილობდა ერეკლე რუსეთის წინააღმდეგ წასულიყო“.¹

რუსებს ეჭვის სერიოზული საფუძველი ჰქონდათ. XVIII ს. 60-იან წლებში, 50-იან წლებთან შედარებით, ქართლ-კახეთში სიმშვიდე დამყარდა. ერეკლემ მოახერხა განმდგარი ფეოდალების დამარცხება, დაღესტნელ ბელადთაგან ზოგი დაამარცხა, ზოგი გაიერთოგულა, ზოგიც მოისყიდა. ქვეყანა მხოლოდ ლეკების ეპიზოდური თავდასხმებით წუხდებოდა, მათ დამარცხებასაც სამეფო კარი უმეტესწილად ახერხებდა. მაგ. 1767 წ. დეკემბერში ერეკლემ ლეკებზე კიდევ ერთი ბრწყინვალე გამარჯვება მოიპოვა. იმერეთის მეფე სოლომონ I-მა როსტომ რაჭის ერისთავის ურჩობის გამო ლეკები მიიწვია და რაჭა ააკლბინა. ნადავლით დატვირთულ უკან მომავალ ლეკებს ქართლ-კახეთის მეფემ იორი შეუკრა, სამასი ლეკი საიქიოს გაისტუმრა და ტყვე თანამოძმეები გაათავისუფლა, ხოლო ვინც ისურვა, თელავთან ახლოს დაასახლა.² ერეკლე 1769 წელს გრაფ პანინს სწერდა: „...ეგების, რომ ჩვენთვის ლეკებს ტყვე მოეტაცოს ქურდობით მცირეს კაცითა და ის ახალციხეს გაეყიდნოს, ისიც დაფარვითა, თვარემ სხვა მტერობა არ გამოუჩენიათ ჩვენდა მომართო“.³

იმდროინდელი საბუთებიდანაც ჩანს, რომ ერეკლე შემორიგებულ ლეკებთან მშვიდობის შენარჩუნებას დიდ მნიშვნელობას ანიჭებდა. ქართლ-კახეთის მეფე რევაზ ამილახვარს 1769 წ. 7 აგვისტოს სწორედ ამ შეთანხმების დაცვას მოუწოდებს: „ამხანათ მანდეთკენ ლეკის ჯარები წამოვიდნენ, ჩვენსა და მაგათში შერიგება არის, მძევლებიცა გვყავს მიცემული, თქვენ მაგათ არა აწყენინოთ რა და ან მაგათ თქვენ არა გაწყენინონ რა, რიგიანად მოიქეციოთ“.⁴ ბევრი ფიქრის შემდეგ, მეფემ მაინც „ჩათრევას-ჩაყოლა“ და რუსეთთან კავშირი ამჯობინა, თუმცა, ისიც კარგად იცოდა, რომ ამას მეზობელი მაჰმადიანური ქვეყნების მხრიდან მტრობის გაძლიერება მოჰყვებოდა და გარკვეულ სიფრთხილეს იჩენდა. მოგვიანებით (1771 წ.), სუხოტინისადმი გაგზავნილ ბარათში ერეკლე იწერებოდა: „ყარსიდამ და ახალციხიდამ და ბაიაზეთიდამ და ლეკიც ამათთან რომ აერიოს და მოვიდნენ ჩემზე თქვენი მადალმსვლელობა ხომ დიად შორს ბრძანდებაო“,⁵ მაგრამ ქართლ-კახეთის სამეფო კარზე იმასაც ვარა-

¹ ვაღერიან მაჭარაძე. მასალები XVIII საუკუნის მეორე ნახევრის, ნაწ. III. გვ. 526; დოკ. № 226.

² საქართველოს ისტორიის ქრონიკები, გვ. 122.

³ იასე ცინცაძე. ორი საბუთი რუსეთ-საქართველოს ურთიერთობათა ისტორიიდან, გვ. 345.

⁴ ერეკლე II-ის მიერ გაცემული საბუთები 1736-1797 წლები. თბ., 2008, დოკ. № 250, გვ. 64.

⁵ ერეკლე II-ის მიერ გაცემული საბუთები 1736-1797 წლები, დოკ. № 250, გვ. 359.

უდობდნენ, რომ რუსეთთან კავშირი ქვეყნის მფარველობის გარანტია უნდა გამხდარიყო და იგი ირან-ოსმალეთის ძალმომრეობისაგან დაეცვა, ამ მფარველობაზე დაყრდნობით ჭარ-ბელაქანის დაპყრობის საკითხიც გადაწყვეტილიყო და ლეკთა თარეშებსაც ბოლო მოეღებოდა.¹

რუსეთ-საქართველოს მოკავშირეობის ფონზე კვლავ მთელი სიცხადით დადგა ოსმალეთ-დაღესტნის „პარტნიორობის“ აუცილებლობაც. გურამ მაისურაძის თქმით: „ისევე როგორც დაღესტნის ხალხები გზას უჭრიდნენ რუსეთს კავკასიის ქრისტიანი ხალხებისაკენ, ასევე საქართველო ეღობებოდა თურქეთს კავკასიის მაჰმადიან ხალხებთან კავშირის გაბმაში“², ერეკლეს ორიენტაცია რუსეთზე მნიშვნელოვნად სწორედ რელიგიურმა ფაქტორმა განაპირობა.

1769 წლის ზაფხულში საქართველოში დარიალ-სტეფანწმინდის გზით 1200 კაციანი კორპუსით და მცირე არტილერიით რუსის ჯარი შემოვიდა, მალე მას ანდრია პირველწოდებულის ორდენი მოჰყვა, რომლითაც საიმპერატორო კარმა ერეკლე რუსეთის ერთგულებისათვის დააჯილდოვა³. ჯარის მეთაურად გენერალი ტოტლებენი დაინიშნა. სექტემბერში გადაწყდა რუს-ქართველთა ერთობლივი ლაშქრობა ახალციხის საფაშოზე. ახალციხის აღებით ერეკლე იმედოვნებდა, რომ ლეკ-აბრაგთა თავშესაფარს მოსპობდა, მაგრამ ამ საკითხს იმერეთში სხვანაირად უყურებდნენ.

სოლომონ I-ს რუსეთიდან გამოგზავნილი 1200 კაცი არასაკმარისად მიჩნდა, ერეკლესთან საუბარში იმერეთის მეფის მრჩეველი ქაიხოსრო აბულაძე გაოცებას ვერ მალავდა: „ასე ცოტას რუსეთის ხელმწიფის ჯარს როგორ აპყვეი და ხვანთქარს აეშაღე. ამით ხვანთქარს რა უნდა დააკლო შენა, ხვანთქარმა რომ ერთი სერასკირი წამოაყენოს და იქიდან დაღესტანს უბრძანოს, მას უკან რიღათი შეძლებ იმათ წინააღმდეგ ომსაო“⁴. მდგომარეობა კიდევ უფრო დაამძიმა ტოტლებენის ქმედებამ, რომელმაც ერეკლე თურქ-ლეკებს შეატოვა აწყურთან, თვითონ კი სასწრაფოდ ბორჯომის ხეობიდან ქართლისაკენ გამოემშურა, ხოლო შემდეგ თავის მართლებას შეუდგა: „სურსათის ნაკლებობის გამო დაგბრუნდიო“⁵. სურსათის მიზეზით ბრძოლის ველის მიტოვება,

¹ ვალერიან მაჭარაძე. ასპინძის ბრძოლა, გვ. 53.

² გურამ მაისურაძე. ქართველი და სომეხი ხალხების ურთიერთობა XIII-XVIII სს. თბ., 1982, გვ. 241.

³ ვალერიან მაჭარაძე. მასალები XVIII საუკუნის მეორე ნახევრის., ნაწ. III, გვ. 458, დოკ. № 192.

⁴ ვალერიან მაჭარაძე. ასპინძის ბრძოლა, გვ. 49.

⁵ А. Цагарели. Грамоты и др. исторические документы относящиеся по Грузии. т. II. вып. I. Груз. тексты с 1768-1801 гг. СПб., 1898, гв. 61.

ტოტლებენის მოგვიანებით გამოგონილი საბაბი იყო. სინამდვილეში რუსთა კორპუსს აწყურში იმდენი სურსათი ჰქონდა, რომ ქართველებზეც კი ჰყიდნენ.¹

მდგომარეობა დაამძიმა იმ ფაქტმაც, რომ ტოტლებენი, რომელსაც საქართველოში ლეკების წინააღმდეგ ბრძოლებით თავი არ შეუწუხებია (საიმპერატორო კარის გეგმისა და აქედან გამომდინარე, ტოტლებენის მიზანს იმ დროისათვის სულ სხვა რამ წარმოადგენდა), მაინცდამაინც იმ ლეკებს დაერია, რომლებიც ერეკლეს შემორიგებული ჰყავდა და ამ მხრივაც ქართლ-კახეთის მეფეს პრობლემები შეუქმნა. „რუს“ გენერალს არც ლეკები რჩებოდნენ ვალში. აბისში გამაგრებულს თავს 50-მდე შეიარაღებული ლეკი დაესხა, 12 კაცი მოუკლა და აღჭურვილობის ნაწილი გაიტაცა.²

ასპინძასთან გამარჯვების შემდეგ, იმავე წელს ერეკლემ კიდევ რამდენჯერმე ილაშქრა ახალციხეზე და გაიმარჯვა, მაგრამ ცალკეულ ბრძოლებში გამარჯვებები „ლეკიანობის“ პრობლემას ვერ წყვეტდა, ვითარების სტაბილიზების მიზნით მეფე საიმპერატორო კარს სთხოვდა მხარდაჭერას: „რუსეთის მფარველობაში შესული დაღესტნელი ტომები რომ მაინც დაითანხმოთ უარი თქვან საქართველოში აბრაგობაზე, სხვებს ჩვენ მოუვებითო“.³

ერეკლე ცდილობდა მტრისათვის დაესწრო. 1770 წ. 1 ივლისს იგი რუსეთის წარმომადგენელს ა. მოურავოვს სწერდა: „თუ ახლა მტრის ქვეყანაში არ ვიმოქმედებ, რომელიც მტერობა შემიძლია, ...თვით თქვენა ხართ ამისნი მეცნიერნი, დაღისტნიდამ ვითარი ჯარის ყრილობის ჰამბავი მოგუდის, და თვით ყიზლარის კამენდანტს თქვენთან და ჩვენთან რაც მოეწერა დაღისტნელთაგან მზადება, და ამ ჰამბის მსმენელი ტოტლებენი თუ როგორ სასოწარკვეთილებაში მაგდებს მე და ჩემს ქვეყანასო“.⁴

ერეკლე ზაალ ორბელიანსაც ავალებდა მოლაპარაკებოდა საიმპერატორო კარს, რუსეთის მფარველობაში მყოფი ზოგიერთი სახანო საქართველოსთან ხელშეკრულებით დაეახლოვებინათ და ამ გზით ჭარ-ბელაქნელი ლეკებისათვის მაშველი ძალები მოეკლათ. 1770 წ. ოქტომბერში ერეკლე პანინს ურჩევდა, 1770-71 წ. ზამთარში ჭარ-ბელაქანს ვერც დაღესტანი და ვერც ოსმალეთი ვერ მიეშველება, რუს-ქართველთა ჯარით შევუტოთ, ამით წინააღმდეგობის ერთ-

¹ იხ: *საქართველოს სიძველენი. ექვთიმე თაყაიშვილის რედ.*, ტ. I, გვ. 344, დოკ. 285.

² *დე ვრაი დე ფუა საქართველოს შესახებ*, გვ. 46.

³ *შოთა ლომსაძე*. სამცხე-ჯავახეთი., გვ. 82.

⁴ *А. Цагарели*. Грамоты..., т. II, вып. I. გვ. 41.

ერთი დიდი კერა მოესპოთო“¹, ერთი თვის საკვებსაც სთავაზობდა და მინისტრ-რეზიდენტ ბურნაშოვს ჭარის დაპყრობის დეტალურ გეგმასაც სთავაზობდა: „ქ. ბელაქნიდამ მოყოლებული ჯინიხამდინ რაც ლეკნი არიან იმათი გამოვა ორი ათასი კაცი და რომელნიც იქაურნი მემკვიდრენი ქართველნი და თათარნი და მისულნი სხვანი არიან, იმათშიც გამოვა ორი ათასი კაცი. ქ. გავაზიდამ ყარაღაჯამდინ და იმათს ქუეითაც რომელიც იქნება თექვსმეტი. .. (არ იკითხება – ი.ა.) ყოვლგნიდამ კარგად და ადვილად მიისვლება. რომელ ეს სულ ჩვენი მხარისა არის სახლობენ კაცზედ, რომელიც სამ კურთხევაზედ კარგათ მიისვლება და ერთი მხარე აღმოსავლეთისა, ჩრდილოეთს მთა აქვს დაღისტნისა, ამათ საზოგადო ციხე არა აქვსთ, ზოგიერთს სახლსა სიმაგრე და კოშკები აქვსთ, ისიც მცირე და უსარგებლო“.²

საიმპერატორო კარის გეგმის მიხედვით, ჭარ-ბელაქანის დაპყრობა ქართველების ინიციატივით კი არა, მათი მონაწილეობით უნდა მომხდარიყო, ამიტომაც ზემოხსენებული ლაშქრობა არ შედგა. პრუსიელი გენერლის ქმედებების გამო, იმპერატრიცასთან ურთიერთობის გაფუჭება ერეკლეს რომ არ დაბრალებოდა, საქართველოში დიპლომატიური მისიით მყოფმა ივანე ლეოვმა 1771 წელს ქართლ-კახეთის მეფეს ხერთვისის ციხეზე (სამცხეში) გალაშქრება შესთავაზა. ერეკლემ ლეოვს დაუჯერა, ხერთვისი აიღო, მრავალი ტყვიითა და საქონლით დატვირთული ქართლში გადმოვიდა და ცხინვალს დადგა. ხერთვისის „სანაცვლოდ“ ახალციხის ფაშამ – სულეიმანმა, ქართლში ლეკ-ოსმალთა ჯარი გამოგზავნა, ხვითი მოარბიეს და ირგვლივ დამრბევი რაზმები (ჩაფაული) შეუსიეს. მეფემ ჯარი შეჰყარა, ლეკ-ოსმალნი სალთვისის მინდორზე დაამარცხა და ისევ ახალციხეში გადარეკა.

1771 წელს ერეკლემ კიდევ რამდენჯერმე დაამარცხა ლეკები, მაგრამ რუსებთან კავშირი ქვეყანასაც ძვირად დაუჯდა. ქართლში კვლავ განახლდა დაღესტნელების ინტენსიური შემოსევები. შეწუხებული ერეკლე 1771 წ. 21 აგვისტოს გრაფ პანინს აცნობებდა, რომ დაღესტნის მთელი აბრაგობა ქართლ-კახეთში იყო მოდებული: „ქართლ-კახეთს რამდენის ქურდობის გზით სოფლებსა და ხეობებს სცემენ“, ამიტომ ადგილობრივი ძალები მათთან საბრძოლველად საკმარისი არ არისო.³ ერეკლეს სულეიმან ფაშაც მუდმივ მტრად ექცა: სულთ-

¹ შოთა ლომსაძე. სამცხე-ჯავახეთი., გვ. 82.

² სახელმწიფო საისტორიო არქივი, ფ. 1449; ს. 2277.

³ იასე ცინცაძე. ორი საბუთი რუსეთ-საქართველოს ურთიერთობათა ისტორიიდან, გვ. 359.

თნის ხაზინიდან დიდი თანხა მიიღო, დაღესტნელ-ჭარელების დიდ-დიდი ჯარები დაიქირავა და ქართლს მიუსია.¹ ლეკ-ოსმალებმა ზემო (შიდა) ქართლი მოარბიეს, გორს შემოადგნენ და 16 მაისს აიკლეს,² 20 ნოემბერს ცხინვალი წაახდინეს, ოსიაურის ციხეც აიღეს და ორივეგან 600-მდე კაცი დაატყვევეს.³

ასე რომ რუსის ჯარის ქართლში შემოსვლამ, გარდა იმისა, რომ ქვეყნისათვის ხარჯის მეტი არაფერი მოუტანია, ლეკ-ოსმალთაგან ქართლის რბევა კიდევ უფრო საგრძნობი გახდა და შედეგი – აოხრებულ-გადაძვარი გორი, ცხინვალი და უფლისციხესთან წაგებული ბრძოლა იყო.

ერეკლემ წარსული მწარე გაკვეთილიდან სწორი ანალიზი გააკეთა და ოსმალეთთან დაახლოვების გზას დაადგა. მეფე 1776 წლის დეკემბერში, თავის დესპანს გიორგი (მირზა გურგინა) ენაკოლოფაშვილს ჩილდირის (ახალციხის) ვალის დახმარებით სტამბულში გზავნის. დედაქალაქში ჩასვლისთანავე ერეკლეს ელჩი შეხვედრია უმაღლეს მოხელეებს: რეის ეფენდისა და ბეილიქთი ეფენდის.⁴ ეს ელჩობა რუსებს, ბუნებრივია, მხედველობიდან არ გამოპარვიათ. რუსეთის სტამბულელი ელჩი სტახიევი თავის ხელმწიფეს აცყობინებს, რომ რუსეთს სანერვიულო არაფერი აქვს, რადგან ერეკლეს ელჩი სტამბულში ცუდად მიიღეს, მხოლოდ მცირედდ დაასაჩუქრეს და სულთანს არც აპირებს მის მიღებასო.⁵ თუმცა, სტახიევის სხვა მოხსენებებიდან ცხადი ხდება, რომ სინამდვილეში ყველაფერი სხვაგვარადაა. მომდევნო წერილში გაწბილებული ელჩი იწერება, რომ სულთანს (აბდულჰამიდ I – 1774-1789 წწ.) ერეკლეს ელჩი კიდევ მიუღია და მისთვის წყალობაც მიუცია. რომ ერეკლესა და სულთანს შორის სამეგობრო ტრაქტატიც დადებულა.⁶ უფრო მეტიც, სტახიევი იტყობინება, რომ ერეკლეს ელჩი მხოლოდ ქართლ-კახეთის კი არა, მთელი აზერბაიჯანელი ხანების სახელთაც ლაპარაკობს.⁷ სულთანს ერეკლესთვის მეგობრობის პირობის სანაცვლოდ ძვირფასი საჩუქრები: 1000 ოქრო, სიასამურის ქურქი და შეკაზმული ცხენი ცხენი გამოუგზავნია. საპასუხო საჩუქრები სტამბულში ერეკლესაც გაუგზავნია: თეთრი ქურქი, პერანგები და შალეული.⁸

¹ ომან ხერხეულიძე. მეფობა ირაკლი მეორისა, გვ. 64.

² შოთა ლომსაძე. გვიანი შუა საუკუნეების საქართველოს ისტორიიდან., გვ. 137.

³ შოთა ლომსაძე. გვიანი შუა საუკუნეების საქართველოს ისტორიიდან., გვ. 139.

⁴ ოთარ გიგინეიშვილი. ნარკვევები ოსმალეთის ისტორიიდან, თბ., 1982, გვ. 80

⁵ ნიკოლოზ ბერძენიშვილი. საქართველოს ისტორიის საკითხები, ტ. IV, თბ., 1967, გვ. 168.

⁶ ნიკოლოზ ბერძენიშვილი. საქართველოს ისტორიის საკითხები, ტ. IV, თბ., 1967, გვ. 168.

⁷ ოთარ გიგინეიშვილი. ნარკვევები ოსმალეთის ისტორიიდან, გვ. 80.

⁸ ოთარ გიგინეიშვილი. ნარკვევები ოსმალეთის ისტორიიდან, გვ. 80.

1780 წ. თებერვალში ერეკლეს ელჩი კიდევ ერთხელ ჩასულა სტამბულში. სტახიევი პეტერბურგში შემფოთებული იწერება, რომ ერეკლესა და სულთანს შორის სამეგობრო ხელშეკრულება დაიდო, მაგრამ ერეკლეს ელჩი ქერიმ ალა (Karym ara) ისე ჰყავთ ჩაკეტილი, რომ რაიმეს გაგება შეუძლებელიაო.¹ თუმცა, რუსეთის ელჩს რაღაც საკითხების გარკვევა მაინც მოუხერხებია. აგენტები სტახიევს ატყობინებენ, რომ ერეკლემ 1779 წელს განმდგარი ჰუსეინ ალი-ხანის წინააღმდეგ ერევანზე ილაშქრა, გაიმარჯვა, დიდძალი ნადავლი წამოიღო და უამრავი სომეხი გადმოსახლა საქართველოში. თავის მხრივ, სტახიევი იწერება, რომ ოსმალეთი რეალურად აფასებს ერეკლეს ძალას და მასთან კავშირით ცდილობს დაამარცხოს ირანი და მთელი კავკასია გაუერთგულოსო.² სტახიევი ცდილობს რაიმე გაარკვიოს ერეკლე-ოსმალეთის სამომავლო ურთიერთობების შესახებ და სტამბულიდან გამომგზავრებულ ერეკლეს ელჩს თავის აგენტს (სომეხ ვაჭარს) გამოაყოლებს თან, იმ დავალებით, რომ რაიმე შეიტყოს ამ ხელშეკრულების შესახებ და ორი თვის ვადაში უკან ჩამოუტანოს ახალი ამბავი. სანაცვლოდ, გასამრჯელოდ სომეხი აგენტი 300 პიასტრს მიიღებს და სხვ.³

ოსმალეთთან ურთიერთობის დალაგებამ ერეკლეს ბევრი პრობლემა მოუხსნა. ჯერ იყო და სულთნის ნებართვით ერეკლემ ანატოლიიდან (გიუმიშ-ხანედან) მრავლად ჩამოსახლა სამთამადნო საქმის მცოდნე ბერძნები, რითაც წარმატებული ახტალა-ალავერდის მადნები აამუშავა და ქვეყნის შემოსავალი მნიშვნელოვნად გაზარდა.

ურთიერთობები დალაგდა ტრადიციულ მეტოქეებთან: ომარ-ხანსა და ახალციხის სულეიმან ფაშასთანაც. 1776 წ. 29 აპრილით დათარიღებული ერთი დოკუმენტიდან ვიგებთ, რომ ქართლელი გიორგი ავაქაშვილი ოჯახთან ერთად, რამდენიმე წლის წინ დაუტყვევებიათ და ახალციხეში გაუყიდიათ. ავაქაშვილის დედა ფაშასთან მისულა, გათავისუფლება და ქართლში დაბრუნება უთხოვია. „ფაშა გასწყრომია (ტყვეების გამყიდველს – ი.ა.) და ჩვენ დაუხსნივართ და გამოუშვივართ, მე იმათს ყმას აქ არავის გაგასყიდვინებო. არ ვიცი

¹ ნიკოლოზ ბერძენიშვილი. საქართველოს ისტორიის საკითხები, ტ. IV, გვ. 168-170.

² ნიკოლოზ ბერძენიშვილი. საქართველოს ისტორიის საკითხები, ტ. IV, გვ. 168.

³ აღნიშნულთან დაკავშირებით ვრცლად იხ. იოსებ ალიშარაშვილი. ქართლ-კახეთის სამეფო-ფოსა და თურქეთის ურთიერთობა XVIII საუკუნის 60-70-იან წლებში და რუსეთი, გვ. 11-14.

მოყვარე რომ ყოფილა ის ფაშა ამათი თუ მეგობარი, ამიტომ გამ[ო]უშვივართო“, აცხადებდა გიორგი ავაქაშვილი ერეკლესთან სათხოვარში.¹

აღნიშნულ წლებში ერეკლესთან სიახლოვეს ესწრაფოდა ომარ-ხანიც, რომელიც ქართლ-კახეთის მეფესთან მოწერილ წერილებში ერთგულებას „შივილების სახელოსა“ და „მამა-შვილობის“ ფიცით უმტკიცებდა.² დაღესტ-ნელთაგან მშვიდობა ჩანს 1780 წლის 16 დეკემბრით დათარიღებულ დოკუმენტშიც, სადაც ქალაქის (თბილისის – ი.ა.) მოურავი დავითი ლეკიანობით დაფანტული ყმების დაბრუნებას ითხოვს და მეფისადმი მიმართვაში აღნიშნავს: „ღმრთის მოწყალებით და თქვენის დოვლათით ლეკისაგან მშვიდობა არისო“.³

ქართლ-კახეთის მეფის ოსმალეთთან დაახლოვება და დიპლომატიური წარმატებები ირანისთვისაც მიუღებელი აღმოჩნდა. ქერიმ-ხანმა ირანისადმი მორჩილ ქვეყნებს ერეკლეს წინააღმდეგ საომრად მოუწოდა, მაგრამ მისმა სიკვდილმა 1779 წელს ეს გეგმები ჩაშალა⁴. რაც შეეხება რუსეთს, პეტერბურგიდან სასწრაფოდ გამოგზავნეს ქართლის ტახტის მაძიებელი ალექსანდრე ბაქარის ძე (ვახტანგ VI-ის შვილიშვილი), რომელსაც აშკარად მფარველობდა, ერთი მხრივ – საიმპერატორო კარი, ხოლო მეორე მხრივ – ირანი.

მდგომარეობის გამოსწორება მეფემ ევროპასთან დაკავშირებით სცადა. 1781 წ. ზაფხულში მან კათოლიკე მისიონერი დომენიკე გააგზავნა ევროპაში და წერილები გაატანა ავსტრიისა და საფრანგეთის იმპერატორებთან, სარდინიისა და ნეაპოლის მეფეებთან, ვენეციის რესპუბლიკის სენატთან, მაგრამ დომენიკე იმავე წლის 3 ივლისს კონსტანტინოპოლში შავ ზღვაში დაიდრჩო და ადგილამდე ვერ ჩააღწია.⁵

ერეკლე ახლა რომის პაპის მეშვეობით შეეცადა ვითარების ნორმალიზებას. 1782 წლის 14 ნოემბერს საქართველოში მოღვაწე კათოლიკე კაპუცინების პატრი ანდრია გორიდან რომში კარდინალს სწერდა: „მეფე შუამდგომლობას სთხოვს პაპსა მთავართა წინაშე; თვითონაც მზად არის, შეასრულოს იმ მთავრების ყოველი პირობაო“⁶, მაგრამ საქართველოსთვის არც რომის პაპს გაუწე-

¹ ქართული სამართლის ძეგლები, ტ. VII, თბ., 1981, გვ. 339.

² ეროვნული საისტორიო არქივი, ფ. 1449, ს. 2824.

³ ქართული სამართლის ძეგლები, ტ. VII, გვ. 494.

⁴ **О. Маркова**, Россия Закавказье и международные отношения..., გვ. 156.

⁵ დიმიტრი შეველიძე. ერეკლე მეფის უკანასკნელი ცდა. – ისტორიანი. კრებული მიძღვნილი როინ მეტრეველის დაბადებიდან 70 წლისთავისადმი. თბ., 2009, გვ. 293.

⁶ მიქელ თამარაშვილი, ისტორია კათოლიკოსობისა ქართველთა შორის. ტფ., 1902, გვ. 400-401.

ვია რეალური დახმარება.

ასევე უშედეგოდ დამთავრდა ყაბარდოელების საქართველოში გადმოსახლების კარგი იდეაც, რითაც მნიშვნელოვნად იზრდებოდა ქართლ-კახეთის თავდაცვისუნარიანობა. ერეკლემ საამისოდ დიდი სამუშაოებიც ჩაატარა. გამოყო შესაბამისი სახსრები, გაწმინდა დარიალიდან გადმოსასვლელი გზა, შეაკეთა ხიდები თერგსა და არაგვზე. გამოყო მათთვის სამოსახლო ადგილები ახალციხის საფაშოსა და იმერეთის სამეფოს საზღვრების გასწვრივ, თვით ყაბარდოელებშიც (დიდსა და მცირე ყაბარდოში) ბევრს გამოუთქვამს საქართველოში გადმოსახლების სურვილი,¹ მაგრამ მეფის რუსეთის ოფიციალური პოზიცია ჩრდ. კავკასიისა და ქართლ-კახეთის პოლიტიკური დაახლოების ასეთი ფორმის წინააღმდეგი აღმოჩნდა.²

ერეკლე ისევ სამხრეთს მიუბრუნდა. ქერიმ ხანის გარდაცვალების შემდეგ, ზენდების ძალაუფლება ირანში მნიშვნელოვნად შესუსტდა და ცალკეულმა სახანოებმა დამოუკიდებელი საშინაო და საგარეო პოლიტიკის გატარება დაიწყეს. მათ შორის ყველაზე ძლიერი იყო ირანის დიდი ვეკილი ალი-მურად-ხანი. ძალაუფლების კიდევ უფრო ზრდის მიზნით, იგი ერეკლეს საშუალებით რუსებს დაუკავშირდა. ეს ფაქტი რუსების ინტერესებშიც შედიოდა და მურად-ხანის მიერ საიმპერატორო კარზე გაგზავნილი მირზა-მუჰამედი უკან დიდძალი საჩუქრებით გამოსისტუმრეს³ და რუსი ელჩიც გამოაყოლეს, მაგრამ სანამ ისინი შირაზში ჩავიდნენ, ალი-მურად-ხანი გარდაცვლილიყო და ირანის მმართველად აღზევებული ჯაფარ-ხანი დახვდათ, ამიტომ რუსი დიპლომატი თბილისში დავალების შეუსრულებლად დაბრუნდა.

რუსეთის ენ ნაბიჯი ამიერკავკასიის ხანებისათვის შეუმჩნეველი არ დარჩენილა. ხოის მმართველი ახმედ-ხანი ერზრუმის ვალს ხაჯი-ალი-ფაშას ატყობინებდა, რომ რუსეთის ნამდვილი მიზანი ირანთან მშვიდობა დაამყაროს, ემსახურება მათ მზაკვრულ ჩანაფიქრს – აზერბაიჯანის მოსაზღვრე ტერიტორიები ხელთ იგდოსო.⁴ ახმედ-ხანი სტამბოლსაც სთხოვდა გამოფხიზლებას და იტყობინებოდა, თუ იქიდან დახმარება და მფარველობა დროულად არ იქნებოდა, მრავალი მუსულმანი მტრის ხელში აღმოჩნდებოდა. თავის მხრივ, ჩილდი-

¹ თეიმურაზ ბოცვაძე. საქართველო-ყაბარდოს ურთიერთობის..., გვ. 113, 115; ნიკო ჯავახიშვილი, ნარკვევები ქართველი და ადიღელი ხალხების ურთიერთობის ისტორიიდან, გვ. 149-150.

² ლოვარდ ტუხაშვილი. ქართლ-კახეთის სამეფოს ურთიერთობა კავკასიასა და მახლობელ აღმოსავლეთის ხალხებთან XVIII საუკუნის II ნახევარში. – №1, მნათობი, 1971, გვ. 160.

³ Джевдет паша. Описание события в Грузии и Черкасии по отношению к Оттоманской империи от 1192 года по 1202 год хиджри. (1775-1784)..., გვ. 380-381.

⁴ Джевдет паша. Описание события в Грузии и Черкасии..., გვ. 381.

რის (ახალციხის – ი.ა.) სულეიმან ფაშაც იუწყებოდა, რომ ერეკლეს მწყობრში მოჰყავდა ახალი გზა, რომლითაც სამი ათასი რუსი თბილისში უნდა შემოსულიყო. „ცხადია, რომ ერეკლე-ხანი ემზადება მეზობელ მაჰმადიანურ სახანოებზე თავდასასხმელადო“, იწერებოდა ჩილდირის გამგებელი.¹ სულეიმანმა მართლაც მიიღო დავალება, ფხიზლად ედევნებინა თვალი ერეკლეს მოქმედებებისათვის. წაექეზებინა და უხვად დაესაჩუქრებინა დაღესტნელები ქართლ-კახეთის მეფის წინააღმდეგ „წმინდა ომის“ დასაწყებად.²

ერეკლეს დიდი ძალისხმევით დალაგებული ურთიერთობები კვლავ აეშალა. ფათალი ხანისა თუ სხვა კავკასიელი ხანების შემოსევის მოლოდინში იგი ნებისმიერ დროს მზად უნდა ყოფილიყო. აქტიურად ამოქმედდა ჩრდილო კავკასიაში მყოფი ქართლის ტახტის მაძიებელი ალექსანდრე ბაქარის ძე, რომელიც საქართველოში ჩამოსასვლელად ემზადებოდა და მოსახლეობას მხარდაჭერის პირობით თითო კაცს – 50 მანეთს, ხოლო თბილისის დაკავების შემთხვევაში დამატებით კიდევ 50 მანეთს ჰპირდებოდა.³ ამის გამო, ბატონიშვილს ქართლში საკმაო მომხრე გამოუჩნდა. ბაქარის ძეს მხარდაჭერა აღუთქვა იმერეთის მეფე სოლომონ I-მაც. ერეკლეს წინაშე მთელი სიმწვავეით დადგა სამეფოს დაკარგვის საფრთხე. დიდი მიხვედრა არ სჭირდებოდა იმას, რომ პრობლემის გასაღები პეტერბურგში იყო. მეფე დათანხმდა შესულიყო იმპერატორის მფარველობაში, იმ პირობით, რომ მის შვილებს და შთამომავლებს „პაპების სამკვიდრო და ამდენი გარჯით და ღვაწლის დადებით აშენებული ქვეყანა არ დაკარგვოდათ, რომ ალექსანდრე ბაქარის ძის მსგავს ბედის მაძიებლებს უმეცარი ხალხი არ აჰყოლოდა“.⁴

როგორც კი მხარდაჭერის გარანტია მიიღეს, რუსებმა მაშინვე დააგზავნეს მიმართვები ყიზლარის კომენდატთან, ასტრახანის გუბერნატორთან და სხვა დაღესტნელ მთიელ ბელადებთან, რომ არ აღმოეჩინათ დახმარება ალექსანდრე ბაქარის ძისათვის.⁵ 1783 წ. ნოემბერში (ამ დროისათვის უკვე გაფორმებული იყო გეორგიევსკის ხელშეკრულება) მაიორი კომარსკი დერბენტში ჩა-

¹ **Джевдет паша.** Описание события в Грузии и Черкасии..., გვ. 382.

² **Джевдет паша.** Описание события в Грузии и Черкасии..., გვ. 382.

³ **იასე ლორთქიფანიძე.** მასალები საქართველოს ისტორიისათვის. – *მასალები საქართველოსა და კავკასიის ისტორიისათვის.* ნაკვ. II. თბ., 1940, გვ. 29-30.

⁴ **გიორგი პაიჭაძე.** ქართლ-კახეთისა და რუსეთის ურთიერთობის განახლება 80-იანი წლების დასაწყისში. 1783 წ. ხელშეკრულება. – *საქართველოს ისტორიის ნარკვევები*, ტ. IV, გვ. 689.

⁵ **О. Маркова.** Феодальная реакция на прогрессивную политику единодержавия Грузии (Выступление князя Александра Грузинского 1766-1783 гг.). – *კავკასიის ხალხთა ისტორიის საკითხები.* თბ., 1966, გვ. 374.

ვიდა ფათალი ხანთან ალექსანდრე ბაქარის ძისა და იმ დროისათვის იქვე მყოფ, ასევე ერეკლეს „ოპონენტ“ ალექსანდრე ამილახვრის გადასაცემად. რუსებს ორივე ალექსანდრეს „ყიდვა“ ფათალი ხანისაგან სულ ერთი ოქროს სათუთუნე და 500 ოქროს „ჩერვონცი“ დაუჯდათ.¹ როგორც კი ერეკლემ რუსებს მეგობრობა „შეახსენა“, საიმპერატორო კარმა თავი ისე წარმოაჩინა, თითქოს ძალიან იყო დაინტერესებული ერეკლეს უშიშროებით. საქმე ზუსტად ისე მიდიოდა, როგორც რუსებს აწყობდათ. საყოველთაო აზრი იმგვარად იქმნებოდა, რომ ქართლ-კახეთის მეფე რუსების გარეშე არათუ „ლეკიანობის“, არამედ შიდა პრობლემებსაც ვერ წყვეტდა, რომ შექმნილი ვითარებიდან ერთადერთი გამოსავალი რუსეთის იმპერატორისადმი მფარველობის თხოვნა იყო. ერეკლეს არწმუნებდნენ, რომ ძლიერი მოკავშირის დახმარებით „საქართველო ყველა სიძნელეს ადვილად დასძლევდა, მშვიდობასა და კეთილდღეობას ეწეოდა“.²

ქვეყნის წინაშე ალტერნატივა იდგა – „მას შაჰის სპარსეთი ან სულტანის ოსმალეთი დაიპყრობდა, ან იგი უნდა რუსეთის პროტექტორატის ქვეშ შესულიყო“. იმ დროს დამკვიდრებული მოსაზრებით: „...მეორე პერსპექტივა მაინც უმცირესი ბოროტება იყო“,³ ამიტომ 1782 წ. 21 დეკემბერს ერეკლემ რუსეთის იმპერატორის მფარველობა ითხოვა, რომლის 5-6 მუხლებით, ეკატერინე II-ს კვლავ „ლეკიანობის“ პრობლემის გადაჭრას სთხოვდა:

„...5. ამ მოწყალებას ვითხოვთ, რომელიც ჩვენი მამულები ამ მკარეს ლეკებს უჭირავსთ, იმისი დაჭერა შეგვაძლებინონ!

6. რადგან დაღესტნელები აქ ჩვენ ჯარათა გვეყვანან, იმათს ჯამაგირსა და მიცემაზე ბევრი გვეხარჯება, მაგ ჯარის ჯამაგირის მიცემაზე იმიტომ თავი ვაწყინეთო“.⁴

1783 წ. 24 ივლისს ჩრდ. კავკასიის ციხე-სიმაგრე გეორგიევსკში დაიდო რუსეთ-საქართველოს „მეგობრობის პირობა“ (ტრაქტატი). შემთხვევითი არ იყო, რომ ეს ხელშეკრულება ერეკლეს საგარეო საკითხებში დამოუკიდებელ მოქმედებას უზღუდავდა. გარეგნულად კი ყველაფერი ისე ჩანდა, თითქოს ტრაქტატის დადებით საქართველო მეტ სარგებელს იღებდა, ვიდრე რუსეთი.

¹ ერეკლეს მხარდაჭერის განაღდებისთანავე, რუსებმა ალექსანდრე ამილახვარი ვიბორგის ციხეში ჩასვეს, ხოლო ალექსანდრე ბაქარის ძე პოლიციის მკაცრი ზედამხედველობის ქვეშ გააგზავნეს სმოლენსკში და ყოველწლიურ სარჩოდ 1200 მანეთი დაუნიშნეს. უშედეგოდ ელოდა იგი იმპერატორის შეწყალებას. პატიმრობაში მყოფი იქვე გარდაიცვალა ყველასაგან მიტოვებული 1791 წელს.

² ნიკოლოზ ბერძენიშვილი. საქართველოს ისტორიის საკითხები, ტ. II, გვ. 228-229.

³ საქართველოს ისტორია..., ნაწ. I, გვ. 405-406.

⁴ ქართული სამართლის ძეგლები, ტ. II, გვ. 455, დოკ. 132.

რუსეთის საქართველოში ფეხის მოკიდებამ დიდი შიში დანერგა მთელ ჩრდილო-კავკასიაში, რადგან რუსეთი მათ ახლა არა მარტო ზურგში, არამედ ფლანგზეც მოექცა და ადრე თუ გვიან მათ დამორჩილებასაც მოიწადინებდა. წამოჭრილმა საფრთხემ ლეკეთის დაქსაქსული ტომები კვლავ გააერთიანა.¹

ოსმალეთმა რუსეთის წინააღმდეგ მთელ კავკასიაში აშკარა თუ ფარული ომი გააჩაღა და სარწმუნოების დასაცავად მოუწოდა აზერბაიჯანულ და ჩრდ. კავკასიის მაჰმადიანურ მოსახლეობას. სულეიმან ახალციხის ფაშას, ომარხანსა და სხვა მთავრებს. როგორც ნ. დუბროვინი წერს: „ოფიციალურად უარყოფდა, რა ახალციხის ფაშას მხარდაჭერას, კონსტანტინეპოლის კარი (ოსმალეთი – ი.ა.) ფარულად მხარს უჭერდა და აქეზებდა არა მარტო სულეიმანს, არამედ მთელს აზერბაიჯანის ხანებს. ემისრები სულთნის ფირმანებით მოედვნენ დაღესტანსა და მთელს კავკასიას მოწოდებით – გაერთიანებულიყვნენ რწმენის დასაცავად და საქართველოს ასაკლებად“.²

სულთანი თავის ამიერკავკასიელ ქვეშევრდომებსაც აფრთხილებდა, რომ ერეკლეს ეს ნაბიჯი გულში არ გაევიდოთ და „რწმენა არ შეეებღალათ რუსთა დაპირებებით, რომლებიც მხოლოდ გარეგნულად ჩანდა ტკბილი, სინამდვილეში კი შხამს შეიცავდნენ“.³ თურქეთის მიერ წაქეზებული მაჰმადიანური მეზობლების საერთო ამხედრება საქართველოს წინააღმდეგ ერეკლეს ქვეშევრდომ სამფლობელოებსაც შეეხო. გამუდმებული თავდასხმებით მათ „გული უნდა გაგრილებოდათ სიუზერენი ერეკლეს მიმართ, რომელიც ქვეშევრდომების დაცვას ვერ ახერხებდა და ისინი ერეკლეს რუსული პოლიტიკის საწინააღმდეგოდ განეწყობოთ“.⁴ ამ საკითხში განსაკუთრებით აქტიურობდა ახალციხის სულეიმან ფაშა, რომელიც სულთნის დავალებას „გულმოდგინედ“ ასრულებდა და „ახალციხე ლეკების საბუდრად გადააქცია, საიდანაც ავაზაკთა ბრბოები გამუდმებით თავს ესხმოდნენ ქართლის სოფლებს“.⁵ ერეკლე რუსეთში წერილს-წერილზე აგზავნიდა და ამოდ ითხოვდა საიმპერატორო კარისაგან დაპირებულ დახმარებას. მან 1783 წ. ზაფხულში პოტიომკინს წარუდგინა ჭარელებისაგან მიყენებული ზიანის დაწვრილებითი აღწერილობა და რუსებს საპასუხო

¹ სარგის კაკაბაძე. კრწანისის ომი. თბ., 1991, გვ. 33.

² Н. Дубровин. История войны... т. II. გვ. 232.

³ Джедет паша. Описание события в Грузии и Черкасии..., გვ. 378.

⁴ მიხეილ სამსონაძე. ამიერკავკასიის სახანოებთან ქართლ-კახეთის სამეფოს ურთიერთობის ისტორიიდან XVIII საუკუნის 80-იან წლებში. – ქართული სამეფო-სამთავროების საგარეო პოლიტიკის ისტორიიდან, ტ. II. თბ., 1973, გვ. 109.

⁵ ნიკოლოზ ბერძენიშვილი. საქართველოს ისტორიის საკითხები. ტ. II. გვ. 232.

ნაბიჯის გადადგმას სთხოვდა. 24 სექტემბრის საპასუხო წერილში პოტიომკინი აცნობებდა ქართლ-კახეთის მეფეს, რომ რუსული მხედრობისათვის რთული არ იყო ჭარელების წახდენა, მაგრამ „ამ ნაბიჯისაკენ გარკვეული მოსაზრებები გვაკავებსო“¹ და აქეთ მოუწოდებდა: „იქნებ თქვენი მხედრობა შეეცადოს მათ დამშვიდებასო“.²

მიმოწერის პარალელურად პოტიომკინი რუსეთის წარმომადგენელს საქართველოში ს. ბურნაშოვს 1783 წ. 1 ოქტომბერს ქართველი მეფისაგან ფარულად ავალებდა, მიეწოდებინა დაწვრილებითი ინფორმაცია ქართლ-კახეთში ლეკების მოძრაობისა და ერეკლესთან მათი დამოკიდებულების შესახებ. 5 დეკემბერს პეტერბურგიდან გამოგზავნილი საიდუმლო წერილით გარსევან ჭავჭავაძე თავის მეფეს უიმედო პასუხს აცვობინებდა: „ჭარ-ბელაქნის შესახებ სალაპარაკო აღარაფერი დარჩა, რადგან რუსები არ იღებენ თქვენს წინადადებას ჭარ-ბელაქნის წინააღმდეგ ლაშქრობის შესახებო“.³

რუსები ერეკლეს იმით ამშვიდებდნენ, რომ მათ რამდენიმე სერიოზული გამარჯვება მოიპოვეს დაღესტნელებზე და ლეკების საბოლოო განდევნა მომავლის საქმე იყო, ამასთანავე, ისინი შანსს ხელიდან არ უშვებდნენ, რომ მომხდურებთან შეტაკებებში მოპოვებულ წარმატებებში რუსების როლი განსაკუთრებით წარმოეჩინათ, ხოლო ქართველებისა, პირიქით, – დაეკნინებინათ.

აღნიშნულის კარგი დასტურია 1785 წ. 10 აპრილს ქვემოჭალასთან მომხდარი ბრძოლა, სადაც ახალციხიდან შემოჭრილ 2000 თურქსა და ლეკზე მოპოვებული გამარჯვება ცნობილმა რუსმა ისტორიკოსმა პეტრე ბუტკოვმა მოლიანად მაიორ სენენბერგსა და 200 ეგერს მიაწერა, ხოლო 500 ცხენოსანი ქართველის ბრძოლაში მონაწილეობა გამორიცხა.⁴ თუმცა, პ. ბუტკოვი იმაში კი მართალი იყო, რომ ქვემო ჭალასთან დამარცხებამ „თურქები და დაღესტნელები მხოლოდ გააბოროტა და ამავე წელს საქართველომ ყველაზე მგრძობიარე დარტყმა მიიღო“.⁵

პ. ბუტკოვს მხედველობაში აქვს ხუნძახის ბატონის ომარ-ხანის შემოსევა, რომელმაც 1785 წლის სექტემბერში 20 ათასამდე ლეკი შემოიყარა და საქართველოს კახეთის მხრიდან მოადგა. აიკლო და დაარბია ერეკლეს მიერ დიდი

¹ ზურაბ ცქიტიშვილი. გარსევან ჭავჭავაძის სახელმწიფოებრივი მოღვაწეობა (საქართველოს საგარეო პოლიტიკური ისტორიიდან XVIII ს-ის უკანასკნელ მეოთხედში). თბ., 1982, გვ. 52.

² ზურაბ ცქიტიშვილი. გარსევან ჭავჭავაძის სახელმწიფოებრივი მოღვაწეობა..., გვ. 52.

³ ზურაბ ცქიტიშვილი. გარსევან ჭავჭავაძის სახელმწიფოებრივი მოღვაწეობა..., გვ. 52.

⁴ П. Бутков. Материалы для новой истории Кавказа с 1722 по 1803 г. ч. II. СПб., 1869, гв. 162.

⁵ П. Бутков. Материалы..., ч. II, гв. 163.

გარჯის შედეგად წამოწყებული ახტალა-ალავერდის სამთამადნო საწარმოებში, დაარბია ქვემო-ქართლი, ვახანი, გაირეკა ათასობით ტყვე, ფული, საქონელი და უკან მხოლოდ ყოველწლიური ხარკის გადახდის პირობით გაბრუნდა.¹

ვითარებას კიდევ უფრო ართულებდა ის ფაქტი, რომ 1785 წელი ქართლში მოუსაველიანი იყო, რამაც პურის გაძვირება გამოიწვია. იესე ბარათაშვილი „ცხოვრება-ანდერძში“ რამდენჯერმე მიუთითებს: „...წელს (1785 წ. – ი.ა.) პური არც მე მომივიდა და არც სხვას. ლიტრა აბაზათ ისყიდებო“.²

ერეკლეს მდგომარეობა ისევ დაეძაბა. ყმადნაფიცი ქვეყნები განუდგნენ და ხარკს აღარ იძლეოდნენ. ქვეყნის შემოსავლის „ხერხემალი“ - ახტალა-ალავერდის მადნები ომარ-ხანმა დაანგრია და შემოსავალიც შეწყდა. მეფის პოლიტიკით უკმაყოფილო ზოგიერთი თავადი ახალციხის ფაშასთან გაიქცა და ლეკებთან ერთად ქვეყნის სარბევედ წამოვიდა. სულთნის გეგმის მიხედვით, თუ სულეიმან ახალციხის ფაშა ერეკლეს ორიენტაციის შეცვლაში ვერ დაარწმუნებდა, ქართლ-კახეთზე თავდასხმა ერთობლივად უნდა მოწყობილიყო ახალციხიდან და ჭარ-ბელაქნიდან. ეს ლაშქრობა სულთნის კარზე რუსეთის წინააღმდეგ საერთო „წმინდა ომის“ დასაწყისად მოიაზრებოდა. ომარ-ხანი ამ ფაქტს ერეკლეს არც უმაღლავდა: „ვიდრე რუსის ჯარი მანდ იმყოფება, მე პორტასაგან უფლება არა მაქვს საქართველო მოვასვენო“.³

ახალციხის სულეიმან ფაშაც ენერგიას არ ზოგავდა, რომ ერეკლე არჩევანის შეცვლაში დაერწმუნებინა. რუსებს ცნობა ჰქონდათ, რომ 1786 წ. 19 თებერვალს სულეიმან ფაშას სულთნისაგან 44 ათასი მანეთი მიეღო, რათა დარიგებინა ახერბაიჯანის ხანებისათვისა და დაღესტნის მფლობელებისათვის და საქართველოზე სათარეშოდ წამოსულიყვნენ.⁴ ცბიერი ფაშა ერეკლესაც არწმუნებდა, რომ ჩრდილო-კავკასიელები საკუთარი ინიციატივით მოქმედებდნენ, „მათი ქმედება არც სულთნისათვის იქნება სასიამოვნო და არა მგონია, ეს ყველაფერი მისი უმაღლესობის სურვილით ხდებოდეს. ჩემი მხრივ, გარწმუნებ, რომ თქვენთან მეგობრობის მეტი არაფერი მსურს, ჩვენს მეზობელ სამფლობელოებს დიდი ხნის ნანატრი მშვიდობა ეწია და მის დამრღვევს ღმერთი

¹ დაწვრ. იხ: იოსებ ალიმბარაშვილი. ომარ-ხანის თავდასხმები საქართველოზე. თბ., 2007.

² იესე ბარათაშვილი. ცხოვრება-ანდერძი, გვ. 691; 695

³ მიხეილ სამსონაძე. საქართველოს გაერთიანების პრობლემა და საგარეო ორიენტაცია XVIII საუკუნეში. თბ., 1988, გვ. 287.

⁴ იასე ლორთქიფანიძე. მასალები საქართველოს ისტორიისათვის (მე-18 საუკ.), გვ. 64.

დასჯისო“¹ მაგრამ რეალობა სულ სხვა იყო და ახალციხის მხრიდან ლეკთა შემოსევებს კვლავ ინტენსიური ხასიათი ჰქონდა.

სულეიმან ფაშას თვითნებობით გაბეზრებული ერეკლე 1786 წ. 15 სექტემბერს თურქეთის ვეზირთან ჩიოდა, სადაც იმავდროულად ცდილობდა, მისი რუსეთთან კავშირის მიზეზები აეხსნა: „...რადგანაც მტერ მრავალნი ვიყავით, ჩვენს მეზობლებთან თუ სხვაგან, საცა ხელი მიგვიწვდებოდა ყველგან შემწეობა ვითხოვეთ, მარა არავისაგან მოგვეცა ჩვენს მტერზედ შემწეობა. ადრითგანვე ჩვენი მამა პაპანი რუსეთის დიდებულის კელმწიფის უმაღლეს კარზედ მრავალჯერ შეხვეწნიან, და შემწეობა უთხოვიათ. ამ მიზეზით დიდებულის რუსეთის კელმწიფის კარს ჩვენც შავებევწინით და შემწეობა ვთხოვეთ. მათმა დიდებულებამ წყალობა გვიყო, თავეთს საფარველ ქვეშ შეგვიყვანა და ჩვენის მტრის პასუხის მისაცემად სამი ათასი კაცი გვიბოძა. სამი წელიწადი არის ეს სამი ათასი კაცი ჩვენს ქვეყანაში არის მოსული, მაგრამ არც იმათგან და არც ჩვენის კაცისგან დიდებულის ხუნთქრის ქვეყანაში, რაც ჩვენი მეზობლები არიან იმათს ადგილებში, ერთის იოტის ოდენი არც მალვით და არც ცხადათ არა წამხდარა რა, და თუ ვინმე ჩვენს ქვეყანაში მტერი მოსულა შეძლებისაებრ იმათს პასუხის მიცემას ვცდილვართ, თორემ სხვა რიგად არავისთვის რა გვიწყენინებია რა, მაგრამ სულეიმან ფაშამ ჩვენს ქვეყანაში ამ სამი ათასის რუსის მოსვლა იწყინა და დაღისტნელნი მოიყვანა, ახალციხეს დააყენა, ჩვენს ქვეყანაში მრავალი სოფლები ააოხრა, მრავალი საქონელი და ტყვე წაასხეს და მრავალი სული დახოცეს. რადგანაც ორსავე დოვლათში შერიგება იყო, ჩვენც დიდებულის ხუნთქრის მორიდებასა და წყენისათვის ახალციხის ქვეყნიდამ ერთის იოტის ოდენა არა წავგვიხდენია რა, რომ სხვა ჩ-ნი (ჩვენი – ი.ა.) მეზობლები დიდებულის ხუნთქრის რაიანი ყველანი მოწამენი არიან, თორემ თუ დიდებულის ხუნთქრის წყენას არ მოვრიდებოდით, იქნებოდა რომ ჩვენც წავგვიხდინა ახალციხის მაჰლებიო...“²

შერიგებაში ერეკლე გულისხმობდა 1786 წ. 15 სექტემბერს ახალციხის ფაშა სულეიმანთან დადებული ორმხრივი ხელშეკრულების პროექტს, რომლის მიხედვით, სულეიმან ფაშა ერეკლე მეფესთან პირობას დებდა, დაღესტნელების ჯარი ახალციხეში აღარ დაეყენებინა და არც საქართველოდან გატაცებული

¹ იასე ცინცაძე. მასალები, რუსეთ-საქართველოს ურთიერთობის ისტორიისათვის (1782-1791). – საისტორიო მოამბე №23-24. თბ., 1970, გვ. 114-115; დოკ. № 93.

² იასე ცინცაძე. 1783 წლის მფარველობითი ტრაქტატი, გვ. 254-255.

ტყვეები მიეღო“.¹ ამასობაში რუსეთ-თურქეთის წინააღმდეგობები ძალზე დაიძაბა და ახალი ომის დაწყებას აღარაფერი უკლდა, ამიტომ 1787 წ. სექტემბერში ოსმალეთის სულთანმა ქაჰია ბეგის პირით ერეკლეს კიდევ ერთხელ შესთავაზა: „თუ საქართველოში რუსეთის ჯარი აღარ იქნება, დიდ წყალობას მოგცემ, დაღესტანსაც დავაყენებ და რაც ზარალი ჩვენგან და ჩვენის მიზეზით მოგცემიათ, სრულიად ავანაზღაურებო“, მაგრამ ერეკლესგან კვლავ უარი მიიღო.²

ამ ფაქტმა სულთანი აღაშფოთა და ერეკლეს მოკავშირე ყარაბახელ სომხებს ომარ და იბრეიმ ხანები მიუსია. სომხებმა შემწეობა ერეკლეს სთხოვეს. 1787 წ. სექტემბერში მეფემ ქართულ-რუსული მხედრობით განჯის წინააღმდეგ გაილაშქრა და გაიმარჯვებდა კიდევაც, მაგრამ მოულოდნელად რუსის ჯარის უფროსს - მინისტრ-რეზიდენტს ბურნაშევს პოტიომკინისაგან საქართველოდან დაბრუნების შესახებ ბრძანება მოუვიდა, რის გამოც რუსი პოლკოვნიკი საჩქაროდ აიყარა და ერეკლეს თხოვნის მიუხედავად თბილისისაკენ გამობრუნდა.³

რუსი ავტორები ცდილობენ ქართლ-კახეთში შექმნილი მძიმე ვითარება ერეკლეს უმოქმედობას მიაწერონ. მაგ. ვ. პოტოს აზრით, ქვეყანაში შექმნილი მდგომარეობა იმის შედეგი იყო, რომ ქართლ-კახეთის მეფე თავდაცვისათვის საჭირო ზომებს არ იღებდა, საყოველთაო პანიკის ვითარებაში მყოფ საქართველოში კი ორი რუსული ბატალიონი მთელი ქვეყნის დაცვას ვერ ახერხებდა. ამის გამო, თითქოს პოტიომკინს საჭიროდ მიუჩნევია საქართველოში ჩამოსულიყო და ერეკლეს დამუქრებოდა, უკან გაიყვანდა რუსულ ძალებს, თუ მეფე ადგილზე შესაბამის ზომებს არ მიიღებდა. ამიტომ ერეკლე იძულებული გამხდარა ადგილობრივი მილიციის ფორმირება მოეხდინა, რათა საზღვრისპირა ტერიტორიები დაეცვა ლეკებისაგან.⁴

ჩვენი აზრით, ზემოთქმული ადგილზე რეალურად არსებული ვითარების არ ცოდნით გამოწვეული სხვადასხვა „წყაროებზე“ გულუბრყვილო დანდობა კი არა, გამიზნული პროვოკაციაა, რომლის მიზანი ერეკლეს უუნარობისა და რუსული ძალების ქართლ-კახეთის საშინაო საქმეებში ჩარევის აუცილებლობის ჩვენებაა.

საქართველოში შექმნილ მდგომარეობაზე საიმპერატორო კარი მთელ პა-

¹ ქართული სამართლის ძეგლები, ტ. II, გვ. 500, დოკ. 139.

² იასე ლორთქიფანიძე, მასალები საქართველოს ისტორიისათვის, გვ. 62.

³ სახელმწიფო საისტორიო არქივი, ფ. 1449; ს. 2795.

⁴ В. Потто, Кавказская война в отдельных очерках эпизодах легендах и биографиях. т. I. вып. II, СПб., 1885, გვ. 262.

სუხისმგებლობას თურქეთს აკისრებდა. გარეგნულად ყველაფერი ისე ჩანდა, თითქოს რუსეთი რეალურად იყო დაინტერესებული სტაბილური ქართლ-კახეთით და თურქეთთან ომის წამოწყება მხოლოდ გაჭირვებაში მყოფი ერთმორწმუნე ერის ინტერესების დაცვის მიზნით იყო განპირობებული. რუსი ისტორიკოსი ნ. სმირნოვი აღნიშნულთან დაკავშირებით წერდა: „რაც უფრო რთულდებოდა იმპერიის საშინაო მდგომარეობა, თურქეთი მით უფრო დაჟინებით ეძებდა საბაბს რუსეთთან კონფლიქტისათვის კავკასიაში. შემთხვევითი არ იყო, რომ 1785 წლიდან რუსეთ-თურქეთის ურთიერთობა კვლავ იწყებს გართულებას, ბრალს სდებდა, რა რუსეთს აგრესიულ პოლიტიკაში, თურქებმა თვით გამოავლინეს განსაკუთრებული აქტიუობა კავკასიასა და დაღესტანში, რათა მოემზადებინათ ადგილობრივი მოსახლეობა შესაძლო ომის შემთხვევაში. მთავარი დარტყმის ობიექტად საქართველო იქცა.“

დაღესტნელების 300-700 კაციანი რაზმები თავს ესხმოდნენ ქართლის მოსახლეობას მტკვრის ორივე ნაპირზე. მიჰყავდათ ტყვე და საქონელი, ძარცვავდნენ ქონებას. ეს თავდასხმები ხდებოდა თურქეთის მთავრობის ნებართვით. მიუხედავად იმისა, რომ პორტამ რუსეთის მოთხოვნიდან გამომდინარე, „ამკრძალავი წერილები“ დაუგზავნა თავის ფაშებს, რომლებშიც უბრძანებდა, „ხელი არ ეხლოთ ხარისათვის, რომელიც წევს (იგულისხმება ერეკლე II – ი.ა.) და არ ეიძულებინათ წამომდგარიყო“, ...თურქეთი არ ზოგავდა თანხას ადგილობრივი ხანებისა და ბეგების მოსყიდვის მიზნით“.¹

1787 წელს რუსეთ-თურქეთის მეორე ომი მართლაც დაიწყო და რუსებმა ქართლ-კახეთში მდგარი ორი ბატალიონიც უკან გაიწვიეს. ისინი არც მაღავდნენ, რომ საქართველოში მათი შემოსვლით ერეკლემ ბევრი მოკავშირე დაკარგა და უკან გასვლის შემთხვევაში ქართლ-კახეთის მეფე მოახერხებდა მეზობლებთან ძველი ურთიერთობების აღდგენას. თუმცა, ჯარის გაწვევის მთავარ მიზეზად ის დასახელდა, რომ რუსი ბატალიონები საქართველოში დიდ შიმშილს განიცდიდნენ.²

სინამდვილეში, რუსები თურქებთან ამ ომის მთავარი მოვლენების განვითარებას ბალკანეთის ფრონტზე გეგმავდნენ და საქართველოში ყოფნით თურქებისათვის ბრძოლის საბაბის მიცემა არ სურდათ. ბურნაშოვის საჩქაროდ

¹ Н. Смирнов. политика России на Кавказе в XVI-XIX веках, გვ. 129-130.

² С. Бурнашев. Картина Грузии или описание политического состоянія царств Карталинского и Кахетинского. Тифл., 1896, გვ. III.

უკან მიბრუნების მთავარი მოტივიც ეს გახლდათ. შიმშილი რომ არაფერ შუაშია, საბუთებითაც დასტურდება. ამ დროის ერთი დოკუმენტით ერეკლე იესე ამილახვარს უბრძანებს: „მერმე ამ შენს სასარდლოს ზემო ქართლს, ამ სიით აქ მყოფის რუსის ჯარის სურსათი ვისაც შესწერებოდეს, ეს ასე უკლებლად უნდა გამოიღონო“.¹ ცოტა მოგვიანებით, პეტერბურგში გარსეგან ჭავჭავაძისადმი ერეკლეს მიწერილი წერილიდან ირკვევა, რომ რუსული მხედრობა ადგილობრივი მოსახლეობისაგან პურს, საბაზრო ღირებულებასთან შედარებით, ხუთჯერ უფრო დაბალ ფასში ყიდულობდა² და სხვ.

ზურაბ ავალიშვილის შეფასებით, ქართლ-კახეთში დატრიალებულ უბედურებაზე პასუხისმგებლობა რუსეთს უნდა აეღო: „უკვე გეორგიევსკის ტრაქტატიდან 1 წლის შემდეგ, რუსეთის სრულუფლებიანი ელჩი თურქეთში ბულგაკოვი მოითხოვდა არ მიეყენებინათ ზიანი ქართლ-კახეთისათვის, მიუხედავად ამისა, ამ მოთხოვნებს შედეგი არ მოჰქონდა, რადგან რუსებთან დადებული პროტექტორატი მეზობელ ახალციხის ფაშას სამფლობელოს დაკარგვით ემუქრებოდა (რომლის დაკავებასაც რუსეთის დახმარებით ცდილობდა ერეკლე), ამიტომ მხოლოდ რუსული არმიის საქართველოდან წასვლის შემდეგ, 1787 წელს ერეკლემ განაახლა მასთან კავშირი და ფაშამ თავდასხმები შეწყვიტა“. ზ. ავალიშვილი სვამდა საკვებით სამართლიან კითხვას: „რამდენადაც უცნაური არ უნდა იყოს, თურქეთთან მეორე ომის დროს (1787-1791 წლების ომი – ი.ა.), მიუხედავად იმისა, რომ საქართველო, როგორც იმპერიაზე დამოკიდებული სახელმწიფო, იმყოფებოდა თურქეთთან საომარ ვითარებაში, ეს უკანასკნელი არანაირ მტრულ დამოკიდებულებას ერეკლესთან ურთიერთობაში არ ამჟღავნებდა“. და პასუხობდა ლოგიკურად: „ერთი სიტყვით, თურქეთთან მშვიდობიანობის დროს რუსეთის პროტექტორატი საქართველოს არ იცავდა, ხოლო თურქეთთან ომის დროს იგი ზედმეტი აღმოჩნდაო“.³

მართლაც, XVIII საუკუნის 80-იანი წლების ბოლო შედარებით მშვიდობიანი გამოდგა ქვეყნისათვის. 1786 წლის 17 მაისს ერეკლე ზოგიერთ ჩრდილოკავკასიელ ტომსაც გაურიგდა და ანწუხელებთან, კაპუტელებთან და სხვებთან, თანამშრომლობისა და თავდაუსხმელობის ხელშეკრულება გააფორმა. მოლაპარაკების მეორე მხარეს თუშ-ქართლები (დოკუმენტის მიხედვით –

¹ ივანე ჯავახიშვილი. საქართველოს ეკონომიური ისტორიის ძეგლები (XIII-XIX სს.), წ. II, გვ. 144, დოკ. 53.

² А. Цагарели. Грамоты., т. II, вып. I, გვ. 135.

³ З. Авваловъ. Присоединение Грузии къ Россiи, გვ. 165-166.

ქართველები) წარმოადგენენ. დოკუმენტი 16 მუხლისაგან შედგება და სამ ნაწილად შეიძლება დავეყოთ. პირველ ნაწილში (I-III მუხლები) თუშების ვალდებულებებია გაწერილი. პირველივე მუხლი განმარტავს, რომ „დღეის იქით თუშებმა ასე წმინდათ უნდა დაიცვან თავი, რომ ჩვენს შემორიგებულს ლეკს ანწუხელსა, კაპუჭელსა თუ სხუას ნურას აწყენენ და ნურარას მოჰპარავენ“.¹

მეორე მუხლის მიხედვით, თუ თუშები ბელაქნისაკენ ჯარით „სამტეროთ წასვლას მოინდომებდნენ“, მოურავისათვის უნდა შეეცყობინებინათ, დაზუსტებული იყო მათი მარშრუტიც. სათარეშოდ წასული თუშები ყვარლელებსა და გაგაზელებს უნდა შეთანხმებოდნენ. ეს უკანასკნელნი არჩევანში თავისუფალნი იყვნენ, უნდოდათ გაჰყვებოდნენ, უნდოდათ – არა. გაღმა ქიზიყიდან თუშებს ზამთარ-ზაფხულ მოქმედების თავისუფლება ეძლეოდათ.

ზემოხსენებულ პროცესებში ანწუხელები ნეიტრალიტეტს ინარჩუნებდნენ.

მეოთხე მუხლით გავლენის სფეროებია გადანაწილებული: „კართუბანსა და კართუბანს ჩასწვრივ ალაზნამდინ თუშნი ნუღარ ჩავლენ, ანწუხელთ დაანებონ, ნურც სანადიროდ, ნურც სამტეროთ და ნურც გზის შესაკრავათ ნუღარ გაივლიან“.² მეხუთე-მეათე და მეთხუთმეტე-მეთექვსმეტე მუხლებით „განჩინების დამრღვევთა პასუხისმგებლობა და „სისხლია“ განსაზღვრული ორივე მხრიდან. რომელიმე მხარის პირის მკვლელობის საზღაურად თავიდან თორმეტი თუმანი ყოფილა დაწესებული, შემდეგ თანხა გაუორმაგებიათ, მაგრამ მიზნისთვის მაინც ვერ მიუღწევიათ და „მაინც კიდევ ხოცდნენ“, ამიტომ ანწუხელის, თუშის, თუ ქართლელის მკვლელობისათვის საბოლოოდ 30 თუმანი დაუდგენიათ. თუ მკვლელი ან ქურდი დაიმალებოდა, სისხლის ფასი და ზარალის ანაზღაურება ნათესავს, ან „იმის სოფლის კაცს“ უნდა გადაეხადა. ქურდებს ზარალი ორმაგად უნდა აენაზღაურებინათ.

მეცხრე და მეათე მუხლებით თუშებს პირობის ფიცი და მუხალგა ერთმეოდათ, რომ „ამ გარიგებას დღეის იქით აღარ გა[რ]დახდებოდნენ“.

XI-XIV მუხლებით ანწუხელების ვალდებულებები იყო დადგენილი. მათი უპირველესი პირობა იყო, რომ „სხუა დაღისტნის კაცი“ არ უნდა მოეყვანათ თავიანთ ბინაზე. თუ ანწუხელები თუშეთზე ან კახეთზე მომავალ მტრის მოძრაობას შენიშნავდნენ, გაგაზელები და ყვარლელები უნდა გაეფრთხილებინათ. ისინი ასევე ვალდებულნი იყვნენ, ლეკების ხელიდან ქართველი ტყვეები დაეხ-

¹ ქართული სამართლის ძეგლები, ტ. VI, თბ., 1977, გვ. 731, დოკ. 381.

² ქართული სამართლის ძეგლები, ტ. VI, გვ. 732.

სნათ (ლეკების მცირე ჯარის შემთხვევაში) და ქართველებისათვის გადაეცათ. თუ ლეკები დიდი ჯარით მოდიოდნენ, „ჭეშმარიტ ამბავს“ ანწუხელები კვლავ ყვარლელ-გაგაზელებს ამცნობდნენ. მეთოთხმეტე მუხლით უკვე ანწუხელები იძლეოდნენ პირობის ფიცს, რომ „განჩინებას“ ურყევად დაიცავდნენ.¹

გატარებული ღონისძიებების შედეგად, ლეკთა შემოსევებმა მნიშვნელოვნად იკლო, სამეფო კარი მათ მოგერიებასაც იოლად ახერხებდა. 1788 წლის სექტემბერში ერეკლე, როგორც იქნა, ახალციხის ფაშა – სულეიმანსაც მოურიდდა, „ახალციხური ქრონიკების“ მიხედვით, არც თუ უანგაროდ:

- „...1. 27 ენკენისა (სექტემბერი – ი.ა.) მეფე ერეკლე და ფაშა გარიგდნენ;
- 3 ღვინობ. (ოქტომბერი – ს.ა.) ხაზინადარი მეფე ერეკლესთან წავიდა;
- 4 ფაშამ ჯარი დაშალა;
- ...10. ხაზინადარი მოვიდა“²

სულეიმან ფაშა სიტყვის პატრონი მაინც არ აღმოჩნდა, იგი კვლავ უღებდა კარს დაღესტნელ აბრაგებს და ერეკლეს მოწინააღმდეგე ფეოდალებს. ეს ფაქტი მინიმუმ ორი მიზეზით იყო განპირობებული: ჯერ ერთი, დაღესტნელთა წაქეზებით ისიც მნიშვნელოვნად ითბობდა ხელს და მეორეც: როგორც ითქვა, სულეიმანს სერიოზული ეჭვი ჰქონდა, რომ ერეკლეს ახალციხის დაკავება ჰქონდა განზრახული, ამიტომ ქართლ-კახეთის განუწყვეტელი რბევით ერთდროულად საშიშ მეზობელსაც ასუსტებდა და სულთანსაც იმადლიერებდა.

XVIII ს. ბოლო ათწლეული ქვეყნისათვის გადამწყვეტი აღმოჩნდა. ერეკლე „ლეკიანობის“ საკითხის გადაჭრას პეტერბურგს მყოფ ქართველ დიპლომატებს მუდმივად შეახსენებდა. მისი მოთხოვნით 1795 წ. 18 სექტემბერს გარსევან ჭავჭავაძე კანცლერ ა. ბეზბოროდკოს სთხოვდა, მითითება მიეცა საქართველოში მყოფი რუსული მხედრობისათვის, დახმარებოდნენ ერეკლეს ჭარელთა „დამდაბლებაში“, ამასთან ეს ლაშქრობა ზამთარში უნდა მოეწყოთ, რადგან ჭარში ცივი ზამთარი არ იცოდა, ამიტომ „საზოგადო სარგებლობისათვის სჯობს მათზე ზამთარში ვიმოქმედოთ“³ მაგრამ რუსებმა ერეკლეს ეს თხოვნაც უპასუხოდ დატოვეს.

1795 წლის 10-11 სექტემბერს, კრწანისის ბრძოლაში მარცხმა მოხუცებული მეფე კიდევ ერთხელ დატოვა ბედისწერის პირისპირ. ერეკლეს კრწანის-

¹ ქართული სამართლის ძეგლები, ტ. VI, გვ. 732, დოკ. 381.

² შოთა ლომსაძე. გვიანი შუა საუკუნეების საქართველოს ისტორიიდან..., გვ. 106.

³ ზურაბ ცქიტიშვილი. გარსევან ჭავჭავაძის სახელმწიფოებრივი მოღვაწეობა, გვ. 145

თან დამარცხებით მაშინვე ისარგებლეს დაღესტნელებმა, 4 ათასამდე კაცი შეიკრიბა და იმავე წლის ოქტომბერში პანკისს დაეცა. არც სულეიმან ფაშა კარგავდა დროს უქმად, 1796 წ. 6 იანვარს რუსეთის ელჩი სტამბულში კონიუბეი რუსეთის მთავრობას ატყობინებდა, რომ ახალციხის ფაშას 300 დატყვევებული ბავშვი გაეყიდა.¹ კრწანისთან ქართველების მარცხის მოსალოდნელი შედეგი საიმპერატორო კარზე გვიან გააცნობიერეს. რუსეთს გასაჭირში მიტოვებული და მტრის პირში მიცემული მოკავშირე ეკარგებოდა, ხოლო საქართველოს დაკარგვით იგი იძულებული გახდებოდა მთელს ახლო აღმოსავლეთში ფეხი ამოეკვეთა,² ამიტომ 1796 წელს ზუბოვის მეთაურობით ჩრდ. კავკასიაში წარმატებული ლაშქრობა წამოიწიეს, აიღეს დარუბანდი, ყუბა, ბაქო, სალიანი, შამახია და ირანში შესატრელად ემზადებოდნენ, მაგრამ არც ამჯერად მიიყვანეს საქმე ბოლომდე. ნოემბერში ეკატერინე II გარდაიცვალა, ტახტზე ასულმა პავლე I-მა ლაშქრობა მოშალა და ჯარი უკან გაიწვია. დაღესტნელი ირანელებმა ქართლ-კახეთის უნუგეშო მდგომარეობა რეალურად შეაფასეს, აღა-მაჰმად-ხანი კვლავ საქართველოზე ლაშქრობის სამზადისს შეუდგა, ომარხანიც კახეთს მოადგა,³ მაგრამ იმჯერად საქართველო გადარჩა.

სიცოცხლის ბოლო წლებში მოხუც ერეკლეზე დიდ გავლენას ახდენდა დარეჯან დედოფალი, რასაც საგანგებოდ ხაზს უსვამენ რუსი ავტორები (ბუტკოვი, დუბროვინი და ა. შ.) და აღნიშნავენ, რომ სარგებლობდა, რა მეფის განუსაზღვრელი ნდობით, ერეკლეს ასაკის მომატებასთან ერთად დედოფალი სულ უფრო აქტიურად ერეოდა სახელმწიფო საქმეებში და ახასიათებენ მას (დარეჯან დედოფალს – ი.ა.) ჭკვიან, მაგრამ ძალაუფლებისმოყვარე, ცბიერ და მკაცრ ადამიანად.⁴ ქართლ-კახეთის სამეფო კარზე შექმნილ კრიტიკულ მდგომარეობას ნ. დუბროვინი სწორედ ამ ფაქტს უკავშირებს: „...მეფის ამ ბრმა ნდობამ და ცოლის ხელში მთელი ძალაუფლების გადაცემამ, საბოლოოდ საქართველოს ბედზე დამდუპველი გავლენა იქონიაო“.⁵

რუსი ავტორების მიერ საქართველოს სამეფო კარზე შექმნილი რეალური ვითარების კიდევ უფრო დრამატიზება შემთხვევითი არ არის. არც იმის მიხედვრათა ძნელი, რომ საიმპერატორო კარის უმაღლესი წრეების მითითებით

¹ იასე ლორთქიფანიძე. მასალები საქართველოს ისტორიისათვის, გვ. 62.

² საქართველოს ისტორია..., ნაწ. I. გვ. 414.

³ იოსებ ალიმბარაშვილი. ომარ-ხანის თავდასხმები საქართველოს წინააღმდეგ, გვ. 51-54.

⁴ Н. Дубровин. История войны..., т. II, гв. 38; П. Бутков. Материалы..., т. II, гв. 336.

⁵ Н. Дубровин. История войны..., т. II, гв. 38.

ყველაფერი კეთდებოდა იმისათვის, რათა დიდი ხნის წინათ მოფიქრებული და ამ ამბებიდან რამდენიმე წლის შემდეგ განხორციელებული აქტი (მხედველობაში გვაქვს 1801 წლის 12 სექტემბრის მანიფესტი), პოლიტიკურად და მორალურად გამართლებულიყო.¹

1798 წლის 11 იანვარს, ამდენი ჭირ-ვარამ გამოვლილი, 80 წელს მიტანებული მეფე ერეკლე გარდაიცვალა. გამეფდა ერეკლეს უფროსი ვაჟი გიორგი XII (1798-1800 წ.წ.), რომელიც ერეკლეს მეორე ცოლის, ზაალ აბაშიძის ასულ ანასაგან ჰყავდა, ხოლო დანარჩენი ვაჟები (იულონ, მირიან, ვახტანგ, ალექსანდრე, ფარნაოზ ბატონიშვილები) – დარეჯან დედოფლისაგან. მამის გარდაცვალების შემდეგ, გიორგიმ შეცვალა 1791 წელს მიღებული კანონი და მემკვიდრედ უფროსი ძე – დავითი გამოაცხადა, რამაც გიორგის დედინაცვალი დარეჯან დედოფალი და ნახევარ-ძმები აშკარად ააჯანყა. ბატონიშვილები თავიანთ საუფლისწულოებში ჩაიკეტნენ (იულონი თავს ქართლის მეფედ თვლიდა, ვახტანგი არაგვზე გამაგრდა, მირიანი – მარტყოფში, ფარნაოზი – სურამში, ალექსანდრე სპარსეთში გაიქცა და შაჰის დახმარებით ცდილობდა რუსების მოიმედე გიორგის დამარცხებას) და გიორგი XII-ს მეფედ არ ცნობდნენ.

ლეკთა გამუდმებული შემოსევების, დაპირისპირებული დედინაცვლისა და ნახევარ-ძმებისაგან დასაცავად მეფე იძულებული გახდა 5-7 ათასი ლეკი დაექირავებინა.² როცა ესეც არ აღმოჩნდა საკმარისი, ისევ რუსების ხელით სცადა საკუთარი უშიშროების უზრუნველყოფა. 1800 წ. აგვისტო-სექტემბერში იგი ერთიმეორის მიყოლებით უგზავნის სათხოვარ წერილებს³ გენერალ კნორინგს და საქართველოში 6000 ჯარისკაცის გამოგზავნას სთხოვს. ოთხი თვის „პრავიანტსა და ფურაჟს“ ჰპირდება და გარანტიას აძლევს, რომ „ყაზიბეგიდამ ტფილისამდე დანიშნულს ადგილებში მზა არის სუხარი, კრუპა და ფურაჟი ...არც იმაზე შეწუხდებიან და არც დააკლდებათ“. 6 ათასი რუსი „რეგულარის“ გამოგზავნის შემთხვევაში, მეფის მთავარი მოტივი ის არის, რომ „ჩვენს გარშემო მტერთ შეეშინდესთ და ეგრეთვე რომელნიც მტერნი შინა გვყვანან,

¹ საგულისხმოა, რომ მოგვიანებით, როცა ქართლ-კახეთის სამეფოს გაუქმების პროექტს ადგენდნენ, 1801 წ. 8 აგვისტოს სახელმწიფო საბჭოს სხდომის დასკვნაში ასეც ჩაიწერა: „ამ ქვეყნის (ქართლ-კახეთის – ი.ა.) რუსეთთან შეერთება არ შეიცავს რაიმე უსამართლობას, არამედ ეს იქნება ამ ქვეყნის ხსნა, ხოლო რუსეთისათვის ის წარმოადგენს არსებითი ხასიათის სარგებელს“ (იხ. ნიკოლოზ ბერძენიშვილი. საქართველოს ისტორიის საკითხები. ტ. II, გვ. 257).

² П. Бутков. Материалы..., ч. II, გვ. 448.

³ Акты Собранные Кавказскою Археографическою Коммисиею т. I. вып. II, გვ. 144-145, დოკ. №61; გვ. 146, დოკ. № 64; გვ. 149, დოკ. №68.

იმათაც ჩვენზედ ბოროტი განზრახვა აღარა ჰქონდეთ“.¹

1800 წ. 7 ნოემბერს, სოფ. კაკაბეთთან, ნიახურას ველზე, გიორგი XII-მ რუსების დახმარებით უკანასკნელი გამარჯვება მოიპოვა ალექსანდრე ბატონიშვილისა და ომარ-ხანის მხედრობაზე. კაკაბეთთან ბრძოლა ქართულ ისტორიოგრაფიაში შეფასებულია, როგორც წარმატებული ნაბიჯი დაღესტნელთა შემოსევების წინააღმდეგ. სინამდვილეში, ნიახურას ველზე ომარ-ხანისა და ალექსანდრე ბატონიშვილის დროშის ქვეშ ქართველები საკმაო რაოდენობით იბრძოდნენ, მაგ. ჯერ კიდევ 25 ოქტომბერს, ყოვლად სამღვდელოს ბოდბელსა და ქიზიყის მოხელეებისადმი ალექსანდრეს მიერ მიწერილი წერილიდან ცნობილია, რომ დაუცხრომელი ბატონიშვილი გარე კახეთიდან 1500 მეომარს ელოდებოდა.²

გასათვალისწინებელია ისიც, რომ დავით ბატონიშვილისა და რუსების გაერთიანებულ მხედრობაში იძულებით გამოყვანილი მოსახლეობა იბრძოდა, როცა ალექსანდრესთან მისვლა დიდ რისკთან და ოჯახების წახდენასთან იყო დაკავშირებული. ეს ფაქტი კიდევ ერთხელ ადასტურებს, ვის მხარეს იყო იმ დროისათვის ქართველი მოსახლეობის სიმპათია. რუსების წინააღმდეგ მებრძოლ ალექსანდრე ბატონიშვილს ომარ-ხანი „საყვარელ ძმად“ მოიხსენიებდა და მის დასახმარებლად ნიახურას ველზე მთელი ჩრდილო კავკასიური მხედრობის მობილიზება შეძლო. კაკაბეთთან ალექსანდრესა და ომარ-ხანის გვერდით იბრძოდნენ ხაპშუთა და ჯონგათაი მაჰმად ხანები, იბრეიმ ხანი, მურთუზალი და სხვები 17 ათასიანი კოალიციური მხედრობით.³ თუმცა, ისიც ფაქტია, რომ ქართლ-კახეთის უკანასკნელი მეფის რუსეთისადმი ერთგულება შექმნილმა რეალობამაც განაპირობა. გიორგი იძულებული იყო იმპერიისადმი ლოიალური პოლიტიკა გაეტარებინა. წინააღმდეგ შემთხვევაში იგი ერთადერთ საგარეო „დამცველს“ – იმპერატორსაც კარგავდა და მარტოდმარტო რჩებოდა საგარეო მტრისა და ტახტის მაძიებელი ბატონიშვილების დაჯგუფების პირისპირ.⁴

გიორგი XII-ის ორწლიან უბადრუკ მეფობაში ეს იყო ყველაზე „სახელოვანი“ გამარჯვება“. 28 დეკემბერს იგი გარდაიცვალა. ახალ საუკუნეს საქართველო ახალ რეალობაში ხვდებოდა. პირველად ათასზე მეტი წლის შემდეგ -

¹ *Акты...*, т. I, вып. II, გვ. 149, დოკ. 68.

² **იოსებ (სოსო) აღიშპარაშვილი.** კაკაბეთთან (ნიახურას) ბრძოლის) შეფასების..., გვ. 398.

³ **იოსებ (სოსო) აღიშპარაშვილი.** კაკაბეთთან (ნიახურას) ბრძოლის) შეფასების..., გვ. გვ. 399.

⁴ **ნიკოლოზ ჯავახიშვილი.** ხუნძეთის ნუცალი უმა V და საქართველო, კრებული. – *ისტორიანი.* კრებ. მიძღვნილი *როინ მეტრეველის* დაბადებიდან 70 წლისთავისადმი. თბ., 2009, გვ. 333.

უმეფოდ. არ შეცვლილა მხოლოდ ლეკიანობის მასშტაბები და შინაარსი. ქართველებიც ჩვეული თავდადებით ებრძოდნენ დაღესტნელ მომხდურებს, ოღონდ ერთი განსხვავებით – უკვე რუსული დროშის ქვეშ.

3. ლეკიანობა ქართლ-კახეთში რუსული ხელისუფლების დროს (XIX ს. დასაწყისი – 30-იანი წლები)

გიორგი XII-ის მემკვიდრეს – დავით ბატონიშვილს, რუსებმა მხოლოდ დროებით (1801 წლის იანვარ-მაისი), ჩააბარეს მმართველობა, მაშინაც კონორინგ-ლაზარევის უკითხავად ქვეყანაში არაფერი ხდებოდა.

დავით გიორგის ძეს მალე ფორმალური ძალაუფლებაც ჩამოერთვა და ქვეყნის ხელისუფალნი „დე ფაქტო“ და „დე იურე“ კონორინგ-ლაზარევი გახდნენ. 1802 წლიდან აღმოსავლეთ საქართველოში მთლიანად რუსული მმართველობა დამყარდა, ხოლო დავით ბატონიშვილი 1803 წლის 18 თებერვალს სამუდამოდ რუსეთში გადაასახლეს. მალე მას დედოფლები (დარეჯანი და მარიამი) და ყველა ის ბატონიშვილი მიაყოლეს, ვისაც რაიმე პრეტენზია შეიძლებოდა ჰქონოდა საქართველოს სამეფო ტახტზე.

აღმ. საქართველოს დაპყრობის შემდეგ „ლეკიანობა“ უშუალოდ რუსების მოსაგვარებელი გახდა. საიმპერატორო კარი კვლავ აქტიურად გამოდიოდა ერთმორწმუნე ხალხის დაცვის ღოზუნგით.¹ თუმცა, მარტივი მიზეზის გამო ამჯერად იძულებული გახდა ჭარ-ბელაქანის პრობლემა იარაღის ძალით გადაეწყვიტა: 1801 წლამდე იგი მხოლოდ „მფარველობაში“ მყოფ ქვეყანას „ეხმარებოდა“, ხოლო 1801 წლის შემდეგ, ეს ქვეყანა „საკუთარ ნაწილად“ იქცა.

რუსეთი ასევე მოხერხებულად იყენებდა გეორგიევსკის ხელშეკრულების იმ სეპარატიულ მუხლს, რომელიც მას საქართველოს ისტორიული ტერიტორიების შემოერთებას ავალდებულებდა. დამოუკიდებელი ქართლ-კახეთის სამეფოს დროს ეს მუხლი რუსეთს არასოდეს გამოუყენებია, მაგრამ ახლა სიტუაცია რადიკალურად შეიცვალა. საიმპერატორო კარმა უკვე „ვალდებულად“

¹ ბუნებრივია, იმ დროისათვის ქართველები ვერც წარმოიდგენდნენ, რომ რუსეთის მხრიდან კავკასიაში დამკვიდრების საბაზად მუდმივად ერთმორწმუნოების მტკიცება, სინამდვილეში მხოლოდ ფარსი იყო და ქართლ-კახეთის სამეფოს გაუქმებას (1801 წ.), მალე ქართული ეკლესიის ავტოკეფალიის გაუქმებაც (1811 წ.) მოჰყვებოდა.

ჩათვალა თავი ამ ტერიტორიების შემოერთებაზე ეზრუნა. ეს ფაქტი მარტივად ასახსნელი იყო: საქართველოს ისტორიული მიწა-წყლის შემოერთებით რუსეთის იმპერია კიდევ უფრო იზრდებოდა.

პირველ რიგში მოსაგვარებელ საკითხად ამ ეტაპზე სწორედ ჭარ-ბელაქანის ტერიტორიის შემოერთება იქცა, ჯერ ერთი იმიტომ, რომ საინგილო საქართველოს ყოფილ ტერიტორიას წარმოადგენდა. მეორე: რუსეთს უფრო შორს მიმავალი გეგმები ჰქონდა, იგი ირან-ოსმალეთთან ომების დაწყებას აპირებდა და საქართველოს ყოფილი ტერიტორიების დაბრუნებასთან ერთად, გამარჯვების შემთხვევაში სამხრეთ კავკასიაში მოხერხებულ პლაცდარმს იქმნიდა. და მესამეც, ზურგში სახიფათო და აგრესიული ჭარ-ბელაქანის დაპყრობის გარეშე, რუსეთი ირან-ოსმალეთთან ხსენებულ ომებს ვერ დაიწყებდა.

სამართლიანად მიუთითებდა მ. დუმბაძე: „აღმოსავლეთ საქართველოში გაბატონებული რუსეთის მთავრობა დასაწყისში (და შემდეგაც, სადაც საჭიროდ სცნობდა) ძველი ქართული მიწა-წყლის შეკრება-გაერთიანების ღოზუნგითაც გამოდიოდა ჭარ-ბელაქანის დამორჩილებისათვის. ასეთი მოტივი სავსებით საფუძვლიანი იყო და იგი კარგად ფარავდა მთავრობის ნამდვილ მიზნებს საქართველო-ამიერკავკასიის სრული დაპყრობის საქმეში“.¹

რუსეთის „ოფიციალურმა“ დამკვიდრებამ ქართლ-კახეთში ირან-ოსმალურ-დაღესტნური კოალიცია ახალი ენერგიით აამოქმედა. თავისი აგრესიით გამოირჩეოდნენ დაღესტნელი მთიელები. რუსეთის ამიერკავკასიაში გაბატონებით ისინი საბოლოოდ მოექცნენ ქრისტიანული ქვეყნების გარემოცვაში, რის შემდეგ, რუსეთისათვის მათი პოლიტიკური დაპყრობა ძნელი აღარ იქნებოდა, ამიტომ თავისუფლების მოყვარე მთიელთა პროტესტმა მთელი ძალით იფეთქა, ამჯერად არა მარტო ქართველების, არამედ რუსების წინააღმდეგაც.

შეპირებული მშვიდობის ნაცვლად, ქვეყნის მშენებლობის ჩარხი უკუღმა დატრიალდა. საქართველოს მდგომარეობა იმ მონადირეს ჰგავდა, რომელიც დაჭრილ ნადირს უიარაღოდ შეატოვებს. ამიტომ იყო, რომ ქართველმა აზნაურობამ 1802 წელსვე პეტიცია შეადგინა და საქართველოს მმართველთან ჩიოდა: „ყოვლად მოწყალე ხელმწიფემ საქართველო რუსეთს შეაერთა და მანიფესტები გვიბოძა, რომ ყოველსფერი მოწყალეობა თვითეულად გვიბრძანა, თქვენგან არ აგვისრულდა. უშიშროება გვიბრძანა, რაში ჩანს? სოფლებსა და

¹ მამია დუმბაძე. აღმოსავლეთ კახეთის (საინგილოს) ისტორიიდან, გვ. 131.

სოფლებს გლეჯენ ლეკნი და თქვენ არას ნადგლობთო“.¹

1802 წ. ივლისში რუსული ხელისუფლების ძალმომრეობით შეწუხებულმა კახელი თავადაზნაურობის ნაწილმა იმპერატორის ტახტის ერთგულებაზე უარი განაცხადა და აჯანყდა. გამოსვლები სოფ. ქელმენურში დაიწყო. აჯანყებებს ოთარ ჯანდიერი და სვიმონ ქობულაშვილი ჩაუდგნენ სათავეში. ალექსანდრე ბატონიშვილმა შექმნილი მომენტით ისარგებლა, ჭარში გადავიდა და ჯამაათთან მოლაპარაკებები დაიწყო რუსული ხელისუფლების წინააღმდეგ ერთობლივი მოქმედებების საწარმოებლად. ამ ფაქტით შემფოთებული გულიაკოვი ციციანოვს ატყობინებდა, რომ ალექსანდრეს ემისრები ცდილობდნენ კახელი მოსახლეობის „ლეკების“ მხარეზე გადაბირებას და კახელი თავადაზნაურობის დიდი ნაწილი კიდევ დაიძრა ჭარ-ბელაქანისაკენო,² მაგრამ იმ დროისათვის ალექსანდრემ სერიოზულ ძალების თავმოყრა ვერ მოახერხა და ისევ ირანში დაბრუნდა, ლეკებმა კი ჩვეულ მარბიელ ძარცვა-თარეშებს მიჰყვეს ხელი. დაღესტნელთა „პლაცდარში“ ქართლზე თავდასასხმელად კვლავ ახალციხე იყო, საიდანაც ფაშას ხელშეწყობით ისინი დაუბრკოლებლად გადმოდიოდნენ და არბევდნენ მოსახლეობას.

„ლეკიანობის“ სიმძიმე საკუთარ თავზე რუსებმა ძალიან მალე იგრძნეს. მიუხედავად რუსი გენერლების მუქარისა, მარტო ქართლ-კახეთში ყოველწლიურად ახალციხის მხრიდან ლეკთა შემოსევების შედეგად 300-მდე კომლი ან ნადგურდებოდა, ან უმთავრესად ახალციხეში ტყვედ იყიდებოდა. კნორინგისა და ლაზარევის ოფიციალურ მიმართვაზე – ხელი არ შეეწყო მძარცველთა ბანდებისათვის, რომლებიც ქართლს აწუხებდნენ, ახალციხის ფაშა – შერიფი პასუხობდა: „ლეკები ჩემს უნებურად ტყეებსა და ხევ-ხუვებში იმალებიან და მე არაფერს მეკითხებიანო“.³

ჯერ კიდევ 1801 წ. 26 აპრილს ლაზარევი კნორინგს უპატაკებდა: „...დადგება თუ არა გაზაფხული, იწყება ლეკების მტაცებლური თავდასხმები საქართველოზე. ისინი გადმოდიან მცირე რაზმებით, მიჰყავთ და ხოცავენ ტყეებსა და მინდვრად მომუშავე ადამიანებს. რუს ქვეითთა რაზმებს მათი მოგერიება არ შეუძლიათ, რადგან მათი დევნა შეუძლებელია“. ლაზარევი აღნიშნავდა, რომ აუცილებელი იყო დუშეთიდან მცხეთამდე და ღართისკარის გასასვლელ-

¹ აბელ კიკვიძე. საქართველოს ისტორია. 1801-1890 წწ. თბ., 1974, გვ. 31-32.

² И. Петрушевский. Джаро-белаканские., გვ. 80.

³ შოთა ლომსაძე. სამცხე-ჯავახეთი. გვ. 106-107.

თან ორი ცხენოსანი ეგერთა ასეულის ჩაყენება. ამავე დროს დიდ-მოხელეს აფრთხილებდა: „ამ საქმეში ქართველების ნდობა არ შეიძლება, რადგან ლეკები დაუბრკოლებლად ახერხებენ ქართველთა პიკეტების გავლას და უფრო მეტიც, ტყვეებადაც კი მიჰყავთ ისინიო“.¹

1801 წლის აპრილში სიღნაღში მდგარი პოლკოვნიკი კარიაგინი მთავარმართებელ კნორინგს ატყობინებდა 4 000 ლეკის შესახებ, რომლებიც ორ პარტიად ემზადებოდნენ კახეთზე თავდასასხმელად.² რუსების ოფიციალური ცნობებით: 29 მაისს ლეკების ერთ-ერთ რაზმს თბილისის შემოგარენში გაუძარცვავს ერთ-ერთი სოფელი, ტყვედ წაუყვანია 80 ქალი და მამაკაცი და 300 სული საქონელი. ხელისუფლების ოფიციალური პირების მიმოწერიდან ჩანს, რომ 1801-1803 წლებში ქართლ-კახეთში ლეკთა შემოსევებს ინტენსიური ხასიათი აქვს, რასაც აქტიურად ხელს უწყობს ახალციხის შერიფ ფაშა, ხოლო მის უკან კვლავ ოფიციალური სტამბოლი დგას.³

კნორინგ-ლაზარევიძე ქართლ-კახეთში ლეკიანობის საკითხი ვერ გადაწყვიტეს. თეიმურაზ ბაგრატიონი მთავარმართებელ კნორინგის შეცვლას (1803 წ. იანვარში) პავლე ციციანოვით (ციციშვილით), სწორედ ამ გარემოებით ხსნის.⁴ პ. ციციანოვი ლეკების წინააღმდეგ თავიდანვე ენერგიული ზომები მიიღო. მან მთავარ მიზნად დაისახა ლეკთა თავდასხმების აღკვეთა არა ახალციხიდან, არამედ ჭარ-ბელაქანიდან, საიდანაც მუდმივად მარაგდებოდა ახალციხე. მანვე მოითხოვა 4 საგუშაგოს დაარსება თურქეთის საზღვარზე, მათ შორის სურამსა და წალკაში.

1803 წლის მარტში გულიაკოვის მეთაურობით ბელაქანში მხედრობა გაიგზავნა, რომელმაც იქაურობა გადაწვა და ჭარელებს შემდეგი პირობები წაუყენა:

1. არ მიეცათ თავშესაფარი ალექსანდრე ბატონიშვილისა და რუსულ ხელისუფლებას გაქცეული სხვა ქართველი თავადებისათვის;
2. მიეღოთ და შეენახათ საკუთარ კმაყოფაზე რუსი გარნიზონები;
3. გადაეხადათ ყოველწლიური ხარკი აბრეშუმით რუსებისათვის, იმ რაოდენობით, რასაც ადრე კახელ მეფეებს უხდიდნენ;

¹ *Акты...*, т. I, вып. II, გვ. 338; დოკ. № 433.

² **И. Петрушевский.** Джаро-белаканские..., გვ. 78.

³ იხ: **Н. Дубровин.** История войны..., т. III, გვ. 406-407; *Акты...*, т. I, вып. II, გვ. 285, დოკ. № 322; გვ. 659, დოკ. № 931; გვ. 664, დოკ. № 940; გვ. 669; დოკ. 964; გვ. 672; დოკ. № 940 და სხვ.

⁴ **თეიმურაზ ბაგრატიონი.** ახალი ისტორია. გვ. 68-69.

4. მიეცათ ყოველწლიურად ხუთი მიწეული წარჩინებულ ცნობილ გვართა წარმომადგენელთაგან.

პირობების მიღების შემთხვევაში, პ. ციციანოვი ჭარელებს საშინაო საქმეებში ხელშეუხებლობას „ფიცით“ უმტკიცებდა¹. თუმცა, არც ციციანოვის დონისძიებებს მოჰყოლია რაიმე არსებითი შედეგი. ლეკები შერიფ ფაშას ხელშეწყობის მთელ ქართლ-კახეთს იყვნენ მოდებულნი. დაეცნენ ქარელს, კავთისხევს, ატენის ხეობას, ჩაუარეს ხიდისთავს, სკრას, ხვედურეთს, წაღკას და რაც ხელთ მოხვდათ გაიტაცეს.²

პ. ციციანოვი კვლავ ძველ გეგმას მიუბრუნდა. მისი დავალებით რუსთა ერთი რაზმი გენერალ ორბელიანის სარდლობით ახალციხეში შეიჭრა, შემინებულმა ფაშამ ორბელიანს ქელი მოუხარა და 600 აბრაგი წარუდგინა დასასჯელად. ლეკი აბრაგები განაიარაღეს და შერცხვენილები მთელს ქართლსა და კახეთში ჩამოატარეს,³ ხოლო სხვა რაზმმა გულიაკოვის სარდლობით ჭარბელაქანზე ილაშქრა. ამ ლაშქრობას, როგორც პოლიტიკური, ასევე ეკონომიკური მიზნები განაპირობებდა, რომელსაც ნ. ბერძენიშვილი გამოკვეთილად მიანიშნებს:

პირველი: ჭარ-ბელაქანის დაპყრობის გარეშე საქართველოში „ლეკიანობის“ პრობლემის გადაჭრა შეუძლებელი იყო, ეს კუთხე კახეთს უშუალოდ ემეზობლებოდა და აქედან შეუფერხებლად გადმოდიოდნენ ლეკთა დიდი თუ მცირე რაზმები აღმოსავლეთ საქართველოში. ჭარ-ბელაქანის დაპყრობა ასევე მნიშვნელოვნად შეამცირებდა ლეკთა თარეშს ახალციხის მხრიდანაც, რადგან დაღისტნიდან ახალციხეს მისასვლელი მარჯვე გზა დახშული აღმოჩნდებოდა. მეორე: ჭარ-ბელაქანი აბრეშუმით მდიდარი კუთხე იყო და მისი შემოერთება ქვეყნის შემოსავალს გაზრდიდა. დაბოლოს: ამ კუთხეში გარბოდნენ რუსული მმართველობის შემოღებით უკმაყოფილო ქართველი თავადები. ⁴

ჩვენი აზრით, იყო კიდევ რამდენიმე სერიოზული მიზეზი, რომლის გამოც რუსეთმა ჭარის დაპყრობა გადაწყვიტა: როგორც ზემოთაც აღინიშნა, რუსეთი ირანთან ომის დაწყებას აპირებდა და ჯერ ერთი, ზურგში აგრესიული და

¹ **И. Петрушевский.** Джаро-белаканские..., გვ. 85.;

² **თეიმურაზ ბაგრატიონი.** ახალი ისტორია. გვ. 69; *Акты...* т. II. Тифл., 1868, გვ. 758-759, დოკ. №1551; გვ. 760, დოკ. №1553; მასალები ...შეკრებილი დავით გიორგის ძისა და მისი ძმების..., გვ. 68-69 და სხვ.

³ **მამია დუმბაძე.** ქართლ-კახეთის სახელმწიფოს გაუქმება და რუსეთთან შეერთება. – *საქართველოს ისტორიის ნარკვევები*. ტ. IV, გვ. 841-842.

⁴ **ნიკოლოზ ბერძენიშვილი.** საქართველოს ისტორიის საკითხები, ტ. II, გვ. 276.

„მოურჯულებელი“ დადესტნის ყოფნა მისთვის სახიფათო იყო; მეორე – ქართლში ლეკთა თარეშის აღსაკვეთად იგი იძულებული იყო მუდმივად ჰყოლოდა ზურგში დამატებითი სამხედრო ძალები, რაც საიმპერატორო კარს არახელსაყრელ ვითარებაში აყენებდა. და მესამეც, – რუს ხელისუფალთ უსაფუძვლოდ არ ეშინოდათ იმ თანაგრძნობის, რომელიც ჭარ-ბელაქნელებსა და ავარებს შეიძლებოდა ჰქონოდათ, არა მარტო ქართველ გლეხობაში, არამედ რუსებისადმი ოპოზიციურად განწყობილ თავადაზნაურთა რიგებში. ეს გარემოება ჭარ-ბელაქანს საერთოკავკასიურ მნიშვნელობას ჰქენდა¹ და აქედან გამომდინარე მისი დაპყრობის გარეშე რუსეთი ირანთან ომს ვერ დაიწყებდა.

გულიაკოვმა 9 მარტს ბელაქანი აიღო, ხოლო 29 მარტს ჭარიც უბრძოლველად დაიკავა.² დადებული ზავის თანახმად ლეკებს ხარკის სახით ყოველწლიურად 1100 ლიტრი (=3520 კგ.) აბრეშუმში უნდა ესადათ. ამავე ხელშეკრულების მე-5 მუხლის მიხედვით, ჭარელებს თავიანთ ქვეყანაზე არ უნდა გაეტარებინათ საქართველოს სარბევად დადესტნიდან ჩამოსული ლეკები,³ თუმცა იმავე წლის ოქტომბერში ლეკებმა პირობა დაარღვიეს და საქართველის ორი მხრიდან შემოუტიეს. ჭარ-ბელაქნის მხრიდან კახეთში შემოიჭრნენ, ხოლო ახალციხის მხრიდან ქართლის სოფლებს დაეცნენ. ამჯერად რუსებმა ისინი ადვილად დაამარცხეს და უკან გააბრუნეს.

1804 წ. იანვარში გულიაკოვმა კიდევ ერთხელ ილაშქრა ურჩი ჭარელების დასამორჩილებლად, მაგრამ ერთ-ერთ ბრძოლაში 15 იანვარს რუსები დამარცხდნენ, ხოლო თვით გულიაკოვი მოკლეს. პ. ციციანოვმა სცადა დიპლომატიურად მოეგვარებინა ახალციხის საფაშოს საკითხი მაგრამ აღარ დასცალდა: 1806 წლის 30 იანვარს ბაქოს ალყის დროს ჰუსეინ ხანთან მოლაპარაკებაზე მისული – მოკლეს, თავი მოკვეთეს და ირანის შაჰს – ბაბა ხანს გაუგზავნეს, ხოლო ტანი ციხის გვერდით დაფლეს (მოგვიანებით ტანი თბილისში გადმოასვენეს და სიონის ტაძრის ეზოში დაკრძალეს). ლეკებმა კი ქართლის რბევა კიდევ უფრო ენერგიულად გააგრძელეს, რასაც იმავე 1806 წ. ნოემბერში, რუსების კიდევ ერთი ლაშქრობა მოჰყვა ჭარში გენერალ ორბელიანის მეთაურობით. ლეკები დამარცხდნენ და კიდევ ერთხელ პირობა დადეს, რომ ხარკს გადაიხდიდნენ და საქართველოში აღარ ითარეშებდნენ.

¹ **И. Петрушевский.** Джаро-белаканские..., გვ. 78.

² გულიაკოვის ამ ექსპედიციაში მონაწილე ქართველი მეომრების რაოდენობა (4500 კაცი), სამჯერ აღმატებოდა რუსი ჯარისკაცების რიცხვს (1482 კაცი)

³ **А. И. Фонь-Плотто.** Природа и люди Закавказья, გვ. 13.

მოკლული პ. ციციანოვის ნაცვლად მთავარმმართველად დაინიშნა გუდოვიჩი. მალე იგი ტორმასოვით შეცვალეს, მაგრამ „მანცა ვერა ძალ იღვა აღვირსხმად მტაცებლობასა ლეკთასა, რ(ომე)ლნიმცა მარადის რყენიდიან დაბნებსა და სოფლებსა საქართველოსასა და მარადის სტაცებდიან რუსთა და მათთა ყაზახთა ცხენთა პოლკებთასა და იყო ფრიადი განუსვენებლობა და ოხრება მათგან“.¹

ზემოთ მოტანილი ფაქტები ცხადყოფს, რომ XIX ს. პირველ ათწლეულში, მიუხედავად რუსი ავტორების არაერთგზის მტკიცებისა, ლეკთა შემოსევები ქართლში არა თუ შემცირდა, არამედ გაიზარდა კიდევ. ამ ამბების უშუალო მომსწრე თეიმურაზ ბატონიშვილი ხსენებულ პერიოდს შემდეგნაირად აფასებს: „არა ოდეს მოიხსენების და ვერცა დაიტევს ისტორია ესე, თუ ვითარი ოხრება იყო ლეკთაგან საქართველოსა შ(ინ)ა“.²

აღსანიშნავია, რომ რუსეთის მიერ აღმოსავლეთ საქართველოს დაპყრობის შემდეგ ჩრდილო-კავკასიელთა დამოკიდებულება ბაგრატიონთა სამეფო სახლის წარმომადგენელთა მიმართ მნიშვნელოვნად შეიცვალა. დაღესტნელები უკვე აქტიურად თანამშრომლობენ და წართმეული ტახტის დაბრუნების საქმეში დახმარებას სთავაზობენ საიმპერატორო კართან ოპოზიციაში მყოფ სოლომონ II-ს,³ ალექსანდრე, ფარნაოზ და იულონ ბატონიშვილებს, ლევან იულონის ძეს⁴ და სხვ.

XIX საუკუნის დასაწყისიდანვე რუსეთი აქტიურად შეეცადა ამიერკავკასიაში პოზიციების განმტკიცებას და ერთდროულად ორი ომი დაიწყო – თურქეთისა (1806-1812 წწ.) და ირანის (1804-1813 წწ.) წინააღმდეგ, ამავე ხანებში დასავლეთ საქართველოს დაპყრობა-შემომტკიცებით იყო დაკავებული (დაიპყრო იმე-

¹ თეიმურაზ ბაგრატიონი. ახალი ისტორია, გვ. 73-74.

² თეიმურაზ ბაგრატიონი. გვ. 71.

³ მაგ. 1810 წელს რუსთაგან მოტყუებით შეპყრობილი და თბილისს დატყვევებული სოლომონ იმერთა მეფე (1789-1810 წ.წ.), თბილისიდან ერთგულ კაცთა დახმარებით გაიპარა 30 მხლებლით, გზაზე შემოეყარათ ლეკთა ბელადი ნურ მაჰმადი სამასი ლეკით, რომელთაც რუსებთან მებრძოლი სოლომონ II ახალციხეში შერიფ ფაშასთან უვნებლად ჩაიყვანეს. ფაშამ მეფე დიდი პატივით მიიღო და მოაგება ცხენი აკაზმული ოქროთა და შეიყვანნა დიდისა დიდებითა“ (იხ. ბაგრატ ბატონიშვილი. ახალი მოთხრობა..., გვ. 117). ეს ფაქტი კიდევ ერთხელ ადასტურებს, რომ ლეკების 300 კაციანი მხედრობის გადაადგილება ქართლში 1810 წელსაც შემთხვევითი არ იყო.

⁴ როდესაც რუსებს გამოქცეული და ახალციხეში მიმავალი ლევან იულონის ძე, ბორჯომთან, გოგიას ციხეში მარბიელმა ლეკებმა მძინარე ნადავლის გამო მოჰკლეს, ამ ამბის შემტყობმა ახალციხის ფაშამ ნადავლს დახარბებული ლეკები ძელზე გასვა, ხოლო ამ ამბის შეტყობის შემდეგ დაღესტანში ლევანის მკვლელთა ოჯახებს ადგილობრივებმა ბაგრატიონთა სამეფო სახლის „სისხლის დაღება“ არ აპატიეს და „სრულიად მოსწყვიტეს“ (იხ. ბაგრატ ბატონიშვილი. ახალი მოთხრობა..., გვ. 117-118).

რეთის სამეფო, მფარველობითი ხელშეკრულებები დადო აფხაზეთის, გურიის, სამეგრელოს მთავრებთან), ამიტომ ლეკებისათვის ველარ მოიცავდა. მათაც დრო იხელთეს და „ჩვეულ ხელობას“ მიჰყვეს ხელი.

რუსეთ-თურქეთის ომის მსვლელობაში განსაკუთრებული მნიშვნელობა მიეცა ახალციხის საფაშოს. როგორც ნ. ბერძენიშვილი მიუთითებდა: „ოსმალთა ხელში ახალციხე ის პუნქტი იყო, სადაც თავს იყრიდა, თავშესაფარსა და დასაყრდენს პოულობდა საქართველოს ყველა მტერი, ლეკი მტაცებელი, ტყვის მსყიდველი თავადაზნაური, მეფის წინააღმდეგ აჯანყებული რეაქციონერი თავადი თუ მეფობის მაძიებელი ბატონიშვილი, ერთი სიტყვით, საკუთარი ქვეყნის ყველა მოღალატე“.¹

ქართლ-კახეთის სამეფო კარისა და რუსული ხელისუფლების მიმართ ახალციხის ფაშების მრავალგზის დაპირების მიუხედავად, რომ არ მისცემდნენ საფაშოს ტერიტორიაზე დაღესტნელ მოთარეშეებს თავშესაფარს, როგორც ვნახეთ, ფაშები პირობას არასოდეს ასრულებდნენ. ეს ფაქტი რამდენიმე მიზეზით იყო განპირობებული და ერთნაირად აწყობდათ, როგორც ახალციხეში, ისე დაღესტანსა და სტამბოლში.

ოსმალეთის დედაქალაქში იმიტომ, რომ ზემონათქვამი ვითარება ბრწყინვალე პორტას რუსეთთან ომის დროს საშუალებას აძლევდა, ძირითადი სამხედრო ძალების კონცენტრაცია დასავლეთის ფრონტზე მოეხდინა; დაღესტანში იმიტომ, რომ, გარდა ტყვეებით ვაჭრობისა, მეომარ ლეკებს შეეძლოთ ფაშას სამხედრო სამსახურში ქირით შესულიყვნენ და ახალციხის მეზობელი პროვინციები ერბიათ, რაც შემოსავლის დამატებითი წყარო იყო; ახალციხეში იმიტომ, რომ შორს მყოფი სტამბოლიდან განსხვავებით, საჭიროების შემთხვევაში 2-3 დღეში შეიძლებოდა საჭირო რაოდენობის შეიარაღებული მეომრის გადმოსვლა დაღესტნიდან. ამას გარდა, საქართველოში ნაშოვნი ნადავლის რეალიზაცია ხშირად აქვე, „პირველი ხელიდან“ ხდებოდა და შესაძენი „პროდუქტი“ ბევრად იაფი ღირდა.

ამ დროისათვის ახალციხის საფაშოში გაბატონებისათვის ორი პრეტენდენტი იბრძოდა: აჭარელი სელიმ ფაშა (ხიმშიაშვილი) და შარიფ (შერიფ) ფაშა (ჯაყელი). სელიმი რუსებთან მოლაპარაკების გზას დაადგა, ამით გაღიზიანებულმა თურქებმა შარიფ ფაშას ახალციხესთან ერთად შავი ზღვის სანაპიროზე მდებარე ციხე-ნავსადგურებიც გადასცეს, რამაც ფაშებს შორის ბრძო-

¹ ნიკოლოზ ბერძენიშვილი. საქართველოს ისტორიის საკითხები. ტ. II, გვ. 417.

ლა კიდევ უფრო დაუნდობელი გახადა. მალე შარიფ ფაშასთან თავი მოიყარეს რუსეთის წინააღმდეგ მებრძოლმა ალექსანდრე და ლევან ბატონიშვილებმა, თბილისიდან რუსთა ტყვეობას გამოქცეულმა სოლომონ იმერთა მეფემ, აქვე საკმაოდ იყვნენ საბრძოლველად მზდ მყოფი ლეკთა „დასტები“.

ახალციხის შემოერთება რუსებმა ჯერ კიდევ 1807 წელს სცადეს, მაგრამ გუდოვიჩი ახალქალაქთან სამარცხვინოდ დამარცხდა, თავის გასასამართლებლად კი ახალქალაქის მკაცრი კლიმატი, ჯარის სიმცირე, სუსტი მომარაგება, მტრის მიწაზე არასაიმედო სიტუაცია, სალდათების სულიერი დაძაბუნება და საკუთარი ავადმყოფობა დაასახელა.¹

რუსეთს სურდა, როგორმე ერთი ომი მაინც დაესრულებინა და ირანთან ზავის დადებას შეეცადა, მაგრამ ირანი ინგლისმა წააქეზა და აბას მირზას მოუწოდეს, რომ თუ იგი თურქეთთან ერთად საერთო ძალით გამოვიდოდა რუსეთის წინააღმდეგ, მაშინ რეალურად დადგებოდა კავკასიის კვლავ დაუფლებების საკითხი – აღმოსავლეთ საქართველოს დაიკავებდა ირანი, ხოლო დასავლეთ საქართველოს - თურქეთი. მათ ყოველი ღონე უნდა ეხმარათ დაღესტნელი ფეოდალების გააქტიურებისათვის. საქართველოს წინააღმდეგ უნდა აეჯანყებინათ ოსებიც, სადაც ჯერ კიდევ გაქცეული ბატონიშვილები საქმიანობდნენ². შექმნილი მდგომარეობით ისარგებლა ირანში გაქცეულმა ალექსანდრე ბატონიშვილმა, რომელიც ავტორიტეტით სარგებლობდა ქართლ-კახეთის მოსახლეობის დიდ ნაწილში, დაღესტნელებში, ასევე ახლო ურთიერთობა ჰქონდა ახალციხის შერიფ ფაშასთან და იმერეთის მეფე სოლომონ II-სთან, დაბრუნდა საქართველოში და რუსების წინააღმდეგ საბრძოლველად „ფართო ქსელი გააბა“.

ალექსანდრე ბატონიშვილი მართლაც დაიძრა საქართველოსაკენ. რუსებთან მებრძოლი ბატონიშვილის ავტორიტეტი მთელ კავკასიაში განუზომლად დიდი იყო. ალექსანდრემ ჩრდილო-კავკასიის მოსახლეობის მხარდაჭერა გაინაღდა და იქიდან მოუწოდებდა ქართლის მთიანეთის მაცხოვრებლებს: „მეფის ძე ალექსანდრე ძმურის სიყვარულით მოგიკითხავთ არაგვის სახლთუხუცესო დურმიშხან, მთიულეთის მოურავო სოლომონ, თრუსოს მოურავო გომპარის-შვილო ივანე ...მერმე ერთგულება და ეგრეთ სიმხნე რომ მესმის დიდად გიმადლით, ღ“თს მოწყალებით ჩუენგანაც თქუენის გულის წადილისამებრ წყა-

¹ შ. ლომსაძე. სამცხე-ჯავახეთი, გვ. 112-113.

² შ. ლომსაძე. სამცხე-ჯავახეთი, გვ. 128.

ლობით გული შეგისრულდებათ. ღვთისმშობელი ჩუენც დიდრონს ამბებში ვართ. ქუეი-
დამ ყიზილბაშთ რუსთ ყათლანი უყვეს და შუშა აიღეს და რამდენსამე დღე-
ზედ ქალაქზედ (თბილისზე – ი.ა.) მოვლენ. ჩუენც ჯარს ორმოცი ათას კაცს
მეტს შევეყრით, რომ სულ მთელი დაღისტანი, ჩაჩანი, ჩერქეზი, ქისტი, დლიდ-
ვი, ჭანთო და ეს ჩუენის მთების ხალხნი სულ მზანი არიან, ცოტა სიცივე
არის, თორემ აქამდისაც არ დავდგებოდით, ესლა როგორც თქუენი ერთგულ
კაცებისაგან მოვლოდეთ ისე მოიქეცით ...და ჩუენგან წყალობა გეღითო“,¹ არც
არც ქართველი მოსახლეობის მხარდაჭერა დაჰკლებია ქვეყნის თავისუფლები-
სათვის მებრძოლ დაუცხრომელ ბატონიშვილს, მაგრამ საქართველოში უკვე
მყარად ფეხმოკიდებული რუსების დამარცხება მან ვერ შეძლო და საბოლოო-
ოდ გულგატეხილი ირანს გადაიხვეწა.

რუსებმა ალექსანდრე ბატონიშვილის აჯანყება კი ჩააცხრეს, თურქებიც
დაამარცხეს (1812 წ.), მაგრამ ახალციხის საკითხი იმჯერად მაინც ვერ გადაწ-
ყვიტეს. ბუქარესტის ზავით ახალციხე-ახალქალაქი თურქეთს დარჩა. ახალცი-
ხის საფაშოდან კვლავ განახლდა ქართლზე ლეკთა თავდასხმები. 1812 წლის
10 ივლისს რტიშჩევი აფრთხილებდა თავად ორბელიანს, რომ ახალციხიდან
ლეკების დიდი პარტია ემზადებოდა საქართველოზე სათარეშოდ და სთხოვდა,
განსაკუთრებული ზომები მიეღო.² 17 ოქტომბერს რუსები უკვე ლეკების მიერ
ქართლის სოფლების – ცხრამუხას, ნაბახტევის და გრაკალის წახდენას იუწ-
ყებოდნენ.³

1813 წელს რუსეთმა ომი ირანთანაც დაამთავრა. გულისტანის ზავით ირან-
მა რუსეთს სხვა აზერბაიჯანულ სახანოებთან ერთად (ყარაბახის, განჯის, შა-
ქის, შირვანის და ა. შ.) მთელი დაღესტანი და საქართველო „დაუთმო“.

ახალციხის ფაშას თვითნებობა მთავარმართებელ ა. ერმოლოვის დრო-
საც გაგრძელდა, იგი კვლავ ფართოდ უღებდა კარს ლეკურ რაზმებს და
ქართლ-იმერეთის საზღვრების გასწვრივ გაუდაბურებულ სოფლებში ასახლებ-
და, ისინი თავს ესხმოდნენ მეზობლად მაცხოვრებელ მოსახლეობას და ნა-
დავლს ფაშასთან ერთად ინაწილებდნენ.⁴ ამდენი თვითნებობით თავგაბეზრე-
ბული ერმოლოვი ახალციხის ალი ფაშასადმი 1820 წლის 30 ივლისს გაგზავ-
ნილ წერილში უკვე კატეგორიული იყო: „ჩუენთვის ცნობილია, რომ თქვენ

¹ *სახელმწიფო საისტორიო არქივი*, ფ. 1448; ს. 9392.

² *Акты...* т. V, გვ. 609 დოკ. № 734.

³ *Акты...* т. V, გვ. 782; დოკ. № 921.

⁴ *Акты...* т. VI. ч. II. Тифл. 1875, გვ. 411; დოკ. № 733.

თავშესაფარს აძლევთ ლეკ ავაზაკებს, რომლებიც თავდასხმებს აწყობენ ჩვენს ტერიტორიებზე. მალე გვნახავთ თქვენს საზღვრებთან, თქვენც ავაზაკივით მოგექცევიან და შებრალების საბაბი არ გვექნებაო“.¹

რუსი გენერალი არც იმდენად მიაშიტი იყო, რომ ფაშას წამქეზებლისა და დამფინანსებლის ვინაობას ვერ მიმხვდარიყო. იგი სწერდა კიდევ საკუთარ ხელისუფლებას, ბრწყინვალე პორტას ფარისევლური დაპირებების მიუხედავად, რომ აკრძალავდა ადამიანებით ვაჭრობას, უსაზღვროდ გულუბრყვილონი უნდა ვიყოთ, რომ მათ ნათქვამს ნდობა გამოვუცხადოთო.²

მთელი სიმკაცრით მიუბრუნდა ერმოლოვი იმიერკავკასიის საკითხსაც. 1818 წელს მან ერთიმეორის მიყოლებით დალაშქრა ჩეჩნეთი, დაღესტანი, ყაბარდო და განსაკუთრებული სიმკაცრე გამოიჩინა. მისი ბრძანებით მოწამლეს შაქის მმართველი იზმაილ ხანი, კასპიის ზღვაში დაახრჩვეს იმიერკავკასიის ხანების ოჯახების 16 წევრი.³ 1820 წ. 7 ივლისს გენერალი ერმოლოვი პეტერბურგში იმპერატორ ალექსანდრე პირველს სურხაი-ხანის განადგურებასა და დაღესტანში ომის დამთავრებას უპატაკებდა: „სახანოს მთელმა მოსახლეობამ თქვენი იმპერატორობითი უდიდებულესობის წინაშე დადო ერთგულების ფიცი და დაეკისრათ ხარკი. გასულ წელს დაწყებული ამაყი, მებრძოლი და პირველად მორჩილებაში მოსული დაღესტნის დაპყრობა დასრულებულია და დამორჩილებულია თქვენი იმპერატორობითი უდიდებულესობის წინაშე“.⁴ დაპყრობილ ტერიტორიებზე 1820-1822 წლებში რუსებმა ჩეჩნეთსა და ჩრდილო დაღესტანზე გამავალი სამხედრო სიმაგრეთა მთელი რიგი ააგეს. მათ სახელწოდებებში („გროზნაია“, „ნეოტსტუპნი სტანი“, „ბურნაია“ და ა. შ.) კარგად ჩანდა რუს მეომართა მრისხანე დღეების ანარეკლი კავკასიის მთიანეთში.⁵

ირანსა (1826-1828 წწ.) და თურქეთთან (1828-1829 წწ.) ომების მეორე ტურის წარმატებით დამთავრებამ რუსეთს ამიერკავკასიაში ერთპიროვნული ლიდერის პოზიცია მოუპოვა. ადრიანოპოლის ზავით რუსეთმა შემოიერთა ყოფილი ახალციხის საფაშოს ძირითადი ნაწილი,⁶ რის შემდეგ თურქეთმა საბო-

¹ *Акты...* т. VI . ч. II. გვ. 428; დოკ. № 754.

² *Акты...* т. VI . ч. II. გვ. 655.

³ **ეთერ ორჯონიკიძე.** რუსული მმართველობის დამყარება საქართველოში (XIX ს-ის I ნახევარი). თბ., 1992, გვ. 116.

⁴ *Акты...* т. VI, ч. II, გვ. 411, დოკ № 733.

⁵ **ეთერ ორჯონიკიძე.** რუსული მმართველობის დამყარება საქართველოში, გვ. 116

⁶ ახალციხის მხარის შემოერთების შემდეგ მთავარმართებელმა პასკევიჩმა იქ მცხოვრები მაჰმადიანი ქართველები აჰყარა და ამ ადგილებში სომხების მასობრივი ჩამოსახლება დაიწყო. სომხებს ხუთი წლის განმავლობაში მოუხსნა ყოველგვარი გადასახადი, ეხმარებოდა ფულით,

ლოოდ დაკარგა „ტყვის სყიდვის“ მთავარი ბაზა.

ირანთან მეორე ომის დროს კიდევ ერთხელ დიდი ყურადღება მიექცა ჭარ-ბელაქანის პოლიტიკური ორიენტაციის საკითხს. ა. ერმოლოვის გეგმებში იმ დროისათვის ჭარის სამხედრო ძალით დაკავება არ შედიოდა, ამიტომ მათთან კეთილგანწყობილი ურთიერთობების შენარჩუნებას ცდილობდა. სამაგიეროდ, ირანსაც კარგად ესმოდა, რომ ჭარი დაღესტან-საქართველოს „კარების გასაღები“ იყო და ყველაფერს აკეთებდა, ისინი რუსების წინააღმდეგ აეჯანყებინა. ალექსანდრე ბატონიშვილი, რომელიც დიდი ხანი იყო, რაც სპარსეთში რუსეთის ხელისუფლებას გაქცეოდა, ჭარში გამოსამგზავრებლად მოამზადეს ამ საქმის ორგანიზების მიზნით. პროცესებში აქტიურად იყო ჩაბმული ინგლისიც.¹ ა. ერმოლოვს ეჭვის სერიოზული საფუძველი ჰქონდა, რომ რუსების ბატონობით უკმაყოფილო კახელი გლეხობა ირან-ჭარელების ჯარების გამოჩენისთანავე მათ შეუერთდებოდა და იმპერიის წინააღმდეგ გამოვიდოდა. ეს გამოსვლა, ალავერდობა დღეს, 27 სექტემბერს იგეგმებოდა², მაგრამ კოალიცია ვერ შედგა.

ამასობაში ირანი კიდევ ერთხელ დამარცხდა და თურქმანხაის ზავით, უკვე საბოლოოდ დაუძღურებული, იძულებული გახდა ჩრდილოელი მეზობლის ტერიტორიულ ამბიციებს შეგუებოდა. ჭარელები მიხვდნენ, რომ წინააღმდეგობის გაწევას აზრი აღარ ჰქონდა. 1830 წ. 26 თებერვალს თალის, მუხახის, ჯინიხის, კატეხისა და ბელაქანის თემების მეთაურები პასკევიჩს ეახლნენ და საკუთარი ჯამაათების დანებების შესახებ გადაწყვეტილებები მიართვეს.³

ამიერიდან ჭარ-ბელაქანი რუსული მმართველობის ერთიან სისტემაში მოექცა. საინგილოში დაღესტნიდან გადმოსასვლელი გზების გამაგრებით, რაც რუსმა და ქართველმა რაზმებმა განახორციელეს, საზღვარი დაედო აბრაგული რაზმების პერმანენტულ და გამანადგურებელ შემოსევებს. ჭარ-ბელაქანის დაპყრობით რუსეთმა კავკასიის საკითხი საბოლოოდ მაინც ვერ გადაწყვიტა. 1830 წელს რუსული ხელისუფლების წინააღმდეგ დაღესტანში დაიწყო ძლიერი აჯანყება ყაზი მოლას მეთაურობით. იგი 1832 წელს ერთ-ერთ ბრძოლაში დაიდუბა, მაგრამ აჯანყების ხელმძღვანელობა ჯერ ჰამზათ-ბეკმა, ხოლო მოგვიანებით შამილმა ითავა, რომელიც 27 წლის მანძილზე წარმატებით უძღვე-

ხორბლით და ა.შ. ამ ღონისძიების შედეგად 1830 წლისათვის ყოფილი ახალციხის საფაშოს მოსახლეობის 76% სომხები შეადგენდნენ.

¹ **И. Петрушевский.** Джаро-белаканские..., გვ. 96.

² **И. Петрушевский.** Джаро-белаканские..., გვ. 97.

³ **И. Петрушевский.** Джаро-белаканские..., გვ. 110.

ბოდა მთიელი ხალხის ბრძოლას რუსეთის წინააღმდეგ, ვიდრე 1859 წლის 26 აგვისტოს მეფისნაცვალმა ბარიატინსკიმ იერიშით არ აიღო შამილის უკანასკნელი გამაგრებული პუნქტი ღუნიბი, ხოლო შამილი ტყვედ ჩაბარდა. ამის შემდეგ აჯანყებულთა ძალა მნიშვნელოვნად შესუსტდა და რუსეთმა 1864 წელს დიდი ზარ-ზეიმით აღნიშნა კავკასიაში ომის დამთავრება. თუმცა, „ლეკიანობა“ საქართველოში ამით მაინც არ დამთავრებულა. იგი მცირე მასშტაბებით გრძელდებოდა XIX ს. ბოლომდე და საბჭოთა ხელისუფლების დამყარების შემდეგაც. მათი მარბიელი თარეშისაგან განსაკუთრებით ზარადლებოდა ჭარ-ბელაქანის მოსაზღვრე კახეთი.

ქართულ და რუსულ პერიოდულ პრესაში XIX საუკუნის ბოლომდე ქვეყნდებოდა მასალები კახეთიდან ლეკების მიერ ადამიანებისა და საქონლის გატაცების შესახებ.¹ აღსანიშნავია, რომ შემოერთებული ჭარ-ბელაქანი რუსეთმა 1842 წელს ჯერ ცალკე ოლქად გამოჰყო, ხოლო 1844 წელს სამხედრო ოლქად გადააკეთა და თბილისის გუბერნატორს დაუქვემდებარა. 1860 წელს ჭარ-ბელაქანის სამხედრო ოლქი – ზაქათალის ოკრუგის სახელწოდებით დადესტნის ოლქში შეიყვანეს, რითაც საქართველოს მოძმე ინგილოები კვლავ იძულების წესით ჩამოაშორეს. 1883 წელს სამხედრო მმართველობა გაუქმდა, მაგრამ ზაქათალის ოკრუგი ტფილისის გუბერნიის შემადგენლობაში აღარ დააბრუნეს.

ჭარ-ბელაქანის დაპყრობისას რუსეთმა, რა თქმა უნდა, კარგად იცოდა მისი წარსული, რომ იგი საუკუნეების განმავლობაში კახეთის სამეფოს ნაწილს წარმოადგენდა² და, როგორც ზემოთ ითქვა, 1605 წელს შაჰ აბას I-მა ჩამოართვა კახეთის მეფე – ალექსანდრე II-ს. XIX საუკუნისათვის მისი მოსახლეობის მნიშვნელოვან ნაწილს ლეკებთან და სხვა ხალხებთან ერთად შეადგენდნენ გამუსულმანებული ქართველები – ინგილოები. სწორად შენიშნავს თ. პაპუაშვილი: „მართებული იქნებოდა, რომ ჭარ-ბელაქანი, მისი შემოერთების შემდეგ მეფის ხელისუფლებას გაეერთიანებინა მის მიერვე შექმნილ „საქართველოს გუბერნიაში“ შემავალ სიღნაღის მაზრაში, მაგრამ მეფის რეჟიმმა ცხადია, გარკვეული მოსაზრებით ზემოაღნიშნულ გარემოებებს ყურადღება არ მიაქცია“.³

ეს ისტორიული უსამართლობა ნაწილობრივ გასწორდა საქართველოს დამოუკიდებლობის წლებში (1918-1921 წწ.), როცა 1921 წლის კონსტიტუციით

¹ იხ. გაზეთი „დროება“, 30. 06. 1876 წ. № 6605. 10. 1877 წ. № 159; 06. 10. 1877 წ. № 160; 08. 06. 1877 წ. № 66; გაზეთი „ცნობის ფურცელი“ 14. 08. 1897. № 283 და სხვ.

² იხ: **А. И. Фонь-Плотто**, Природа и люди Закавказья..., გვ. 5.

³ **თენგიზ პაპუაშვილი**. ჭარ-ბელაქანი. თბ., 1972, გვ. 151.

საქართველოს შემადგენლობაში ავტონომიის სახით შემოვიდა სამუსულმანო საქართველო, ანუ ზაქათალის ოლქი (ბათუმის ოლქთან ერთად), მაგრამ საბჭოთა რუსეთის მიერ საქართველოს დაპყრობის შემდეგ, 1922 წელს ამიერკავკასიის ცენტრალური-აღმასრულებელი კომიტეტის (ცაკი) დადგენილებით, ზაქათალის ოლქი სხვა ტერიტორიებთან ერთად (სულ 4 553 კვ. კილომეტრი ფართობი 92 600 მცხოვრებით) აზერბაიჯანს გადაეცა.

თავი III. ქართლ-კახეთის სამხედრო-თავდაცვითი სისტემა ლეკიანობის წინააღმდეგ

1. ადმინისტრაციული ღონისძიებები ქვეყნის თავდაცვისუნარიანობის განმტკიცების მიზნით

საქართველოს თავდაცვითი ბრძოლების დიდი გამოცდილება ჰქონდა, მაგრამ ლეკიანობა ამ მხრივაც გამორჩეული იყო. როგორც შესავალში ითქვა, ლეკები დიდი ჯარით იშვიათად მოდიოდნენ. მიუვალი ხეობებითა და მთაბილიკებით უეცრად გამოჩნდებოდნენ და მოულოდნელად თავს ესხმოდნენ ქალაქ-სოფლებს. ნიშანდობლივია, რომ XVIII საუკუნეში ქართველ მეფეთა მიერ ქვეყნის უსაფრთხოების მიზნით გატარებულ ღონისძიებათა („სამდევროები“, „მორიგე ჯარი“, „ყარაული“, „ნოქარი“, საფორტიფიკაციო ნაგებობები და სხვ.) უმეტესობა სწორედ „ლეკიანობის“ წინააღმდეგ იყო მიმართული.

ერთიანი საქართველოს დაშლის შემდეგ XV-XVI საუკუნეებში ქართლსა და კახეთში დამოუკიდებლად ყალიბდება სამხედრო-სტრუქტურული ერთეულები - სადროშოები. ქართლში არსებობდა ოთხი სადროშო. მეწინავეს შეადგენდა სომხით-საბარათიანოს სათავადოები, რომელთაც, ჯერ ბარათაშვილები, შემდეგ ორბელიანები სარდლობდნენ. მემარჯვენე სადროშოს ზემო ქართლის სათავადოები შეადგენდნენ, რომელთა შორის ამილახორს განსაკუთრებული ადგილი ეკავა და სარდალიც იგი იყო. მემარცხენე სადროშოს წარმოადგენდა სამუხრანბატონო, ქსნისა და არაგვის ერისთავების ჩათვლით და მუხრანბატონის სარდლობით, ხოლო მეუკანავეში შედიოდა მეფის სადროშო საკათალიკოსო ლაშქართან ერთად, რომლის სარდალსაც მეფე ნიშნავდა.¹

ვახუშტი ბატონიშვილის მიხედვით, კახეთში მეწინავე სადროშოს ბოდბელის სასარდლო შეადგენდა ქიზიყით, კონდოლსა და მანავამდე. მემარჯვენეს ნეკრესელის სასარდლო - გაღმა მხარი - ელისენით. მემარცხენეს - რუსთაველის სასარდლო გარე კახეთი, ქიზიყამდე და მარტყოფ-საგურამო-ხერკამდე, ხოლო მეუკანავეს - ალავერდის სასარდლო.²

თუმცა, გ. ანჩაბაძეს მიაჩნია, რომ კახეთში, ლოგიკურად, მემარცხენე სა-

¹ აკაკი კლიმიაშვილი, მასალები XV-XVIII სს. ქართლისა და კახეთის სადროშოების ისტორიისათვის. *კრებული: XIV-XVIII სს. რამდენიმე ისტორიული დოკუმენტი*, თბ., 1964, გვ. 123

² ბატონიშვილი ვახუშტი. გვ. 538; 542; 545.

დროშო უნდა ყოფილიყო ნეკრესელის, ხოლო მემარჯვენე - რუსთაველის. მეცნიერს არგუმენტად მოჰყავს არჩილის „გაბაასება თეიმურაზისა და რუსთაველისა“, სადაც მემარცხენეებად „ენისნელები“ არიან მოხსენიებულნი, ენისელების მოურავის დროშის კაცები კი, როგორც ცნობილია, ნეკრესელი ეპისკოპოსის თანაშემწეები იყვნენ.¹

პაპუნა ორბელიანის ცნობით, ფანა-ხანისა და მაჰმად-ხანის წინააღმდეგ ყმადნაფიცი ერევნის სახანოს მისაშველებლად, ერეკლე და თეიმურაზი ერევანთან (1749 წ.) ჯარს შემდგენაირად აწყობენ: მეწინავე ჯარს შეადგენენ სარდალი რევაზ ორბელიანი საბარათიანოს ჯარით, ყმადნაფიცი ელებით, გარეკახეთის (ქიზიყის) ჯარი თამაზ მოურავთან ერთად და „ვინა დროშის კაცი ჰყვანდნენ.“

მემარჯვენე ფრთას წარმოადგენენ: ამირინდო ამილახორი, ზემო ქართლის, კახის ბატონისა და ყაზახის ჯართან ერთად;

მემარცხენეთ განწესებულნი არიან: სახლთუხუცესი კონსტანტინე მუხრან-ბატონი ქსნისა და არაგვის საერისთავოების ჯარებით, მასვე ახლავს ბორჩალოსა და ჩერქეზთ ბატონის დაქირავებული ჯარები;

მეუკანავეს ერეკლე-თეიმურაზის ჯარები შეადგენენ და იმისდამიხედვით, თუ რომელ ფრთას უჭირს, „ხან ერთ დროშაზე მიბძანდის და ხან მეორე დროშაზე, ჯარებს არიგებდის, აძლიერებდის და უბძანის იმედი წყალობისა“.²

რაზმების წინა ხაზს ქვეითი და ცხენოსანი მეთოფეები შეადგენდნენ, რომელთაც თავ-თავიანთი მემორები ჰყავდათ. მეთოფეები არაუმეტეს 4-5 მწკრივზე ღრმად არ ეწყობოდნენ, ცეცხლსასროლო იარაღის ეფექტი რომ მეტი ყოფილიყო.³

ლეკიანობის სპეციფიკიდან გამომდინარე, ქართლ-კახეთის სამეფოს სამხედრო თავდაცვით სისტემაში დიდი ადგილი ეკავა „ყარაულს“. სამეფო კარის ბრძანებით, შედგენილი იყო ამა თუ იმ სოფლის მოსახლეობის ნუსხები, რომელთაც მეფის დაძახილზე საყარაულოდ გამოსვლა ევალებოდათ. 1772 წლის 12 თებერვლის ნუსხით, ერეკლე შიდა (ზემო) ქართლის სოფლებს (ურბნისს, რუისს, ბრეთს, ახალდაბას, არაშენდას, ცხინვალს, სამაჩაბლოს – „ცხინვალს ზეით“, ქურთას, ძევერას, კარალეთს და ა. შ.) ავალებდა მოსახლეობის გარკ-

¹ გიორგი ანჩაბაძე. საქართველოს სამხედრო ისტორიის საკითხები, გვ. 114-115.

² პაპუნა ორბელიანი. ამბავნი ქართლისანი, გვ. 161.

³ გიორგი ანჩაბაძე. საქართველოს სამხედრო ისტორიის საკითხები, გვ. 150.

ვეული რაოდენობის საყარაულოდ გამოყვანას. მათში იგულისხმებოდნენ ის პირებიც, რომლებიც ამ სოფლებში ხიზნათ იდგნენ: „ამა სოფლებმა ვისიც ყმა უნდა უდგეს ხიზნათ ყველა უნდა მოუდგეს ამ საყარაულოსო“, – აცხადებდა ერეკლე II.¹

ყარაულს ხაზინიდან ჯამაგირიც ეძლეოდა. 1770 წ. 12 აპრილს ერეკლე II ა. მოურავოვს სწერდა: „კახეთის „ლეკის“ გზებზედ სამს ალაგას ჯარი დავაგდევით ჯამაგირით გზების შესანახავად“.² თუმცა, თანხა ყველგან ერთნაირი არ იყო და იმის მიხედვით განისაზღვრებოდა, თუ სტრატეგიული თვალსაზრისით რამდენად მნიშვნელოვან უბანს იცავდნენ, მაგ: სოფ. სკრის ხეობის ყარაულებს ექვსი მინალთუნი ეძლეოდათ, ქარელისა და გვერდინეთის ყარაულებს – რვა მინალთუნი, მღვრიე წყლის ყარაულებს – ოთხი მინალთუნი და ა. შ.³

ერეკლე II-ის პერიოდი ქართული ფეოდალური სამხედრო ხელოვნების განვითარების უმაღლესი საფეხურია.⁴ მეფის მიერ ქართლ-კახეთის სამხედრო სისტემაში გატარებულ მრავალ ღონისძიებათაგან აღსანიშნავია „სამდევროებისა“ და „მორიგე ჯარის“ განხიზმების შექმნა. მართალია, „მდევრის“ ინსტიტუტი ერეკლემდეც იყო მოქმედებაში, მაგრამ 1772 წლის 28 აგვისტოს ბრძანებით, იმის გათვალისწინებით, თუ საიდან იყო ლეკთა შემოსევები მოსალოდნელი, მეფემ შიდა (ტექსტის მიხედვით – ზემო) ქართლის მოსახლეობას, უფლება-მოვალეობანი „დაუკანონა“.

დოკუმენტი ძირითადად საამილახვრო-ქსნის საერისთავოს სოფლებს მოიცავს, თუმცა ერეკლეს, ტექსტის მიხედვით, ასეთივე სამდევროები შეუქმნია შიდა ქართლის სხვა კუთხეებშიც (მაგ. სამუხრანბატონოში), რომელიც უკვე იყო მოქმედებაში და საკმაო წარმატებითაც. სამდევროები ვალდებულნი იყვნენ ერთმანეთისათვის დროულად ეცნობებინათ ლეკთა მოძრაობის შესახებ და იმის მიხედვით, თუ როგორი იყო შემოსული მტრის რაოდენობა და ტიპი (ცხენოსანი, ქვეითი, შერეული), შესაბამისი დავალება ეძლეოდათ.

საყურადღებოა თავდაცვითი ბრძოლის იმდროინდელი სტრატეგია – შესაბამისად, მტრის ქვეითი ან ცხენოსანი ჯარის წამოსვლის შემთხვევაში: მდევრის შეყრა, თავისა და ბოლოს გადაკეტვა და ალყაში მოქცევა, მოულოდნე-

¹ ივანე ჯავახიშვილი. საქართველოს ეკონომიური ისტორიის ძეგლები, წ. II, გვ. 111-112, დოკ. 34.

² ვალერიან მაჭარაძე. მასალები..., III, გვ. 546, დოკ. 241.

³ აკაკი კლიმიაშვილი. მასალები XVIII ს. II ნახევრის აღმოსავლეთ საქართველოს სამხედრო ისტორიისათვის (მორიგე ლაშქარი). სადისერტაციო ნაშრომი. თბ., 1966, გვ. 117-118.

⁴ გიორგი ანჩაბაძე. სამხედრო ისტორია (ლექციების კურსი). თბ., 2002, გვ. 52.

ლი თავდასხმა და ა.შ.¹ დოკუმენტში ერეკლე ადგილობრივ მოხელეებს და მოსახლეობას მოქმედების თავისუფლებას არ უზღუდავს, რაც მრავალგზის არის მითითებული: „თუ თავს დასხმა ამჯობინონ, თავს დაესხან, თუ გზის შეკვრა ამჯობინონ, გზა შეუკრან, თუ წინ დახვედრა ამჯობინონ თავს დაესხან, რომელიც ამჯობინონ, იმ გზით ეცადნენ მტრის პასუხის მიცემასა და გაყრასა; სადაც სარქარდებმა ამჯობინონ და დაუძახონ იქ მოცვივნენ; როგორც სარქარდებმა ამჯობინონ ისე შეებნენ...“ და ა.შ.

აღსანიშნავია, რომ სამღვეროების გეოგრაფია საკმაოდ ჭკვიანურად არის მოფიქრებული: აღმოსავლეთ-დასავლეთით იგი მოიცავს მდ. ლეხურის (საბუთის მიხედვით რეკურის) წყლიდან – აღისწყლამდე, ხოლო ჩრდილო-სამხრეთით სამაჩაბლოდან-გორ-ქარელამდე ტერიტორიას (იხ: რუკა, დანართი № 5) და მდინარეების: ბერშოულა-მეჯუდას, პატარა ლიახვის, დიდი ლიახვისა და ფრონეს მონაპირე სოფლებითაა განსაზღვრული.

საბუთი იმ მხრივაცაა საინტერესო, რომ მასში გათვალისწინებულია მოსახლეობის ყველა კატეგორიის (თავადი, აზნაური, გლეხი) მოვალეობა (ხელმძღვანელობა, პასუხისმგებლობა, სასჯელი თავის არიდებაზე და ა.შ.)

იქიდან გამომდინარე, რომ სამღვეროები საამილახვრო-ქსნის საერისთავოს სოფლებს მოიცავდა, თავდაცვითი ღონისძიების ხელმძღვანელობაც ამილახვარსა და ქსნის ერისთავს ეკისრებოდა, ხოლო მათი არყოფნის შემთხვევაში მეთაურობას გიორგი ყულარაღასი და იასე მდივანბეგი კისრულობდნენ.

ერეკლე ძალზე მკაცრი იყო დეზერტირების მიმართ. სამღვეროში გამოუსვლელობის გამო ჯარიმის სახე და რაოდენობა მათი ქონებრივი შესაძლებლობების მიხედვით იყო განსაზღვრული: ღონისძიების მთავარი მიზანი – ძლიერი და მტკიცე საქართველოს შექმნაა, რომელიც დოკუმენტის დასკვნით ნაწილშია განმარტებული:

„ქ. ეს იცოდეთ თავადიშვილებმაც, აზნაურისშვილებმაც, გლეხმაკაცმაც, ამის უკეთეს ვერცარას ღმერთს აამებთ, ვერც არას ჩვენ გვაამებთ და ვერც არას ქვეყანას შემატებთ, რომ ქრისტეს მტერნი თქვენის ცოლ-შვილის დასატყვევებლად დარბიან, ამათ პასუხი მისცეთ და ღვთის მოწყალებით დაჰხოცოთ და სირცხვილეულნი გააბრუნოთ. ...რომელნიც ჩვენგან საქმნელი საქმეა

¹ იოსებ ალიმბარაშვილი. ქართული ჯარის ისტორიიდან (შიდა ქართლის სამღვეროები. – გორის სასწავლო უნივერსიტეტის ისტორიისა და არქეოლოგიის ცენტრის შრომათა კრებული №3. თბ., 2012, გვ. 7-17.

პატრონჟიმობისა, მოვლისა, გარჯისა, წყალობისა და ჩემის ქვეყნისათვის თავის დადებისა ღმრთით არ დაგზოგავთ. თქვენც ასე ეცადებით და ჩვენც კიდევ უფრო ძლიერსა და მტკიცეს საქართველოს შეწევნას ვცდილობთო“.¹

„სამღევროს“ ერთ-ერთი აუცილებელი პირობა სწრაფად შეკრება იყო. 1775 წ. 10 თებერვალს ერეკლე II შიდა ქართლის გამგებელს – რევაზ ამილახვარს აფრთხილებს: „...საგურამოში სამასამდის ლეკი არის იმათ მუხრანდამ ქსნის ხეველთ ცხვარი მოუტაცნიათ და წაეღოთ. ჩვენ ყარაიაზედ ვიმყოფებოდით ამბავი იქ მოგვივიდა ასე რიგად ვეღარ მოვემზადენით რომ იმაზედ მივსულიყავით. ზემო ქართლის ქარავანი წამოვიდა და მორიგე გამოგატანეთ, რუსხმულამდისინ მოჰყვებიან და იქიდან გამობრუნდებიან. ეს ჩვენი წიგნი რომ მოგივიდესთ თქვენ ეს გმართებსთ ზემო ქართლიდამ მამაცობრივ სამას-ოთხასი კაცი შემოიყაროთ და ჭაღას ქარავანს მოეგებნეთ სიფრთხილით და ყარაულობით სამშვიდობოში მიიყვანოთ ...ჯარს მღევრულად დაუძახეთ და ხუთშაბათს დღეს ქარავანს ჭაღას წინ მოეგებნით. ხუმრობა საქმე არ არის, ბეჯითად მოიქეცით ქარავანი არ წაახდინოთ თორემ პასუხს ვეღარ მოგცემთო“.²

გარდა სამეფო კარის მიერ კანონით დადგენილი „სამღევროებისა“ და „ნოქრისა“, აღმ. საქართველოს მთიანეთში თავდაცვის სფეროში ურთიერთდახმარების ფორმას წარმოადგენდა ე. წ. „მეკოდება“. იგი ორ, ან რამდენიმე ტერიტორიულად ახლო მდებარე სოფელს აერთიანებდა, რომელთაც „მეკოდე“ სოფლები ეწოდებოდათ. ისინი ვალდებულებას იღებდნენ დახმარებოდნენ ერთმანეთს თავდასხმების, ეპიდემიების, ან სხვა რაიმე ექსტრემალურ მდგომარეობაში ჩავარდნისას.

როგორც ჩანს, აღნიშნულმა ღონისძიებებმა ლეკიანობის პრობლემა ვერ გადაჭრა, ერეკლე მიხვდა, რომ საჭირო იყო მუდმივი ჯარი, რომელიც ყოველ წუთს მზად იქნებოდა მტრის წინააღმდეგ საბრძოლველად, „სამღევროები“ კი მტრის მოულოდნელი თავდასხმების შემთხვევაში ხშირად დროულად ვერ ახერხებდნენ შეკრებას, ვერც „ნოქარი“ წყვეტდა ქვეყნის თავდაცვის პრობლემებს, რადგან, ჯერ ერთი, მისი გასასტუმრებელი „ჯამაგირი“ ხაზინაში ხშირად არ იყო და მეორეც – „ნოქარში“ ძირითადად 2000 კაცამდე იკრიბებოდა, რომელიც მოზღვავებული მტრის მოსაგერიებლად არ კმაროდა, ამიტომ მეფემ

¹ იხ: ხელნაწერთა ეროვნული ცენტრი, ფ. HD, საბ. 13714.

² ვსიემ, 7782/3, ფ. № 179.

ქვეყნის თავდაცვის ახალი, უფრო სრულყოფილი ღონისძიების გატარება გადაწყვიტა.

1773 წ. ბოლოს ერეკლემ დარბაზის სხდომა მოიწვია. მსჯელობა შეეხებოდა ისეთი ჯარის შექმნას, რომელიც ლეკთა ქურდულ თავდასხმებს საბოლოოდ მოსპობდა და ქართველ გლეხობას მშვიდობიანი შრომის საშუალებას მისცემდა. 1774 წ. 4 იანვარს დარბაზმა შეიმუშავა “მორიგე ჯარის“ განჩინება, თუმცა, „მღვერის“ ინსტიტუტი „მორიგე ჯარის“ შემოღების შემდეგაც არ გაუქმებულა. „მორიგეს“, ანუ, როგორც სხვანაირადაც უწოდებდნენ „რეგულის“ შექმნის მიზანი შესავალშივე განისაზღვრა: „რადგან საქართველოს ქვეყანა ლეკთაგან ამდენს ხანს ამისთანას მოუსვენებელს მტერობით შეიწრდა და მოუთმენელს ჭირს მიეცა, ჩვენც მრავალ-გზის ბევრ რიგის გარჯილობით ვეცადენით, მაგრამ არ იქნა რომ ასეთი წამალი და საქმე გვეპოვნა, რომ ჩვენი ქვეყნისათვის გვერგო რამე და ამხანად ღვთით ყველასაგან უმჯობესად და უკეთესად ეს გამოვარჩიეთ და საერთოდ ყველამ ვამჯობინეთ“.¹

„მორიგე ჯარი“ იცავდა ვაჭრებსა და ქარავნებს გზებზე, რათა ქვეყნის შემოსავალი არ შემცირებულიყო, სტრატეგიულ ობიექტებს – თოფისწამლის ქარხანასა და ახტალა-ალავერდის სპილენძის მადნებს, გამოიყენებოდა ეკლესიების აღდგენა-მშენებლობის მიზნით, დაზიანებული არხების შესაკეთებლად და ა. შ. ისე არ უნდა გავიგოთ, თითქოს „მორიგეს“ შემოღების შემდეგ, მოსახლეობის დანარჩენი ნაწილი ჯარში გაწვევას აღარ ექვემდებარებოდა. მუდმივი მტრიანობის პირობებში ეს შეუძლებელიც იყო. „ქუდზე კაცი“, „კომლზე კაცი“, „ჩარქი“, „მღვეარი“ და ა. შ. ძალაში ყოველთვის რჩებოდა და იგი დამოკიდებული იყო შემოსული მტრის რაოდენობასა და მარშრუტზე. ამდენად, მეფის დაძახილზე საკუთარი შეიარაღებით გამოსვლა მოსახლეობის ნებისმიერი კატეგორიისათვის უპირველეს მოვალეობად ითვლებოდა.

მაგ. 1794 წ. 27 აპრილს ერეკლე II სურამის მოურავს ბეჟან ამილახვრიშვილს მორიგესთან ერთად, „კომლზე კაცის“ გამოყვანასაც ავალებს: „...რა წამს ეს ჩემი ოქმი მოგივიდეს, ამ მაისის და მკათათვის მორიგე რაც იყოს,

¹ ხელნაწერთა ეროვნული ცენტრი, ფ. QD, საბ. 920. აღნიშნული დოკუმენტი ქართულ ისტორიოგრაფიაში საკმაოდ დეტალურადაა შესწავლილი, ამიტომ მისი ფართო განხილვისაგან შეგნებულად თავს ვიკავებთ. ვრცლად იხ: აკაკი კლიმიაშვილი. მასალები XVIII ს. II ნახევრის აღმოსავლეთ საქართველოს სამხედრო ისტორიისათვის (მორიგე ლაშქარი); გერონტი ქიქოძე. ერეკლე მეორე, თბ., 1958; იასე ლორთქიფანიძე. საბუთები ერეკლე მეფის მორიგე ლაშქრის შესახებ. – საქართველოს სახელმწიფო მუზეუმის მოამბე, ტ. XIV-B; თბ., 1947. საბუთის ვრცელი ანალიზი ასევე მოცემულია ჩვენ მონოგრაფიაში. იხ.: იოსებ ალიმბარაშვილი. აღმოსავლეთ საქართველოს თავდაცვითი სისტემა XVIII ს-ის II ნახევარში. თბ., 2008.

უკლებლად უნდა გამოიყვანო და არც დაკლება იქნება, შენ უნდა შემოიყარო და მზათ უნდა იყო. ამ ორის თვის მორიგეს გარდა სხვა რაც კომლის კაცის დაკლება არ იქნება, ყველას უნდა შეატყობინო და მზათ იყვნენ. ამ ერთის კვირის უკან საცა მოვიკითხოთ მორიგეც და კომლის კაციც უკლებლად უნდა შემოგვეყარნენ. თუ ამაზედ ნაკლებობას იხმარებს ვინმე დიდათ აგად მოვეპყრობით და კიდევ გარდავახდევინებთო“.¹

თუ „მორიგე ჯარი“ შემოსული მტრის მოსაგერიებლად არ კმაროდა, მათ ადგილობრივი მოსახლეობა უნდა მიშველებოდა და ამაზე პასუხისმგებელი ადგილობრივი მოხელე იყო, თუმცა, სხვადასხვა მიზეზების გამო, ისინი ყოველთვის ჯეროვნად ვერ ასრულებდნენ მათზე დაკისრებულ მოვალეობას. 1774 წლის 1 აპრილს რევაზ ამილახვრისადმი მიწერილ წერილში, ერეკლე II ერთი მხრივ „მორიგეებს“ გარჯას უწონებდა, ხოლო მეორე მხრივ ამილახორს თავისი ქვეშევრდომების „სააუგო“ საქმის გამო საყვედურობდა: „ქ. ჩვენ მაგერად ბატონს ამილახორს რევაზს და აპრილის მორიგეთ ასე უანბეთ, მორიგენო თქვენი დიდად მადრიელნი ვართ კარგად გარჯილხართ, ჰელი გამოგიღიათ და ღთით მტრისათვის პასუხი მიგიციათ თქვენი პირი ნათელი იყოს. ამილახორო ამდენი უნამუსობა როგორ იქნება ზემო ქართლელი გლეხთ და აზნაურთაგან დილით საღამომდისინ სროლა ჰქონებიათ, ღიახვს გამოდმართნი კაცნი როგორ არ მიეშველნენ, მიუშველებლობა დიდად სააუგო საქმე მომხდარაო“.²

მთის მოსახლეობა (თუშ-ფშავ-ხევსურები) „მორიგეში“ გაწვევას არ ექვემდებარებოდა, რადგან მათ ისედაც ევალებოდათ ქისტეთ-ლეკეთიდან გამოსასვლელი საზღვრების დაცვა, მაგრამ, როცა ქვეყანას უჭირდა, მთიულები ყოველთვის მეფის გვერდით იდგნენ. მაგ. ხევსურებსა და თუშებს მონაწილეობა მიუღიათ ასპინძისა და კრწანისის ბრძოლებში.³ ერეკლეს კრწანისის ბრძოლაში გამოჩენილი თავდადების სანაცვლოდ ხევსურებისათვის ფულიც კი შეუთავაზებია, რაც მათ პირად შეურაცხყოფად მიუღიათ და თანხის აღებაზე უარი უთქვამთ,⁴ საყოველთაოდ ცნობილია 300 არაგველის გმირობა კრწანისის ომში და ა. შ.

¹ ხელნაწერთა ეროვნული ცენტრი, ფ. AD, საბ. 1052.

² გსიემ, 7782/3, ფ. № 145

³ სერგი მაკალათია. ხევსურეთი. თბ., 1984, გვ. 40-41; სერგი მაკალათია. თუშეთი, გვ. 37-38.

⁴ სერგი მაკალათია. ხევსურეთი, გვ. 40-41.

„მორიგე ჯარის“ გაწვევის ფორმაში არსებული პრობლემები პრაქტიკამ საგრძნობი გახადა, ამას თან დაერთო ქართველი თავადების თვითნებობა და არსებული სოციალ-ეკონომიკური სისტემის წინააღმდეგობანი, ამიტომ „მორიგე ჯარი“ თანდათანობით მოიშალა, თუმცა, ბრძანებით იგი არასოდეს გაუქმებულა. ზემოთქმულის მიუხედავად, ერეკლე მუდმივად ცდილობდა თავდაცვით სისტემაში არსებული ევროპული სიახლეები ქვეყნისათვის მოერგო და საამისოდ სამეფო კარზე ნაირ-ნაირი პროექტებიც მუშავდებოდა. ერთ-ერთი ასეთი იყო იოანე ბატონიშვილის „სახელმწიფოებრივი რეფორმის პროექტი“. „სჯულების“ მიხედვით, „მორიგეში“ ყველა კატეგორიის (სამეფო, სათავადო, საეკლესიო) გლეხები უნდა გაეწვიათ. გაწვეულები ყოველგვარი ხარჯისა და ბეგარისაგან თავისუფლდებოდნენ. სამსახურის ვადად 5 წელი დგინდებოდა. გაწვევა უნდა მომხდარიყო ყოველ ათ კომლზე¹ ერთი უცოლშვილო ყმაწვილი კაცი, ხოლო საერთო რაოდენობა 2000 კაცამდე დგებოდა. ხუთი წლის შემდეგ ახალი შევსება უნდა მომხდარიყო, რათა „ნამსახურებს“ ოჯახები შეექმნათ. გაწვევა ეხებოდათ ბატონიშვილებსა და თავადაზნაურებსაც.² მატერიალური დაინტერესების თვალსაზრისით, იოანე ბატონიშვილი ჯარისათვის ხელფასის დანიშვნასაც ითვალისწინებდა. იგი ქვეითი ჯარისკაცისათვის დღიურად ორი შაურით განისაზღვრებოდა, ხოლო მხედართათვის – ერთი აბაზით.

ხანგრძლივი ლაშქრობისათვის განსაზღვრული იყო ამუნიციაც: „აქვნდეთ ორ კაცს ერთი ნამგალი, ერთი ხელსაფქვავი, ამისათვის, ოდეს ჯარიანობა მოხდეს ზაფხულის დროს, ვინცობა არს სხვა ქვეყანაში, მაშინ მოიძიან მტრის პურსა თავისთვის და დაბერტყენ და დაფქვენ ხელით წისქვილებითა მით. აგრეთვე თავისთა ბარგთა წაიღებენ მათ საკიდრებითა. ათ კაცზედ ჰქონდეთ თითო ქვაბი ყურიანი დასაკიდებელი – საჭმლის მოსახარშავად. აგრეთვე წყლის ჭურჭლები, შეკერილი ყელვიწრო მათარები თალითინისა და

¹ იოანე ბაგრატიონი, სჯულება (ქართლ-კახეთის სახელმწიფოებრივი რეფორმის პროექტი). ტექსტი გამოსაცემად მოამზადა, შესავალი, ლექსიკონი და საძიებლები დაურთო *ივანე სურგულაძემ*. თბ., 1957, გვ. 3-4; ჩვენი აზრით, იოანე ბატონიშვილი ამ შემთხვევაში ათ კომლს ათ სულთან აიგივებს. თუ ყოველ ათ კომლზე ერთი კაცის გამოსვლით 2000 კაცი დგებოდა, გამოდის, რომ XVIII ს. ბოლოსათვის (როდესაც ქართლ-კახეთში მოსახლეობა მნიშვნელოვნად იყო შემცირებული) აღმ. საქართველოში დაახლ. 1000000-1200000 კაცს უცხოვრია (კომლზე 5-6 კაცის გაანგარიშებით), რაც არარეალურია. სხვადასხვა ცნობებით, სსენებული პერიოდისათვის მთლიანი საქართველოს მოსახლეობა 650-770 ათასამდე მერყეობდა, ხოლო ქართლ-კახეთში არაუმეტეს 210-300 ათასი კაცი ცხოვრობდა (იხ: **ვახტანგ ჯაოშვილი**, საქართველოს მოსახლეობა XVIII-XX საუკუნეებში. თბ., 1984, გვ. 53; *საქართველოს ისტორია*, ტ. II. *მარიამ ლორთქიფანიძის* რედ. თბ., 2008, გვ. 364).

² იოანე ბაგრატიონი. სჯულება, გვ. 3-4.

გუდები ...აქედით ნაბადნი სახურევად და ამათი ტანისამოსი იყოს მოკლე წადებ-საცვეთი და ქუდიც განსხვავებული, ხოლო სხვა რაც საჭიროება არს, ყოვლითურთ უნდა იყოს მზა, რომ დაბრკოლება არა ჰქონდეს რა ჯარსა, ეს სახედვე ცხენოსანსაცა.¹

იოანე ბატონიშვილი, როგორც ჭეშმარიტი რაინდი, გამორიცხავს ჯარის მიერ ძარცვა-ძოროდრობასაც: „აკაცობა, ტაცება, სოფლებში ხალხის შეწუხება უნდა იყოს ესრეთ დაკრძალული, რომ აკაცობის მქმნელი, სიკვდილის გარდა, არც დაშავებით, არც დიდის გვემით დაიზოგოს, რათა არა განირყვნას ხალხი ... უკეთუ ციხე, ანუ ქალაქი აიღონ სადმე, ვინმცა იმა ქალაქის მებატონეა, მისსა ქონებასა და ცოლშვილსა, ნუ შეახებენ ხელსა ჯარის კაცნი, და თუ ძლიერი ბრძოლა არ უყონ, ნურც გაწყვეტენ ხალხსა. ხოლო სხვებ, ხალხის ქონება, თეთრი თუ ფარჩა, ესენი იქმნების ჯარისა, ვინც რას იშოვის მაშინ. ხოლო ტყვენი, ტყვია-წამალი, სურსათი და ხაზინა დაიდოს სამეფოდ ... უკეთუ ქალაქი ანუ ციხე ადრევე შემოურიგდნენ, მაშინ ჯერ არს ყოველგან ყარაულეების დაყენება, რომ ჯარმან არაზედ შეაწუხოს შემორიგებული ხალხი“.²

ქვეყნის სამხედრო ინტერესების გათვალისწინებით იყო შედგენილი დავით ბატონიშვილის „სამართალიც“; იგი ჯარში გასაწვევთა უმცირეს ასაკს 20 წელს ადგენდა, დაოჯახება რომ მოესწრო.³ ჯარში გაწვეულთა ხანგრძლივობის ვადად 10 წელი იყო განსაზღვრული. აღნიშნულ პერიოდში გაწვეულის კარმიდამოს მოვლა და ოჯახის დახმარება მეზობლების ვალდებულებას შეადგენდა.⁴ იკრძალებოდა მექრთამეობა. მოხელეები უნდა ყოფილიყვნენ ფრთხილნი, „სინდისიანი, უმანკო და პატივოსანნი“.⁵ დეზერტირებისა და პანიკორების საერთო სასჯელი „ლექაქის“ დახურვა იყო, ოფიცრებს სამსახურიდან განდევნა ემუქრებოდათ, უმცროს ოფიცერთა შემადგენლობას ჯარისკაცებად „ჩამომცრობა“, ხოლო გლეხებს – გაჯოხვა.⁶

ყველაზე დიდი სასჯელი, რა თქმა უნდა, ქვეყნისა და მეფის დაღატი იყო. საიდუმლოს გამცემს ენის მოკვეთა ელოდა, ხოლო „ვინცა ციხე და ადგილი გასცეს, რომელსა აქუს რწმუნებულ მეფისა და საზოგადოებისაგან და

¹ იოანე ბატონიშვილი. სჯულდება, გვ. 47.

² იოანე ბატონიშვილი, სჯულდება, გვ. 47-48. სხვათა შორის, იმამის ნებართვის გარეშე ძოროდრობა იკრძალებოდა შამილის არმიაშიც. იხ. აგრეთვე: იოსებ ალიმბარაშვილი. შამილის „ნიზამი“ და დავით ბატონიშვილის „სამართალი“, გვ. 29-31.

³ სამართალი ბატონიშვილის დავითისა, დ. ფურცელაძის გამოც. თბ., 1964, გვ. 223; მუხლი 165.

⁴ სამართალი ბატონიშვილის დავითისა, გვ. 339.

⁵ სამართალი ბატონიშვილის დავითისა, გვ. 192.

⁶ სამართალი ბატონიშვილის დავითისა, გვ. 20.

ანუ დაუტეოს ადგილნი იგი, გარნა საჭიროებისა, ძელსა ჩამოეკიდოს“.¹ თუმცა, ბატონიშვილი ამ საკითხში ხელისუფლების პასუხისმგებლობასაც აყენებდა: „ოდეს მას არღარა აქუს აზულა და წყალი: ანუ ოდეს აცნობოს მეფესა ანუ უფროსსა თვისსა და მათგან არარაძმე პასუხი ანუ შეწევნა მიეცეს, მაშინ იქმნება თავისუფალი ყვედრებისაგანო“.² დავით ბატონიშვილის „სამართალი“ ითვალისწინებდა საზოგადოებრივ სასჯელსაც, რადგან „დამდები სირცხვილისა ქვეშე საზოგადოებისა უმჯობეს არს დადებადო“.³

მიუხედავად თავისი დროის პროგრესული ბუნებისა და შინაარსისა, სამწუხაროდ, ვერც ერთი ზემოთ მოტანილი სამხედრო-სამართლებრივი დოკუმენტი ვერ განხორციელდა რუსეთის მიერ ქართლ-კახეთის სამეფოს დაპყრობისა და გაუქმების გამო.

ერეკლეს მიერ თავდაცვის სფეროში გატარებულ ღონისძიებათაგან უდავოდ აღნიშვნის ღირსია სამთამაღნო წარმოების განვითარება და საარტილერიო რეფორმა. ჯერ კიდევ XVIII ს. 60-იან წლებში მეფეს შეძლებული თბილისელი მოქალაქე და ამ საქმის მცოდნე მიკირტუმა თაყუაშვილისათვის 100 თუმანი სახარჯო ფული მიუცია და ახტალაში მადნების მოსაძიებლად გაუგზავნია. წარმოების დაწყების შემთხვევაში, მოტივაციის გაზრდის მიზნით, ყოველ მოგებულ მანეთზე მეფე თაყუაშვილს 1 კაპიკის სარგებელს შეჰპირებია.⁴

ერეკლე ცდილობდა წარმოების გაფართოებას და ამ საქმეში გაცილებით გამოცდილებისა და პროფესიონალების ჩართვას შეეცადა. ჯერ კიდევ 1769 წელს რუსეთში გაგზავნილ ა. ანდრონიკაშვილს იგი რუსულ ხელისუფლებასთან წერილს ატანს და სამთამაღნო საქმის ოსტატების საქართველოში გამოგზავნას სთხოვს, თანაც არწმუნებს, რომ ეს რუსებისთვისაც სასარგებლო იქნება: „ღვთის ნებით, როდესაც ყოვლის მოწყალის კვლამწიფის ძალით ჩვენს ქვეყანაში მოვა, ეს საქმე დიდად საჭმარი არის, რომ რამდენიმე მადნების კარგი ოსტატები თან მოყვესთ, რომ ყოველს ალაგს საქართველოში მრავალრიგი მადნები არის მრავალს ალაგს ...მე დიად ვეცადე და ოსტატი ვერ ვი-

¹ სამართალი ბატონიშვილის დავითისა, გვ. 53.

² სამართალი ბატონიშვილის დავითისა, გვ. 21.

³ სამართალი ბატონიშვილის დავითისა, გვ. 32-33.

⁴ პოლიევქტოს კარბელაშვილი. მეფე ერეკლე და მადანჩა. – გაზ. „საქართველო“, 04.07.1916. №123; გვ. 3.

შოვე და ვგონებ, რომ მისი დიდებულების აქეთ სამსახურში მრავალ საქმეში გამოსაყენებელ იყოსო“.¹

რუსებმა 1770 წელს საქართველოში მართლაც გამოგზავნეს აკადემიკოსი იოჰან გიულდენშტედტი. მეფე გერმანელ მეცნიერს განუმარტავდა, რომ მისი აქ ჩამოსვლის მთავარ მიზანს სწორედ საბადოების კვლევაში ხედავდა.² გიულდენშტედტს ერეკლესათვის დასკვნა გაუკეთებია ახტალასა და ქვემო ქართლში (სომხეთში) სპილენძის, ვერცხლისა და ტყვიის მადნის არსებობის შესახებ, მაგრამ იქვე მიუთითებდა მათ არახელსაყრელ გეოგრაფიულ მდებარეობაზე, რადგან თურქული ციხეები – ახალქალაქი, აწყური და ხერთვისი მათგან მხოლოდ ერთი დღის სავალზე იყო დასავლეთით მოშორებული. ერეკლე გიულდენშტედტს არწმუნებდა, რომ ამ მხარეში ციხეს ააშენებდა და სოფლებსაც გადმოასახლებდა, თუ მათი იმპერატორობითი უდიდებულესობა აქ მალაროს მუშების გამოგზავნას ინებებდა,³ მაგრამ საიმპერატორო კარს საქართველოში სასარგებლო წიაღისეულის აღმოჩენა საკუთარი ინტერესებისათვის სჭირდებოდა და არა ერეკლეს გასაძლიერებლად. მეცნიერებათა აკადემიის საგანგებო ინსტრუქცია გიულდენშტედტს უკრძალავდა ერეკლესათვის რეალური ვითარების გაცნობას, რაც კარგად ჩანს მისი ერთ-ერთი ჩანაწერიდანაც: „უზენაესი საიმპერატორო მეცნიერებათა აკადემიის მიერ საქართველოში სამოგზაუროდ ჩემთვის მოცემული ინსტრუქციის მიხედვით, მინერალებს თავდაპირველად მხოლოდ მალვით ვაქცევდი ყურადღებას და მცენარეთა და ცხოველთა შესწავლას ვაცხადებდი მთავარ მიზნადო“.⁴

როდესაც რუსებიდან არაფერი გამოვიდა, მიკირტუმა თაყუაშვილის წინადადებით, ერეკლეს გადაუწყვეტია გიუმიშხანეს პროვინციიდან (თურქეთში) ამ საქმის მცოდნე 800 ბერძენი ოსტატის ჩამოყვანა საქართველოში. გიუმიშხანედან ბერძნების გადმოსახლება შემთხვევითი არ იყო. ეს პროვინცია ძველთაგანვე ქართველებით ყოფილა დასახლებული და ცნობილი იყო ვერცხლისა და სპილენძის საბადოებით, მაგრამ ბერძნების გადმოსახლებამდე ქართლ-კახეთის მეფეს რამდენიმე მნიშვნელოვანი საკითხი უნდა გადაეჭრა:

¹ იასე ცინცაძე. 1783 წლის მფარველობითი ტრაქტატი, გვ. 74-75.

² გიულდენშტედტის მოგზაურობა საქართველოში, ტ. II, გერმანული ტექსტი ქართული თარგმანითურთ გამოსცა და გამოკვლევა დაურთო *გია გელაშვილმა*. თბ., 1966, გვ. 197.

³ გიულდენშტედტის მოგზაურობა საქართველოში, ტ. II, გვ. 147-149.

⁴ გიულდენშტედტის მოგზაურობა საქართველოში, ტ. I, გვ. 026.

ჯერ ერთი, გიუმიშხანე თურქეთის პროვინცია იყო და ადგილობრივი ხელისუფლების ნებართვის გარეშე ეს ღონისძიება ვერ მოხერხდებოდა. ერეკლეს „ბრწყინვალე პორტა“ უნდა დაერწმუნებინა იმაში, რომ გადმოსახლებული ბერძნების საქმიანობას ქართლ-კახეთის სამეფო კარი ოსმალეთის სახელმწიფო ინტერესების წინააღმდეგ არ გამოიყენებდა;

მეორე – ერეკლე იმ დროისათვის რუსეთის მფარველობას ეძებდა, რუსეთი კი ოსმალეთის წინააღმდეგ ომის დაწყებას აპირებდა. საიმპერატორო კარისათვის ქართლ-კახეთის მეფის ამ ნაბიჯს ეჭვის საფუძველი არ უნდა გაეჩინა;

მესამე – ერეკლეს დიდი ძალისხმევა სჭირდებოდა თვით ბერძნების დასაყოლიელებლად საქართველოში გადმოსახლების მიზნით. მეფეს ბერძენი ოსტატები უნდა დაერწმუნებინა იმაში, რომ გამუდმებული ლეკიანობის პირობებში ახტალა-ალავერდში მათი დასახლებით უშიშროება უზრუნველყოფილი ექნებოდათ. როგორც მოგვიანებით ბერძნების მეთაურის ფედორ ხაჯიფეტოვის შვილი ათანასე იხსენებდა, „ერეკლეს ყველა მცდელობის მიუხედავად, ბერძნები გადმოსახლებაზე არ თანხმდებოდნენ, რადგან ეწინოდათ იმ უბედურებისა, რასაც მუდმივად განიცდიდა ქართველი მოსახლეობა“.¹

დაბოლოს, ქართლ-კახეთის მეფეს ბერძნებისათვის მინიმუმ იმის გარანტია მაინც უნდა მიეცა, რომ მათ საქართველოში უკეთესი ეკონომიკური პირობები ექნებოდათ, ვიდრე თურქეთში.

ერეკლემ ყველა ეს პრობლემა წარმატებით გადაჭრა, რაც კიდევ ერთხელ მიუთითებს მის დიპლომატიურ ნიჭზე. მეფემ გადმოსახლებულ ბერძნებს დიდი პრივილეგიები მიანიჭა და გადასახადებიდან გაათავისუფლა. ისინი არც ჯარში გაწვევას ექვემდებარებოდნენ. თავიდან წარმოება კარგად ვერ აეწყო და ბერძენთა ნაწილი უკან გაბრუნდა, მაგრამ 1774 წლიდან მადნები მთელი ძალით ამუშავდნენ და ბერძნებმა კვლავ მოაშურეს საქართველოს. ერეკლემ კომპენსაცია მისცა ახტალა-ალავერდის მფლობელ მელიქიშვილებსა და არღუთინ-დოღგორუკოვებს. მელიქიშვილები მიწის დათმობის ფასად, წლიურად მიწისა და ტყისათვის კომპენსაციის სახით 300 მანეთს იღებდნენ, ასევე 300 მანეთს – ქარხნების ზედამხედველობისათვის და ტყვიისა და ვერცხლის ნა-

¹ С. Эсадзе. Очерки историй горного дела на Кавказе. Тифл., 1903, გვ. 12-13.

წილს – ნატურით.¹ აღაგერდის სპილენძის სადნობი ქარხნის მფლობელები არღუთინ-დოლგორუკოვები წლიურად იღებდნენ 600 მანეთს და მადნის 1/10-ს ნატურით.²

მუშახელით უზრუნველყოფის მიზნით, სამეფო ხელისუფლებას ქარხნებისათვის მიუწერია ბორჩალოსა და ყაზახის სოფლები და დაუკალდებულებია ისინი, ყოველწლიურად ქარხნებისათვის 175 ცხენოსანი და ქვეითი მიეცათ. გარდა ბერძენი ოსტატებისა, ქარხნებში საქართველოს სხვადასხვა კუთხეებიდან ნებით დაქირავებულებიც მუშაობდნენ. წარმოების მეთვალყურეობისათვის მეფე მთავარ ზედამხედველ – მადანჩიბაშს ნიშნავდა.

ერეკლე მხოლოდ ბერძნების იმედად არ იყო და ცდილობდა ეს საშური საქმე ქართველ ახალგაზრდებსაც შეესწავლათ. მისი დავალებით სოფლები ვალდებულნი იყვნენ 20-დან 30 წლამდე ახალგაზრდები გამოეყვანათ და მნიშვნელოვან შეღავათებსაც ჰპირდებოდა. 1775 წ. 27 ოქტომბერს მეფე ამილბარ სახლთუხუცესს სწერს: „...მერე მადანჩათ მისაბარებელი შაგირდები ქართლსა და კახეთში შევაწერეთ, კახეთს გარდა ქართლსა და ქალაქში რაც მისის უწმინდესობის ჩვენის ძმის კათალიკოზის ყმა არის, ამათ ექვსი კაცი აწერიათ. ამის იასაული შენა ხარ, რომელიც სახლისკაციანი კაცი იყოს, იმისთანა გამოიყვანე, ოცი წლიდან მოკიდებული ოცდა ათი წლამდინ რომ იყოს ამგვარი უნდა გამოვიდეს. ამაზედ დიდათ ბეჯითი იყავი, ეს ახლავ გაარიგე ამ შაგირდებს თითო ხელი ტანისამოსი, თითო წამოსასხამი ნაბადი, თითო თოფი და იარაღი და ხუთ-ხუთი მინალთუნი თეთრი უნდა მისცეთ. ამაზე ნურავინ დაბრკოლდება“. მეფე წერილში განსაკუთრებით ხაზს უსვამს ამ ღონისძიების მნიშვნელობას სახელმწიფოსათვის და სარგებლობას მოსახლეობისათვის: „ეს სარწმუნოების ერთგულებაც არის და თავის ქვეყნისაც. ეს რომ ჩვენს ქვეყანაში გამრავლდეს, მტრისაგან ჩვენი ქვეყნის მორჩენა ამას შეუძლია. რომელიც ამ ხელობას ისწავლის, თავის ოჯახს გაამდიდრებს. ჯერ ამის გემო არ იციან, თვარემ ამის სწავლისათვის კიდევ შემოგვეხვეწებიან, წელიწადში ერთი ოსტატი სამოცს-ოთხმოცს თუმანს მოიგებს და ამის უკეთესი მოგება გლეხი კაცისათვის რა უნდა იყოს?“³

¹ დერმიშა გოგოლაძე. სამთამადნო, სამთო-საქარხნო მრეწველობა საქართველოში და კაპიტალიზმის გენეზისის ზოგიერთი საკითხი (XVIII-XIX სს.). თბ., 1982, გვ. 11.

² დერმიშა გოგოლაძე. სამთამადნო, სამთო-საქარხნო მრეწველობა საქართველოში., გვ. 11-12.

³ საქართველოს ისტორიის ქრონიკები. ავთანდილ იოსელიანის რედ. გვ. 138.

მოსახლეობის გარკვეულმა ნაწილმა ამ ღონისძიების „გემო“ და ქვეყნის სარგებელი ჯერ მართლაც არ იცოდა. 1775 წ. 27 ივნისს რუისელი გიორგი ბუზიაშვილი ერეკლესთან ჩიოდა: „რუისისათვის, რომ მადანის შეგირდი გებძანათ, ათი წლის შუილი მყუანდა, სოფელმა მითხრა, შენი შვილი მიეცი მადნის შაგირდათაო, მამულსაც მოგცემთ და კიდევ გათარხნებთო, შვილი შაგირდათ მოგართვით, მაგრამ აღარც მამული მომცეს და არც მათარხნეს, გასაღებს ყველას მართმევენ, სამართალი მაღირსეთო“.¹ სამთამადნო წარმოების დაწყებით, ერეკლემ შესამჩნევად გააღიდა სამეფო შემოსავალი. მადნებიდან ქვეყანას ყოველწლიურად 1500 კილო წმინდა ვერცხლი და საკმაო სპილენძი შემოსდიოდა, მაგრამ ომარ-ხანმა 1785 წლის შემოსევისას პირწმინდად გაძარცვა და დაანგრია საბადოები, რომლის სრულფასოვანი აღდგენა ერეკლემ ვეღარ მოახერხა.²

ქართლ-კახეთის მეფეს კარგად ესმოდა ქვეყნის თავდაცვისუნარიანობის განმტკიცების საქმეში არტილერიის მნიშვნელობა. თოფი ქართველი მეომრის აღჭურვილობაში ჯერ კიდევ XVII ს. II ნახევრიდან ჩანს. ამ დროის საამილახვროს დავთრის მიხედვით, მოსაურეთა შორის 407 თავი გამოდიოდა შუბით, 288 მშვილდით და 420 თავი თოფით.³ XVIII ს. 40-იანი წლებიდან ქართველების აღჭურვილობიდან ტრადიციული მშვილდ-ისარი ხმარებიდან თითქმის ამოღებულია.⁴ ირ. ჯორჯაძის ცნობით, პირველი საბრძოლო ქვემეხი საქართველოში ჯერ კიდევ 1730 წელს ჩამოუსხამთ.⁵ იმავე ხანებში სამეფო კარზე 178 სმ-ის სიგრძის პირველი თოფიც დაუმზადებიათ.⁶ ვახტანგ VI-ის დომენტი კათალიკოსისადმი სალაშქროდ გამზადების 1720 წლის ახლო ხანების დავთრის მიხედვით, 866 კაციდან ოთხასთერთმეტი ცხენოსანი მეთოფეა.⁷

1749 წელს ერეკლეს ინიციატივით, დედაქალაქში აშენდა საარტილერიო საწარმო – „ჯაბა-ხანა“, სადაც ასხამდნენ თოფ-იარაღს, ზარბაზნებს, ზამბუღაკებს, ყუმბარებს, ციხის თოფებს, ზარებს და სხვ. მეფემ ისარგებლა იმით, რომ ტოტლებენის ჯარში არტილერიის საქმის მცოდნე ქართველები – არტილერიის პოდპოლკოვნიკი ჩოლოყაშვილი და თავადი თარხან მოურავი იყვნენ

¹ საქართველოს სიძველენი, ტ. II, გვ. 491, დოკ. 459.

² დაწვრ. იხ.: იოსებ ალიმბარაშვილი. ომარ-ხანის თავდასხმები საქართველოზე, გვ. 101-108.

³ სარგის კაკაბაძე. საამილახვროს დავთარი მე-17 საუკუნის მეორე ნახევრისა. ტფ., 1925, გვ. V.

⁴ Г. З. Анчабадзе. Источниковедческие проблемы военной истории Грузии. Тб., 1990, გვ. 204.

⁵ ირაკლი ჯორჯაძე. ნარკვევები საქართველოს სამხედრო ხელოვნების ისტორიიდან. თბ., 1990, გვ. 169.

⁶ ირაკლი ჯორჯაძე. ნარკვევები საქართველოს სამხედრო ხელოვნების ისტორიიდან, გვ. 169.

⁷ დოკუმენტები საქართველოს სოციალური ისტორიიდან. ტ. I (XV – XVIII სს.), ნიკოლოზ ბერძენიშვილის რედ., თბ., 1940, გვ. 185.

და ზარბაზნების, მორტირებისა და ჰაუბიცების გაკეთება სთხოვა. ქართველებმა ეს საქმე სიხარულით იკისრეს. როცა ტოტლებენმა ეს ამბავი შეიტყო, ჩოლოყაშვილსა და თარხან მოურავს სასტიკად აუკრძალა, რომ ქართველებისათვის საარტილერიო ხელობა ესწავლებინათ.

ქართველმა არტილერისტებმა ტოტლებენის ბრძანება უკანონოდ მიიჩნიეს, თბილისში დარჩნენ და საარტილერიო საქმის შესწავლა გააგრძელეს. მაშინ ტოტლებენმა 1770 წ. 6 თებერვალს რუსეთის მთავრობას საიდუმლო მოხსენება გაუგზავნა, რომელშიც ატყობინებდა, რომ „თუმცა საქართველოს მეფე რუსეთის ხელმწიფის მფარველობის ქვეშ არის, მაგრამ რუსეთის ინტერესებისათვის სასურველი არაა, საქართველოში რუსეთის ხელმწიფის ზარბაზნებს გარდა სხვისი ვისიმე ზარბაზნები იყოს“, ამიტომ ტოტლებენი რუსეთის მთავრობას სთხოვდა, რომ ქართველი ოფიცრები და თავადი თარხან მოურავი საქართველოდან ისევ რუსეთში გაეწვიათ.¹

როგორც ჩანს, ეს ამბავი ერეკლესათვის ცნობილი გახდა. იგი თანამემამულეების დაცვას შეეცადა და ამავე წლის 10 მარტს ტოტლებენს სწერდა: „...ჩვენ გავიგონეთ, ვითამ თქვენ ბრწყინვალებას ას[ე] მოხსენებოდეს: კნიაზ პოდპოლკოვნიკს სვიმონ რომანიჩს ჩოლაყოვისათვის ჩვენ აქ ზარბაზანი და ან არტილერია რამ გაგვეკეთებინოს და ამის გამო თქვენი ბრწყინვალება გასწყრომოდეს. ეს მათის დიდებულების ბრძანებაც იყო, რომ ევროპის ჯარის განწესება ჩვენის ქვეყნის კაცსაც მიეღო, მაგრამ ჩვენ სვიმონ რომანიჩისათვის არტილერიის რიგი არა გავვიკეთებინებია რა. ჩვენ მეზარბაზნე გვყავს, რომელმაც ზარბაზნების ჩამოსხმა კარგათ იცის და ბევრიც ჩამოგვისხმევინებია, რომ იმის ჩამოსხმული ზარბაზანი სამი ჩვენ აქ თან მოგვაქვს“. ერეკლე ტოტლებენს უხსნიდა, რომ ჩოლოყაშვილსა და თარხან-მოურავს მხოლოდ კონსულტაცია სთხოვა და გარდა ამისა, „მათის დიდებულების ნებაც ეს არის, რომ ამ მხარის ქრისტიანებმა ევროპის ჯარის განწესება მიიღონო“.² ერეკლე არ ტყუოდა. ტოტლებენს მართლაც ჰქონდა რუსეთის საგარეო საქმეთა კოლეგიის მიერ გამოგზავნილი ინსტრუქცია, რომლის მე-10 მუხლში მოხსენიებული იყო, რომ ქართველებს შეეძლოთ შეესწავლათ რუსე-

¹ ივანე ჯავახიშვილი, დამოკიდებულება რუსეთსა და საქართველოს შორის XVIII საუკუნეში, ტფ., 1919, გვ. 54-55.

² ვალერიან მაჭარაძე. მასალები XVIII საუკუნის მეორე ნახევრის რუსეთ-საქართველოს ურთიერთობის ისტორიისათვის. ნაწილი III. რუსეთ-თურქეთის ომი 1768-1774 წლებში და საქართველო. თბ., 1988, გვ. 540-541, დოკ. №236.

ბისაგან არტილერიის გამოყენება ბრძოლაში, რათა „ჩაენერგათ მათი მიბაძვის სურვილი“.¹ მიუხედავად მეფის მონდომებისა, ქართველი ოფიცრები თავისი მამულიშვილური გრძნობების გამო სასტიკად დაისაჯნენ. ისინი იძულებით კვლავ რუსეთში წაიყვანეს, დააპატიმრეს და მხოლოდ მას შემდეგ გამოუშვეს, რაც მათი უდანაშაულობა ყველასათვის ცხადი შეიქმნა.²

ერეკლემ მაინც დასძლია ეს წინააღმდეგობები და მოახერხა XVIII ს. 70-იან წლებში თბილისში გაეხსნა თოფ-ზარბაზნების ქარხანა, თოფის წამლის ქარხანა და ა. შ., რომლებიც დაქირავებულ შრომაზე იყვნენ დაფუძნებულნი. მეფე ამ საწარმოებს იჯარით აძლევდა კერძო პირებს, დიდვაჭარ-მოქალაქეებს და შეძლებულ ოსტატებს. მოიჯარადრეები, რაკი საკუთარი ყმები არ ჰყავდათ, სარეწაოებში ხელოსნებისა და შავი მუშების დაქირავებულ შრომას იყენებდნენ, ზოგიერთი საწარმო კი თვით დიდვაჭრებს ეკუთვნოდათ. ჯერ კიდევ 1770 წელს საქართველოში ჩამოსულ ი. გიულდენშტედტს უნახავს აღნიშნული თოფისწამლის ქარხანა. იგი დაწვრილებით აღწერს აღნიშნულ საწარმოში, როგორც თოფისწამლის დამზადების ქიმიურ შემადგენლობას, ასევე შრომის დანაწილების პროცესს.³

თოფისწამლის დამამზადებელი სარეწაოს მფლობელი თბილისელი მოქალაქე ისაია თაყუაშვილი ყოფილა. როგორც ჩანს, თაყუაშვილები ამ ხელობას მემკვიდრეობით ფლობდნენ. 1776 წელს ერეკლე II ისაია თაყუაშვილსა და მის ოჯახს ამ საქმეში შეუვალობას ანიჭებს: „ჩვენი ბძანება არის, თაყუაშვილო ისაიადავ, მერმე დიდ ჭირობას ქვეყნისა და ჩვენის სამსახურისა და ერთგულებისათვის ...ქალაქში თოფის წამლის დანაყვის ბრძანება მამაშენს, შენ და შეილთა შენთა გიბოძეთ, თქვენს მეტი კაცნი ვერავინ დაანაყვინებდა ...და მაშინვე ქარხანა გამართეთ“.⁴ თაყუაშვილს აღნიშნული საწარმოდან საკმაო შემოსავალი ჰქონია და თოფისწამლის წარმოებაში „მონოპოლისტად“ იქცა, რადგან, მეფის ბრძანების თანახმად – „მის მეტი კაცი ვერავინ დაანაყვინებდა და ვერც გვარჯილასა და თოფის წამალს გაჰყიდდა“. მოგვიანებით ერეკლემ ისაიას საწარმო ჩამოართვა და საკუთრად დაიჭირა იმ პირობით, რომ აღნიშნული საქმე თაყუაშვილსვე უნდა გაეგრძელებინა, დამატებითი პირობა მიწების წყალობა იყო: „...ოცდახუთი ადგი ალაგი გვთხოვე, ჩვენც ვინებეთ და ის

¹ ვაღერიან მაჭარაძე. მასალები XVIII საუკუნის მეორე ნახევრის..., გვ. 85.

² ივანე ჯავახიშვილი. დამოკიდებულება რუსეთსა და საქართველოს შორის XVIII., გვ. 54-55.

³ გიულდენშტედტის მოგზაურობა საქართველოში, ტ. I, გვ. 15

⁴ აკაკი კლიმიაშვილი. საარტილერიო მშენებლობა აღმოსავლეთ საქართველოში XVIII ს-ის II ნახევარში. – საქართველოს მეცნიერებათა აკადემიის ხელნაწერთა ინსტიტუტის მოამბე, IV, თბ., 1962, გვ. 273.

ალაგი შენ და შენ შვილებს სამემკვიდროდ მამულად გიბოძეთ, დუქნები გააკეთე და წამალიც იქ გააყიდვინეო“.¹

1795 წლის შემოსევისას ალა-მაჰმად-ხანს თოფის-წამლის ქარხანა გადაუწვავს, მაგრამ მომდევნო წელს ი. თაყუაშვილს მისი აღდგენა ისევ მოუხერხებია. აღსანიშნავია, რომ თოფისწამლის წარმოებას საქართველოში მდიდარი ტრადიცია ჰქონდა და ადგილზეც საკმაოდ მოიპოვებოდა. ვახუშტის ცნობით, სარკინეთს ითხრებოდა „ლითონი რკინისა და სპილენძისა“.² მისივე გადმოცემით, მარნეულის სამხრეთით „ითხრების მიწა და კდიან გუარჯილასა, ეგრეთვე იაღლუჯის მთასა შინაცა მიწისაგან კდიან გუარჯილასა“.³ ეს საქმე სვანეთში ხელოსნობის იმდენად მკვიდრი დარგი ყოფილა, რომ მას საკუთარი მფარველიც (სალომი) კი ჰყოლია.⁴

საარტილერიო საქმის დაწყებამ საქართველოში რკინაზე მოთხოვნილება გაზარდა. დ. მეგრელაძის დაკვირვებით, რკინა აღმ. საქართველოში მცირე რაოდენობით, ისიც უხარისხო იყო, ამიტომ იგი დასავლეთ საქართველოდან შემოჰქონდათ.⁵ ერეკლეს უცდია ამ დანაკლისის შევსება და ბორჩალოში რკინის „ქარხნის“ აშენება წამოუწყია, მშენებლობა თითქმის დამთავრებული ყოფილა, რომ ლეკები თავს დასხმიან და მეფე იძულებული გამხდარა მისთვის თავი მიენებებინა.⁶

მიუხედავად ზემოთქმულისა, სხვადასხვა ცნობებიდან ჩანს, რომ XVIII ს.ბოლოსათვის საქართველოში რკინა საკმარის რაოდენობით იწარმოებოდა. მაგ. 1799 წელს საიმპერატორო კარის დავალებით მუსინ-პუშკინს შეუმოწმებია ახტალა-ალავერდის წარმოება, რომელიც იმ დროისათვის ყოველთვიურად 2000 ფუტს, ე. ი. დაახლ. 32,5 ტონა რკინას აწარმოებდა.⁷ სხვა ცნობით, 1798 წელს კახეთში ბაგრატ ბატონიშვილისათვის, თელავის, შილდის, ლალისყურის და ა. შ. ლეკთა თავდასხმებისაგან თავდაცვის მიზნით, გიორგი XII-ს 600 ლიტრა თოფისწამალი და ჩამოსასხმელი სათოფე და სადამბაჩე – 300 ლიტრა ტყვია

¹ აკაკი კლიმიაშვილი. საარტილერიო მშენებლობა აღმოსავლეთ საქართველოში. „ გვ. 272.

² ბატონიშვილი ვახუშტი. აღწერა სამეფოსა საქართველოსა, გვ. 311.

³ ბატონიშვილი ვახუშტი. აღწერა სამეფოსა საქართველოსა, გვ. 327-328.

⁴ ალექსი რობაქიძე. თოფისწამლის წარმოება პირაქეთა ხევსურეთში. – *ანალები*, ტ. I. თბ., 1947, გვ. 215-217.

⁵ დარეჯან მეგრელაძე. რკინის ადგილობრივი წარმოებისა და მისი შემოზიდვის შესახებ XVIII ს. საქართველოში. – *აკად. ივ. ჯავახიშვილის სახ. ისტორიის ინსტიტუტის შრომები*. VII. თბ., 1964, გვ. 109.

⁶ დარეჯან მეგრელაძე. რკინის ადგილობრივი წარმოებისა და მისი შემოზიდვის... გვ. 113.

⁷ პლატონ იოსელიანი. ცხოვრება გიორგი მეცამეტისა, გვ. 198.

გაუგზავნია.¹ ქართული არტილერიის განვითარების მიზნით, ერეკლე ცდილობდა უცხოელების გამოცდილებაც გაეთვალისწინებინა და ამ მიზნით სამეფო კარზე საქმის მცოდნე სპეციალისტებს იწვევდა. ასეთები იყვნენ გერმანელები იაკობ რაინეგსი და ოსებ გეტინგი. რაინეგსს თბილისში გაუმართავს თოფის წამლის წისქვილი, რომელსაც ევროპულად ამუშავებდა. მისივე რჩევით, ერეკლეს სამეფო ხარჯზე თბილისში საარტილერიო სასწავლებელიც გაუხსნია,² მაგრამ მოგვიანებით მისი ურთიერთობა ერეკლესთან ვეღარ აეწყო და იძულებული გახდა რუსეთში გადახვეწილიყო. რაც შეეხება გეტინგს, იგი 1795 წლის შემოსევის შემდეგ ალა-მაჰმად-ხანმა ტყვედ წაიყვანა და სამსახურიც შესთავაზა, მაგრამ გეტინგი მისი გარდაცვალებისთანავე დაბრუნდა საქართველოში და არტილერიის კაპიტნის ჩინსაც მიადწია.

ქართლ-კახეთის მეფე განსაკუთრებით ენერგიულ ზომებს მიმართავდა, რათა საარტილერიო საქმე ქართველ ახალგაზრდებსაც შეესწავლათ. იგი მნიშვნელოვან შეღავათებს უწესებდა და ხელფასითაც ახალისებდა ამ სფეროში მოღვაწე სხვადასხვა სოციალურ ფენას. მაგ. არტილერიის ხუროს - მოხისელი ივანესადმი 1793 წ. 22 თებერვალს ერეკლეს მიერ გაცემული წყალობის სიგელიდან ვიგებთ, რომ ივანეს თოფხანაში სამსახურის მეტი, არანაირი გადასახადი, მათ შორის სალეკო და სარუსო აღარ ეკისრება, განწესებული აქვს სპეციალური ჯამაგირი და „ულუფა“. ქონებრივი (ქურდობის), ან პიროვნული ზიანის (გალახვის, დაჭრის) მიყენების შემთხვევაში, ზარალი ორმაგად უნდა აუნაზღაურდეს. თუ ერთი ძმის მეტი არა ჰყავს, ისიც „მორიგე ჯარიდან“ თავისუფლდება მასთან ერთად, მაგრამ თუ ივანე არტილერიაში სამსახურს თავს დაანებებს, ყველა წყალობა უნდა მოეშალოს.³ მსგავსი შეღავათები აქვს არტილერიის მცველს ძველერელ ვასილ ხენუაშვილს, იმ უპირატესობით, რომ ზიანის მიყენების შემთხვევაში მისი სისხლი „აზნაურიშილის“ სისხლს უტოლდება.⁴ როგორც ითქვა, არტილერიის სფეროში დასაქმებულებს ხელფასის გარდა, „ულუფაც“ ეძლეოდათ.

¹ პლატონ იოსელიანი. ცხოვრება გიორგი მეცამეტისა, გვ. 87.

² გერმანელი დოქტორი იაკობ რეინეგსი. *ზაქარია ჭიჭინაძის* გამოცემა. ტფ., 1920, გვ. 11.

³ *ეროვნული საისტორიო არქივი*, ფ. 1448, ს. 5124;

⁴ *ეროვნული საისტორიო არქივი*, ფ. 1448, ს. 8719; როგორც ცნობილია, ვახტანგ VI-ის „სამართლით“; გლეხის სისხლი შეფასებულია 12 თუმნად, ხოლო მცირე (ცალმოგვი) აზნაურის სისხლი - 48 თუმნად. იხ: *სამართალი ვახტანგ მეექვსისა. ისიდორე დოლიძის* რედ. თბ., 1981, გვ. 189, მუხლები 29-33.

XVIII ს. 90-იან წლებში ქართულ არტილერიაში უკვე 200-მდე „თოფნი“ მსახურობდა. ერეკლემ ევროპული ყაიდის მსგავსად შემოიღო პრემიერ-მაიორის, სეკუნდ-მაიორისა და გენერალ-ფელდცეხმეისტერის თანამდებობები. ქართული არტილერიის განვითარებაში მნიშვნელოვანი წვლილი მიუძღვოდათ პაატა ბატონიშვილს (რომელიც შემდეგ სიკვდილით დასაჯა ერეკლემ 1765 წლის შეთქმულებისათვის), პაატა ანდრონიკაშვილს, გიორგი გურამიშვილს, გაბრიელ მაიორს და სხვებს. არტილერია გადაჭკონდათ სპეციალური ურმეებით, რომლებშიც ოთხი წყვილი ხარ-კამეჩი იყო შებმული. თითოეულ ურმეს ემსახურებოდა ორი თოფოსანი საკუთარი წესდებით, რომელშიც გაწერილი იყო მათი უფლება-მოვალეობები.

ხარები მოსახლეობიდანაც გაჰყავდათ ქირით. თუ ხარს პატრონს ვეღარ დაუბრუნებდნენ, საზღაურიც ეძლეოდათ და ქირასაც „მართებულს“ უხდიდნენ. ხარ-ურმების გადაადგილების მიზნით შემოღებული იქნა არტილერიის მესრეთ-უხუცესის სახელო. 1785 წ. 10 იანვრის წყალობის სიგელით ერეკლე II დავით მეფურიშვილს მესრეთუხუცესის სახელოს უბოძებს, თორმეტი თუმან ჯამაგირსაც გაუჩენს, ყოველგვარი გადასახადიდანაც (სარუსო, სალეკო, საქვეყნო, ღალა, კულუხი, ნახირისთავი, პირისთავი, საბალახე, ბეგარა) ათავისუფლებს და „მორიგეობაც აღარ ეთხოვება“. მისივე ვალდებულებაა სოფლის მეურმეებში ურმისა და ხარის საჩივრის „სამართლის სისწორით ქმნა და გაშველება“.¹

რაც შეეხება, საომარი იარაღის, აღკაზმულობისა და ცხენების იმდროინდელ ფასებს, ი. გიულდენშტედტის 1771-1772 წლების დანახარჯის სიის მიხედვით, ცხენი საქართველოში 20 მანეთი ღირებულა,² უნაგირი (თავისი მოწყობილობით) – 5 მან. 25 კაპ.,³ 50 გირვანქა⁴ თოფისწამალი – 12,5 მან.,⁵ ამავე რაოდენობის ტყვია – 7,5 მან.,⁶ ეგერის თოფისათვის კონდახის გაკეთებაში გიულდენშტედტს გადაუხდია – 1 მან.,⁷ იარაღით ვაჭრობის საკითხში მთის რეგიონში მიღებული ფორმა იყო ნატურით გადახდა. მაგ. ხევსურეთში კარგი ჯაჭვის პერანგი ხუთ ძროხად ფასობდა, ჩაჩქანი – ერთ ძროხად, სამკლავე – ერთ

¹ დოკუმენტები საქართველოს სოციალური ისტორიიდან, ტ. II, გვ. 133, დოკ. 209.

² გიულდენშტედტის მოგზაურობა საქართველოში, ტ. II, გვ. 235.

³ გიულდენშტედტის მოგზაურობა საქართველოში, ტ. II, გვ. 239.

⁴ გირვანქა - ძვ. წონის ერთეული; 1 გირვანქა = 409,5 გრამს.

⁵ გიულდენშტედტის მოგზაურობა საქართველოში, ტ. II, გვ. 257.

⁶ გიულდენშტედტის მოგზაურობა საქართველოში, ტ. II, გვ. 257.

⁷ გიულდენშტედტის მოგზაურობა საქართველოში, ტ. II, გვ. 247.

ძროხად. ხმლებში ყველაზე ძვირი – „დავითფერული“ იყო, რომელშიც 25 ძროხას იხდიდნენ, თოფებში საუკეთესოდ ითვლებოდა „ისტამული“, რომელიც ასევე 25 ძროხა ღირდა, შემდეგ მოდიოდა ხირიმი – 15-16 ძროხა და ა. შ.¹ რაც შეეხება ჯაჭვის პერანგს, მისი ფასიც ხარისხიდან გამომდინარე იყო, მაგ. დადუღებული ჯაჭვის პერანგი ხუთ ძროხად ფასობდა, ფარეშიანი რგოლით ნაქსოვი ჯაჭვი – ერთი ძროხით ნაკლები, ხოლო თავებშიახლოვებული რგოლიანი ჯაჭვი სამი ძროხა ღირებულა.²

მიუხედავად იმისა, რომ ცხენი, აბჯარი, იარაღი და ა. შ. საკმაოდ ძვირი ღირდა, მისი მოპარვა მაინც დიდ სირცხვილად ითვლებოდა. ვახტანგ VI-ს „სამართლის“ მიხედვით, მომპარავს ნაქურდალის შვიდკაცი ანაზღაურება და სისხლის ნახევარი ეკისრებოდა: „ერთი რომე უმტროდ და შეუბმელად და დაუნარჩუნებლად მუხთლად იარაღი აჰყრია, აუგი დასდებია; და მეორე ესე, – თუ ომი მოვლა, იმ ლაშქრობაში უიარაღობით მკვდარი შეიქმნების“.³

ჯარში ქურდობისათვის მკაცრი იყო დავით ბატონიშვილის „სამართალიც“: „...რომელ კაცმან ბრძოლასა შინა ანუ გაჭირვებასა მოსტაცოს ცხენი ამხანაგსა თუსსა განრომისათვის თუსსა, მაგრა რაოდენცა ჯეროან არს ზრუნვა თავისა თავისა, ეგოდენ უჯერო არს სხვსცა სიკუდილად მიცემა. ...ხოლო თუ მსაჯულების გამოკითხვის შემდეგ, ქურდობა მტერობითა და მობირებით არ იყო მომხდარი, მაგრამ უკეთუ მოკუდეს კაცი იგი ბრძოლსა შინა, მისცეს ნახევარი სისხლისა და მისცეს ცხენიცა, და უკეთუ დატყუჭვდა, მაშინ ნახევარი სასარი დაუურვოს. ხოლო ურემთაგან, გინა საკიდართაგან, ბარგთა გარდამომყრელნი და მის თუსსა გამრირებელნი სრულებით უზღვევენ ბარგსა დაკარგულსა“.⁴

ერეკლეს მიერ შექმნილი ჯარის ყველა სახეობას შესაბამისი წესდება გააჩნდა, ანუ „მორიგე“ ერთი თვით გადიოდა, „ყარაულსა“ და „მდევარს“ ძირითადად საკუთარი, ან ახლომდებარე ტერიტორიების დაცვა ევალებოდა, „ნოქარი“ – ხელფასზე მომუშავე დაქირავებული ჯარისკაცი იყო, „ჩარექში“ – ოთხ კომლზე ერთი გადიოდა (ან სათავადოდან მეოთხედი) და სხვ., მაგრამ ქვეყანაში მტრის დიდი ძალის შემოსვლის შემთხვევაში, ჯარში გასვლა სა-

¹ სურგი მაკალათია. ხევსურეთი, გვ. 147.

² კოტე ჩოლოყაშვილი. ქართული საჭურველი – ჯაჭვი. – აკად. ს. ჯანაშიას სახ. საქართველოს სახელმწიფო მუზეუმის მოამბე. თბ., 1956, ტ. XIX-B; გვ. 284.

³ სამართალი ბატონიშვილის ვახტანგისა, გვ. 225; მუხლი 152.

⁴ სამართალი ბატონიშვილის დავითისა, გვ. 15; მუხლი – 12.

კუთარი შეიარაღებით ყველა მამაკაცის უპირველეს მოვალეობად ითვლებოდა („ქუდზე კაცი“, „კომლზე კაცი“ და ა. შ. შემოსული მტრის რაოდენობიდან გამომდინარე) და ამ შემთხვევაში ყველა დანარჩენისაგან განსხვავებით, გამონაკლისები არ არსებობდა. მეფის დაძახილზე უნდა გამოსულიყო თავადი, აზნაური, გლეხი, თუშ-ფშავ-ხევსური, ყმადნაფიცი ელები და ა. შ.

ქვეყნის თავდაცვის საქმეში სასულიერო წოდებაც აქტიურად იყო ჩართული. თავის მხრივ, არც მეფეები აკლებდნენ წყალობას. 1764 წ. 8 ივნისს ერეკლე II, ერთგულებისა და ლეკების წინააღმდეგ ბრძოლებში გამოჩენილი მამაცობისათვის, ამოწვევითი თავადის – სვიმონიშვილის ქონებას უწყალობებს მღვდელ იესე მაჭავარიანს. დოკუმენტის მიხედვით, მაჭავარიანს მონაწილეობა მიუღია ალაზნის (აჯი-ჩალაბის წინააღმდეგ), ყირბულახის (1751 წ.), მჭადიჯურის, ატოცის ბრძოლებში.¹

საბუთიდან ისიც ირკვევა, რომ სასულიერო წოდების მონაწილეობა ქვეყნის თავდაცვაში მხოლოდ ღოცვით არ შემოიფარგლებოდა, ისინი თავდაცვით ღონისძიებებშიც აქტიურად იყვნენ ჩართულნი, ბრძოლებში იარაღსაც იღებდნენ ხელში და ხშირად გადამწყვეტ როლსაც ასრულებდნენ.

განუწყვეტელ ბრძოლებში საეკლესიო ფენის აქტიურ მონაწილეობას, ბუნებრივია, მსხვერპლიც თან სდევდა, მაგ. მარაბდის ომში ავალიშვილთან ერთად იბრძოდნენ და და ბრძოლის ველზე დაეცნენ რუსთველი და ხარჭაშნელი ეპისკოპოსები. 1752 წ. 10 თებერვალს აჯი-ჩალაბის დალატის წყალობით ჭარში ერეკლე-თეიმურაზის მარცხს, ბოდბელი, ხარჭაშნელი და სამებელი ეპისკოპოსებიც შეეწირნენ.²

აღსანიშნავია ქართველი ქალების როლი ქვეყნის თავდაცვის საქმეში. მართალია, „სამღევროებსა“ და „მორიგეში“ გაწვევას ისინი არ ექვემდებარებოდნენ და ოფიციალურ ნუსხებში მათი მონაწილეობა არ დასტურდება, მაგრამ საყოველთაოდ ცნობილია ქართველი გმირი ქალების – მაია წყნეთელის, თამრო ვაშლოვანელის, თინა წავკისელის, დარეჯან ცქირიაშვილის პირადი თავდადების მაგალითები.

ქვეყნის თავდაცვაში თავისი წვლილი შეჰქონდათ სამეფო ოჯახის მანდილოსნებსაც. 1778 წელს ქართლში მომავალ ქეთევან დედოფალს (გიორგი ბა-

¹ *სახელმწიფო საისტორიო არქივი*, ფ. 1448, საქმე 5602.
² *ქრონიკები და სხვა მასალა საქართველოს ისტორიისა და მწერლობისა*. შვერებილი, ქრონოლოგიურად დაწყობილი და ახსნილი *თედო ჟორდანიას* მიერ. წიგნი III, გვ. 218.

ტონიშილის, შემდეგში ქართლ-კახეთის უკანასკნელი მეფის გიორგი XII-ის მეუღლეს) ღართისკართან 500 ლეკი დახვედრია, ქეთევანს თან 300 „მორიგის“ მეტი არ ჰყოლია, ისიც მეთაურის გარეშე. დედოფალი თვითონ ჩადგომია ქართველ მებრძოლებს სათავეში და ლეკები დაუმარცხებია. რძლის სიმამაცით მოხიბლულ ერეკლეს ეს ამბავი თბილისში ზარბაზნების სროლითა და ქაღალის გაჩირადნებით აღუნიშნავს.¹

თვით დარეჯან დედოფალი, იმ დროს, როდესაც მეფე ერეკლე დედაქალაქში არ იმყოფებოდა, ქვეყნის თავდაცვის საქმეს საკუთარ თავზე იღებდა. 1788 წელს იგი შიდა ქართლის გამგებელს – ოთარ ამილახვარს ატყობინებდა, რომ ერეკლე მდევარში იყო ქიზიყში წასული, ამიტომ სიფრთხილის მიზნით მტკვარ გაღმა-გამოდმა ყარაულები დაეყენებინა, რადგან ცნობა ჰქონდა ახალციხიდან ლეკის ჯარის გადმოსვლის შესახებ. დედოფალი ამილახვარს ავალებდა, რომ იულონ ბატონიშვილისათვის გორში ჩამოსვლა ეთხოვა, რადგან ქსნის ერისთავების ახალციხეში გადახვეწის შემდეგ, მისი ბელოთში დგომა საჭირო აღარ იყო. მრავლისმნახველი დედოფალი დიდმოხელეს სიფრთხილისკენაც მოუწოდებდა: „...ბატონის აქ უბძანებლობა ახლა ახალციხეს შეტყობილი ექნებათ, ამისათვის ქართლს უფრო სიფრთხილე მართებს. ჩუშნც ძალიან ვფრთხილობთ და მანდეთაც გაფრთხილდით. თუ ბატონის მდევარს წაბძანება ქართლშიც არ იცოდნენ, საიდუმლოდ იყოს, ნურავის ეტყვიოთ“.² მოტანილი საბუთი ცხადყოფს, რომ ერეკლეს დედაქალაქში არ ყოფნის დროს ქვეყნის თავდაცვას, ფაქტობრივად, დარეჯან დედოფალი ხელმძღვანელობს და სამხედრო საქმეშიც საკმაოდ დახელოვნებული ჩანს.

ადგილობრივი მოხელეები პასუხს აგებდნენ არა მარტო მათ საგამგებლო ტერიტორიიდან მოსახლეობის დადგენილი რაოდენობის ლაშქრად გაყვანაზე, არამედ ამ ტერიტორიაზე მყოფი ჯარის სურსათით უზრუნველყოფაზეც. 1789 წლის 29 ნოემბერს მუხრანბატონი სახლთუხუცესი იოანე გორის მამასახლის – ზურაბსა და ქედხუდებს ატყობინებდა, რომ ხიდისთავს მისული ჯარი „დამაშვრალი, თოვლისაგან დამძრალი“ და მშიერი იყო და ავალებდა სასწრაფო ზომების მიღებას: „... ახლა თქვენ ერთობით ორასი თუნგი მაჭარი და ორი ათასი გამომცხვარი პური ამადამევე თუ აქ ჯარს არ მოუვიდა არას გზით არ იქნება, ამაზედ აქედამ აღდანაშვილი ოთარ და ბელუა გამოგვიგზავნია, იმათ

¹ დავით ბატონიშვილი. მასალები საქართველოს ისტორიისათვის, გვ. 23.

² მიხეილ ცოტნიაშვილი. ცხინვალის ისტორიისათვის. სტალინური 1961, გვ. 64-65

უნდა გაარიგებინოთ და მოაბაროთ, ახლავ გამოგზავნოთ. თუ ამას იტყვით, რომ გარშემო სოფელს რატომ არ გამოართოო, ამათიდამ დიახ დაუგვიანდებოდათ და მანდედამ ახლო არის და ჯარს შიან, უნდა ახლავ გამოგზავნოთ ...მელიქის კაცი მოვა მანდა ოთხი, იმათაც აჭამე რამე და დახვდითო“.¹

ერეკლეს დროინდელი ქვეყნის უშიშროების სისტემა, ძირითადად ქართლ-კახეთის სათავადოებიდან გამოყვანილ მეომართა რაოდენობაზე იყო დამოკიდებული. მოსახლეობის საერთო რაოდენობის დასადგენად შედგენილი იყო სპეციალური დავთრები,² ამასთან, ნუსხებში დადგენილი იყო შეკრების ვადა და რომელი მეომარი შეკრებისას რა შეიარაღებით უნდა გამოსულიყო: ხმლით, თოფით, შუბით და ა. შ.

„ლაშქრობიდან“ გათავისუფლებული მოსახლეობა, საჭიროებიდან გამომდინარე, გზავნიდა შემცველს, ანუ „ბადალს“, ან იხდიდნენ სხვადასხვა გადასახადებს: „სურსათს“ (ლაშქრის შესანახად დაწესებული გადასახადი – ფქვილით, თევზით, ღვინით და ა. შ.), „მახტას“ (გადასახადი ფულით, ან მარცვლეულით), „ქეშიკს“ (მეფის სასახლის დაცვა ქალაქში არ ყოფნის დროს), „ულაყს“ (ოფიციალური პირების მიერ მოსახლეობის კუთვნილი ცხენებით სარგებლობა) და ა. შ.

გლეხი ვალდებული იყო ბატონის სალაშქროდ წასვლასთან დაკავშირებით, გადაეხადა სპეციალური გადასახადი „სალაშქრო“.³ ერეკლე II-ს კარგად ესმოდა რამდენად მძიმე იყო დაბალი სოციალური ფენისათვის ამდენი ვალდებულებების დაკისრება, მაგრამ რადგან მუდმივი მტრიანობის პირობებში სხვა გამოსავალი არ იყო, გადასახადებისაგან თავისუფლდებოდა მოსახლეობის ის კატეგორია, რომელიც ქვეყნის თავდაცვის საკითხში განსაკუთრებულ წვლილს შეიტანდა. მაგ. მეფეს როსტომ ერისთავის ყმები სამი წლით გაუთარხნებია, იმ პირობით, რომ „ქრისტიანობისათვის, თავისი ქვეყნისა და მამულისათვის მო-

¹ დოკუმენტები საქართველოს სოციალური ისტორიიდან, II, გვ. 153-154, დოკ. 244

² იხ: ივანე ჯავახიშვილი. საქართველოს ეკონომიკური ისტორიის ძეგლები, წიგნი I, აღმოსავლეთ საქართველოს XVIII საუკუნის ხალხის აღწერის დავთრები, თბ., 1974; ივანე ჯავახიშვილი. საქართველოს ეკონომიკური ისტორიის ძეგლები, წიგნი II, თბ., 1974; სარგის კაკაბაძე. საამილახვროს დავთარი XVII ს. მეორე ნახევრისა. ტფ., 1925; საქართველოს ეროვნული საისტორიო არქივი, ფ. 1448, ს. 5032 – გივი ამილახვრის საამილახვროს დავთარი; იასე ლორთქიფანიძე. საბუთები ერეკლე მეფის მორიგე ჯარის შესახებ. – საქართველოს სახელმწიფო მუზეუმის მოამბე, ტ. XIV-B; თბ., 1947, გვ. 281-352; დოკუმენტები საქართველოს სოციალური ისტორიიდან, ტ. II, საბ. № 126; 127; 238 და სხვ.

³ გულიჩინა აკოფაშვილი. ეკონომიკური და სოციალური ცხოვრების განვითარება აღმოსავლეთ საქართველოში XVIII ს. 40-80-იან წლებში. – საქართველოს ისტორიის ნარკვევები, ტ. IV, გვ. 563.

ნაწილეობა მიეღო ბრძოლებში“.¹ ასევე გადასახადებიდან იყვნენ გათავისუფლებულნი არტილერიის სფეროში დასაქმებული პირები და ა. შ.

გამუდმებულმა ლეკიანობამ ქვეყნის მოსახლეობა და შესაბამისად თავდაცვითი პოტენციალი საგრძნობლად შეამცირა. ს. კაკაბაძის მონაცემებით, XVIII ს. 90-იანი წლების შუახანებისათვის ქართლ-კახეთის საომარი ძალა, თათრებისა და ოსების გარდა, შეადგენდა 13,5 ათას თოფიან ცხენოსანს, 4,5 ათას ქვეითს და 600 თოფჩის, ე. ი. 19 ათას კაცს.² გ. მაჭარაძის დაკვირვებით, XVIII ს. 70-იანი წლებისათვის ერეკლეს ბრძოლის ველზე 14-15 ათასი კაცის გამოყვანა შეეძლო.³

თვით ერეკლე II, 1770 წ. 2 აპრილს ანტონ მოურავოვისათვის გადასაცემი ცნობის მიხედვით, ქვეყნის სამხედრო პოტენციალს დაახლ. 15-16 ათასი კაცით განსაზღვრავს: „...ჩვენის ჯარის რაოდენობა გეკითხათ. ჩვენ რომ კახეთს ლეკის გზებზედ სამს ალაგს ჯარი დავაგდეთ ჯამაგირით გზების შესანახავად ...იბრემ ხანის მისაშველებლად სომხის და თათრის ჯარი მცირედის ქართველის კაცით რომ გავგზავნეთ, ოთხი ათასი, ამ ჯარებს გარდა დღეს ჩვენ აქ გვახლავს ცხრა ათასი კაცი. მეტი ჯარი ამ მიზეზისათვის არ გვახლავს. ზოგი ქართლს დავადგინეთ გამოსასვლელს გზებზედ, ზოგიც ტფილისსო“.⁴ 23 აპრილს, იმავე მოურავოვისადმი მიმართვაში, ერეკლე ქართული ჯარის რაოდენობას უკვე 23 ათასამდე „ზრდის“: „ქ. დღეს რომელიც ჩვენს სამეფოში ქვეყნები არის, საქართველოებში, ან ქალაქები, ან მთები, ან ბარში ქვეყნები, ამებში რაც კაცნი მკვიდრობენ, თუ ეს ორი მიზეზი არა გვქონდეს: პირველ ესე, რომე ჩვენის სამარადისოს მტრის უცადოება არ გვაბრკოლებდეს და მეორედ, თუ მისის თადარიკის ჭელის მომართულობა გვქონდეს, ქართველისა და სომხის გამოყვანა შეიძლება რიცხვით იმ [18] ათასი; ქ. თათრის გამოყვანა შეიძლება რიცხვით ე [5] ათასი. იქმნა ორისავე რიცხვი კგ [23] ათასი. ქ. ერევნელნი ჩვენ როგორც გვემორჩილებიან და ან განჯელნი, ჩვენზედ როგორც მოკიდებულნი არიან, ეს ყოველნივე მაღალ კარს ჩვენგან ინსტრუქციით მოწსენებიან“.⁵

ჩვენი აზრით, ქართლ-კახეთის მეფე სამხედრო ძალის რიცხოვნობას შეგნებულად აზვიადებს. ფაქტია, რომ ერეკლე II-ს ამ რაოდენობის ჯარისკაცი

¹ დავით გვრიტიშვილი. ფეოდალური საქართველოს სოციალური ურთიერთობის..., გვ. 226.

² სარგის კაკაბაძე. კრწანისის ომი, გვ. 71-72

³ ვალერიან მაჭარაძე. მასალები XVIII საუკუნის მეორე ნახევრის..., გვ. 56.

⁴ ვალერიან მაჭარაძე. მასალები XVIII საუკუნის მეორე ნახევრის..., გვ. 549, დოკ. 241.

⁵ ქართული სამართლის ძეგლები, ტ. II, გვ. 420-421, დოკ. 120.

არც ერთ დიდ ბრძოლაში არ გამოუყვანია. 15 ათასი ჯარისკაცი იმდროისათვის, სავარაუდოდ, მაქსიმუმი იყო, რომელის გამოყვანა ქართლ-კახეთის სამეფო კარს შეეძლო. ნიშანდობლივია ისიც, რომ ერეკლე „მორიგე ჯარის“ რაოდენობას დიდი საიდუმლოებით ინახავდა და მოხელეებს აფრთხილებდა, რომ მის შესახებ ცნობები არ გაეხმოვანებინათ. 1774 წელს ერეკლე II რევაზ ამილახვარს სწერდა: „რომელიც ჩვენგან ამ ხანად წარვლენილნი მწერლები ხართ ვაკესა თუ მთებში გაღმა თუ გამოღმა ასე იცოდეთ თუ მაგ დაწერილის ჯამი ან შეატყობინეთ ვისმე ან აჩვენეთ ჯერ ქრისტიანობის უარისმყოფელნი იქნებით და მერმე საქართველოს ორგულნი და ჩვენი სწორედ თოფის მსროლელნი და ისიც იცოდეთ სწორედ ასე გარდაგვდებათ სანამდის ჩვენ არ მოგვართვათ დავთარი სხვას არავის აჩვენოთ ან ენით არსად წაგვცდესთ. ბატონო ამილახვარო ეს წიგნი, მალე დაუტარე მწერლებს და ესე გააფრთხილე, თუ ან მტერობით ან მოყვრობით მეტ ნაკლები საქმე დაიჭირეს ისიც ასე მოეკითხებათ. ამაზედ ხათრიჯამი იყვნენ მწერლებიცა და თუ თქვენი კაცი დასდევს ვინმე, ისიც ასე გაიკითხებიან კარგათ ხათრიჯამი შეიქნან, საქმე სიმართლით დაიჭირონ და საიდუმლოდ ჰქონდეთ ყველას დავთარი. ასე შეიტყონ ყოველმა მწერლებმაო“.¹

ლოგიკურად, დიდი რიცხოვნობის შემთხვევაში, ერეკლეს ქართული ჯარის რეალური რაოდენობა არ უნდა დაემაღლა, პირიქით, იგი ეცდებოდა მისი სამხედრო ძალა მტრის თვალში გაზვიადებულად წარმოჩენილიყო. მოვიტანთ რამდენიმე საბუთს XVIII ს. II ნახევარში ქართველების მიერ გადატანილ დიდ ბრძოლებში გამოყვანილი სამხედრო ძალის რაოდენობის შესახებ. ყირსბულახთან (1751 წ. 25 ივლისს), ომან ხერხეულიძის მიხედვით, ერეკლეს დროშის ქვეშ იბრძოდა სამი ათასი ჯარისკაცი, „და ამ რიცხვსა შინა იყო თათარი ხუთასი და ავადმყოფი ხუთასი“.² იოანე ბატონიშვილის მიხედვით, მჭადიჯვართან ქართველთა მხედრობა “მცირედს“ შეადგენდა,³ ასპინძასთან – 3000-ს,⁴ ომარ-ხანის წინააღმდეგ (1785 წ.), ქართლ-კახეთის მეფე თავის რიგებში ითვლიდა ხუთი ათას კაცს, გაძლიერებულს რვა რუსული როტით, 400 ინგუშსა

¹ *ხელნაწერთა ეროვნული ცენტრი*, ფ. HD, საბ. 13079.

² *ომან ხერხეულიძე*. მეფობა ირაკლი მეორისა, გვ. 51.

³ *იოანე ბაგრატიონი*. ხუმარსწავლა, ტ. I, გვ. 43.

⁴ *ვალერიან მაჭარაძე*. ასპინძის ბრძოლა, გვ. 69.

და ოსს, რომლებიც მეფის დაძახილზე მოსულიყვნენ.¹ კრწანისთან (1795 წ. 10-11 სექტემბერს) ალა-მაჰმად-ხანს ერეკლემ 5000 ქართველი დაახვედრა.²

ყველა ზემოთ ჩამოთვლილ ბრძოლაში მტრის ჯარი, ქართველებთან შედარებით, ბევრად მეტი იყო: ყირბულახთან აზატ-ხანს ქართველების წინააღმდეგ ჰყავდა 18 ათასი ჯარისკაცი,³ ნურსალ-ბეგს მჭადიჯვართან – 8000, ხოლო ყვარელთან – 24 ათასი,⁴ ასპინძასთან თურქ-ლეკთა კოალიცია შეადგენდა 8 ათასს,⁵ ომარ-ხანმა საქართველოს საზღვარი 20 ათასიანი მხედრობით გადმოლახა,⁶ ალა-მაჰმად-ხანი თბილისს 35 ათასიანი ჯარით მოადგა.⁷ მიუხედავად ვად ამისა, ხსენებულ პერიოდში გადატანილი ბრძოლების უმრავლესობა ერეკლესა და ქართული ჯარის გამარჯვებით დასრულდა, რაც კიდევ ერთხელ ცხადყოფს არა მარტო ერეკლეს, არამედ, ზოგადად ქართველი კაცის მხედრულ სულსა და თვისებებზე, მით უფრო, რომ XVIII ს. II ნახევარში პროფესიონალი ჯარი ქართლ-კახეთს თითქმის არ ჰყოლია. თვით „ნოქარსა“ და „მორიგეში“, გაწვეულთა უმრავლესობა წარმოადგენდნენ დროებით ვალდებულებს, ე.წ. „რეზერვისტებს“, რომლებიც, დადგენილი ვადის გასვლის შემდეგ ოჯახებს უბრუნდებოდნენ. ეს ვადა კი საკმაოდ მცირე (ძირითადად – 1 თვე) იყო საიმისოდ, რომ მეზობლებს სრულყოფილი თეორიულ-ტაქტიკური, საცეცხლე და ა.შ. მომზადება გაეწყოთ. მეომრის სამხედრო მომზადება, ძირითადად მის სურვილზე, ფიზიკურ ძალასა და კერძო ინიციატივაზე იყო დამოკიდებული. სამხედრო ძალების მეთაურთა შემადგენლობას (ყულარაღასი, ეშიკაღასბაში, მინბაში და ა. შ.), ძირითადად, თავად-აზნაურები შეადგენდნენ, რომლებიც, სამხედრო საქმის გარდა, ცხოვრების დიდ ნაწილს საკუთარი მამულების მართვა-გამგეობას უთმობდნენ, ხოლო „ჯარისკაცები“ გლეხები იყვნენ, რომლებიც „მორიგესა“ თუ „ნოქარში“ დადგენილი ვადის გასვლის შემდეგ, მიწის სამუშაოებს უბრუნდებოდნენ, ამიტომ საგანგებო დავალებისას ძირითადი აქცენტი მაინც მეომრის პირად მოხერხებულობასა და სამხედრო თვისებებზე კეთდებოდა. ერთგან (1787 წ. 4 დეკემბერს) ერეკლე II სწერს ოთარ ამილახვარს: „ბეგთაბეგიშვილი მდივანი სულხან მეფეს დავითთან გავისტუმ-

¹ Н. Дубровин, История войны и владычества Русских на Кавказ. т. II. СПб 1886, стр. 141

² გერონტი ქიქოძე, ერეკლე მეორე, გვ. 189; იასე ცინცაძე, ალა-მაჰმად-ხანის თავდასხმა საქართველოზე, გვ. 165.

³ იოანე ბაგრატიონი. ხუმარსწავლა, I, გვ. 43; საქართველოს ისტორიის ქრონიკები, გვ. 99.

⁴ იოანე ბაგრატიონი. ხუმარსწავლა, I, გვ. 44.

⁵ ვალერიან მაჭარაძე. ასპინძის ბრძოლა, გვ. 67.

⁶ იოსებ ალიმბარაშვილი. ომარ-ხანის თავდასხმები საქართველოზე, გვ. 60.

⁷ იასე ცინცაძე. ალა-მაჰმად-ხანის თავდასხმა საქართველოზე, გვ. 154.

რეთ იმერეთს და ამას თქვენის სასარდლოდამ ოცი კარგი ყოჩაღი ცხენიანი კაცი უნდა გაურიგო აზნაურშილი და მსახურები თან უნდა გააყოლოო“.¹

ლეკებისა და სხვა მომხდურების წინააღმდეგ საბრძოლველად და თავდასაცავად ქართველი მეფეები და ფეოდალები ხშირად მიმართავდნენ ჩრდილო-კავკასიელთა დაქირავებასაც. დაქირავების პირობა იყო გადასახდელი თანხა, საჩუქრები, ბრძოლებში ნაშოვნი ნადავლი და ა. შ. იშვიათი არ იყო ამ მხრივ პოლიტიკური ქორწინებებიც.

დაქირავებულთა შორის განსაკუთრებული ბრძოლისუნარიანობით ყაბარდოელები და ჩერქეზები გამოირჩეოდნენ. ისინი ერეკლეს დროშის ქვეშ იბრძოდნენ კულბითთან, მუსრანთან, კარბთან, გატეხილ ხიდთან, მჭადიჯვართან გამართულ ბრძოლებში.

ერეკლე II-მ ლეკთა თარეშის ასალაგმავად ოსების გამოყენებაც სცადა. თუ ლეკები ღიახვის ხეობით წამოვიდოდნენ, ოსთა რაზმები თამარაშენში უნდა შეკრებილიყვნენ და ლეკები შიდა ქართლისაკენ არ უნდა გამოეშვათ. თუ ლეკები ახალციხიდან წამოვიდოდნენ და ცხინვალისაკენ გაემართებოდნენ, გზას ერეკლე გადაუკეტავდა, ხოლო თუ ლეკები გორისაკენ წამოვიდოდნენ, ოსები ერეკლეს ჯარს უნდა შეერთებოდნენ და ერთობლივად დაეცვათ იგი.² იულონ ბატონიშვილის ამილახვრისადმი 1792 წ. 10 აპრილით დათარიღებული ერთი საბუთის მიხედვით, სამაჩაბლოს (ღიახვის ხეობის გაღმა-გამოღმა მაცხოვრებელი მოსახლეობას) ლეკების წინააღმდეგ საბრძოლველად კომლზე კაცი უნდა გამოეყვანა ოთხი დღის საგზლით.³

იშვიათი არ იყო დაღესტნელების წინააღმდეგ საბრძოლველად ისევ დაქირავებული ლეკების გამოყენება. ბურნაშოვის ცნობით, ერეკლე დაქირავებულ ყაბარდოელებს, ლეკებს და ოსებს მიჰყვებოდა ართმევდა და ამით მათ ბრძოლისუნარიანობას უზრუნველყოფდა. ისინი შეიარაღებულნი ყოფილან თოფებით, დამბახებით, მხარზე ხურჯინებით, (სავარაუდოდ, საგზლისათვის – ი.ა.) ხანჯლებითა და ხმლებით.⁴

თუმცა, დაქირავება ყოველთვის ვერ ხერხდებოდა. ერთ შემთხვევაში დაქირავებულებს შეთავაზებული თანხა ეცოტავებოდათ, მეორე მხრივ, უთანასწორო ბრძოლაზე უარს ამბობდნენ. თუ ქართველებისათვის სულ ერთი იყო

¹ ვსიემ, 7782/6; ფ. 484.

² საქართველოს სიძველენი, ტ. III, გვ. 199-200, დოკ. 211.

³ გიორგი სოსიაშვილი. სამაჩაბლოს ისტორიიდან (XV-XIX სს.). თბ., 2005, გვ. 152.

⁴ С. Бурнашев. Картина Грузии..., გვ. 60.

შემოსეული მტრის რაოდენობა, რადგან საკუთარი მამულის, მეფისა თუ ცოლ-შვილისათვის იბრძოდნენ, „დაქირავებულების“ მთავარი მიზანი ამ შემთხვევაში „ქირა“ და ბრძოლაში ნაშოვნი ნადავლი იყო. მაგ. როდესაც 1755 წელს ნურსალ-ბეგი ყვარელს ოცი ათასიანი ჯარით შემოადგა, ჩერქეზებში ჯარის დასაქირავებლად გაგზავნილ იასე მახაბელს არავინ გამოჰყვა, რადგან: „მთელი დაღესტანი წამოვიდაო და ჩვენ იმათთან ომი არ შეგვიძლიაო“.¹

ერეკლეს გარდაცვალების შემდეგ, კიდევ უფრო დამძიმდა ვითარება გიორგი XII-ის დროს. ლეკებისა და განმდგარი ძმებისაგან თავდასაცავად, იგი ისევ ომარ-ხანისაგან ქირაობდა სამხედრო ძალას. პლ. იოსელიანის ცნობით: „მოითხოვა ავარიისა ხანიდამ (გიორგი XII-მ – ი.ა.) 3000 ლეკი ფასითა ნაქირავნი“ და დაუნიშნა ულუფად: „პური, არაყი, თვითო ხელი ტანსაცმელი და მეექვსესა თთვესა, მოსალოდნილებელსა რუსისა ჯარისა დაბარებულისა მოსვლისა დროსა უნდა მისცემოდათ თვითოსა კაცსა თთვეში 30 მანეთი.“²

თავის მხრივ, ლეკები ჰყოლია დაქირავებული ნახევარძმის (გიორგი XII-ის) წინააღმდეგ მებრძოლ სურამში გამაგრებულ ფარნაოზ ბატონიშვილსაც, რაც ქვეყნის გაჩანაგებულ ეკონომიკას კიდევ უფრო მძიმე ტვირთად აწვებოდა. ჩრდილო-კავკასიელი დაქირავებულების ხარჯიც („სალეკო“, სურსათი და ა. შ.) მოსახლეობის გასასტუმრებელი ხდებოდა, რაც მის უკმაყოფილებას აძლიერებდა. ამას ემატებოდა დაქირავებულთა უღისციპლინობაც. იოანე ქართველიშვილი „მემუარებში“ გიორგი XII-ის მიერ დაქირავებული ლეკების თვითნებობის შესახებ აღნიშნავს: „...ქართლში ყოველს სოფელში ლეკის ჯარი იყო დარიგებული მეფის გიორგისაგან ...ასეთსა შეწუხებასა შინა იყო ქალაქი ტფილისი ლეკთა ჯარის მუნ ყოფნაში, რომ ვინც იმ დროს იმათ ყოფნას არ დაესწრა, დაწერილს არც კი დაიჯერებს. ...აღებ-მიცემობა და დუქნის გაღება ხომ სულ ადარ ყოფილა, სანამ ლეკის ჯარი ქალაქში იყო და სხვას რამდენს უჯეროს საქმეებს შერებოდნენ, დადუმება სჯობსო“.³

გამუდმებული „ლეკიანობის“ პირობებში დაცვა სჭირდებოდა თითოეულ ქალაქს, სოფელს, ციხე-კოშკს, ეკლესია-მონასტერს, ბავშვსა თუ მოხუცს, შინაურ პირუტყვს, ვენახს, ნათესს, ე. ი. დასაცავი ბევრად მეტი იყო, ვიდრე დამცველი, ამიტომ ხელისუფლება იძულებული ხდებოდა, „მორიგე ჯარში“ მო-

¹ პაპუნა ორბელიანი. ამბავნი ქართლისანი, გვ. 228.

² პლატონ იოსელიანი. ცხოვრება გიორგი მეცამეტისა, გვ. 60.

³ იოანე ქართველიშვილის მემუარები. ავთანდილ იოსელიანის გამოკვლევით, რედაქციითა და შენიშვნებით. თბ., 1952, გვ. 80.

სახლეობის ყველა ფენა გაეწვია. ეს ფაქტი მათი მხრიდან ხშირად წინააღმდეგობას იწვევდა, რადგან ადგილობრივი ობიექტები დაუცველი რჩებოდა. მათთვის ძნელი ასახსნელი იყო ის გარემოება, რატომ იდგა „მორიგეში“ თელავში, სიღნაღში, ღართისკარსა და მჭადიჯვარში, როდესაც თავისი სოფლიდან საკუთარი ცოლ-შვილის ტყვედ წაყვანის ძალზე მაღალი რისკი იყო. 1791 წელს დავით-გარეჯის მონასტრის საყმოსათვის „მორიგეში“ 40 კაცი შეუწერიათ, რამაც მონასტრის წინამძღვარი – იოაკიმე გამოუვალ სიტუაციაში ჩააგდო. ერეკლესათვის მიწერილ არხაში, იგი მონასტრის მძიმე მდგომარეობას იუწყება: „რომელიდაც დაწყევლილი ბელადი არის, იმან აგვიჩემა, ოთხჯერ მოსულა ამ რიგათო“, ხოლო მეორე მხრივ, მონასტრის საყმოდან 40 კაცის „მორიგეში“ გაყვანის შეუძლებლობაზე საუბრობს: „...ახლა თქვენს უმაღლესობას მონასტრის ყმისათვის ორმოცი კაცი ეთხოვნა ჯარათ. ჯერ ორმოცი სად არის, ათი კაცი ახლა გავგზავნე მონასტერში ყარაულათ, სხვა რაც დარჩა ქისიყს პური ვიშოვნე, იმის მოსატანად გავგზავნე, მოვატანინო და მონასტერში გავგზავნო, რომ თქვენი მლოცველი ბერები გამოიზარდნენ. გვედრებით თქვენს უმაღლესობას, ყოველთვის თქვენგან წყალობა სჭირვებია, მონასტრის ყმა ჯარათ არ გაგიყვანიათ, მონასტერი უნდა შაინახონ, ორივ არ შეუძლიათო“. ერეკლე იძულებული გამხდარა მონასტრის წინამძღვრის მოთხოვნა დაეკმაყოფილებინა.¹

არც ჯარში გაწვეულთა მოტივაცია იყო მაღალი. თავად-აზნაურები საკუთარი ყმების ჯარში გაწვევით სამუშაო ძალას კარგავდნენ, გლეხები მათთვის საჭირო დროს მიწის დამუშავებას ვეღარ ახერხებდნენ, ბატონიშვილებსა და ეკლესიას „მორიგეში“ გასულთაგან გადასახადი აღარ ერგებოდათ, სოფლები ჯარში გაწვეულთათვის სურსათის და ხელფასის უზრუნველყოფის მიზნით მძიმედ იბეგრებოდნენ და ა. შ. ასე რომ გაწვევისაგან თავის ასარიდებლად, მიზეზები ყველა სოციალურ ფენას გააჩნდა.

ამიტომ, მიუხედავად იმისა, რომ ქართლ-კახეთის მეფეები ცდას არ აკლებდნენ ქვეყნის თავდაცვისუნარიანობის განმტკიცების მიზნით, ამ ღონისძიებების გატარება, განუწყვეტელ საომარ პირობებში, მეზობლებთან უაღრესად გართულებულ პოლიტიკურ ვითარებასა და მძიმე ეკონომიკური კრიზისის ფონზე, ასე ვთქვათ, მუდმივ „ფორს-მაჟორში“ მიმდინარეობდა, ამიტომ ამ ღო-

¹ ქართული სამართლის ძეგლები, ტ. VIII, გვ. 119-120, დოკ. 105.

ნისძიებათაგან ზოგი არათანმიმდევრული იყო, ნაწილი ბოლომდე ვერ ხორციელდებოდა და ზოგიც „ქაღალდზე“ რჩებოდა.

2. საფორტიფიკაციო ნაგებობები

ადრე ქართველი კაცი ციხე-სიმაგრეების უმრავლესობას ძნელად მისადგომ მაღლობებზე აშენებდა, რომლებიც გადმოჰყურებდნენ და კონტროლს უწევდნენ ხეობებსა და გზებს.¹ თანაც, ეს კედლები ისეა შეზრდილი გარემოს, მთასა თუ კლდეებთან, ზოგჯერ ძნელიც კია გარჩევა, რომელია ბუნებრივი და რომელი აშენებული.² ლეკთა ექსპანსიის გაძლიერებისთანავე საფორტიფიკაციო ნაგებობების მშენებლობა უშუალოდ დასახლებულ პუნქტებში გახდა აუცილებელი, მოსახლეობას დროულად დახიზნვა რომ მოესწრო. როდესაც იოჰან გიულდენშტედტი კახეთის სოფლების განლაგებას ეხება, წერს: „კახეთის სოფლები, რადგან ყველას მეურნეობა თავისი ვენახებისა და ხილის ბაღების, აგრეთვე ყანების გარშემო აქვთ, ...ხშირად ერთმანეთს უახლოვდებიან (ერთმანეთს ეკვრიან), ...ყოველს სოფელს აქვს ერთი ან რამდენიმე, დადუღაბებული აგურითა და რიყის ქვით ნაშენი, 3-4 საუენი სიმაღლის და ჭრილში 3 საუენი სიგანის, ორ-სამსართულიანი მრგვალი კოშკები. თავდასხმის დროს ქვედა სართულზე თავს აფარებენ ქალები და ბავშვები, ზედა სართულზე კი იკრიბებიან შეიარაღებული კაცები და ესვრიან ყაჩაღებს. ბევრ სოფელს აქვს 1-2 საუენი სიმაღლის კედლით გარშემორტყმული, 30-100 საუენი განივკვეთის ოთხკუთხა მოედანი კარებებით და სასროლი კოშკებით. ასეთ ადგილებში, რომლებსაც ციხეები ჰქვიათ, ან არ ცხოვრობენ, ან ცხოვრობენ ცოტანი; თავდასხმების დროს ყველანი ცდილობენ ამ ციხეებში გადაირჩინონ თავი საქონლითა და ქონებით“.³

შეიცვალა ნაგებობების არქიტექტურაც. ძველი ციხე-კოშკების მშენებლობისას ქართველი კაცი, ძირითადად, მის მდგრადობაზე ამახვილებდა ყურადღებას, ხანგრძლივი ალყისათვის რომ გაეძლო. მაგ. სამაჩაბლოს საფორტიფიკაციო ნაგებობების ცნობილი მკვლევარი – ვ. ბეზსონოვი, კეხვის ციხის აღწერისას აღნიშნავს, რომ მისი კედლების სისქე რიგ ადგილებში 2-6 მეტრამდე

¹ ვახტანგ ბერიძე. ძველი ქართული ხუროთმოძღვრება. თბ., 1974, გვ. 64.

² ვახტანგ ბერიძე. ძველი ქართული ხუროთმოძღვრება, გვ. 64.

³ გიულდენშტედტის მოგზაურობა საქართველოში, ტ. I., გვ. 250-251.

აღწევდა, ხოლო სიმაღლე – 16 მეტრამდე,¹ სურამის ციხის კედლების სისქე ადგილებში სამ მეტრს აღემატება,² ასევე ორი-სამი მეტრის სისქის კედლები აქვს ბებრის ციხეს,³ სამწევრისის ციხე-დარბაზის დიდი კოშკის კედლების სისქე 2-დან 2,5 მეტრამდე⁴ და სხვ.

როგორც წესი, ძველ ციხე-სიმაგრეთა კოშკები, ციხის გარე გალავნის პერიმეტრს არ სცდებოდა და არც სათოფურების სისტემა გააჩნდა,⁵ რაც ასე დამახასიათებელი გახდა XVIII საუკუნის თავდაცვითი ნაგებობებისათვის.

თავდაცვითი ნაგებობების ძირითადი ნაწილისათვის დამახასიათებელი იყო მართკუთხა ფორმები, რადგან სქელი კუთხეები ნაგებობის მდგრადობასაც უზრუნველყოფდა.

როგორც ითქვა, XVIII საუკუნეში ქვეყნის ძირითადი პრობლემა „ლეკიანობა“ იყო. ლეკები დიდი ლაშქრითა და არტილერიით იშვიათად მოდიოდნენ, სამაგიეროდ მათი თავდასხმების ინტენსივობა იყო ძალზე მაღალი, ამიტომ აღნიშნული პერიოდისათვის აქცენტი, ძირითადად, თავდაცვითი ნაგებობების რაოდენობასა და მშენებლობის ტემპზე კეთდებოდა. გრანდიოზული მშენებლობებისათვის არც დრო იყო და არც სახსრები. მთავარი იყო მოსახლეობას სიმაგრეში შესვლა მოესწრო და საქონელი შეერეკა, შემდეგ კი მღევარი, ან მორიგე ჯარი შეებმოდა მომხდურს და უკუაქცევდა.

XVIII საუკუნეში დიდი ციხე-სიმაგრეების მშენებლობა ქართლ-კახეთში აღარ მიმდინარეობს, მაგრამ მდიდარი მემკვიდრეობა საშუალებას იძლეოდა ძველი ციხე-სიმაგრეების განახლებისათვის, რაც ნაკლებ ხარჯებთან იყო დაკავშირებული. სამაგიეროდ, ხსენებული საუკუნისათვის დამახასიათებელია დიდი რაოდენობით წრიული კოშკების მშენებლობა. კოშკები ორი ტიპის იყო, ე. წ. „სასიგნალო“ და „სახიზარი“. „სასიგნალო“ კოშკების ფუნქცია მოსახლეობისათვის მტრის შემოსევის შესახებ დროული შეტყობინება იყო. ისინი დიდი პროპორციებით არ გამოირჩეოდნენ და შემადლებულ ადგილებზე, ე. წ. დიდი მხედველობითი არეალის ადგილებზე იგებოდა. ზოგჯერ „სათვალთვალო“ კოშკების ფუნქციას, დროებითი ხისგან აგებული, ან ბუნებრივი ნაგებობებიც ასრულებდნენ. რაც შეეხება „სახიზარ“ კოშკებს, ისინი გაცილებით ტევადი

¹ **С. В. Безсонов.** Крепостные сооружения в бассейне большой Лиахви. – *Известия Юго-Осетинского научно-исследовательского института краеведения*, кн. I. Цхинвали, 1933, გვ. 242.

² **პარმენ ზაქარაია.** საქართველოს ძველი ციხე-სიმაგრეები. თბ., 1988, გვ. 54.

³ **პარმენ ზაქარაია.** საქართველოს ძველი ციხე-სიმაგრეები, გვ. 54.

⁴ *საქართველოს ისტორიისა და კულტურის ძეგლთა აღწერილობა.* ტ. V. თბ., 1990, გვ. 390.

⁵ **ვახტანგ ბერიძე.** ძველი ქართული ხუროთმოძღვრება, გვ. 64.

იყო (ადგილზე მაცხოვრებელი მოსახლეობის მიხედვით) და უშუალოდ დასახლებულ პუნქტებში იგებოდა.

XVIII საუკუნიდან ქართულ ფორტიფიკაციაში გაჩნდა ე. წ. გალავნების მშენებლობის აუცილებლობაც. ისინი, ჩვეულებრივ მაღალი კვადრატული კედლებით იყენებდნენ შემოზღუდულნი, რომელთა დანიშნულება ამა თუ იმ სოფლის, ან კუთხის მთელი მოსახლეობისა და საქონლის შეხიზვნა იყო. მათ ფართო ჭიშკარი ჰქონდათ, მოსახლეობას სწრაფად შესვლა და საქონლის შელაღვა რომ შეძლებოდა¹. როგორც წესი, ისინი ფართობით დიდად სჭარბობდნენ ციხე-კოშკებს, მაგრამ ნაკლები სიმტკიცითა და მდგრადობით ხასიათდებოდნენ.

ნიშანდობლივია, რომ გალავნები ეკლესია-მონასტრების სიახლოვეს, ან ირგვლივ იგებოდა, რადგან მოსახლეობის თავშეყრის ძირითადი ადგილი სწორედ იქ იყო. XVIII საუკუნეში შეიცვალა ნაგებობათა არქიტექტურაც. მართკუთხა ფორმები თანდათანობით წრიულმა შეცვალა,² მთა და ხეობები – ბარმა და დასახლებულმა პუნქტებმა. წრიულმა ფორმებმა მოახლოებულნი მტრის შემჩნევა და შესაბამისი ზომების მიღება გააიოლეს. შესაბამისად, სათოფურ-საზარბაზნეთა რაოდენობამაც მოიმატა. საფორტიფიკაციო ნაგებობების არქიტექტურის შეცვლა სამშენებლო მასალის ცვლილებამაც განაპირობა. თლილი და ფლეთილი კლდის მასალა სიპმა ქვამ ჩაანაცვლა.

სიპი ქვით კუთხის ამოყვანა, ჯერ ერთი, რთული საქმე იყო (ამიტომ კუთხეებში ისევ ნათალ კლდეც ხმარობდნენ) და მეორეც, თავდაცვითი ნაგებობების რაოდენობის ზრდამ სამშენებლო მასალაც დიდი რაოდენობით მოითხოვა. კლდე ძნელად მუშავდებოდა და დიდ დროსაც მოითხოვდა, სიპი ქვა კი მდინარეებით უხვ საქართველოში ძნელი საშოვარი არ იყო. ტრადიციულად, დასახლებული პუნქტებიც მდინარეების სიახლოვეს მდებარეობდა და მშენებელს მასალისათვის შორს წასვლა არ უწევდა. თანაც, მასალის წრიული წყობა არტილერიის შეტევას უკეთ უძლებდა.

ცალკე აღსანიშნავია მშენებლობისათვის აუცილებელი სეგმენტის – კირის დიდი რაოდენობის არსებობაც. კირქვა ნიადაგი ქართლ-კახეთში მრავლად არის. მხოლოდ გორსა და მის შემოგარენში XVIII ს. მეორე ნახევრისათ-

¹ ვახტანგ ბერიძე. XVI-XVIII საუკუნეების ქართული ხუროთმოძღვრება, ტ. I. თბ., 1983, გვ. 13, 92.

² თუმცა, მრგვალი კოშკების ხელაღებით XVIII საუკუნით დათარიღება, ცხადია, მიზანშეწონილი არ არის. მრგვალი კოშკები საქართველოში ჯერ კიდევ XVI-XVII საუკუნეებში გვხვდება, მაგრამ XVIII საუკუნეში მრგვალი კოშკები, ძირითადად, დამოუკიდებელ საფორტიფიკაციო ნაგებობებს წარმოადგენენ, ადრინდელი კი ციხე-სიმაგრეთა ნაწილია (გორის ციხე, ქსნის ციხე, ანანური და ა.შ.).

ვის რამდენიმე საკირე (უშუალოდ გორში, ხიდისთავში, გორიჯვარში, ტინის-ხიდში და სხვ.) ფიქსირდება. ზოგიერთმა მათგანმა (მაგ. გორიჯვარის) XX ს. 60-იან წლებამდე მოაღწია. საკირეების გამართულ მუშაობას ერეკლე დიდ მნიშვნელობას ანიჭებდა. ცნობილია, რომ 1774 წელს მეფემ გორის ციხის საფუძვლიანი განახლება დაიწყო. აღნიშნული წლის 18 მარტს იგი გორის მელიქს – ზურაბსა და რევაზ ამილახვარს სწერს: „ამას წინათაც წიგნი მოგწერეთ რომ გორიდან ორმოცდა ათის თუმნის თადარიგი ჰქნათ რომ საკირეები უნდა დაადგმევინოთ და დააწვევინოთ. რაც ორს საკირეს მოუნდეს ის კი დახარჯეთ და სხვა კი შეინახეთ რომ როგორც მოგინდეს ისე დახარჯოთ რომ მაგ ციხეს უნდა მოხმარდეს წლეულობით და ეს წიგნი ბარათით შეინახეთ რომ ის ორმოცდა ათი თუმანი ბაჟიდამ მოგეცემათო“.¹

სამშენებლო ტემპით უკმაყოფილო ერეკლე იმავე წლის 31 აგვისტოს ამილახვარს უკვე მკაცრად აფრთხილებს: „გორის ციხის კეთებისა ვეღარა შევიტყვეთ რა, თუ დღეს მაგაზე გაღატოხი არა დგას და არ მუშაობს, როდისა უნდა გაკეთდეს? ათს ენკენისთვეს უკან მანდ კირი ხომ აღარც კი იმუშავენება, გაჰყინავს, თუ ახლავე არ დააშურებთ, რაღა გაკეთდება?“.²

საფორტიფიკაციო ნაგებობების მშენებლობაში აქტიურად იყო ჩართული დარეჯან დედოფალიც. 1766 წლის 22 სექტემბერს იგი შუამთის მონასტრის წინამძღვარს – ნიკოლოზს სწერს: „მერმე აქ ზარბაზნის ბურჯისათვის კირი ბეჟან ყორჩიბაშის-შვილიდამაც და ამის ძმის დავით ყორჩიბაშის-შვილისაგანაც ვისესხეთ კირი და კიდევ შესმარდა, წინა დღეს ხომ შენგანაც ვისესხეთ და უარიც არ გითქომს. ახლა კიდემა გწერთ, რომ ამ ბურჯს კიდემ დააკლდა კირი და რაც ამას კირი მოუნდეს, უნდა გვასესხოთ. მაგიერი ისევ ღუთით მოგეცემა, ხათრიჯამი იყავ მაგიერს მოგცემთ, ბატონსაც უბძანებია, ვისაც კირი ქონდესო უნდა ისესხოთ. ახლა ჩვენს აქედამ ურმები გამოგვიგზავნია და პეტრე ერატისშვილი გამოგვიტანებია, ამას უნდა წყვით მოაბარო ...რაც კირი მოაბარო წერილი ერთი პირი ჩუშნც გამოგვიგზავნე და მეორე შენ შეინახე, რომ ისევ იმავ ანგარიშით მოგეცესო“.³

სიმკვრივის მიზნით კირში კვერცხის გულსა და რძესაც ურევდნენ. ამილახვრების რეზიდენციის – ჭალის (ქვემო-ჭალის) კოშკის მშენებლობასთან დაკავშირებით, პოლიევექტოს კარბელაშვილი ერთ საინტერესო ამბავს გადმოგვ-

¹ გორის სახელმწიფო ისტორიულ-ეთნოგრაფიული მუზეუმი, 7783/3; ფ. 146.

² ა. გაბიჩვაძე, გორის ციხე ერეკლე II დროს, გვ. 13, დოკ. 3.

³ Акты..., т. I. Тифл., 1866, გვ. 45.

ცემს. როდესაც ყიზილბაშები გივი ამილახვარს ებრძოდნენ, გარემოცვისას ეს კოშკი ზარბაზნით მოუნგრევიათ. სიმაგრეში შეხიზნულებს ღამით მოუწველიათ ფურ-კამეჩი და წყლის მაგივრად რძით არეული კირით მოუდგამთ დანგრეული კოშკი. ღამით აშენებული დილაძდე ისე გამშრალა და განმტკიცებულა, რომ ზარბაზნებსაც ვეღარაფერი დაუკლიათ.¹

ლეკიანობის წინააღმდეგ საბრძოლველად ასევე აუცილებლობას წარმოადგენდა გადმოსასვლელ გზებზე თხრილების გაკეთება, მდინარეების ფონების დაღრმავება, მომხდურთა სამალავი ტყეების გაკაფვა, მზვერავთა მიერ ტერიტორიების მუდმივი შემოწმება, რაც ძალზე დიდ ხარჯებთან იყო დაკავშირებული, ამიტომ მორიგე რაზმების შესანახად ერეკლეს ხიდებზე ბაუები დაუწესებია, რომლებიც მცველების შენახვას ხმარდებოდა. როგორც იოანე ბატონიშვილი გადმოგვცემს: „დალისტნიდამ ჯარი რომ წამოვიდოდა, საგურამოს თუ ყარაიაზედ ამოივლიდა. მტკვარს თუ ვერ გავიდოდნენ, არაგვს გამოვიდოდნენ, ამ მცხეთას თავს გარდაივლიდნენ და ამ ხიდზედ გავიდოდნენ. ზოგნი ახალციხეს აღვიდოდნენ, ზოგნი არმაზის წყალს და ძეგვისაკენ შეჰკრავდნენ და ზოგნი მუხათგვერდსა, და ესრეთ ახდენდნენ მგზავრთა. მეფემ ირაკლიმ ეს დონე იხმარა, რომ ამ ხიდის გაღმა და გამოღმა კოშკები განაახლებინა, შიგ კარგი ვაჟიკაცნი დააყენა, რომელნიც ამ გზებსაც ჰსცვივიდნენ, მგზავრთაც მშვიდობიანად ატარებდნენ და განუწესა ფქვილი ერთი ჩანახი (დაახლ. 8 კგ. – ი.ა.) და ამ ყარაულებს ეძლეოდათ. და ოდეს მეფემან სიმხნითა თუსითა მრავალს ადგილს ჰსძლო ლეკთა და შიშსა შინა მოიყვანნა“.² ერეკლეს ქარავანსა და ვაჭრისათვის საბაჟო ნიხრი ორი შაური დაუწესებია, რითაც ადგილობრივ ყოველდღიურად „ორს თუმნამდის შემოსავალი დგებოდა“.³

ძეგვის გადმოსასვლელს საუკუნის ბოლომდე არ დაუკარგავს მნიშვნელობა, რადგან იგი ლეკთა ქართლ-კახეთზე თავდასხმების ერთ-ერთი ძირითადი „ფორ-პოსტი“ იყო. გარდა იმისა, რომ ძეგველები ჯარში გაწვევას არ ექვემდებარებოდნენ, 1800 წ. 2 მაისს კათალიკოსი ანტონ II მათ გადასახადებიდანაც ათავისუფლებდა: „...ამ ძეგველებს ნურაზე შეაწუხებთ ხოლმე და ყოველითურთ ხელადებულნი უნდა იყვნენ ამათზედა, ამიტომ რომ საშიშს გზაზედ დგანან, შუა შარაზედ, და ესენი მცველნი არიან და არც ამათი ჯარში წას-

¹ პოლიეექტოს კარბელაშვილი. ამილახვართა საგვარეულოს ისტორიული გუჯრები. – *ძველი საქართველო*. საქართველოს საისტორიო და საეთნოგრაფიო საზოგადოების კრებული, ტ. II. ტფ., 1913, გვ. 117.

² იოანე ბატონიშვილი. ხუმარსწავლა (კალმასობა), წიგნი I, თბ., 1990, გვ. 104.

³ იოანე ბატონიშვილი. ხუმარსწავლა (კალმასობა), წიგნი I, გვ. 104.

ვლა იქნება, მისთვის რომ სოფელი უკაცურად დარჩება, ერთი განსაცდელი შე(ე)მთხვევათ, ეკლესიასაც დააკლება და ქვეყანასაც, ნურცავინ გამლელ-გამომვლელი შეაწუხებთო“, ბრძანებდა ქართული ეკლესიის საჭეთმპყრობელ.¹

თავდაცვითი ნაგებობების შენახვა და მოვლა-პატრონობა მოხელეებთან ერთად, ადგილობრივი მოსახლეობის უშუალო მოვალეობასაც შეადგენდა, რადგან მათი და ოჯახების უშიშროებას უზრუნველყოფდა. მაგ. „დასტურლამალის“ მიხედვით, რევიშიელებს შავი წყლის გზა უნდა შეენახათ, საგინაშიელებს, თავიანთი მამულით – კოშკის გზა, თარხნის მამული ოძელ-ცხირელებთან ერთად, გოსტიბეს გზას „ინახავდნენ“, კავთისხევი, წინარეხი და საქვათახევი – თავიანთ გზას, ნიჩბისელები – ასევე თავიანთ გზას, დოესელები და ქვახვრელები – ხიდს² და ა. შ.

ადგილობრივ მოსახლეობას საფორტიფიკაციო ნაგებობების მშენებლობისას სურსათიც უნდა გაეღო. მაგ. ერეკლე II-ის მიერ 1797 წელს გაცემული ერთი საბუთის მიხედვით, გორის ციხის აღდგენისას სასმელ-საჭმელი გორელებს უნდა ეძლიათ, ხოლო ხელფასი გორის იჯარიდან უნდა მიეცათ.³ რადგან ლეკიანობა ქართლ-კახეთის თითოეული ქალაქ-სოფლისათვის დამახასიათებელი მოვლენა იყო, ერეკლე დღენიადაგ ზრუნავდა ციხე-სიმაგრეებისა და კოშკ-გალავნების აშენება-განახლებისათვის. ომან ხერხეულიძის ცნობით: „მეფობისა ამისსა აშენდნენ სიმაგრენი ქართლ-კახეთისანი, ვიდრე ასსამოცამდე გაღავანი და ბურჯნი მტერთათვის, ხოლო თვით მეფემან განახლა ციხე გორისა, გაღავანი სიღნაღისა, თელავისა, ბოჭორმისა, ჭოეთისა, გაღავანი სევირელისა, საბუისა, ფედისა, პატარძეულისა და ნორიისა“.⁴ მეფისავე ინიციატივით დაუწყოთ თბილისის თავდაცვითი ზღუდეების სრული შეკეთება.⁵ თავის მხრივ, თავდაცვითუნარიანობის განმტკიცებაზე თავად-აზნაურებიც ზრუნავდნენ. ლეკების შემოსევებისაგან თავდასაცავად ტყვიავის ციხის მეპატრონეს

¹ ირაკლი ანთელავა. XVIII საუკუნის საქართველოს სოციალ-ეკონომიკური განვითარების სასიათის საკითხისათვის (სოფლის მასალების მიხედვით). თბ., 1977, გვ. 182.

² დასტურლამალი. – ქართული სამართლის ძეგლები. ტექსტი გამოსაცემად მოამზადა, გამოკვლევები, ლექსიკონი და საძიებლები დაურთო ივანე სურგულაძემ. თბ., 1970, გვ. 532-533.

³ შოთა მესხია. აღმოსავლეთ საქართველოს ქალაქების გარეგანი სახე. – საისტორიო ძიებანი. ტ. III. თბ., 1986, გვ. 318.

⁴ ომან ხერხეულიძე. მეფობა ირაკლი მეორისა, გვ. 74.

⁵ თბილისის ისტორია. უძველესი დროიდან XVIII ს-ის ბოლომდე. მამია დუმბაძისა და ვიქტორ გუჩუას რედ. თბ., 1990, გვ. 74.

თამაზ ქარელს 1754 და 1758 წლებში, ციხე-დარბაზისათვის კომპები მიუშენებია,¹ ამავე ხანებში ორბელიანებს გაუმაგრებიათ ციხე – გაღაგანი ლამისყანაში.²

ამილახვრებს თავიანთ რეზიდენციაში – ჭალაში, თავდაცვის მიზნით სამრეკლო კომპად გადაუკეთებიათ,³ მეფის სახლთუხუცესს კონსტანტინე მუხრანბატონს 1746 წელს საფუძვლიანად შეუკეთებია ქსნის ციხე,⁴ ხოლო 1756 წელს განუახლებია მუხრანის ციხე.⁵

არაგვის ერისთავს 1751 წელს გაუმაგრებია დუშეთის სასახლე,⁶ გორის ციხის მინბაშს – დიმიტრი დიასამიძეს 1792 წელს აუშენებია საქაშეთის კომპი,⁷ 1750 წელს გიორგი მირზაშვილს შინდისისათვის გაღაგანი შემოუკვლია, ფრეზეთში სასახლის ციხის მშენებლობა და „ბევრს ხარაბა ადგილის კეთება და შენება წამოუწყია“⁸ და სხვ.

XVIII საუკუნის II ნახევრისათვის ქართლ-კახეთში ციხე-გაღაგნები თითქმის ყველა პირველი ხარისხის თავადს გააჩნდა თავის რეზიდენციაში, ამილახვრებს – ქვემოჭალაში, მუხრანბატონებს – მუხრანში, ციციშვილებს – სამწევრისში, არაგვის ერისთავებს – ანანურში, ქსნის ერისთავებს – ახალგორში, ჩოლოყაშვილებს – მატანში და სხვ. აღსანიშნავია, რომ არისტოკრატიის წარმომადგენელთა საცხოვრებლები ციხე-სიმაგრეს ვერ გამოეთიშებოდა, ამიტომ ცალკეული კომპები თანაბრად შეიძლება მივაკუთვნოთ როგორც საცხოვრებელ, ისე თავდაცვით ნაგებობათა ჯგუფს. ასევე იყო სამრეკლოებიც, რომლებიც ხშირად საცხოვრებელი ოთახიც იყო და გამაგრებული კომპის ფუნქციაც ჰქონდა.⁹

ლექების წინააღმდეგ თავდაცვით ნაგებობებს მხოლოდ ქართველები არ აგებდნენ, „ოსმალობის“ პერიოდში ისაყ ფაშას მამუკა მუხრანბატონთან ერთად აუგია მუხრანის გაღაგანი, გაუმაგრებია გომის ციხე¹⁰, სეხნია ჩხეიძის

¹ საქართველოს ისტორიისა და კულტურის ძეგლთა აღწერილობა, ტ. V, გვ. 88.

² საქართველოს ისტორიისა და კულტურის ძეგლთა აღწერილობა, ტ. V, გვ. 174.

³ საქართველოს ისტორიისა და კულტურის ძეგლთა აღწერილობა, ტ. V, გვ. 203.

⁴ საქართველოს ისტორიისა და კულტურის ძეგლთა აღწერილობა, ტ. V, გვ. 327.

⁵ საქართველოს ისტორიისა და კულტურის ძეგლთა აღწერილობა, ტ. V, გვ. 300.

⁶ **Пл. Иоселиани.** Описание города Душета Тифлисской губернии. Тифл., 1860, გვ. 132.

⁷ **პარმენ ზაქარაია.** ქართული ციხე-ქალაქები, ციხე-სიმაგრეები, ციხე-დარბაზები, ციხე-გაღაგნები, კომპები. თბ., 2004, გვ. 212.

⁸ **ერეკლე II-ის მიერ გაცემული საბუთები 1736-1797 წლები**, დოკ. № 44, გვ. 21.

⁹ **ვახტანგ ბერიძე.** XVI-XVIII საუკუნეების ქართული ხუროთმოძღვრება, ტ. I, გვ. 91.

¹⁰ **დარეჯან მეგრელაძე.** აღმოსავლეთ საქართველო XVIII ს. პირველ ნახევარში. – საქართველოს ისტორიის ნარკვევები, ტ. IV, გვ. 439.

ცნობით, მანვე ააგო: „ციხე აგჭალისა, კოშკები დიდის ბოლოდან ატენის წყლამდე თორმეტი, სადაც ფონი იყო ლეკის გამოსავალი“.¹

ერეკლეს კარგი ცოდნა და დიდი გამოცდილება საფორტიფიკაციო ნაგებობების მშენებლობა-განახლების მიზნით, კარგად ჩანს მისი მოხელეებისადმი გაცემული უამრავი ბრძანებიდანაც. მეფე კონკრეტულ დაგალებებს აძლევს შესაბამის მოხელეებს, მშენებლობისას კირის რა რაოდენობა გამოწვან და დაზიდონ, რამდენი ქვა და ქვიშა მოზიდონ, რამდენი ურემი და მუშა-ხელი გამოიყენონ და ა. შ. ნიშანდობლივია, რომ ერეკლეს მეფობაში თავდაცვითი ნაგებობების ხვედრითი წილი გაცილებით მეტია ყველა სხვა სახის მშენებლობაზე.

მეფეს ზუსტი ინფორმაცია ჰქონდა ციხე-სიმაგრეთა სიმძლავრეებისა და მათში დასახიზნი მოსახლეობის ტევადობის შესახებ. ომარ-ხანის 1797 წლის შემოსევისას თელავში მყოფი ერეკლე საენდრონიკო და სავაჩნაძეო სოფლებს უბრძანებდა: „ომარ-ხანი დაღისტნის ჯარით ბელაქანში ჩამოსულა, ნებას გაძლევთ, სიღნაღის ციხეში დაიხიზნებით, ან აქ თელავს ამოდით და ამ ორს ქალაქს უფრო გამაგრებულნი ვიქნებით და უფრო კარგად მივეშველებით ერთმანეთსა, ვეჯინის ციხის გამაგრება და დახიზნვა არ იქნება და არც ხიზანი დაიყენებაო“.²

ამავე ხანებში ალექსანდრე ბატონიშვილი თბილისიდან მამას სწერდა: „...ქალაქი გავამაგრეთ, მელიქ აპო თავისის ელით, შულავერი თავეთის ხიზნით ქალაქში შემოვიყვანეთ და საიდამაც მტრის მოსვლის ფიქრი გვქონდა, სულ იმ მხარეს დაურიგეთ და ბურჯებში დავაყენეთო“.³

1785 წ. 19 აგვისტოს ერეკლეს მიერ ბეჟან ამილახვრისადმი მიწერილ წერილში, რომელიც ჩვენი აზრით, ასევე ომარ-ხანის თავდასხმას უნდა უკავშირდებოდეს, მეფე დიდმოხელეს ნამოქმედარს უწონებდა და კონკრეტულ დაგალებებსაც აძლევდა: „...მერე შენი წიგნი მოგვივიდა, დიად გიმაღლით რომ ბეჯითი ხარ. აფერუმ და რაც რომ გაუკეთებიათ დიად კარგი. რაც გაკეთებულა კმარა. თუ ასე გაკეთებულა რომ ეგ წერილი სოფლები ჭალები და ეგენი მაგაში დაეტეოდნენ. მაგაში რომ დაიხიზნენ ისა სჯობს, თუ არ დაეტეოდნენ და ციხე აქვსთნ და იმაში შეველენ, რომელიც სოფლები მაგ სურამში შესას-

¹ სენნია ჩხეიძე. საქართველოს ცხოვრება, გვ. 15.

² საქართველოს ისტორიის ქრონიკები, გვ. 205.

³ შოთა ხანთაძე. მასალები ალექსანდრე ბატონიშვილის ბიოგრაფიისათვის. – აკად. ს. ჯანაშიას სახელობის საქართველოს სახელმწიფო მუზეუმის მოამბე, ტ. XXII. თბ., 1961, გვ. 245.

ვლელად მოგვეწეროს ამას წინათ ის სოფლები ახლავ აჰყარე და შეიყვანე კარგათ გამაგრდნენ რაც შეიძლონ. პური შეიტანონ და ტყვია წამალი ბარაქიან შეატანინე, კარგათ გაამაგრე ესეები. ასე გაარიგე: აგვისტოს ით ქ-კს უოგ და რომელსაც სოფელზედ საყარაულო იყოს დარჩომილი იქიდამ უნდა აიღოთ და ან კიდევ თუ თეთრი იყოს მორჩომილი იქიდამ უნდა მიეცესთ ყარაულებსა რომ არ მოიშაღნენ. ამილახვრისათვის და დავით მოურავისათვის მიგვიწერია ისინი აიღებენ და ყარაულებს მისცემენ რომ არ მოიშაღნენ ყარაულები. და თუ რამ თეთრი აქესთ აღებული ხელში იქიდანაც მისცემენ. ეგ რუსის ჯარი რომ აიყაროს და წამოვიდეს, შენ მაგათ არ უნდა მოშორდე, ხუმრობა არ არის და რომელსაც სოფლებში არა პრავიანტი (გადასახადი პურით, ან ხორბლით – ი.ა.) აქეს შეწერილი სულ თან წამოაღებინოთ იასაულებსა. ამილახვრისათვის მოგვიწერია, ამ საქმეზედ ბეჯითი იყავ“.¹

1780 წ. 1 აპრილს მეფე ი. გლურჯიძეს ხიდისთავის კოშკის აღდგენის მიზნით, შემდეგ მითითებებს აძლევს: „ქ. ჩვენი ბძანება არის იასაულო ი. გლურჯიძე, მერმე შენ უნდა წახვიდე ხიდისთავს რაც კაცი იყოს მაგათ ურმები უნდა შეაბმევირო და რაც ქვა და ქვიშა მაგ კოშკს მოუნდება უნდა მოატანინო და რაც საკირეში კირი იყოს ისიც უნდა ამოიღონ და დაზილონ, ამაზედ ბეჯითად მოიქეციო“.²

როცა თავდაცვითი ნაგებობის მშენებლობა უფრო მასშტაბური იყო და ადგილობრივი მოსახლეობა არ კმაროდა, მეფე მოხელეებს მოუწოდებდა ურთიერთდახმარების სხვა ფორმები გამოეყენებინათ, მაგ. 1773 წელს ერეკლე შიდა ქართლის მოურავსა და გორის მელიქს ავალებდა გორის ციხის აღდგენით სამუშაოებში ახლომდებარე მოსახლეობის ჩაბმას: „ქ. ჩვენი ბრძანება არის, ამილახვარო რევაზ და გორის მელიქო! მერე გორის გაღავანს სადაც ეჭირვებოდეს, ოთხი ჯიხური, ვინც გაღავანში ესახლოს იმათ დაადგმევინეთ და ოთხი ჯიხური, ვინც გორის ციხეში დაიხიზნება, იმათ დაადგმევინეთ“.³

1770 წლის აღწერით გორში დაახლოებით 2000 (500 კომლი) კაცი ცხოვრობდა⁴, ხოლო გორის ციხის შიდა ნაწილის (ე. წ. ზემო ციხის) ფართობი დაახლ. 12000 მ-ია (200X60), აქედან გამომდინარე, თავისუფლად შეიძლებოდა

¹ ხელნაწერთა ეროვნული ცენტრი, ფ. AD, საბ. 1362.

² გსიემ, 7782/4; ფ. 355.

³ ა. გაბიჩვაძე. გორის ციხე ერეკლე II დროს. საისტორიო მოამბე, I. თბ., 1945, გვ. 11, დოკ. 4.

⁴ გულჩინა აკოფაშვილი. ქართლ-კახეთის სახელმწიფოს საშინაო პოლიტიკა. – საქართველოს ისტორიის ნარკვევები, ტ. IV. თბ., 1973, გვ. 519.

იმ დროისათვის არა მარტო გორელების, არამედ ახლომდებარე სოფლების მოსახლეობის დახიზვნაც, მით უფრო, თუ გავითვალისწინებთ გორის ციხის იმდროინდელ სიმძლავრეებს. ავტ. თუმანიშვილის გადმოცემით, XIX ს. 10-იან წლებში გორის ციხეს 35 დიდი კოშკი ჰქონია.¹ ეს მოსაზრება სიმართლესთან ახლოს უნდა იყოს, რადგან პოლკოვნიკ დრენიაკინის მიერ 1802 წელს შედგენილი გორის გეგმიდან ჩანს, რომ ციხე 23 კოშკითა და ბურჯითაა გამაგრებული.²

მეფე ციხე-სიმაგრეების მშენებლობის მიზნით არც სახელმწიფო სახსრებს იშურებდა და მუდმივ კონტროლზე ჰყავდა, თუ რა ტემპებით მიმდინარეობდა აღდგენითი სამუშაოები. 1774 წ. 18 მარტს ერეკლე რევაზ ამილახვარსა და გორის მელიქს ზურაბს სწერდა: „მერე ორმოცდაათი თუმანი გარდავიდვია და ბარათი გორის ბაჟის იჯარადარზედ დაგვიწერია და გამოგვიგზავნია. ღ[ვ]ითის მოწყალებით, ამ ორმოცდაათის თუმნით რაც მუშაობა შეიძლება, გორის ციხეზედ უნდა იმუშაოთ და გააკეთოთ“.³ სამიოდ კვირის შემდეგ (8 აპრილს), ერეკლე II ამილახვარს შეახსენებდა: „...ქ. ამას წინათაც წიგნი მოგწერეთ რომ გორიდან ორმოცდა ათის თუმნის თადარიგი ჰქნათ რომ საკირეები უნდა დაადგმევინოთ და დააწვევინოთ, რაც ორს საკირეს მოუნდეს ის კი დახარჯეთ და სხვა კი შეინახეთ რომ როგორც მოგინდეს ისე დახარჯოთ რომ მაგ ციხეს უნდა მოხმარდეს წლეულობით და ეს წიგნი ბარათათ შეინახეთ რომ ის ორმოცდა ათი თუმანი ბაჟიდამ მოგეცემათ“.⁴

1772 წ. 29 თებერვალს ერეკლე II შიდა ქართლის გამგებელს – რევაზ ამილახვარს ავალებდა გორის ციხის გარშემო ღრმა თხრილის გაჭრას: „გორის გალანისა რომ მოგეწერათ, ჩვენი მუშა შევაწერეთ და ხანდაკი უნდა გააჭრევინოთ. ხანდაკს ხუთი ადლი განი უნდა ჰქონდეს და ოთხი ადლი სიდრმე, ასე უნდა გააკეთებინოთ“.⁵

ქართლ-კახეთის მეფის დიდი ინტერესი გორის ციხის აღდგენის მიზნით ჩანს ამილახვრისადმი 20 ივლისს მიწერილი წერილიდანაც: „...ისე გარჯას ეცადენით, რომ მასალა მომზადდეს, ჩვენც ღ-თის მადლით კათალიკოზს და ლევანს რომ ქალაქს მოსულს დავიგულებ მანდეთ წამოვალთ, რომ მარიამობ-

¹ **ავტ. ტუმანოვ.** Описание грузинского города Гори. СПб., 1816, გვ. 20.

² იხ: **ელდარი მამისთვალიშვილი.** გორის ისტორია, ტ. I, გვ. 157; **შოთა მესხია.** აღმოსავლეთ საქართველოს ქალაქების გარეგანი სახე, გვ. 315-320.

³ **ა. გაბინვაძე.** გორის ციხე ერეკლე II დროს, გვ. 12-13, დოკ. 7.

⁴ *გხემ* 7782/3; ფ. 146.

⁵ **ა. გაბინვაძე.** გორის ციხე ერეკლე II დროს, გვ. 9, დოკ. 1.

ის ნახევრიდან მოკიდებული ენკენისთვის ნახევრამდონ სულ ერთიანად ბატონ ყმანი მივეხვივნეთ და გორის საქმე ვიმუშავოთ“.¹

სტრატეგიული ნაგებობების აღდგენა-განახლებაზე მთელი სამეფო ოჯახი ზრუნავდა. 1794 წელს გიორგი ბატონიშვილი გოგია ხერხეულიძესა და სახლ-თუხუცეს ფიცხელაურს ღართისკარის „წამხდარი“ ხიდის საკუთარი ხარჯებით აღდგენას ავალებდა: „...ღართის კარის ხიდი წამხდარა, რომ მგზავრი ვედარ დადის ...თქვენ კომლზედ კაცი და ხარი უნდა გამოიყვანოთ, წამოუძღვეთ და ღართისკარში ...ხიდი გააკეთოთ, უმისობა არ იქნება და არც დაგვიანება, ხარით, ცულით და სახმარის იარაღით უნდა წამოხვიდეთ, ამაში მთის კაცს საქმე არა აქვს-რა, ბარის კაცი უნდა გაისარჯოთ“,² ტოტლებენის საქართველოში მოსვლისას ქსნის ერისთავებისათვის 40 უღელი ხარ-კამეჩის ბეგარაზე გამოყვანა შეუწყვიტა³ და ა. შ.

ყველა დიდ ციხესა და თავდაცვით ნაგებობას ჰქონდა თავისი წესდება (სარისტა, გარიგება), რომლის შესრულებაზე მინბაშები, ქალაქის მოურავები, მელიქები და სხვა სახელმწიფო მოხელეები აგებდნენ პასუხს. 1772 წლის 10 ივნისს ერეკლე იმავე რევაზ ამილახვარს სწერდა: „მერმე ამ ხანად ჩვენი შვილი გიორგი გამოვგზავნეთ მანდეთკენ და თქვენ უნდა იახლოთ, იმათთვისაც მოგვიწერია და მაგ ქვეყნის ბინა-სიმაგრე, ჯარისა და მღვერების გარიგება, ციხეებისა და სიღნაღების გარიგება და გამაგრება, როგორც სამჯობინარო იყოს, ისე უნდა გაარიგოთ და ისე მოიქცეთ მაგრად და ფრთხილად და მტერს არა დაანებოთ რა“.⁴

რაოდენობის მიხედვით, განსაზღვრული იყო ისიც, თუ რომელი სოფლის (ქალაქის) მოსახლეობას რომელი ციხისათვის უნდა შეეფარებინა თავი და ვინ იყო ამაზე პასუხისმგებელი. პაპუნა ორბელიანი ნურსალ-ბეგის 1755 წლის შემოსევისას ერეკლე II-ის მიერ გაწეულ თავდაცვით სამზადისს შემდგენაირად აგვიწერს: „წაბძანდა კახი ბატონი ერეკლე კახეთს, რა მიბძანდა თელავს, შემოიყარა ჯარი კახეთისა და აყარა კახეთი სულ და ციხეები გაამაგრა და

¹ გსიემ 7782/3; ფ. 155.

² დავით გვრიტიშვილი. ფეოდალური საქართველოს სოციალური ურთიერთობის ისტორიიდან (ქართლის სათავადოები). თბ., 1955, გვ. 225.

³ დავით გვრიტიშვილი. ფეოდალური საქართველოს სოციალური ურთიერთობის..., გვ. 225.

⁴ ა. გაბიჩვაძე. გორის ციხე ერეკლე II დროს, გვ. 9-10, დოკ. 2.

ყოველს ციხეს ოთხ-ოთხის თვის თადარიგი დაუჭირა, აავსო პურით, ღვინით, აგრეთვე მეთოფითა და ტყვიის წამლითა“.¹

ციხის უფროსები და სხვა პასუხისმგებელი პირები, ასევე ვალდებულები იყვნენ გასაჭირში ერთმანეთს მიშველებოდნენ. სურამზე ლეკების მოსალოდნელ თავდასხმასთან დაკავშირებით, 1773 წლის 15 ივნისს მეფე ამილახვარს სწორედ ამ ფაქტის გამო საყვედურობდა: „ქ. სურამის მოურავმა რომ ციხეში დასაყენებელი კაცნი გთხოვათ, ღ[ვ]თის გულისათვის, როგორი საქმეა? რატომ არ გაუგზავნეთ? თხუთმეტი-ოცი კაცი რომ გაგვეზავნათ, რა იქნებოდა, როგორი ქვეყნის მოვლა არის? ახლავ ორმოცდაათი იყოს, სამოცი კაცი მიაშველეთ სურამს. გორიდან ტყვია-წამალი გამოიტანეთ, თვითო ლიტრა წამალი თვითომ, ჩარქი იყოს – მეტი თუ ნაკლები – ტყვია აიკიდონ და ერთ ღამეს შევიდნენ სურამს. არაგვის მოურავიც მანდ არის, ზოგი კაცი მაგან, ზოგი თქვენ გამოარჩივთ კარგი კაცი და ახლავ გაისტუმრეთ. თუ ერთად იყვნეთ, გიორგი ერისთავო და ივანე მეთარო, ესენი ასე გაარიგეთ, რაც მოგვიწერია, თუ მანდ იყვნეთ, თუ არა და მაგათ გაარიგონ“.²

ციხეების დაცვა და წესრიგი სპეციალურად დანიშნულ მოხელეებს – მინბაშებს ევალებოდათ. მათ ებარათ ციხის გასაღები და მისი ნებართვის გარეშე ციხეში შესვლა და იქიდან გასვლა არაგვის შეეძლო. გადმოცემით, ერთხელ გორში დაგვიანებით მისული ერეკლე, ციხის მცველებმა დიდხანს აღოდინეს, სანამ მინბაში არ მოვიდა.³ იმის გამო, რომ ციხე ქვეყნის დაცვასაც უზრუნველყოფდა, მინბაში ქალაქის შემოსავლის ნაწილსაც იღებდა. ციხის მცველები საკვებს მეფის ხაზინიდან იღებდნენ, ხოლო ადგილობრივი და მეზობელი სოფლების მცხოვრებნი ციხეს შეშითა და სხვა საჭირო მასალით ამარაგებდნენ.⁴ აღსანიშნავია, რომ ციხისთავად დანიშნული პიროვნების ყმები თარხნდებოდნენ, რათა ისინი ციხისთავს ციხის დაცვაზე გამოეყენებინა.⁵ დადგენილი იყო მათი სამსახურის ვადაც, მაგ. რაინეგსის ცნობით, გორის ციხის მეციხოვნეები ყოველ ოთხ კვირაში იცვლებოდნენ.⁶

ციხისთავი ციხის სრული ბატონ-პატრონი იყო და მეფური პატივით სარგებლობდა. მაგ. გორის ციხის მინბაში სახელმწიფოს მიერ ნაქირავებ ბინაში

¹ პაპუნა ორბელიანი. ამბავნი ქართლისანი, გვ. 227.

² ა. გაბიჩვაძე. გორის ციხე ერეკლე II დროს, გვ. 11-12, დოკ. 5.

³ ილია ბერძნიშვილი. გორის ციხე, გვ. 45.

⁴ ილია ბერძნიშვილი. გორის ციხე, გვ. 45.

⁵ ელდარი მამისთვალისშვილი. გორის ისტორია, ტ. I, გვ. 254.

⁶ იაკობ რაინეგსი. მოგზაურობა საქართველოში, გვ. 149.

ცხოვრობდა და თავისი კაცები ჰყავდა დაყენებული მტკვრის პირას და ქალაქის ჭიშკრებთან, რომლებიც „სამინბაშო ბაჟს“ იღებდნენ. ბაჟი იკრიფებოდა ყველაფერზე, რასაც ვაჭრები გაატარებდნენ: ურემ ღვინოზე - ერთი ტიკი, ურემ ნახშირზე - ერთი კალათი და სხვ.¹ თუმცა, საუკუნის ბოლოს ბატონიშვილებს შორის არსებული დაპირისპირების გამო, მინბაშების ფუნქცია, ხანდახან კონკრეტულ პირებსაც ეკისრებოდათ. მაგ. 1797 წლის 22 დეკემბერს იულონ ბატონიშვილი დარეჯან დედოფლის სახელზე გაგზავნილ წერილში წერდა: „...სურამის ციხეში შემსვლელ-გამომსვლელნი ...ოთხნი კაცნი არიან: ბებილაშვილი მღვდელი გიორგი, ტერ მიქელა, მამასახლისი გაბრიელა და ბერელაშვილი გაბრიელა. ამ ოთხს კაცს გარდა სურამელი კაცი ვერავინ შევა და ვერცავინ გამოვაო“.² 1796 წელს თბილისში შავი ჭირის ეპიდემიის გავრცელებასთან დაკავშირებით, იულონ ბატონიშვილი ოთარ ამილახვარს აფრთხილებდა, რომ გორში მკაცრი საკარანტინო ზომები შემოეღო და ციხეში არავინ შეეშვა: „ქალაქის ამბავ შენ უკეთ გეცოდინება, მაგრამ ჩვენ ამას გწერთ, ამაზე არავინ მოგატყუოს რომ ქალაქში ჭირი არ იყოს. ხუმრობა არ არის გორში არავინ შეუშვათ ქალაქში ნამყოფი ხალხი, ან ნათესავ, ან მეგობარი, თორემ ჩვენს მესისხლეთ მოვიკითხავთ მანდელამ. ან პურს არ დაუწყონ ძლევა ან ღვინოს და ან მეგობრობით არავინ გაიაფდეს და არავინ ნახოთ და თუ შეუტყოთ ვისმე, ნუღარც იმას შემოუშვებთ და სახლით და კარით აიკელით, სიფრთხილით მოიქეცითო“.³

ხელისუფლების მხრიდან მკვეთრად იყო გამოიჯნული მოხელეთა უფლებამოვალეობანი. როცა ნიკოლოზ მდივანბეგმა საკუთარ ძალაუფლებას გადაამეტა და სურამის მოურავი ციხეში აღარ შეუშვა, ერეკლეს რეაქციამ არ დააყოვნა: „...ახლა სურამის მოურავისა გვესმის, რომ სურამის ციხეში აღარ უშვებ და დაგითხოვნიან; შენ მაგ ციხეში სულობით საქმე არა გაქვს რა. მაგ ციხიდან უნდა გამოხვიდე, მამულები გაქვს და თქვენს მამულში, საცა გინდოდეს, მიბძანდი და დადეგო“.⁴

შეიძლება უცნაურად მოგვეჩვენოს, მაგრამ „არაბობას“, „მონღოლობას“, „ოსმალობას“, „ყიზილბაშობას“, საქართველოში დადებითი შედეგებიც მოჰქონდა. ჯერ ერთი, ისინი სამხედრო საქმის უბადლო ოსტატები იყვნენ (მაგ. არაბ-

¹ ელდარი მამისთვალისიშვილი. გორის ისტორია, ტ. I, გვ. 254.

² დავით გვრიტიშვილი. გორის ისტორია, ტ. I, გვ. 134.

³ საქართველოს ეროვნული არქივი, ფ. 1448, ს. 3534.

⁴ საქართველოს სიძველენი, ტ. III, გვ. 171, დოკ. 193.

ებს ჯარის ორგანიზაციასა და დისციპლინაში ბადალი არ ჰყავდათ, მონღოლები – სწორუპოვარი ცხენოსნები, მოისარნი და გამძლეობით გამოირჩეოდნენ, ოსმალები – სამხედრო სისტემაში დენტის წარმოების პიონერები და ა. შ.), რასაც არ შეიძლებოდა ქართველებზე ამ მხრივ კეთილისმყოფელი გავლენა არ მოეხდინა და მეორეც, მუდმივმა ძნელებელობამ ქართველი კაცი არა მარტო ბრძოლებში გამოაწრთო, არამედ თავდაცვითი ნაგებობების მშენებლობაშიც დაახელოვნა. ამ ფაქტს ხელს უწყობდა საქართველოს მოხერხებული გეოგრაფიული მდებარეობაც (ვიწრო ხეობები, რომლებიც მტრის მრავალრიცხოვან ჯარებს გაშლის საშუალებას არ აძლევდა, წყალუხვი და სწრაფი მდინარეები, რომელთა გადალახვა იოლი საქმე არ იყო, მიუვალი მთები, რომლებიც ძნელებელობის უამს მოხერხებულ სახიზრებს წარმოადგენდა და ა. შ.).

განუწყვეტელი თავდასხმების პირობებში, ქვეყნის მთავარი ციხე-კოშკები მუდმივ მზადყოფნაშიც უნდა ყოფილიყო. „ციხეებისაც ასე „დაგვიწერია“, აცხადებდა 1791 წელს ერეკლე, „ქალაქის თბილისის ციხეები, გორის ციხე, სურამის ციხე, წირქოლის ციხე, ანანურის ციხე, ბოჭორმის ციხე და გრემის ციხე, რომ ამ ციხეებს ნარიყალის ციხეებიცა აქეთ და ნარიყალები ცოტა კაცით შეინახება, ამ შვიდს ალაგას ნარიყალებში საერთოდ კაცი უნდა ეყენოსთ, რათა ერთიც მოუნდესთ მცველად და სხვა ციხეები და გალაგნები, რომ დიდრონი არიან, ქართლში თუ კახეთში, ისინი ცოტას კაცით ხომ არ შეინახება ის სათემო არისო“.¹ როგორც ბრძანებიდანაც ჩანს, ერეკლე ქართლ-კახეთში 7 მთავარ ციხეს გამოარჩევს: თბილისის, გორის, სურამის, წირქოლის, ანანურის, ბოჭორმისა და გრემის. ჩვენი აზრით, ჩამონათვალს უნდა დაემატოს თელავისა და სიღნაღის ციხე-გალაგნებიც. თუ დავაკვირდებით, მეფის მიერ მინიშნებული შვიდივე ციხე შიდა (ზემო) ქართლში, ან კახეთშია. ეს არ არის შემთხვევითი. XVI-XVII საუკუნეებში ბრძოლების ძირითად ასპარეზს ქვემო ქართლი წარმოადგენდა (ალგეთი, გარისი, ფარცხისი, ნახიდური, მარაბდა და ა. შ.), ხოლო დაპირისპირებულ მხარეს – ირან-ოსმალეთი. XVIII ს. მეორე ნახევრისათვის ქართლ-კახეთს მათი უღელი მოშორებული ჰქონდა და ქვეყანა, ძირითადად, „ლეკიანობის“ სიმძიმეს განიცდიდა, ამიტომ თავდაცვითი ობიექტების შენება-განახლება იმის მიხედვით ხდებოდა, საიდანაც ლეკების თავდასხმები იყო სავარაუდო. შვიდივე ზემოსხენებული ციხე ქართლ-კახეთის გზაჯვარედინებსა და მთავარ მაგისტრალზეა და შესაბამისად, ხეობის ჩამკეტიც.

¹ ილია ბერძნიშვილი. გორის ციხე, გვ. 45.

სურამის ციხე მტკვრისა და ბორჯომის ხეობით შემოსული მტრისაგან თავდასაცავად იყო გამიზნული, ამასთან სურამი გორისაკენ მომავალ გზასაც კეტავდა.

გორის ციხე შიდა ქართლის მთავარი ციტადელი იყო, ვისაც გორი „ქიორა“, ის ქართლის მფლობელადაც ითვლებოდა, ამდენად, ციხის სიმტკიცეს ერეკლე, ბუნებრივია, დიდ მნიშვნელობას ანიჭებდა, რაც კარგად ჩანს ზემოთ მოტანილ საბუთებშიც.

წირქოლი ქსნის ხეობით წამოსული ლეკების მთავარი „შემკავებელი“ უნდა ყოფილიყო. მას ქსნის ქვემო წელის სოფლები და ქსნის ერისთავების რეზიდენცია – ახალგორიც უნდა დაეცვა.

ანანური არაგვის ერისთავების მთავარი სიმაგრე იყო. იგი ერთდროულად უზრუნველყოფდა ჩრდილოეთიდან როგორც სამუხრანბატონოს, ისე თბილისის მოსახლეობის უშიშროებას.

თბილისი ქვეყნის დედაქალაქი, ყველაზე მრავალრიცხოვანი მოსახლეობით და ეკონომიკის მთავარი „ხერხემალი“ იყო. სწორედ აქ იყო თავმოყრილი საწარმოების (მათ შორის თავდაცვით სფეროში – თოფ-ზარბაზნის, თოფის-წამლის და სხვ.) ძირითადი ნაწილი, ამიტომ მისი თავდაცვა ხელისუფლების უპირველეს საზრუნავს წარმოადგენდა.

ბოჭორმას გარე-კახეთიდან, ან ცივ-გომბორიდან წამოსული მტერი უნდა შეეკავებინა და თბილისის უშიშროება ჩრდილო და სამხრეთ-აღმოსავლეთიდან უნდა უზრუნველყო.

თელავსა და ალავერდზე ჩრდილო-აღმოსავლეთიდან წამოსული მტერი გრემის ციხეს ვერ ასცდებოდა, ამდენად მისი სიმტკიცე და ბრძოლისუნარიანობა კახეთის მთავარი ქალაქისათვისაც იყო მნიშვნელოვანი.

მტრის თავდასხმების შემთხვევაში ხსენებული ციხე-სიმაგრეებისათვის ახლომდებარე სოფლებიდან მოსახლეობის დახიზნვისა და თავდაცვითი ღონისძიებების გატარების მიზნით, დროული სიგნალის გადაცემა იყო საჭირო. ხშირად გუშაგები ამას ძველი ტრადიციით, სათვალთვალ კოშკებზე ცეცხლის დანთებით აკეთებდნენ. კოშკები, როგორც წესი, იმ მდინარეთა ხეობებში (მტკვრის, ძამას, ფრონეს, ლიახვის, ტანას, თემძის, ქსნის, არაგვის, ივრის და ა. შ. იხ: რუკა აქვე, დანართი № 6) სასიგნალო სისტემის ერთიან, უწყვეტ ჯაჭვს ქმნიდნენ. იქ, სადაც ციხე-კოშკის აგება ვერ ხერხდებოდა, „სახელდახე-

ლო“ სათვალთვალოებს აგებდნენ. მოგვიანებით კოცონი თოფ-ზარბაზანმა შეცვალა, მაგრამ ძველი ტრადიცია ადგილებში მაინც შემორჩა.

აღნიშნული ციხეების ადგილმდებარეობის შესწავლისა და რელიეფზე დაკვირვების შედეგად, მათი სასიგნალო კავშირი შემდეგი პრინციპით უნდა განხორციელებულიყო:

სურამის ციხე დასავლეთიდან ლიხის ქედით დაიმედოდ იყო დაცული. მტკვრის ხეობიდან შემოსული მტრის შემთხვევაში სიგნალი მას პეტრეს ციხე – გოგიას ციხე – ახალდაბა – ქვიშხეთი – ცხრამუხის კოშკებით გადაეცემოდა.

ძამის ხეობით წამოსული მტრის შემთხვევაში, სურამ-გორისათვის „მთავარი მესიგნალე“ საციციანოს „ჩამკეტი“ გვერძინეთის კოშკები იყო. ნიშანი პირველად ციციშვილების რეზიდენციას – ორთუბანს გადაეცემოდა, შემდეგ ყინწვის-სამწერისს, აქედან კი სურამ-გორისათვის სიგნალის გადაცემა ძნელი აღარ იყო.

გორის ციხეს სამაჩაბლოდან წამოსული მტრის შესახებ, სიგნალს ქემერტი-კეხვი-ფხვენი-შინდისის კოშკები აძლევდნენ. დიდი ლიახვის ხეობას ჩრდილოეთიდან კეხვის ციხე კეტავდა. კეხვიდან სამხრეთით სიგნალი ფხვენის-შინდისს გადაეცემოდა. ფხვენიდან კარგად ჩანს ამილახვრების მთავარი ციხე – სხვილო. იქიდან კი „აღმოსავლეთის სასიგნალო სისტემა“ იწყებდა მუშაობას.

პატარა ლიახვის ხეობაში სიგნალის გადაცემა შემდეგნაირად ხდებოდა: ჯერ ფოხალის ციხეზე აინთებოდა ცეცხლი, შემდეგ მიყოლებით – ხადური-ანთ კოშკზე, ერედვის ციხესა და მცხეთიჯვარზე, ხოლო იქიდან სიგნალი გორის ციხეს გადაეცემოდა.¹

ქართლის მთავარ ციხეს სამხრეთიდან (ტანის ხეობიდან) ნიშანს დანახვისი აძლევდა. კარგ ამინდში მასზე დანთებულ კოცონს თბილისიდანაც დაინახავდნენ, ხოლო ცუდი ხილვადობის პირობებში, დანახვისზე მიცემული სიგნალი უნდა შეემჩნიათ მუხრანბატონების მთავარ „დასაყრდენში“ – ქსნის ციხეში.

მტკვრის მარჯვენა ნაპირით თბილისისაკენ მტრის წასვლის შემთხვევაში სიგნალი მცხეთის „ჩამკეტი“ – ბებრის ციხეს გადაეცემოდა, აქედან კი თბილისის „საქმის კურსში ჩაყენება“ დიდ სირთულეს აღარ წარმოადგენდა.

¹ გიორგი სოსიაშვილი. ნარკვევები ლიახვის ხეობის ისტორიიდან. თბ., 2011, გვ. 111.

ქსნის ციხე ჩრდილოეთით სიგნალს აძლევდა სამუხრანბატონოს ცენტრს – მუხრანს. მუხრანიდან ჩრდილოეთით ნიშანი ქსნის ერისთავების რეზიდენციას – ახალგორს გადაეცემოდა, დასავლეთით – გორს, ხოლო სამხრეთ-აღმოსავლეთით – თბილისს.

ქსნის ხეობით წამოსული მტრის შემთხვევაში ლარგვისი – წირქოლი – ახალგორის სასიგნალო სისტემა ერთვებოდა.

რაც შეეხება თერგ-არაგვის ხეობას, დარიალიდან ანანურამდე სათვალთვალ კოშკების მთელი კასკადია (ფანშეტი, სნო, სიონი, მღეთა და ა. შ.)

სამხრეთ-აღმოსავლეთით თბილისისათვის სიგნალის მიცემას პატარძეულის კოშკი უზრუნველყოფდა, ხოლო ცივ-გომბორიდან – ბოჭორმა.

თელავსა და სიღნაღს ჩრდილო-აღმოსავლეთიდან ალაზნის ვაკე აკრავს და შესაბამისად, ხილვადობაც მეტია, ამიტომ ამ მხრიდან მტრის თავდასხმის შემთხვევაში, ციხეებს თავდაცვითი ზომების მიღება დროულად შეეძლოთ. თელავისა და ალავერდის მეციხოვნეებს ყვარელი – ნეკრესი – გრემიდან მიღებული სიგნალიც დიდ სამსახურს უწევდა.

ასე რომ სასიგნალო სისტემა გეოგრაფიული მდებარეობის მიხედვით, საკმაოდ გონივრულად იყო შედგენილი, რაც ქვეყნის უშიშროების დამატებითი გარანტია იყო.

ქართლ-კახეთში საფორტიფიკაციო ნაგებობების მშენებლობისა და მასში მოსახლეობის დახიზნვის ერთ მთლიან სისტემას გვთავაზობს იოანე ბატონიშვილი. იგი გარე კახეთიდან იწყება და ლიხის ქედით მთავრდება. ბატონიშვილის გეგმის მიხედვით, სიმაგრეები ისეთ ადგილებსა და იმგვარად უნდა აშენებულიყო, რომ მოსახლეობას მასში თავშეფარებისას შიში არ ჰქონოდა. ქიზიყის, საენდრონიკო, სავაჩნაძეო, ყანდაურას და ჯიმითის მოსახლეობა სიღნაღის ციხეში სრულად მოთავსდებოდა, მაგრამ მას გაწყობა-შეკეთება ესაჭიროებოდა.

ნინოწმინდა, პატარძეული, ხაშმი, სართიჭალა და სხვა მეზობელი სოფლები საჭიროების შემთხვევაში ბოჭორმის ციხეში უნდა დახიზნულიყვნენ.

ველისციხიდან თელავამდე მოყოლებული სოფლებისათვის კარგი სახიზარი იყო კალაურის მთა, მაგრამ იოანე ბაგრატიონი იქ ციხის აშენებასაც მიიჩნევდა მიზანშეწონილად.

თელავის გარშემო ქიშტაურამდე სოფლებისათვის მთავარ სახიზრად თელავის ციხე მოიაზრებოდა.

ახმეტას, მატანს, ბახტრიონს, ლალისყურს საკუთრივ ჰქონდათ ციხე-სიმაგრეები და მოსახლეობას შეეძლო მშვიდად ყოფილიყო.

ენისელსა და მის სამეზობლო წვრილ სოფლებს, საფრთხის შემთხვევაში, ენისის ციხეში შეეძლო შესვლა, მით უფრო თუ მას გააფართოებდნენ. სხვა მხრივ ციხე მკვრივი იყო და დახიზნულებს საფრთხე არ შეექმნებოდათ.

შილდას, საბუეს და სხვა სოფლებს ყვარელამდე შილდის ციხისათვის უნდა შეეფარებინათ თავი, ხოლო ყვარელს, გავაზსა და სანაგარდოს - ყვარლისათვის.

თიანეთს, ბუნებრივ-გეოგრაფიული პირობებიდან გამომდინარე, ფშავის მხარეს მრავლად ჰქონდა სახიზარი, ამიტომ ამ მხარეს დამატებითი თავდაცვითი ნაგებობების მშენებლობა არ იგეგმებოდა.

ბატონიშვილი თბილისსა და გორში საფორტიფიკაციო ნაგებობების დიდი რაოდენობით მშენებლობის ითვალისწინებს: „ტფილისის ქალაქს გაუახლდეს ციხე, გაამაგრონ შაიტახტი, მეღიქის სასახლესთან კლდის ძირის კოშკი, კოჯრის კარზედ გაკეთდეს კარგი დიდი კოშკი, აგრეთვე დიღმის კარზედ და წყლის კარზედ გალავანი გაუახლდეს. ავანაანთ ხევი ამოიწმინდოს და სხვა თხრილიც შეუერთდეს და ამას შიგნიდამ კიდე გაუკეთდეს ალიზის დაბალი გალავანი ჯებირად. მეტეხი გამაგრდეს კარგად. ავლაბრის ასავალს, დედოფლის სასახლის პირდაპირ, კირაკოზას ბაღთან, იმ კლდეზედ დაიდგას კარგი ბურჯი დიდი სანგარივით. ერთიც ქვაბისთავს დაიდგას ამგვარი ბურჯი. წინ კლდეზედ, სადაც ასავალია, გალავანი გაეგლოს. უკან მახათას მხარეს კარგი და დიდი თხრილი გაეგლოს.

სუპკარაპეტის ხევიდამ, სადაც მტკვარს დაჰყურებს ძველი თხრილი, იმას შემოუარონ, შიგნიდამ გაეგლოს გალავანი, გაუკეთდეს ხიდი სამსა თუ ოთხს ადგილს, ამასაც გაუკეთდეს სანგრები კოშკის სახედ და ესე იქმნების ფრიად მაგარი. აქ დაიხიზნებოდეს სომხით-საბარათოსშვილო, მარტყოფები, ნათლუდი, ავჭალა, დიღომი, მცხეთა, და მძეგვი და სხვა წვრილი სოფლები.

... გორს გარშემო შემოეგლოს დიდი და ღრმა თხრილი, შიგნიდამ ამოვიყვანოთ დიდი გალავანი, ორს-ორს ადგილზედ გაუკეთოთ დიდრონი ბურჯები სანგრად, გარედამაც ამოვიყვანოთ მიწის პირად კედელი და ესე ავაგსოთ ფშნების წყლით. ამ გალავანის კედლების გვერდზედ, გაუყოთ სახლების ად-

გილი თავადაზნაურთ, აგრეთვე გლეხთა სახიზრად, გაკეთდეს ზეითი ციხე, კიდე რაც აკლდეს და გაიწყოს ესეც ამ სახედ¹.

ბატონიშვილის გეგმის მიხედვით, მცხეთიდან გორამდე მტკვრის სანაპიროზე საჭირო ადგილებში გალავნები უნდა აშენებულიყო, ხოლო იქ, სადაც ბუნებრივი ზღუდეები ამის საშუალებას იძლეოდა და წყლის პირები იმგვარად უნდა დაფლატევილიყო, რომ კაცს ამოსვლა ვეღარ შეძლებოდა.

ასეთივე ბუნებრივი წინააღმდეგობანი უნდა შექმნილიყო მცხეთიდან არაგვის ხეობაში ანანურსა და ჟინვალის ხიდამდე. ეს ბუნებრივი ციხე-სიმაგრე თავისუფლად დაიტევდა ქართლის მთელი ვაკის მოსახლეობას თავისი საქონლით. მხოლოდ რამდენიმე ადგილას უნდა დაეტოვებინათ ფონი და გასასვლელი გზა. საჭიროების შემთხვევაში არაგვის ხეობა საზრდოს მოპოვების საშუალებასაც იძლეოდა, ადგილზე სამშენებლო ქვაც ბლომად მოიპოვებოდა და კირის გამოწვაც გაზაფხულიდან შემოდგომამდე სხვადასხვაგან შეიძლებოდა.

კაიშაურის კართან იგეგმებოდა ქალაქის აშენება. მასში სომხები უნდა ჩაესახლებინათ და ათი წლით გაეთარხნებინათ. ამ საქმეში მათთვის მუშა-კაცი უნდა დაეხმარებინათ. პროექტის მიზანი იყო ადგილობრივი მოსახლეობის მიერ „მთის კაცთან ვაჭრობის გამართვა“.

ქართლის დასავლეთ ნაწილში ძლიერ ნაგებობას წარმოადგენდა სურამის ციხე, რომელიც ახლომდებარე მოსახლეობას სააბაშიო-ქვეფინისხევის ჩათვლით შეეძლო სახიზრად გამოეყენებინა.

იოანე ბაგრატიონი არა მარტო ქვეყნის გეოგრაფიის კარგ ცოდნას ამჟღავნებს, არამედ საფორტიფიკაციო ნაგებობების მშენებლობაშიც ღრმად განსწავლული ჩანს, მაგრამ იმ დროინდელ საქართველოში არსებული სოციალ-პოლიტიკური და ეკონომიკური ვითარებიდან გამომდინარე, ამ პროექტის განხორციელება პრაქტიკულად შეუძლებელი იყო.

მაგ. როდესაც ერეკლემ მეტეხელებს დაზიანებული ციხის აღდგენა მოსთხოვა, მაშინვე თავის „უილაჯობაზე“ შესჩივლეს: „მოგესხენებათ ჩუჴნი ცხოვრება, რომ თუ არ დაჭირება, თორემ აქ მართებული კაცი ვინ დადგება და ან ვინა დგას, თითო საქათმესა გავს, ქოხებში ვყრივართ, დღიურად ვრჩებით, მწარედ უილაჯონი და გლახები. ახლა ოქმი გიბძანებია, რომ მეტეხის ციხის ზეით კედელია გადაქცეული, მეტეხელებმა უნდა ა[ა]გონო. ჩემო ხელმწიფე იმას ორმოც-სამოცი თუმანი ვერ არგებს და ჩუჴნ სულ დავიყიდნეთ, ორმოც

¹ იოანე ბაგრატიონი. სჯულდება, გვ. 51-54.

თუმანს არავინ მოგუცემს, წყალში თუ ჩაგცუივით, თორემ ამის შეძლება ვისა გუაქუს. ღ“თი გაგიმარჯუებს და გაცოცხლებს, ამის უსამართლოს ნუ გუიზამთ, ჩუჭნი ცხოვრება მოიხსენე და ისე გუიბძანე. ღ“თი შეილებს გიცოცხლებსთო“.¹

მოსახლეობის უსახსრობა მათი ვალდებულებების შეუსრულებლობასაც იწვევდა. გორის ციხის მინბაში – დიმიტრი დიასამიძე 1794 წლის 10 იანვარს ერეკლესთან ჩიოდა: „...გორის ციხის დებულება სალბაში და თითო-ოროლა დერი შეშა არის ურემზედ, რომ მეციხოვნე ცეცხლს აინთებს და იცხოვრებს, აღარც გორელები მაძლევენ შეშას, აღარც სალბაშს ქარელელნი და მეტეხელებიო“. ერეკლე იძულებული გამხდარა ურჩ მოსახლეობას იასაულებით დამუქრებოდა.²

1780 წელს თუმანიშვილები და მათი გლეხები ერეკლესთან ჩიოდნენ, რომ თავდაცვითი ნაგებობის გარეშე დარჩნენ, მეზობლებმაც ბედის ანაბარად მიატოვეს და სანაცვლო დახმარებას ითხოვდნენ: „...მერმე ამას მო[გახსენებთ] რომ ამდენი სული ასე უსიმაგროვოთ ვყრივართ. [ცოტა რამ] ვიცოდვილეთ, გავაკეთეთ. ნახევარი ხალხი აიყ[არა] აღარავინ დაგრჩით. აღარ შეგვიძლია მარტოკა გა[კეთება]. ამ მოწყალეობას ვითხოვთ: ჩვენც მრავალს კაცს დაგხმარებივართ ურმითაც, გუთნითაც, მუშითაც და სხვანიც მოგვეკმარნენ. ნახევარზედ გაკეთებული გვაქვს და ვეღარ შევიძელით თორემ თავს არ შეგაწყენდით ქართლისა შესამატისნი ვართ, მუდამ შინ გვიდგანან ჯარათ თუ მგზავრათა, ჩვენც თითო ოროლა დღეს მოგვეკმარნენ, თუ არავინ მოგვეკმარებიან, დღეს იქით აღარცავის ჩვენ მივეკმარებით. ამდენის სულის ქრისტიანის მადლი გეყოფათ, ჩვენო მოწყალევი რომ ერთი სიმაგრე რამ გაგვიკეთდესო“.³

საფორტიფიკაციო ნაგებობების მშენებლობა-განახლების თვალსაზრისით ერეკლე II-ის თავდაუზოგავი შრომის მიუხედავად, ციხე-კოშკები და გალავნები, უკეთეს შემთხვევაში მხოლოდ მოსახლეობის თავდაცვას უზრუნველყოფდნენ, ამიტომ „ლეკიანობის“ წარმოშობის მიზეზებს ვერ სპობდნენ.

¹ საქართველოს სიძველენი, ტ. III, გვ. 50, ლოკ. 65.

² ქართული სამართლის ძეგლები, ტ. VIII, გვ. 253, ლოკ. 241.

³ ვსიებ, 7782/4, ფ. 385.

თავი IV. ლეკიანობის შედეგები და ღონისძიებები მდგომარეობის სტაბილიზების მიზნით

ლეკთა ასწლიანმა გამუდმებულმა თარეშმა ქვეყანას ძალზე მძიმე შედეგები მოუტანა. როგორც ალექსანდრე ყიფშიძე (ფრონელი) წერდა: „მთელი მეთვრამეტე საუკუნე ისე დასრულდა, რომ ერთი დღე ბედნიერი არ უნახავს ლეკთაგან ქართველობას. რუსობა რომ დაბინავდა ჩვენში, მაშინაც კი თავზე ხელადებულნი ბრბონი დაღესტნისა თამამად დათარეშობდნენ ქართლ-კახეთის ველ-მინდორზე და ხშირად იმერეთსაც კი უწევდნენ ხოლმე“.¹

შუა საუკუნეების საქართველოში მტრის გამუდმებული შემოსევებისაგან აოხრებულ-გავერანებულ და მოსახლეობისაგან დაცლილი ტერიტორიების აღმნიშვნელ ტერმინებს: „ნასოფლარი“, „ნაფუძვარი“, „პარტახტი“, XVIII საუკუნეში – „ნალეკარი“ დაემატა. იგი ერთდროულად გულისხმობდა არა მარტო დაცლილ-გავერანებულ ადგილს, არამედ მოსახლეობის იმ ნაწილსაც, რომელთაც ლეკთაგან ტყვეობის სიმწარე გამოეცადათ. 1783 წლის ერთ საბუთში ნათქვამია: „ეს კაცი, ოსიაური რომ წახდა ლეკისგან და წავიდა, ქიტეს ნალეკარმა მოიყვანა ამ მხარეს“.²

საგულისხმოა, რომ ქართულ მეტყველებაში ბუნებრივი სტიქიის, წარღვნის აღმნიშვნელი სიტყვა – „წალეკილი“, სწორედ ლეკთა გამუდმებული ძარცვა-თარეშის სინონიმად დამკვიდრდა. როგორც რაინეგსი გადმოგვცემს, ქართველი კაცი ამბობდა: „ლეკების ფეხქვეშ ბალახიც კი ხმება და ჭკნება და მხოლოდ შვიდი წლის შემდეგ ამოდისო“.³ იმდროინდელ დოკუმენტებში ხშირად ვხვდებით ფრაზას: „ანანური რომ ლეკისაგან დაიწვა და მისი ხალხი დატყვევდა“,⁴ სხვაგან ვკითხულობთ: „ავი დროისაგან რომ ის სოფელი აიყარა“,⁵ „როდესაც წუღრუდაშენი დაიცალა“,⁶ „სკრა რომ დაიცალა“,⁷ „ავის დროს მიზეზით ეს ვანქის მამული დიდხანს გახარაბებული იყო, ერთიმეორის მამული არ გაირჩეოდა“,⁸ „ლეკიანობა რომ შეიქმნა, იქიდან დავიფანტენით“⁹ და სხვ.

¹ ალექსანდრე ფრონელი. მთის არწივი შამილი, ტფ., 1914. გვ. 12-13.

² ქართული სამართლის ძეგლები, ტ. V, გვ. 204, დოკ. 122.

³ იაკობ რაინეგსი. მოგზაურობა საქართველოში. გვ. 194-195.

⁴ ქართული სამართლის ძეგლები, ტ. IV, გვ. 637, დოკ. 496.

⁵ ქართული სამართლის ძეგლები, ტ. IV, გვ. 670-671, დოკ. 519.

⁶ ქართული სამართლის ძეგლები, ტ. V, გვ. 74, დოკ. 43.

⁷ ქართული სამართლის ძეგლები, ტ. IV, გვ. 567, დოკ. 445.

⁸ ქართული სამართლის ძეგლები, ტ. V, გვ. 175, დოკ. 103.

⁹ ქართული სამართლის ძეგლები, ტ. VI, გვ. 354, დოკ. 181.

საუკუნოვანი ძარცვა-რბევის ფონზე, ლეკთა შემოსევების ინტენსივობა პერიოდულად იზრდებოდა და სისტემატიურ ხასიათს იღებდა XVIII ს. 50-იან, 80-იან, 90-იან წლებში, XIX ს. პირველ ათწლეულში. რამდენად მძიმე იყო ეს მოვლენა ქართლ-კახეთისათვის, ჩანს იმდროინდელი უამრავი საბუთიდან, იქნება ეს პირადი თუ სახელმწიფოებრივი მნიშვნელობის მქონე. ოთარ თუმანიშვილი, რომელიც დეტალურად აღწერდა ლეკთა შემოსევებს XVIII ს.50-იან წლებში, წერდა: „ქართლში ქურდის ლეკისაგან დიდი ძალა ჭირს. თუ დიდი ჯარი გამოვა, პირდაპირ შეებმიან და ქართველები აჯობებენ, თუ არ, ქურდობით ძალას შერებიან. ჩნდ მკათათვის ლ ჩნე მკათათვის გასვლამდის (30/VII-1754 წ. – 30/VII-1755 წ.) რომ ჩემის შეტყობით დატყვევებულია და მოუკლავთ კაცი-ქალით შვიდას-რვაასამდის, აგრეთვე ლეკი, რომ თვითონ უთქვამთ, ექვსას-შვიდასამდის, მაგრამ მეტს იტყვიან ხოლმე“.¹

აღბათ მკითხველისათვის ინტერესმოკლებული არ იქნება, მისი მრავალრიცხოვანი მოხსენებითი ბარათებიდან ერთ-ერთი ფრაგმენტის მოტანა, რათა რეალურად გავაცნობიეროთ „ლეკიანობის“ სახე, შინაარსი და მასშტაბები: „...ავისტოს ერთს (1754 წ. – ი.ა.) სოფელ მწყნეთში – მოკლეს თუ დაატყვევეს სული ორმოცი, პირუტყვი სულ წაიყვანეს; ავისტოს ათს რუისიდან, სურამიდან ტყვე შვიდი, რამთონიმე პირუტყვი; ავისტოს თოთხმეტს ბეყამიდან ტყვე ოცამდინ; ავისტოს ოცდაერთს წავკისიდან ტყვე ხუთი, მოკლეს ხუთი; ავისტოს ოცდასამს ვერეს მოუხდენ, მეფე ერეკლე გაბძანდა ლეკები გაიქცენ, ავისტოს ოცდაათს სხალტბას სოფელს მოუხდენ, მოკლეს თუ წაიყვანეს ტყვე თოთხმეტი; სეკდემბრის სამს ტაბახმელადამ წაიყვანეს ტყვე ორი, მოკლეს ოთხი, ამავე დღეს ოთხი ტივი წახდინეს ფქვილით და ქერით სავსე; სეკდემბრის ექვს კიდევ მწყნეთიდან ტყვე სამი; სეკდემბრის თორმეტს დიღმიდან ტყვე ერთი, ვერედამ ტყვე ორი, ამავე დღეს ხოვლეადამ წაეყვანათ ტყვე, თუ მოეკლათ თოთხმეტი; სეკდემბრის თექვსმეტს წავკისიდან ტყვე ერთი, მოხისიდან ტყვე ორი, გუთნეული შებშული ორი; სეკდემბრის ოცს სავალისშილოში მოეკლათ ლეკი ხუთი, ქართველი დაჭრილიყო სამი; სეკდემბრის ოცდა ხუთს ხაშმზედ ქარავანი წაეხდინათ, იმავე დღეს ყოჩაქილისას მიუხდენ, წაიყვანეს ტყვე ხუთი, მოკლეს ლეკი ერთი, სეკდემბრის ოცდაექვსს მცხეთას და ავჭალას მიუხდენ, ცოტა რამ პირუტყვი წაეყვანათ; სეკდემბრის ოცდაშვიდს ბოლნის მოეკლათ ერთი ლეკი. ოქტომბრის ერთს საბაშიოს ნუნიდან წაეყვანათ ტყვე ოცამ-

¹ ნიკოლოზ ბერძენიშვილი. საქართველოს ისტორიის საკითხები, ტ. VI, გვ. 376-377.

დინ, კიდევ საბაშვილოდამ ამ წელს წაეყვანათ ტყვე ორმოცამდის, იმავე დღეს წაეყვანათ სოღალუხიდამ ტყვე შვიდი, მოეკლათ ორი, ჯორი წაეყვანათ ოცამდის, თელათ გორის ნახირი წაეღოთ; ოკდობრის სამს ბოლნისის გზაზედ შებმული ურემი ორი, ტყვე ორი; ოქტობრის ხუთს გორიდამ წაეყვანათ შებმული გუთნეული ერთი, ცხენი ოცამდის, ტყვე ერთი, ოქტობრის შვიდს კალოუბნიდამ მონასტრიდამ მოეკლათ კაცი ხუთი, ტყვე წაეყვანათ სამი; ოქტობრის ათს წისქვილებიდამ წაეყვანათ ტყვე ოთხი, მოეკლათ ლეკი ერთი, ამავე დღეს საფალავანდისშვილოდამ წაეყვანათ ტყვე ოცამდის...“¹ და სხვ.

თუ 1754 წლის „ლეკიანობის“ 6 თვიან თუმანიშვილისეულ ქრონიკას ცხრილის სახით წარმოვიდგენთ, შემდეგ სურათს მივიღებთ:

დასახლებული პუნქტი, რომელსაც ლეკები დაეცნენ	თარიღი 1754 წ.	მოკლულთა რაოდენობა	ტყვედ-წაყვანილთა რაოდენობა	გატაცებული საქონლის რ-ბა	შენიშვნა
ხიდისთავი	13.06	10			
ღირბი	18.06		40		
დუშეთი	12.08		დაუკონკრეტებელია		
წყნეთი	01.08		40		
რუისი	10.08		7	დაუკონკრეტებ.	
ბეკამი	14.08		20		
მჭადიჯვარი	19.08	460 (ლეკი)			
წავკისი	21.08	5	5		
ვერე	23.08				
სხალტბა	30.08		14		
ტაბახმელა	03.09	4	2		წაიღეს 4 ტივი ფქვილითა და ქერით დატვირთული
წყნეთი	06.09		3		
დიღომი	12.09		1		
ვერე	12.09		2		
ხოვლე	12.09		14		
წავკისი	16.09		1		
მოხისი	16.09		2	2 შებმული ურემი	
საავალიშვილო	20.09	5 (ლეკი)			3 ქართველი დაჭრეს
ხაშმი	25.09			გაიტაცეს ქარაგანი	
ყონაქილისა	25.09	1 (ლეკი)	5		
მცხეთა და აუჭალა	26.09			დაუკონკრეტებელი	
ბოლნისი	27.09	1 (ლეკი)			
ნუნისი	01.10		20		
სააბაშიშვილო	01.10		40		

¹ იასე ცინცაძე. კაპიტან ოთარ თუმანოვის მოხსენებითი ბარათები, გვ. 17-18, დოკ. 7.

სოდანლუდი	01.10	2	7	20 ჯორი	
თელათგორი	01.10			ნახირი (დაუკონ.)	
ბოლნისი	03.10		2	2 შებმუ- ლი ურემი	
გორი	05.10		1	20 ცხენი	
კალოუბანი	07.10	5	3		
წისქვილებიდან (?)	07.10	1 (ლეკი)	4		
საფალავანდიშ- ვილოდან	10.10		20		
საგარეჯო	10.10	21(ლეკი)	60		
მანავი		5 (ლეკი)			
ქიზიყი		2	2	6 გუთნეული	
შილდა		3	4		
ქისტაური		1			
კუმისი	13.10	1 (ლეკი)	4	500 ცხვარი	
კუმისი	15.10		9		
ქერე	16.10	3 (ლეკი)			
წენეთი	20.10		4		
აგჭალა	25.10		3	შებმული ურ- მები	
კოდა			2	შებმული ურ- მები	
თბილისი	28.10		3		
თბილისი	30.10		4		
თბილისი	31.10	2	5	40 ჯორი	
ბოლნისი	01.11			40 ხარი	
დაუკონკრეტე- ბელია	05.11		9		
არაგვისპირი	05.11		11		
მარნეული	17.12		4		
თხილოვანის გზიდან	26.12		3		
ვაყა	29.12		11		

ზემოთ მოტანილი ცხრილიდანაც ნათლად ჩანს, რომ ქართველ კაცს მოსვენება არ ჰქონდა ლეკისაგან. ამ მოვლენის თანამედროვე ისტორიკოსის - პაპუნა ორბელიანის თქმით: „ზამთარ და ზაფხულ ჩამოდგის და აოკრებდის (ლეკები – ი.ა.) უმეტეს ქართლსა“.¹

ცნობილი გერმანელი მეცნიერი იოჰან გიულდენშტედტი, რომელმაც 1770-72 წლებში საქართველოში მოგზაურობისას უშუალო თვითმხილველი იყო დაღესტნელთა გაუთავებელი თარეშით გამოწვეული ვითარებისა, აქედან წასვლის შემდეგ აღნიშნავდა: „...სწორედ ისინი არიან (ლეკები – ი.ა.), რომ დაარბიეს კახეთი და ქართლი და ახლაც განაგრძობენ რბევას, უმეტესად თავისი

¹ პაპუნა ორბელიანი. ამბავნი ქართლისანი, გვ. 226.

მიდრეკილებისა და ყაჩაღური გამორჩენის გამო და ნაწილობრივ თურქთა წახალისებით“.¹

ვითარება გამწვავდა 80-იან წლებშიც, განსაკუთრებით გეორგიევსკის ტრაქტატის შემდეგ, სამ წელიწადს გრძელდებოდა ლეკთა წვრილ-წვრილი თარეში, ხოლო ომარ-ხანის შემოსევამ ქვეყანა გაუსაძლის მდგომარეობაში ჩააგდო. როგორც ამ დროს საქართველოში მოღვაწე რუსი დიდ-მოხელე ბურნაშოვი წერს: „ლეკთა გამუდმებული და ქურდული თავდასხმებისაგან გზები – გაუვალი, ხოლო მიწათმოქმედება სახიფათო გახდა და სოფლები დაცარიელდა“.² „თესვა და მოსავლის აღება მოითხოვს ყოველთვის ძლიერ დაცვას შეიარაღებული მამაკაცებისას და ფრთხილ გუშაგებს, რათა ლეკებმა არავითარი ზიანი არ მიაყენონ, ანდა მცველები და გუშაგები თან არ გაიტაცონო“³, – აფასებდა XVIII ს. 80-იან წლებში ქართლ-კახეთში შექმნილ ვითარებას იაკობ რაინეგსი.

სიტუაცია სასიკეთოდ არ შეცვლილა აღნიშნული საუკუნის ბოლო ათწლეულში. ნ. დუბროვინის ცნობით: „...საქართველო მაშინ იმყოფებოდა უნუგეშო მდგომარეობაში და არავის შეეძლო თავდებად დასდგომოდა საკუთარ სიცოცხლესა და უშიშროებას. დედაქალაქის გარშემო დაძვრონენ ლეკ-მტაცებელთა ჯგუფები, ძარცვავენ და იკლებდნენ სოფლებს, დაწყებული 1789 წლიდან ქართველებს სიმშვიდე არ უნახავთო“.⁴ ერეკლემ უშიშროების მიზლკეთა რაზმები დაიქირავა, რომლის რჩენა მოსახლეობის ყველა ფენას დააწვა კისერზე.

XVIII ს. 80-იან წლებში მეფის ყოველწლიურ გასაგალს უკვე 50-60 ათასი მანეთისათვის მიუღწევია. მხოლოდ სამი წლის განმავლობაში (1782-1785 წ.წ.) ლეკთა დაქირავებული რაზმებისათვის ქართლ-კახეთის მეფეს, საჩუქრებს გარდა, გადაუხდია ჯერ 100 ათასი, შემდეგ 110 ათასი მანეთი.⁵ დაქირავებული ლეკების გასასტუმრებელი ხარჯის დასაფარავად სამეფო კარი ხშირად კერძო

¹ *გიულდენშტედტის მოგზაურობა საქართველოში*, ტ. II, გვ. 81.

² **С. Бурнашев.** Картина Грузии или описание политического состоянія царств Карталинского и Кахетинского. Тифл., 1896, გვ. 13.

³ **იაკობ რაინეგსი.** მოგზაურობა საქართველოში, გვ. 167.

⁴ **Н. Дубровин.** История войны..., III, გვ. 28-29. გაუგებარია რატომ მიანიშნებს დუბროვინი მაინცდამაინც 1789 წელს. რეალურად 1787 წლიდან რუსეთ-თურქეთის ომის დაწყებისა და საქართველოდან რუსის ჯარის გაყვანის გამო, ქართლ-კახეთში ლეკთა შემოსევები მნიშვნელოვნად შემცირდა და მხოლოდ მას შემდეგ განახლდა, რაც თურქეთის დამარცხების შემდეგ რუსის ჯარი კვლავ დაბრუნდა საქართველოში.

⁵ **Н. Дубровин.** История войны..., III, გვ. 42-43.

პირებისაგან იღებდა ვალს გადახდის უქვევლი გარანტიით. 1799 წლის 6 აპრილს გიორგი XII იოანე ბეგთაბეგიშვილს პირობის წიგნს აძლევს: „ჩვენ მეფემ გიორგიმ გიბოძეთ ეს წიგნი შენ, ბეგთაბეგიშვილს მდივანს იოანეს და შენს ძმის წულს სოლომონს, ასე რომ ჩვენ ჯარი მოვიყვანეთ ლეკისა და იმის მისაცემლად დაგეჭირდა. შენ გამოგართვი ათას ორას სამოცდაოთხი ბაჯადლოს ოქრო და სამი ათასი ადით მიშლული. ეს ჩვენ დავხარჯეთ და ხათრი ჯამი იყავ, შენ იმას არ დაგიკარგავთ და საიდამაც იქნება შეგისრულებთო“.¹

სამეფო კარი იძულებული გახდა, სპეციალური გადასახადი „სალეკო“ შემოიღო. 1786 წ. იანვრის სალეკო ხარჯის გამოსაღების მიხედვით, ქართლში 25 კომლს მთლიანობაში 124 მანეთი და 1 აბაზი უნდა გადაეხადა.² 1799 წ. 28 მარტის სულხან თუმანიშვილის მიერ ძმის – მანუჩარ მდივნისადმი მიწერილი ერთი წერილიდან ვიგებთ, რომ „გატეხილ ხიდს აქეთ ელებს ათასი თუმანი სალეკო შესწერდათ“.³ თვით თუმანიშვილები 1799 წელს ლეკთა ჯარისათვის მისაცემი ფულის შოვნის მიზნით გიორგი XII-ს ბრძანებით აიკლეს. ამ ფულის გაღებაზე ისინი მხოლოდ პატიმრობისა და შერისხვის შემდეგ დასთანხმდნენ, 600 თუმანი ივალეს და გიორგი XII-ს გადასცეს.⁴

ფინანსურის გარდა, გადასახადი არსებობდა ნატურითაც. 1791 წლის 1 ივნისს იოანე სახლთუხუცესი გორის მამასახლისს ატყობინებდა: „ქ. გორის მამასახლისო. ლეკის ჯარს ორმოცს კაცს გ (=3 – ი.ა.) დღისა ცხრა ლიტრა ყველი მიეციო“.⁵ 1796 წლის 8 ივლისს ერეკლე მოლარეთუხუცეს – ნაიბ კაკალოს ავალებდა ლეკებისათვის 8 თუნგი არაყისა და ერთი ფარჩა ქსოვილის მიცემას⁶ და ა. შ.

მოსახლეობა, რომელიც საკუთარი ძალებით უზრუნველყოფდა ლეკების გადმოსასვლელი გზა-ბილიკების დაცვას, გადასახადებიდან თავისუფლდებოდა. 1798 წლის 24 მარტს ახლად გამეფებული გიორგი XII მოხელეებსა და ერთობით ავჭალელებს ერთი წლით საქვეყნო ხარჯ-გამოსაღებისგან ათავისუფლებს, იმ პირობით, რომ ლეკების „მისავალ-მოსავალზედ“ თვალყურიანად იყ-

¹ გორის სახელმწიფო ისტორიულ-ეთნოგრაფიული მუზეუმი (გსიემ), 7648, ნაწილი 6, გვ. 603.

² ხელნაწერთა ეროვნული ცენტრი. ფ. AD, – საბ. 907.

³ მამისა ბერძნიშვილი. მასალები XVIII საუკუნის ბოლო წლების საქართველოს ისტორიიდან (ეპისტოლარული მასალა). – ქართული წყაროთმცოდნეობა, ტ. I, თბ., 1965, გვ. 181.

⁴ მამისა ბერძნიშვილი. მასალები XVIII საუკუნის ბოლო წლების..., ტ. I, გვ. 123.

⁵ სახელმწიფო საისტორიო არქივი, ფ. 1448; ს. 4657.

⁶ ხელნაწერთა ეროვნული ცენტრი, ფ. HD – საბ. 11909.

ენენ და საკუთარი მხარე „ბეჯითის გარჯით კარგად და მაგრად“ შეენახათ.¹

დაქირავებული ლეკების შესანახად ხარჯის გასტუმრებას, ქართლ-კახეთის სამეფო კარს ერთგვარ „შელავათს“ ყმადნაფიცი ქვეყნები აძლევდნენ. 1784 წლის 16 დეკემბერს ერეკლე მინბაშ დავით საამიშვილს სწერდა, შემორიგებული ლეკებისათვის ათი დღის უღუფა ყაზახიდან გაერიგებინა და ათი დღის – შამშადილიდან². როგორც ზემოთ ვნახეთ, გატეხილი ხიდის ელები „სალეკოს“ ათას თუმანს იხდიდნენ და სხვ.

მდგომარეობა განსაკუთრებით მას შემდეგ დამძიმდა, რაც „სალეკო“ ხარჯს „სარუსოც“ დაემატა. ერეკლე ქვრივ-ობლების მდგომარეობას ითვალისწინებს, მაგრამ მოსახლეობის სხვა კატეგორიისადმი შეუვალია და მოხელეებს სთხოვს გამონაკლისები არ დაუშვან. 1783 წლის 25 ივლისს მეფე თეიმურაზ ჯავახიშვილს სწერს: „ქ. ჩვენი ბძანება არის ჯავახიშვილო თეიმურაზ, მერმე ამ სიით ეს საქვეყნო რასაც შესწერდებოდეს ეს ასე უკლებლად გაარიგებინე თეთრი და ფქვილი მოატანინე და თავ-თავის ალაგას მიაბარებინე, ეს სრულად უნდა აიღო, ამის დაკლება არ იქნება, არ დააგვიანო, ამაში ქვრივსა, ობოლსა, აყრილსა და ამოწყვეტილს გამოვსულვართ, ეს მთლად უნდა აიღო და მოაბარო. ამაში არც შემოხვეწა იქნება, არც შუამავლის შემოყენება, ესლა [რუსებზე] ათას ხუთასი თუმანი მეტი დაგვხარჯვია, მიბდალი ლეკი ახლაც შინ გვიდგას და ხარჯი გვაქვსო“³.

დოკუმენტში ჩამოთვლილია საციციანოს მხარის (შიდა ქართლის) სოფლები და თითოეულ მათგანზე გაწერილია, როგორც ფულადი, ისე ნატურით (ფქვილით) გადასახადი, რის ჯამი მთლიანობაში „სამოცდაერთ თუმანსა და რვა მინალთუნს“, ხოლო ფქვილით – ექვსას თვრამეტ კოდს⁴ (დაახლ. 40293 კგ-ს) შეადგენს.

ერეკლეს გარდაცვალების შემდეგ (1798 წ.) ვითარება კიდევ უფრო დამძიმდა. დაქირავებულთა ხელფასის გასტუმრება იმდენად მძიმე ტვირთი იყო, რომ მისი ამოღება მოსახლეობისაგან მხოლოდ იძულების წესით ხდებოდა, ამიტომ მეფეს ხშირად უწევდა მოხელეთათვის უფლება-მოვალეობების „შესენება“. 1799 წ. 1 აპრილს გიორგი XII დარჩია მელიქს ერეკლეს დროს დადგენილ „განწესებას“ ახსენებს და მოუწოდებს, სალეკო ხარჯი კანონის მიხედ-

¹ ვსიემ, 7648, ნაწილი 6, № 63, გვ. 591.

² ხელნაწერთა ეროვნული ცენტრი, ფ. HD – საბ. 1146.

³ ვსიემ, 8375, ნაწილი 5, № 63, გვ. 343.

⁴ ვსიემ, 8375, ნაწილი 5, № 63, გვ. 343.

ვით გაანაწილოს: „რასაც ლეკის ჯარს ვისტუმრებთ და იმათ ჯამაგირად ექ-
ლევათ რაც სათაო არის და იღებთ, როგორც კურთხეულის ბატონის მამის
ჩვენის დროს იყო განწესებული მემანდრებისა, მდივნისა, მოლარეთხუცისა თუ
მემბაშებისა, ყველას თავთავისი წილი ისე უნდა მიეცეს. ჩვენი სარქრისა
რომელიც არის ის წილი კვეზერელს დავითს უნდა მიბარდეს, რაც აღებულია
ან ამას იქით აიღება, კაკალა მემბაშს უნდა მიბარდეს და მასუკან ისე უნდა
გაჰყონ და თავთავისი წილი ისე მიეცეს“.¹

კიდევ უფრო მძიმე და შეურაცხყოფელი იყო ლეკთა ბელადებისათვის
სახუქრების გასტუმრება. 1800 წლის 3 აპრილს გიორგი მეფე ზემოთ ნახსენებ
კაკალო ბახაზბაშს ლეკებისათვის 5 ლეინის (ქსოვილი) მიცემას ავალებდა.²

საქართველოში ყოფნისას ლეკები ჩვეულებას არ ღალატობდნენ და ძარ-
ცვა-რბევას არ იშლიდნენ. ამ ფაქტის გამო, ქვეყანაში ვაჭრობა მნიშვნელოვ-
ნად შემცირდა, რამაც საგრძნობლად გააძვირა ფასები პროდუქტზე. იოანე
ქართველიშვილი „მემუარებში“ წერდა: „...ქართლში ყოველს სოფელში ლეკის
ჯარი იყო დარიგებული მეფის გიორგისაგან ...წელიწადსა 1799, გაზაფხულს
შეკრიბა კუალადვე ლეკის ჯარი ქალაქში მეფემან და ზაფხულიცა იგი დაყ-
ვეს მუნ. მოკრიფა ქართლსა და კახეთსა შინა ჯამაგირი მათი და გაისტუმრა
ევრეთ; მაგრამ ასეთსა შეწუხებასა შინა იყო ქალაქი ტფილისი ლეკთა ჯარის
მუნ ყოფნაში, რომ ვინც იმ დროს იმათ ყოფნას არ დაესწრა, დაწერილს არც
კი დაიჯერებს. ...აღებ-მიცემობა და დუქნის გაღება ხომ სულ აღარ ყოფილა,
სანამ ლეკის ჯარი ქალაქში იყო და სხვას რამდენს უჯეროს საქმეებს შვრე-
ბოდნენ, დადუმება სჯობს“.³

თბილისში ლეკების თავგასულობა, ნარატიულის გარდა, დოკუმენტური
წყაროებითაც დასტურდება. 1799 წ. 4 აპრილს გიორგი XII თომა მეღვინეთხუ-
ცესისშვილს სწერს: „მეღვინეთ ხუცესშვილო მემანდარბაშო თომაჲ, აბანოებს
ლეკნი დიდათ თურმე ძალას ატანენ. ორი ლეკი გამოარჩიეთ, დააყენეთ, რომ
ძალა აღარ აქნევიონ რა“.⁴ მდგომარეობას კიდევ უფრო ართულებდა ის ფაქ-
ტი, რომ გიორგი XII-ის წინააღმდეგ მისი ნახევარძმებიც ლეკებს ქირაობდნენ.
მაგ. სურამში გამაგრებული ფარნაოზ ბატონიშვილი: „შეიგროებდა ჯარსა და

¹ ხელნაწერთა ეროვნული ცენტრი, ფ. HD – საბ. 14499.

² ხელნაწერთა ეროვნული ცენტრი, ფ. HD – საბ. 11706.

³ იოანე ქართველიშვილის მემუარები, გვ. 80.

⁴ სახელმწიფო საისტორიო არქივი. ფ. 1449. ს. 879.

ლეკთაცა მიიწოდებდა ახალციხის მხარეთაგან¹. ძმათა შორის შუღლი და დაპირისპირება ისედაც სუსტ სახელმწიფოს, კიდევ უფრო ანაწევრებდა და მომრავლებული მტრების პირობებში წინააღმდეგობის უნარს აკარგვინებდა. სამაგიეროდ, ნედლეულით მწირ და ეკონომიკურად სუსტ მეზობელ დაღესტანს, რომლის „ცხოვრების წესი“ ძარცვა-რბევა და ნადავლი იყო, საქართველოში შექმნილი ვითარება „სულის მოთქმის“ საშუალებას აძლევდა.

როდესაც სამეფო კარს ასეთ დღეში ვხედავთ, ადვილი წარმოსადგენია უბრალო მოსახლეობის მდგომარეობა. ამას ქვემოთ მოტანილი რამდენიმე დოკუმენტიც ცხადყოფს:

1731 წელს ბესარიონ გაბაშვილი სახლთუხუცეს ამილბარ მაღალაძეს სწერდა: „გომი ლეკმა და ოსმაღმა ააოხრა და ლეკმა გზა იმაზე დაიჭირა და გლეხი ვეღარ დასახლდაო“². 1738 წ. 6 მარტს იასე თუალაშვილი სახლთუხუცეს გივი ჩოლოყაშვილს შესწიოდა: „თქვენგნით რომ ხუთი თუმანი თეთრი ავიღე და ქალაქს წაველ სავაჭროთ, დამხდენ ლოჭინზედ, დამიჭირეს, თეთრიც ლეკებმა წაიღეს და მეც დამიჭირეს და წამიყვანეს, ორი კვირა ბელაქანს ვყავდი, მას უკან დაღისტანში წამიყვანეს. იალაღიდა[ნ] გამოვეპარე და მოველიო“³.

1751 წლის აპრილში ერთაწმინდელი ივანე ხახანაშვილი იოანე მდივანბეგთან ჩივის: „ამას მოგახსენებთ: მამაჩემ[მა] ფარეშიშვილის თევდორასაგან ნახევარი საწისქვილო იყიდა. მამაჩემი ლეკებმა მოკლეს, ს[ა]ხლით და კარით აიკლეს, წიგნებიც იქ დაიკარგაო“⁴.

უსასოდ დარჩენილი ზაალ დავითაშვილი 1761 წელს ერეკლე II-ს გადასახადებიდან გათავისუფლებას სთხოვს: „ხომ მოგეხსენება, ჩვენს მამულში ცეცხლი აღარ ანთია, აღარც ყმა დაგ[ვ]რჩომია, რაც ლეკს მაურჩა, დაიფანტნენო“⁵.

1762 წ. 1 სექტემბერს გორჯასპი მდივანი ერეკლეს უიმედო ვითარებას აუწყებს: „ჩემი ყმა გარეჯვრელი სულთანასშვილი ნასყიდა ლეკებმა ცხვარში მოკლეს. იმის მწყემსობაში ცოლი ქვრივი დარჩომოდა, ცოლიც გათხოვებულა, არც საქვრივო მომცემია და თუ რამ იქილამ გამოყვა ჩემს კაცს, ისიც მეკარგება და რაც ცხვარი ერგებოდა არც ისი ჩანს“⁶.

იყო შემთხვევები, როდესაც ტყვეობა იმდენ ხანს გრძელდებოდა, რომ ად-

¹ პლატონ იოსელიანი. ცხოვრება გიორგი მეცამეტისა, გვ. 59.

² დარეჯან მეგრელაძე. აღმოსავლეთ საქართველო XVIII ს. პირველ ნახევარში, გვ. 439-440.

³ დოკუმენტები საქართველოს სოციალური ისტორიიდან. ტ. I., გვ. 277; დოკ. № 395.

⁴ ქართული სამართლის ძეგლები, ტ. VII, თბ., 1981. გვ. 28; დოკ. №20.

⁵ ქართული სამართლის ძეგლები, ტ. VII, გვ. 43; დოკ. № 40; გვ. 60-61; დოკ. 49.

⁶ ქართული სამართლის ძეგლები, ტ. VII, გვ. 65; დოკ. № 54.

გილზე დაოჯახებასაც ასწრებდნენ. თრიალელი ბასილა ზეიგიძე ტყვედ 6 წლის ასაკში წაუყვანიათ და ყირიმში გაუყიდათ. ტყვეობაში ბასილას ცოლიც შეურთავს და შვილებიც შესძენია. მოგვიანებით, ზეიგიძეები სამშობლოში დაბრუნებულან, მაგრამ უსახსრობის გამო, ბასილას დიდმეღ იოანე დოღენჯაშვილისაგან ვალი აუღია, რომელიც ვეღარ გადაუხდია და იძულებული გამხდარა დოღენჯაშვილს ყმად დასდგომოდა.¹

მარტყოფელი აბრამა კუპრაძე ტყვეობაში თვრამეტ წელიწადს იყო,² რუსელი ბუზიაშვილი ფარემუზა – ოც წელს,³ ლარაძე დათუნა – ოცდათხუთმეტ წელს.⁴ ილია ორბელიანს შამილთან ტყვეობისას (1842 წ.) უნახავს ქართველი ქალი, რომელიც 15 წლის წინათ გაუტაციათ ლეკებს და იქ ცოლად შეურთავთ ასევე დარუბანდიდან 46 წლის წინ გამოქცეული რუსისათვის.⁵

უმძიმესი იყო ტყვედწაყვანილთა მდგომარეობაც. ისინი ბორკილდადებულნი ღრმა ხარობებში ჰყავდათ დამწყვდეული და მხოლოდ იმდენ საკვებს აძლევდნენ, რომ შიმშილით არ დახოცილიყვნენ.⁶

განსაკუთრებით უჭირდა ქვეყნის განაპირა და ჭარ-ბელაქანის მოსახლვრე ტერიტორიაზე მცხოვრებლებს, რადგან ძარცვა-თარეშის პირველი მსხვერპლი ისინი ხდებოდნენ. „ასემც თქვენს მტერს და ორგულს გაუჭირდეს საქმე, როგორათაც ჩემს კაცებს უჭირდეს. ნაპირს ქვეყანას გახლავანო“, ჩივის სამეფო კარზე ლუარსაბ მურვანიშვილი და თავისი ხალხის ოთხი წლით სახელმწიფო ბეგარიდან გათავისუფლებას ითხოვს, თავდაცვის მიზნით „ეგების ერთი სიმაგრე კოშკი გავაკეთებინო“.⁷

სამწუხაროდ, „ლეკიანობას“ ადგილზე ძალზე ხელსაყრელ პირობებს უქმნიდა ქვეყნად არსებული მძიმე სოციალ-პოლიტიკური და დემოგრაფიული ვითარება (მებატონეთა ძალმომრეობა, ხშირად გაგრძელებული ეპიდემიები და სხვ.). 1765 წელს „ავის მიზეზით“ მთელი ნოსტე აყრილა და ვინმე თამაზა სასირეთს ჩამოსულა, მაგრამ იქიდან ლეკებს გაუტაციათ და და ტყვეობაში გარდაცვლილა, ხოლო მისი ობლები იორამ თარხნიშვილს თავის ქალიშვილი-

¹ ქართული სამართლის ძეგლები, ტ. V, გვ. 106, დოკ. 74.

² საქართველოს ისტორიის ქრონიკები, გვ. 140.

³ ეროვნული საისტორიო არქივი, ფ. 1449, ს. 2542.

⁴ დოკუმენტები საქართველოს სოციალური ისტორიიდან. ტ. II, გვ. 222, დოკ. 359.

⁵ ილია ორბელიანი. რვა თვე შამილის ტყვეობაში, გვ. 41

⁶ ილია ორბელიანი. რვა თვე შამილის ტყვეობაში, გვ. 45

⁷ ქართული სამართლის ძეგლები, ტ. VIII, გვ. 640, დოკ. 654.

სათვის მზითვევში გაუტანებია.¹

იმდროინდელი თბილისის ყოველდღიური ყოფის დამახასიათებელ სურათს წარმოგვიდგენს ალექსანდრე ჯამბაკურ-ორბელიანი: „ქ. ტფილისის ავლაბრის მხარეს, სადაც ეხლა რიყეზე მცხოვრებნი დგანან მტკუარის პირზედ მჩითაგებსა ჩითები ჰქონდათ გაფენილი და წყლით თურმე ნამაგდნენ. ამ დროს ჩუღურეთისა და ავლაბრის მხრიდან დაქვეითებული ლეკები წამოეპარნენ, უნდოდათ მჩითაგები დაეჭირათ, მაგრამ ისინი საჩქაროთ მტკუარში გამოცურდნენ და ამით მოირჩინეს თავი. ამაზედ ერთი ძახილი და ერთი ყოფა შეიქნა ქალაქიდგან. არიქა მდევარი, მდევარიო... ლეკებმა მჩითაგები რომ ვეღარ მოახელეს, ჩითები დაიტაცეს და გაიქცნენ რაც შეეძლოთ დიახ ჩქარა. დაქვეითებული ლეკი ცხენიანს მდევარს ქართუშელს სადღა წაუვიდოდა, იქვე მახათას იქით მოასწრეს, ზოგი დახოცეს და ზოგი ტყუშთ წამოიყუანეს. ეს ამბავი სწორეთ მეფის ირაკლის სასახლისა პირდაპირ მომხდარა. აი ასე გაკადნიერებული ყოფილან ლეკები, რომ სიკვდილისაც აღარ ეშინოდათ არსად, ისე მოდიოდნენ საქართუშლოზედო“;² ვითარების ლაკონურ შეფასებას აკეთებს ზემოთქმული სიტყვების ავტორი.

იყო უარესი შემთხვევებიც, როცა ლეკებისა და მძიმე გადასახადებისაგან შეწუხებული მოსახლეობა საკუთარ შვილსაც კი ჰყიდდა: 1742 წელს ღთისია გოგიაშვილს შვილი მიუყიდია ვიდაც ბატონ ავთანდილისათვის: „მაღუჯათის (ირანული გადასახადი – ი.ა.) თეთრსა გვთხოვდნენ და საქონელი სულ ლეკმა წაგვართო, ილაჯი არასი გვქონდა, მოვედით ჩემი შვილი მოგყიდე ჩემის ნებითა“.³ ასევე მრავლისმეტყველია 1745 წლის დოკუმენტი: „ილაჯი და ღონე აღაღარა მქონდა სხვა ამის მეტი, დიად, დიდათ გამიჭირდა და მოგეცი ჩემი შვილი პაპა, მოგყიდე ორ თუმნად...“⁴ არც აზნაურები იყვნენ უკეთეს მდგომარეობაში. მაგ. ციციშვილების აზნაური ჯორაშვილი ზემოთქმული მიზეზების გამო ისეთ მდგომარეობაში ჩავარდნილა, რომ მიწების დაყიდვას რომ მორჩა, შვილსაც ტყვედ ჰყიდდა.⁵ მოსახლეობის საერთო გაჭირვების სრულყოფილ სურათს წარმოგვიდგენს პაპუნა ორბელიანი: „ქართლში პური ასე ძვირად იყო, რომ თქვენმა მზემა, ბევრჯელ ვნახეთ ბალახის კურკას გაახმობდიან,

¹ დოკუმენტები საქართველოს სოციალური ისტორიიდან. ტ. II, გვ. 61, დოკ. 91.

² ალექსანდრე ჯამბაკურ-ორბელიანი. დადესტნიდგან ლეკების გამოსვლა და... გვ. 19-20.

³ დარეჯან მეგრელაძე. აღმოსავლეთ საქართველო XVIII ს. პირველ ნახევარში, გვ. 452.

⁴ დარეჯან მეგრელაძე. აღმოსავლეთ საქართველო XVIII ს. პირველ ნახევარში, გვ. 452.

⁵ გულჩინა აკოფაშვილი. სოციალური ურთიერთობის ისტორიიდან XV-XVIII სს. ქართლში (აზნაურთა ფენა). თბ., 1965. გვ. 79.

დაფქვიდენ და იმას ჭამდენ... თუ პურს სადმე გასაყიდს იშოვიდენ, თავის ხელით შვილებს აძლევდენ“.¹

ლეკებისათვის ყველაზე ხელსაყრელი ვითარება მაშინ დგებოდა, როდესაც ქვეყანა „უპატრონოდ“ რჩებოდა. მათ ასეთი დრო ქართლში XVIII ს.10-იან წლებში, ვახტანგ VI-ის ირანში წასვლისას დაუდგათ. „ლეკობა“ ქართლის თავადთა ნაწილმაც ხელობად გაიხადა და ტყვეთა „სყიდვას“ მოუხშირა. როდესაც რუსუდან დედოფალმა (ვახტანგ VI-ის მეუღლე) და ბაქარ ბატონიშვილმა ამ საქმეს ვერაფერი მოუხერხეს, უღირსი „ხელობის“ წინააღმდეგ ბრძოლა დომენტი კათალიკოსმა ითავა. 1712 წლის რუსუდან დედოფალი და ბაქარ ბატონიშვილი კათალიკოსს პირობის წიგნს აძლევენ: „ზოგიერთს ალბას ტყვის სყიდვა გამოჩნდა და თქუენი ვითაც მართებული იყო, ეგრეთ იწყინეთ და გამოეკიდენით. ახლა ეს აღთქმა დაგვიდვია თქუენს წინაშე, სადაც სადედოფლოში და ან საუფლისწულოში, ან საცა ჩუენს საბატონოსა და მამულში ან ტყვის გამყიდველი გამოჩნდეს და ან გაყიდოს ვინმე და ან საყვენოს გარდა, ჩუენს საბატონოში ტყვე მოიყუანოს გასასყიდელი და ჰყუანდეს ვინმე და წაართვათ და თქუენც გაუწყრეთ და გამოენახნეთ, მოიკითხოთ, არცა-ვის ამისთანა საქმე აქნევინოთ, არცა ვიწყინოთ და დიდათაც ხელი მოგიმართოთ და თუ ვინმე წინ აღვიდგეთ და თქუენი ნება არა ქნას, დიდათაც გამოვენახოთ და უწყინოთ“.²

დასავლეთ საქართველოში საქმე კიდევ უფრო ცუდად იყო, ამიტომ „პირობის წიგნი“ ამ საკითხსაც განმარტავდა: „თუ იმერელმა კაცმან მოიყუანოს ტყუფ, თუ საქართველოს კაცმან სამოსამსახუროთ შესანახავად დაიხსნას, თვარა გასასყიდლათ ნუ იყიდის და ნურც გაყიდისო“.³ ე. ი. კათალიკოსი არა მარტო ტყვეებით მოვაჭრეთა წინააღმდეგაა უკომპრომისო, არამედ ამ საქმით ხელისმომთბობთა მიერ სამეფო კართან „საქმის ჩაწყობასაც“ გამორიცხავს და დედოფალ-ბატონიშვილისაგან საქმეში ჩაურევლობის გარანტიებს ითხოვს.

1713 წელს, იესე მაღალაშვილს „ავი საქმე“ უქნია და ტყვეები დაუყიდა. კათალიკოსს უცდია, ჯერ საკუთარი სახსრებით გამოეხსნა თავადს ისინი, როცა ამ გზითაც ვერას გამხდარა, მამულები ჩამოურთმევია მისთვის და მზად ყოფილა ამ „ძვირისმოქმედისათვის ანუ თვალთავანი, ანუ კვლთავანი,

¹ პაპუნა ორბელიანი. ამბავნი ქართლისანი. გვ. 59.

² *Акты...*, т. I. ч. II. Тифл., 1866, გვ. 55, დოკ. №4.

³ *Акты...*, т. I. ч. II. Тифл., 1866, გვ. 55, დოკ. №4.

ანუ ფერკთაგანი, ანუ ერთი ასოთა მისთაგანი“ მოეკეთა,¹ რათა სხვას მიბაძვის სურვილი აღარ გასჩენოდა.

მიუხედავად გატარებული ღონისძიებებისა, ამ სამარცხვინო საქმეში ქვეყნის სამსახურში მყოფი მოხელეებიც იყვნენ გარეულნი. დომენტი მათაც მკაცრად ამხელს. ამ დროის (1705-1729 წწ.) ერთ საბუთში აღნიშნულია: „...ქ. ჩვენი ბძანება არის ხელჯოხიანო დავით, მერმე ბატონი კ-ზი (იგულისხმება დომენტი – ი.ა.) სკრელს მამასახლისს ძულიაშვილს ტყვეების დაყიდვას უჩივის. ჩვენს სამართალში მოიყვანე, სამართალს უზამთო“.²

ნიშანდობლივია 1725 წელს მის მიერვე თავდახსნილ „სჯულის კანონზე“ გაკეთებული წარწერა: „...დავისენ სჯულის კანონი ესე ...პატრიარქმან დომენტიმ ოდეს ჯერ ლეკთა გატყვევს სვეტიცხოველი ...მერმე ურუმები მოვიდნენ და დაიპყრეს ქვეყანა ესე ჩვენი ქართლი, მაშინ ...წარმოსტყვევენს საყდარი და ტყვე ჰყვეს საყდრის ამის რაოდენ წიგნები, ხოლო ჩვენ ძიება ვყავით და რაოდენ ვპოვეთ დავისხენით ფასითა და ისევ სვეტიცხოველს შევსწირეთ“.³ აღსანიშნავია, რომ დომენტი კათალიკოსს კუნძულ ტენედოსზე გადასახლების დროსაც არ შეუწყვეტია ტყვეების გამოსხნა და სამშობლოში დაბრუნება,⁴ მაგრამ მხოლოდ ერთეულთა მონდომება და ძალისხმევა პრობლემის გადასაჭრელად არ კმაროდა. თუნდაც დომენტი IV კათალიკოსის თანამედროვე კონსტანტინე მაჰმადყული ხანის მიერ მოწვეულ ლეკებს თბილისის აღებისას (1723 წ.) საშინლად აუოხრებიათ სიონი. ლეკებს მალე ოსმალები მოჰყვნენ, რომელთაც ტაძრის მეჩეთად გადაკეთება მოუნდომებიათ და მხოლოდ გივი ამილახვრის პირად თავდადებას უხსნია ტაძარი.⁵

დაუნდობელი იყო „ტყვეთა სყიდვის“ წინააღმდეგ ანტონ კათალიკოსიც. 1744 წლის 19 ივნისს კათალიკოსს ავალიშვილები პირობის წიგნს აძლევდნენ, რომ მის ოჯახსა და საყმოში აღარ გაერეოდნენ: „ტყვის გასყიდვაში, კაცის კვლასა და სხვას ბოროტს საქმეში“.⁶

¹ დოკუმენტები საქართველოს სოციალური ისტორიიდან. ტ. I., გვ. 158, დოკ. 223.

² დოკუმენტები საქართველოს სოციალური ისტორიიდან. ტ. II., გვ. 16; დოკ. № 22.

³ ქრონიკები და სხვა მასალა., წ. III., გვ. 113.

⁴ დოკუმენტები საქართველოს სოციალური ისტორიიდან. ტ. II., გვ. 65; დოკ. № 95.

⁵ ეროვნული საისტორიო არქივი, ფ. 1451, დავთ. 2. სიონის ღვთისმშობლის წერილების რეესტრი, საქმე 55; აღნიშნული დეაწლის სანაცვლოდ, 1724 წლის 8 თებერვლიდან თბილელ მიტროპოლიტ დომენტის მითითებით, სიონის ღვთისმშობელში ყოველი წლის ახალკვირის შაბათს გივი ამილახვრისა და მისი ოჯახისათვის სპეციალური წირვა ტარდებოდა.

⁶ სახელმწიფო საისტორიო არქივი. ფ. 1451. დავთ. № 2. მცხეთის სვეტიცხოვლის ეკლესიის წერილების რეესტრი. ს. 255.

გიორგი უფლისწული (შემდეგში გიორგი XII), რომელიც 1789 წელს მისულა შიო მღვიმის მონასტერში, იქ წმინდა მამებთან, ბერებთან და მსახურებთან ერთად 30 მეთოფე მცველი დახვედრია, თუმცა, მაინც ლეკიანობა გამხდარა მონასტრის დაცლის მიზეზი. როგორც პლატონ იოსელიანი გადმოგვცემს: „ლეკნი ერეოდნენ გარემოთა მცხოვრებთა, და ვერ უძლო უდაბნომან (იგულისხმება შიო მღვიმის მონასტერი – ი.ა.), ამისათვის მეორესავე წელსა დაიცალა უდაბნო. ბერნი წავიდნენ სხვა მონასტრებში და ხატნი და ჯვარნი წარიღეს ამილახვრიანთა ჭალასა დასაცველად“.¹

აღმოსავლეთ საქართველოში „ლეკობაში“ განსაკუთრებით „გამოიჩინეს თავი“ ციციშვილებმა. ზაზა, დავით და პაატა ციციშვილებს, ჯერ იყო და ლეკები მოუყვანიათ და მძოვრეთის ციხისათვის „ყათლანი“ უქნიათ. დასახოცი დაუხოციათ, გასაყიდი – გაუყიდათ, რაც ჩვილი ყმაწვილი ყოფილა, ციხიდან გადაუყრიათ და ნადირ-ფრინველთ შეუჭამიათ, მონაზონი და ბებერი, რომელიც არ გაიყიდებოდა, ერთ სახლში შეუყრიათ, სახლისთვის დედაბოძი გამოუცლიათ და უზიარებელი ჩაუხოცავეთ. რაც გადარჩენილა – შუაზე გაუყვიათ. დავითს იმერეთში წაუსხამს და იქ დაუყიდა, ხოლო პაატას – პირდაპირ ოსმალეთში“.²

ძმების „მონაგარი“ ტყვეების ჯამს მთლიანობაში ას ორმოცდათხუთმეტი სულისათვის მიუღწევია, საქონლისა და სახლის ავეჯეულობის გარდა.³ მათ მიბაძა ნოდარ ციციშვილმაც, რომელსაც ყინწვისის მონასტრის მღვდელი პეტრე ინანიშვილი და მისი ძმები გაუყიდა. ეს საქმე ერეკლეს ყურამდე მისულა, რომელიც მოხელეებს სასწრაფოდ მღვდლის გათავისუფლებას, მონასტერში დაბრუნებას სთხოვს და მორალს „შეახსენებს“: „დიად, უწესო იყო და ქვეყნის დამაქცევარი საქმე ჯერ მღვდლისა გასყიდვა და მერმე საყდრის ყმისა. დიად, შორს დავიჭირეთ და ღმერთმა ჩვენს დროში ნურც ქნასო“.⁴

თავადებს არც ზოგიერთი ყმა ჩამორჩა, თუმცა ამ საქმეს ყოველთვის წარმატება არ მოჰქონდა. 1793 წ. 21 იანვრით დათარიღებული ერთი საბუთის მიხედვით, ჩრდილელის ყმა – ბაზალელი გიორგი ჭიჭიკაშვილი ლეკებს ტყვედ წაუყვანიათ. თვითონ გამოსასყიდი „სახსარი“ არ ჰქონია, ჩრდილელსაც მის გამოსხნაზე უარი უთქვამს: „ვინც დაგისხნას, იმისი იყავ, არც შენი დახსნა შემიძლია და არც შენი ყმობა მინდაო“, საბოლოოდ, მისი გამოსხნა ვახტანგ

¹ პლატონ იოსელიანი. ცხოვრება გიორგი მეცამეტისა, გვ. 36.

² ქართული სამართლის ძეგლები, ტ. VII, გვ. 51, დოკ. 47.

³ ქართული სამართლის ძეგლები, ტ. VII, გვ. 57, დოკ. 47.

⁴ ქართული სამართლის ძეგლები, ტ. IV, გვ. 417-418, დოკ. 329.

ბატონიშვილს უთავია.

ტყვეობიდან თავდახსნილ ჭიჭიკაშვილს ეკონომიური მდგომარეობის გაუმჯობესების მიზნით „ლეკობა“ განუზრახავს, ანწუხელი ლეკი მოუპარავს და გაუყიდა. იმ ლეკს, როგორღაც ტყვეობიდან თავი დაუხსნია და ერეკლესთან უჩივლია: „თქვენი ჯარისკაცი ვიყავ, თქვენმა ყმამ მომიპარა და გამყიდაო.“ სასამართლოს ჭიჭიკაშვილი გაუმტყუნებია და „გირაოს“ გადახდამდე „ტუსად ხანაში“ გამოუმწყვდევია. უიმედოდ დარჩენილი, ღარიბი და უილაჯო ჭიჭიკაშვილი ციხიდან ისევ ვახტანგ ბატონიშვილს გამოუხსნია და მისი აზნაურის – ჭილაძის ყმად დაუდგენია.¹

ბიძინა ყანჩელი შვილებით, პირობის წიგნს აძლევს თავის ბატონს გივი ამილახორს: „...კელმწიფის ბრძანებითა და ქართველთ პირობით ტყვის აღთქმა-დათობა იქნა და თქვენ კელმწიფესა და სვეტიცხოველს დაუდევით ფიცი ტყვის გაუსყიდველობისა; ჩვენ თქვენის ყმის თავდებობისა, ჩვენ თქვენ მოგართვით, თუ დღეის ამას იქით, ჩვენ ან გაყიდით და ან გავსცეთ და ან გავურჯულოთ, თავად ვიყვნეთ ღვთისა სვეტიცხოველის შემცოდეთო“²

სამწუხაროდ, სამეფო კართან, მოხელეებთან, თანასოფლელებთან და სხვა პიროვნული დაპირისპირება ხშირად საკუთარ ქვეყანაში ლეკების მოყვანის მიზეზი ხდებოდა. მაგ. ზაქარია ციციშვილს ერთ-ერთი ამილახვარი შემოაკვდა, რის გამოც სასამართლომ დანახისხლად სოფ. გრაკალი ჩამოართვა. სასამართლოს ოქმი ერეკლემ უცვლელად დაამტკიცა. ეს ფაქტი ციციშვილმა პირად შეურაცხყოფად მიიღო, ახალციხის ფაშასთან გაიქცა და საკუთარ ქვეყანაში 2500-მდე ლეკსა და ოსმალოს წამოუძღვა.³ 1782 წელს ჯუგაშვილი და გარშაული თანასოფლელებს მამულის გაყოფაში ვერ მორიგებიან და საკუთარ სოფელში სარბევად ლეკები მოუყვანიათ⁴ და სხვ.

ზემოთქმულიდან გამომდინარე, აღმოსავლეთ საქართველოს მოსახლეობა უკიდურესად შემცირდა, ხოლო ზოგიერთი მხარე მთლიანად დაიცალა. ვახუშტი ბატონიშვილის ცნობით: „...ადარ დაშთა მსახლობელნი მუხრანს, ქართლს და საციციანოს და ადგილს საბარათიანოს სომხითსაც თუნერ სიმაგრეთა შინა“⁵ პაპუნა ორბელიანი ქვემო ქართლში შექმნილ ვითარებას აზუსტებს:

¹ *სახელმწიფო საისტორიო არქივი*. ფ. 1450. დავთ. № 12. ს. 63.

² *დავით გვრიტიშვილი*, ფეოდალური საქართველოს სოციალური ურთიერთობის..., გვ. 243.

³ *იოსებ ალიმბარაშვილი*. ზედაველას ბრძოლები, გვ. 160.

⁴ *ქართული სამართლის ძეგლები*, ტ. VIII, გვ. 176, დოკ. 161.

⁵ *ბატონიშვილი ვახუშტი*. აღწერა სამეფოსა საქართველოსა, გვ. 512.

„დაიცავდა საბარათაშიელო, სომხითი, ორბელიანთ მამული და ზოგი გავიდა კახეთს, ზოგნი ავიდნენ ზემო ქართლში და საერისთაოებში. აღარსად დარჩა შენობა იმ მხარეს“.¹ 1733 წლის „ოსმალობის“ დროინდელი ერთი საბუთით მუსტაფა ფაშას შვილი ალიბეგი მანუჩარ გლურჯიძეს უდასტურებს, რომ „თქვენი ნაქონი სოფლები სასირეთი და ორბითი ვერანი შეიქმნაო“.²

განსაკუთრებით მძიმე მდგომარეობაში ჩავარდნილა საამილახვრო გივი ამილახვრის აჯანყების დროს. განდგომილ ფეოდალს ყიზილბაშებმა დამსჯელი ექსპედიციებით უპასუხეს. როგორც ზემოთაც ითქვა, ამილახვარი მდგომარეობის თავის სასარგებლოდ შემობრუნების მიზნით ლეკ-ოსმალებს იწვევდა. ისინი თავადის ქირას არ სჯერდებოდნენ და ქვეყანას დაუნდობლად იკლებდნენ, რის გამოც მარტო საამილახვროდან 3 ათასი კომლი კახეთში გადასულა.³ იოანე ბაგრატიონის მიერ ქართლ-კახეთის 1794-1799 წლების აღწერის მიხედვით, მხოლოდ საამილახვროს – დიდი და პატარა ღიახვის ხეობებში ჩამონათვალი 174 სოფლიდან 64-ში მოსახლეობა აღარ ჩანს და მხოლოდ სოფლის სახელწოდებაა მითითებული.⁴

XVIII ს. 20-იანი წლებიდან, ამავე საუკუნის 80-90-იან წლებამდე თითქმის მოიშალა საციციანო. ბევრი სოფელი ამოვარდა ან ნასოფლარად გადაიქცა. მოგვიანებით ამ ტერიტორიების შევსება ოსური მოსახლეობის ხარჯზე მოხდა. ახლად მოსულმა მოსახლეობამ ზოგ სოფელს ძველი ქართული სახელი შეუნარჩუნა, ზოგს თავისი სოფლის სახელი შეარქვა, ხოლო ზოგი სოფლის სახელი, რომელიც ამ ხელოვნური შევსების შემდეგაც უკაცრიელი დარჩა, საბოლოოდ ამოვარდა.⁵ ზაალ მახვილაძე 1754 წელს თავის მიერ აღდგენილ აბისის სის (ფრონეს ხეობაში – ი.ა.) ეკლესიის წარწერაში ამბობს: „აღვაშენე ესე ეკლესია ...დიდხანს ლეკისაგან, ოსისაგან ხარაბა იყო“.⁶

ასევე მნიშვნელოვნად დაზარალდა სამუხრანბატონო. დართისკარის გავლით ქართლის ქალაქ-სოფლების სარბევად მომავალი ლეკები სამუხრანბატონოს ვერ ასცდებოდნენ, ამიტომ ეს მხარე შედარებით მეტად ზარალდებოდა. ამ ფაქტს იმდროინდელი ეპიგრაფიკული წარწერებიც ადასტურებენ. მაგალი-

¹ პაპუნა ორბელიანი. ამბავნი ქართლისანი, გვ. 244.

² თამარ ოთხმეზური. აღმოსავლეთ საქართველო 1723-1735 წწ., გვ. 90.

³ ელდარი მამისთვალისვილი. ამილახვრები. გორი 1996, გვ. 22.

⁴ იოანე ბაგრატიონი. ქართლ-კახეთის აღწერა. ტექსტი გამოსაცემად მოამზადეს, გამოკვლევა და საძიებლები დაურთეს თინა ენუქიძემ და გურამ ბედოშვილმა. თბ., 1986, გვ. 38-42.

⁵ დავით გვრიტიშვილი. ფეოდალური საქართველოს სოციალური ურთიერთობის..., გვ. 130-131.

⁶ სერგი მაკალათია. ფრონეს ხეობა. თბ., 1963, გვ. 46.

თისათვის კონსტანტინე მუხრანბატონის მიერ აღდგენილ მჭადიჯვრისა და შიოს უბნის ციხეებზე გაკეთებულ წარწერებს მოვიტანთ. მჭადიჯვრის წარწერაში აღნიშნულია, რომ „ოდეს უამთა ქცეულებისაგან და ცოდვათა ჩუენთა მიერ მოქცხრებულიყო ქვეყანა ქართლისა ლეკთაგან რომელ არიან კავკასისა შინა და თვინიერ ციხეთა არსადა ეგებოდა გება კაცთა არცა თუ ერთსა სოფელსა და დაბაცა ესე ოხერქმნილ იყო, რომელ არარასა ცნობილ იყო თუცადა სოფელსა ამას პირველი შენობა ყოფილიყო თვინიერ ეკლესიასა ამის რომელი აღეშენა ბატონიშვილსა კათალიკოსს დომენტის. აწ ჩვენ მუხრანის ბატონმა კონსტანტინე ჳელყავ ადშენებად ციხისა ამის სამკვიდროსა ჩემსა, რათა კაცრიელ იქნას და დაეშენონ კაცთა და მტერთა და მარბიელთაგან უვნებლად დაშთენო“. სამუხრანბატონოს დაცლაზე მიუთითებს შიოს უბნის ციხის წარწერაც: „უამსა ამასა ოდესაცა მტერნი უსჯულონი მძლავრებდენ ქვეყანასა ქართლისასა, ადგილითი ადგილად მოოკრებულ იყო სოფელნი და დაბანი და ესეცა შიოს უბანი მკვიდრთაგან თვისითა ცარიელ იყო და მიმოდებნეულ იყვნენ მოსახლენი ამისი“ (წაკითხვა ადგილზე ჩვენია – ი.ა.).

არანაკლებ მძიმე მდგომარეობაში ჩავარდნილა სამაჩაბლო. გ. სოსიაშვილის თქმით: „ლეკთა შემოსევებს სამაჩაბლოში განადგურების პირას მიჰყავდა სათაუადოს მოსახლეობა, რომელთა ერთი ნაწილი მარბიელთა წინააღმდეგ გამართულ ბრძოლებს ეწირებოდა, ნაწილი კი – მათი ტყვე ხდებოდა“.¹ მკვლევარს იქვე მოჰყავს ერთი საბუთი, რომლის მიხედვით, ქემერტიდან ლეკების მიერ გატაცებულ ხუთ სულ ყმაში იასე მანაბელს გამოსასყიდის სახით 18 თუმანი და ერთი ცხენი გადაუხდია.²

ცნობილი მწიგნობარი იესე ბარათაშვილი „ცხოვრება-ანდერძის“ დასაწყისშივე გამოკვეთილად მიანიშნებს: „დავიბადე საჯავახოსა მთასა შინა, ლეკთაგან დახიზნებულთა ერთა შინა ...ქრისტეს აქეთ 1728, ქართულსა ქორონიკონსა – 416. იგი წელიწადი ერთი მთიდამ სხვა მთად, სოფლით სხვა სოფლად მავლინებდენ ლეკისაგან განძარცვილნი და დაბნეულნიო“.³

მძიმე დემოგრაფიული მდგომარეობა XVIII ს.70-იან წლებშიც შენარჩუნდა. 1770 წელს ერეკლეს დავალებით ჩატარებულ ქართლ-კახეთის აღწერის მასალებში ვკითხულობთ: „...არს აოხრებული და უმკვიდრო ქმნილი თრიალეთი,

¹ გიორგი სოსიაშვილი. სამაჩაბლოს ისტორიიდან (XV – XIX სს.). თბ., 2005, გვ. 149.

² გიორგი სოსიაშვილი. სამაჩაბლოს ისტორიიდან (XV – XIX სს.), გვ. 149-150.

³ იესე ბარათაშვილი. ცხოვრება-ანდერძი. გვ. 564.

ადგილი ვრცელი და ფრიად კეთილი და დიდი და სოფელ მრავალი. არს აოხრებული ყაიყული, უმკვიდრო ქვეყანა, ფრიად კეთილი და მრავალი სოფელი. არს აოხრებული ტაშირი, გუჯარეთი და სომხითი, ქვეყანა დიდი და მრავალი და ამისი კაცი ორმოცისაგან ერთი დარჩენილა. ...არს საბარათასშვილო ქვეყანა დიდი, ასისაგან ერთი დარჩენილა, ხიზნათ არიან¹ და სხვ.

სარგის კაკაბაძის ცნობით, მარტო 10 წლის მანძილზე (1770-1780 წ.წ.) თბილისის მოსახლეობა 4000 კომლიდან – 3478–მდე; გორის – (1770 წლიდან 1794 წლამდე) 500 კომლიდან – 227–მდე; ხოლო ქართლ-კახეთის მოსახლეობა (1770 წლიდან – 1795 წლამდე) 42 ათასი კომლიდან 35 ათას კომლამდე შემცირებულია.²

ქართველი მეფეები დემოგრაფიული მდგომარეობის გამოსწორებას მეზობელი ქვეყნებიდან მოსახლეობის ჩამოსახლებით ცდილობდნენ, მაგრამ არც ისინი იყვნენ უკეთეს დღეში. ყაზახელი ნაზიმ ჯაფარი გიორგი XII-სთან ჩივის: „ოთხი წელია ყარაბაღიდან გიახელ, მაგრამ რაც საქონელი მქონდა, სულ დაკარგე, დაღისტანში გადაიტანეს ლეკებმა. აბაზისა არა გამამყვა რაო“.³

არა მარტო გლეხობა, არამედ გაჭირვებაში ჩავარდნილი თავად-აზნაურობაც ერთიმეორის მიყოლებით ჰყიდდა ყმა-მამულებს. მაგ. „ჟამთა ვითარების“ გამო, 1757 წლის 5 იანვარს დავით აბდულაბეგისშვილი და მისი ძმა – არზაყული მირზა, კუთვნილ 12 სულ ყმას, მამულითა და ეკლესიით ტფილელ მიტროპოლიტ ქრისტეფორე თუმანიშვილზე ჰყიდიან, „ამათს გარდა რომელნიც აყრილნი და დაკარგულნი არიან ...ამათ გამოაჩენ და იპოვნი ...არც ჩვენსა და არცავის სხვას იმათთან საბატონყმით ხელი არავის აქვს, ასე სულ შეუვალად თქვენთვის მოგვიყიდიან“, – ნათქვამია დოკუმენტში.⁴

1760 წელს ციციშვილები პირობის წიგნს აძლევენ თეიმურაზ II-ს: „ასე რომ ჩვენი აზნაურიშვილი დანდლიშვილი ლეკისაგან დატყვევდა და თქვენ დაიხსენით ათ თუმნად. მერმე თუ ჩვენ შევძლოთ დახსნა და თქვენი თეთრი ათი თუმანი მოგართვათ, ჩვენი აზნაურიშვილი ისევ ჩვენ გვიბოძეთ, თუ ვერ შევძლოთ დახსნა და თქვენ დაგიხსნიათ და ღმერთმა გამარჯვებაში მოგახმაროთ“.⁵

¹ ქართული სამართლის ძეგლები, ტ. II, გვ. 421, დოკ. 120.

² სარგის კაკაბაძე. საქართველოს ისტორია. ახალი საუკუნეების ეპოქა (1500-1810). გვ. 227; 241.

³ ქართული სამართლის ძეგლები, ტ. VIII, გვ. 651, დოკ. 668.

⁴ სახელმწიფო საისტორიო არქივი, ფ. 1449, ს. 532.

⁵ სახელმწიფო საისტორიო არქივი, ფ. 1450, დავთ. 48; ს. 36.

1789 წ. 15 აგვისტოს ბირთველ და ზაალ თუმანიშვილები თავიანთ ბიძაშვილს ი. მდივანს ყმის ნასყიდობის წიგნს აძლევენ: „...მამა და დედა დამიტყვევდა და დავისხენ, მამა ჩემი და დედა ჩემი სხვა ქვეყანაში წავიდნენ, ამათის დახსნისათვის ახალციხეს ოთარაშვილის ვალი დამედვა, მოვიდა ბატონთან (იგულისხმება ერეკლე II – ი.ა.) მიხივლა, იასაული დამაყენა, დიდათ შემაწუხეს, ვერსაით ილაჯი ვერა ვქენ რა, მოგვიდე ახალდაბას ჩემს ბარათში ნარგები გიორგი ქებაძე თავისის შვილებით და შვილის შვილებით, თავისი მამულით. ...სულ შენ მოგეც, რომ ახალდაბაში მე წილი აღარ მაქვსო“.¹

1784 წ. 17 ნოემბერს გაცემული საბუთის მიხედვით, მიქელიშვილი კიკოლას ყმა, ტერუნაანთ არუთინასშვილი ბეჟანა, ლეკებს ტყვედ წაუყვანიათ. იგი ყიზლარში მარია მარიასშვილს 17 თუმნად დაუხსნია და თბილისს ჩამოუყვანია. არუთინაშვილს ყოფილი ბატონი მოუძებნია და შევედრებია, „ამ კაცისგან გამომიხსენიო“. მიქელიშვილს ყოფილი ყმა მარიაშვილისაგან ვერ გამოუხსნია („არ შემეძლო რომ დამეხსნაო“), თუმცა, იმ შემთხვევაში, თუ ტერუნაანთ ბეჟანა თვითონ მოახერხებდა თავის დახსნას, – თავისუფლებას ანიჭებდა: „მეც შემბრალდი და დასტური მოგეცი, შენი თავი ვისთანაც გინდოდეს მიყიდე თავით ან ცოლშვილით, ...ამის მეტი მე შენთან ბატონ ყმობაზე საქმე არა მქონდესო“.² შედარებით „იოლად გამოსულა“ თეიმურაზ ჯავახიშვილი. მას თერთმეტ მინალთუნად ლეკი უყიდია, ხოლო ამ ლეკის გაყიდვით საკუთარი ყმა დაუხსნია.³

ხდებოდა პირიქითაც, როდესაც მებატონეთა ძალმომრეობას გაქცეული გლეხები ლეკების ტყვეობაში ხვდებოდნენ. 1768 წელს ივანე გიორგაძე ერეკლეს ჯავახიშვილებისაგან დახსნას სთხოვს: „...იმჟამათ მეტეხს სხვისშვილათ გახლდი. მოვიდნენ ჯავახისშვილები, წამომეჭიდნენ – ჩემი ყმა არო. იმათ გავექე და მუხრანის რუსხმულზედ დავიკარგე. ექვსი წელი ტყვედ გახლდითო“.⁴

როგორც შესავალშიც აღნიშნა, ტყვედწაყვანილთა ის ნაწილი, რომელთაც ახლობლები ვერ გამოისყიდინდნენ, დაღესტნიდან ახალციხისა და ყირიმის მონათა ბაზრებზე იყიდებოდა, 1766 წელს დაღესტანში ჩასული ალექსანდრე ბაქარის ძე გულისტკივილით აღნიშნავდა: „აქ იმდენი ქართველი მოტაცებული

¹ სახელმწიფო საისტორიო არქივი, ფ. 1450, დავთ. 23; ს. 3.

² ავთანდილ კილასონია. ტყვეთა გამოსხნის საშუალებანი, გვ. 232.

³ ქართული სამართლის ძეგლები, ტ. IV, გვ. 541-542, დოკ. 428

⁴ ქართული სამართლის ძეგლები, ტ. IV, გვ. 577, დოკ. 453

ტყვე ვნახე, რომ მათგან შეიძლება მთელი სახელმწიფო დაგასახლოთ“.¹

განსაკუთრებით მძიმე მდგომარეობაში ჩავარდა ქვეყნის ძირითადი მწარმოებელი გლეხობა, რომელსაც ხშირად გასაქცევიც არსად ჰქონდა. ნ. ბერძენიშვილის თქმით: „გლეხების ერთი ნაწილი დატყვევდა და უცხოეთში მონებად დაიყიდა, მეორე ნაწილი ლეკებთან თუ ოსმალ-ყიზილბაშებთან ომებს შეეხოცა, სხვები ბოლომოუღებელი ომების თანამგზავრმა შიმშილობამ და ჭირმა იმსხვერპლა, დიდმა ნაწილმა, კიდევ მიატოვა ეს გაჯოჯოხეთებული სამშობლო და ახლობელ ქვეყნებს მიაშურა“.²

ლეკები მტაცებლობას ქართლ-კახეთში მათი მფარველი „ოსმალბის“ დროსაც არ იშლიდნენ. გორის კომენდანტი მეჰმედ ფაშა, 1732 წელს სულთნისადმი გაგზავნილ პატაკში უწესრიგობის გამო თავს იმართლებდა: „რამდენიმე წელია, რაც ლეკების ბრბოები შემოდიან და ღარიბი რეაიას ბავშვები ტყვედ მიჰყავთ, გლეხთა ქონებას იტაცებან და ამრიგად სოფლებს ანადგურებენ, მათი შემოსევები არეულობას იწვევს“.³ ამავე წელს გორის მოსახლეობას დახმარებისათვის მიუმართავს ფაშასადმი, რომ ლეკები თავს ესხმიან, აწიოკებენ, არბევენ, იტაცებენ ბავშვებს და სხვა მოქალაქეებს. გორის ყადის განაჩენის მიხედვით, მოსახლეობის დასაცავად 30 მუდმივი ცხენოსანი რაზმი შეუდგენიათ, თითოეული მხედრის საფასური თვიურად ხუთი ყურუში ყოფილა.⁴

უკიდურესად დაეცა სოფლის მეურნეობა. ყანასა თუ ვენახში მიმავალ გლეხს, ცალ მხარზე გადებულ თოხთან ერთად, მეორე მხარზე თოფ-იარაღი მზადყოფნაში უნდა ჰქონოდა, ხოლო, როცა იგი ხვნა-თესვით უნდა ყოფილიყო დაკავებული, ოჯახთან ერთად ციხე-კოშკებს აფარებდა თავს. ეს პროცესი ძალზე დიდხანს გაგრძელდა. თუმცა, რუსული ხელისუფლება ამყობდა, „ლეკიანობა“ საქართველოში მოსვლისთანავე მოესპეო, მაგრამ მათი მოსვლიდან 20 წლის შემდეგაც (1825-26 წწ.) ედუარდ აიხვალდი აღნიშნავდა: „მიუხედავად იმისა, რომ საქართველოს აღმოსავლეთ ნაწილში რუსთა მფლობელობა კარგახნის დამყარებული იყო, ლეკები მაინც არ იშლიდნენ თავის ყაჩაღობას. მაღალ კლდეებს მოფარებულნი, მთელი დღის განმავლობაში უთვალთვალებდნენ ჯარისკაცთა ყაზარმებსა და საგუშაგოებს და როგორც კი შემაზე ან სხვა საქმე

¹ დავით ჯანელიძე. საქართველო და აღმოსავლეთი. XVIII ს. გვ. 121.

² ნიკოლოზ ბერძენიშვილი, საქართველოს ისტორიის საკითხები. ტ. II. გვ. 154.

³ ნოდარ შენგელია. XV-XIX საუკუნეების საქართველოს ისტორიის ოსმალური წყაროები. თბ., 1974, გვ. 224.

⁴ ნოდარ შენგელია. XV-XIX საუკუნეების საქართველოს ისტორიის ოსმალური., გვ. 224.

ზე ყაზარმას მოცილებულ სალდათებს დაინახავდნენ, იტაცებდნენ და შემდეგ, უკეთეს შემთხვევაში გამოსასყიდს ითხოვდნენო“.¹

გაზეთ „დროების“ 1877 წლის ერთ-ერთ პუბლიკაციაში ნათქვამია: „...ამ ლეკები მოდიანის“ გამო, ხალხი სახნავ-სათესის დროს, სრულიად თავის საქმეს მომცდარი იყო ...სოფლებიდან, ყოველ დღე-ღამ კომლათ ერთი კაცი თოფ-იარაღით იდგნენ ყველა თავიანთი სოფლის გარშემო; ასე ყოველის ოჯახიდგან ერთი პირი იყო გადადებული ყარაულზედ ...ზოგ-ზოგებს, ვინც მარტოხელ ოჯახისანი არიან, აქამომდე მუჭი პურიც არ დაუთესნიათ და ჩალოუქებიც ისევ მოსამკელები უყრიათო“.²

განსაკუთრებით სახიფათო იყო საქონლისა და ცხენების მწყემსობა. ლეკები, დაიმარტოხელებდნენ თუ არა მათ, მწყემს-საქონლიანად იტაცებდნენ. გიულდენშტედტი ერთგან მიანიშნებს: „ლეკთა თარეშის გამო ცხენებს არ შეეძლოთ ებალახათ, ამიტომ უნდა გამოგვეკვებო“.³

ისედაც მძიმე ეკონომიკურ მდგომარეობაში მყოფი მოსახლეობა ლეკების წინააღმდეგ დაწესებულ დამატებით გადასახადს ვეღარ იხდიდა, ამიტომ სისტემატური ხასიათი მიეცა ქართლიდან გლეხების მასიურად და ინდივიდუალურად აყრისა და გაქცევის შემთხვევებს. მაგ. „ოსმალბის“ დროს (1723-1735 წ.წ.) ლეკიანობის მიზეზით სოფ. ნოსტეს მოსახლეობა აყრილა და გადასახლებულა ქსნის ხეობაში.⁴ 1732-1735 წლებში სოფ. ხანდაკის გლეხები დედაწულიანად აყრილან და გადაკარგულან. მებატონე რატიშვილს ისაყ ფაშას დახმარებამაც ვერ უშველა, გაქცეული გლეხები თავის დაცარიელებულ მამულში ვერ დაუბრუნებია,⁵ შემფოთებული ისაყ ფაშა, ამის გამო მუხრან ბატონს სწერდა: „მერმე შენის აზნაურიშვილის, რატიშვილის სოფელი ხანდაკი და ან სხვა სოფელი აყრილი იყოს, ვისცა მამულში იყოს, ყველა მოაგროვე და ნურავის გააცარცვინებ და სადაც შენ გინდოდეს, იქ დააყენე, თუ წაართვა ვინმე მწვავედ გარდავაკდევინებ. იმ კაცებთან შენს მეტი კელი ნუ აქვსო“.⁶ ფაშას შემფოთების მიზეზი გასაგებია – თითოეული აყრილ-დაცარიელებული სოფელი ოსმალთათვის გადასახადების შემცირებას ნიშნავდა. როდესაც აყრა-გაქ-

¹ ედუარდ აიხვალდი საქართველოს შესახებ, გვ. 18, 258-259.

² გაზ. „დროება“, 06. 06. 1875 წ. № 63.

³ გიულდენშტედტის მოგზაურობა საქართველოში, ტ. I, გვ. 101.

⁴ საქართველოს ისტორიისა და კულტურის ძეგლთა აღწერილობა. ტ. V. გვ. 181.

⁵ აღექსანდრე ბენდიანაშვილი. გლეხთა კლასი და გლეხთა მოძრაობა საქართველოში. თბ., 1989, გვ. 23.

⁶ საქართველოს სიძველენი. ტ. III. გვ. 418-419; დოკ. № 441.

ცევა მასიურ ხასიათს იღებდა, ისტორიულ დოკუმენტებში ეს მოვლენა „დაფანტვად“ იწოდებოდა.

დაფანტვის ძირითადი მიზეზი მეპატონეთა ძალმომრეობა და ლეკთა შემოსევების მუდმივი შიში იყო. მაგ.: როდესაც სოფ. გომი ლეკებსა და ოსმალებს აუოხრებიათ, გლეხობა დაფანტულა. მას შემდეგ, რაც გომის ციხე გაამაგრეს, დაფანტული მოსახლეობა უკან დაბრუნებულა.¹ იგივე მდგომარეობა გაგრძელდა 90-იან წლებში. 1794 წელს მანგლისისა და რუისის გლეხებს მიუტოვებიათ თავიანთი ბატონები და გაქცეულან. მომდევნო წლებში მათი მაგალითისათვის მიუბაძავთ ნიქოზელ და სხვა გლეხებსაც.²

ქართლ-კახეთის სამეფო კარი კარგად გრძნობდა ქვეყნის საერთო გასაჭირს, ამიტომ დღენიადაგ ზრუნავდა იმ პირთა მიმართ, რომლებიც ლეკების ტყვეობაში მოხვდებოდა, ან ტყვეობას თავს დაადწევდა. ჯერ კიდევ 1726 წელს, რუსეთში გადახვეწილი ვახტანგ VI-ის, მისი მეუღლის რუსუდანის თხოვნითა და რუსეთის საიმპერატორო კარის ნებართვით დარუბანდში დაარსებულა ქართული ეკლესია, რაც იმით იყო ნაკარნახევი, რომ დარუბანდთან ახლოს მცხოვრები ლეკების ტყვეობიდან ქართველები ხშირად გამორბოდნენ.

1735 წელს ამ ეკლესიის მრევლში უკვე ირიცხებოდა რამდენიმე ასეული ქართველი.³

1765 წელს ერეკლე II-მ გამოსცა კანონი, რომლის ძალითაც უცხოეთის ტყვეობიდან თავდახსნილი ან გამოქცეული ყმა გლეხის მიმართ წინანდელ ბატონს „კელი“ აღარ ჰქონდა.⁴ გლეხს შეეძლო თავისუფალი დარჩენილიყო, ან თავისთვის სასურველი მფარველი ბატონი შეერჩია. ასეთი მობრუნებული გლეხების უმრავლესობა სახასო ყმად ეწერებოდა და მხოლოდ უმნიშვნელო ნაწილი ინარჩუნებდა სრულ თავისუფლებას. ამას გარდა, ქვეყნად შექმნილი მდგომარეობაც გლეხს აიძულებდა რომელიმე ბატონისათვის თავი შეეფარებინა, წინააღმდეგ შემთხვევაში, დიდი შანსი იყო, რომ იგი კვლავ ტყვეობაში მოხვედრილიყო.

სწორედ ზემოხსენებული კანონის დაცვას ითხოვდა 1782 წ. 10 მარტს თათრიშვილი ღვთისია გიორგი ბატონიშვილთან საჩივარში: „...დავით ამილახ-

¹ დარეჯან მეგრელაძე. საქართველოს გლეხობა XVI-XVIII სს. გვ. 235.

² მამია დუმბაძე, ნიკოლოზ ქორთუა. კლასობრივი ბრძოლის გამწვავება. – საქართველოს ისტორიის ნარკვევები. ტ. IV. თბ., 1973, გვ. 737-738.

³ გიორგი პაიჭაძე. ვახტანგ VI. თბ., 1981, გვ. 128.

⁴ ქართული სამართლის ძეგლები. ტ. IV. გვ. 513, დოკ. № 409.

ვრის შვილმა ქალაქს გამაგზავნა ფარჩისათვის. ღართისკარში ლეკები დამხვდნენ, დამიჭირეს, თორმეტი წელი ტყვეთ გახლდი. ვალით, ვახშით თავი დავიხსენ, ხუთი თვე არის გიახელ, ერთი მარტოხელი, უსახლკარო, უმამულო გახლავარ, ახლაც და უწინაც. ახლა დავით ამილახვრის შვილი არ მეშვება, ჩემი ყმა ხარო. შენსა მზეს ვფიცავ, თაობითაც წყალობის ყმა ვიყავი, თორემ ახლა ბატონის მამათქვენის ბძანებაც არის: ტყვესთან საქმე არავის აქვს, ყველგან თავისუფლად არის. მეც [ერთის ოქმის წყალობა მიყავით თქვენის შვილების სადღეგრძელოთ, ვინც მამული მამცეს, იმას ვემსახურო“.¹

ასევე უპირატესობა ენიჭებოდა მოსახლეობის იმ კატეგორიას, რომელიც ტყვეს გამოისყიდდა. ასეთ შემთხვევაში გამოსყიდული ტყვე მის საკუთრებად ცხადდებოდა და ძველ ბატონს მასზე უფლებები ეკარგებოდა. 1735 წელს ბერი გივი შვილი გივი ამილახვარს ყმობის წიგნს აძლევს: „...ლეკებისაგან დავტყვევედი, წამიყვანეს გაღმა მკვარში ტყვედ ვიყავ და თქვენ ჩემში კუპრაშვილს დავითს ხუთი თუმანი თეთრი მიეცით და იმისგან დამიხსენით. თქვენს მეტს, არც მამას, არც ბიძას ჩემში არა გაუღიარა, მარტო თქვენ მიყიდეთ და მომიყვანეთ ...თქვენს მეტს ჩემთან არას კაცს ჰელი არა აქვს, ორჯელ თქვენგან ნასყიდი და დახსნილი ვარ. ჩემში გასაყიდათ, გასაზითვათ, ყოვლად ჰელი გეწიფოს“.²

აღნიშნული კანონის თავის სასარგებლოდ გამოყენება და გადასახადების თავის არიდება უცდიათ ცხინვალებს, მაგრამ ერეკლეს საპასუხო რეაქცია მყისიერი იყო. 1774 წლის 24 დეკემბერს იგი რევაზ ამილახვარს სწერს, ცხინვალში გადასახადების აკრეფა ჩვეული ტემპით გააგრძელოს: „ქრცხინვალელთ არზა მოეწერათ ჩვენთვის მოსაღებზედ საჩივარი. ჩვენ იმისი როდის გვითქომ, რომელიც ლეკისაგან დატყვევებული არ არის ხარჯის გამოურთმეველობა. ჩვენ იმისი ვთქვით, რომელსაც ახლა ლეკისაგან დატყვევებული ყავთ, იმ ტყვის პატრონებს ნურა გამოურთმევათ რა, ამათი მოგვიწერია, მაგათ ჩიხიაც უნდათ და ბაბაც, ახლა ისეთი ჯამები (იგულისხმება დრო-ჟამის თვალსაზრისით – ი.ა.) არის თავის შადლებით ყველანი უნდა გაისარჯნენ ...პური არავის აჭამონ როგორ იქნება? სურსათზედ ყველა გასარჯეო“, ნათქვამია ქართლ-კახეთის მეფის არზაში.³

1742 წ. 15 ნოემბერს სამეხრანბატონოში არუთინაშვილი მოხია სახლთუ-

¹ ქართული სამართლის ძეგლები. ტ. VII. გვ. 533-534, დოკ. № 564.

² დავით გვრიტიშვილი. ფეოდალური საქართველოს სოციალური ურთიერთობის..., გვ. 194.

³ ერეკლე II-ის მიერ გაცემული საბუთები 1736-1797 წლები, დოკ. № 378, გვ. 89.

ხუცეს ბეჟან დორთაშვილს ლეკებისაგან დახსნის სანაცვლოდ ყმობის პირობას უდასტურებს: „მამაჩემი ლეკში დაკარგულიყო თქვენ დაგეხსნათ რვა თუმნათ. ...შენ ბატონი და მე ყმა. ბატონყმობის რიგზე უნდა გემსახუროო“.¹ 1771 წ. წ. 12 ნოემბერს გორელი ამირალდან თამაზა ერეკლე II-სთან ჩიოდა: „რუისელი ფანიაშვილის ყმა დედაბრისშვილი გოგია ლეკში დაკარგულიყო, ბორჩალოელები დასხმიყვნენ და გაეგდებინებინათ. ოქმი გებძანათ, თუ ჩემ[მა] სახასო კაცმა დაიხსნასო თავისთვის ყმათაო (ე. ი. თავის ყმად ჩაითვალოსო – ი.ა.). თქვენის ბძანებითა და ოქმითა ბორჩალოელებისაგან დავიხსენი და თავის ბატონი ფანიაშვილისაგანაც დავიხსენ და წიგნი გამოვართვი, საამილახოროში დგას და გორს ვერ ჩამომიყვანია. ერთი იასაულ[ის] წყალობა გვიყავით, რომ ამიყაროს და გორს ჩამომგვაროს, ორჯელ დამიხსენია“.²

ამ კანონით აქტიურად სარგებლობდა სამეფო ოჯახიც. ასეთ შემთხვევაში მეფის ინტერესი ის იყო, რომ ტყვეობიდან გამოსხნილ-გამოსყიდული პირი (პირები), მეფის (ბატონიშვილის) საკუთრებად ანუ „სახასოდ“ ითვლებოდა და ყოფილ მესაკუთრეს მასზე უფლებები ეკარგებოდა. მაგ.: ციციშვილის აზნაური ბეჟან დანდლიშვილი ლეკებს ჰყავდათ დატყვევებული და მეფეს გამოუხსნია. ციციშვილები ყოველ ღონეს ხმარობენ, რომ აზნაური დაიბრუნონ. მეფესა და ციციშვილს შორის იდება წიგნი, რომლის მიხედვით, ციციშვილები მეფეს პირობას უდებენ: „თუ ვერ შევძელით ამ აზნაურის დახსნა, თქვენი იყოსო, ხოლო თუ მოვახერხეთ და მოვართვით ის თანხა, რაც ამ აზნაურის გამოსხსნაზე დაგეხარჯათ, ეს ჩვენი აზნაურიშვილი ისევ ჩვენ გვიბოძეთო“.³

XVIII ს. მეორე ნახევარში გიორგი ბატონიშვილს ლეკებში დატყვევებული ჯავახიშვილების აზნაურები: ოთარ, იორამ და იოანე ბეჟანიშვილები გამოუხსნია და მათი ნასყიდი ყმა-მამულითურთ თავისთვის ყმად დაუდგია.⁴ ერეკლე II 1782 წელს ქსნის ერისთავებს სწერდა: „ეს კობახიძე გაბრიელ მღვდელი დატყვევებული იყო, ...ჩვენ დაგვიხსნია უსჯულოთა ხელიდან და ამასთან ჩვენს გარდა საბატონყმო საქმე არავის აქვს და ნურავინ შეაწუხებთო“.⁵ თუმცა, მებატონეები ყოველთვის არ ეპუებოდნენ კანონებს და ცდილობდნენ ყოფილი ტყვეების მისაკუთრებას.

¹ *სახელმწიფო საისტორიო არქივი*. ფ. 1448; საქმე: 4325.

² *ქართული სამართლის ძეგლები*. ტ. VII. გვ. 193; დოკ: № 193.

³ *გულჩინა აკოფაშვილი*. სოციალური ურთიერთობის ისტორიიდან XV-XVIII სს., გვ. 78.

⁴ *გულჩინა აკოფაშვილი*. სოციალური ურთიერთობის ისტორიიდან XV-XVIII სს., გვ. 101.

⁵ *გულჩინა აკოფაშვილი*. სოციალური ურთიერთობის ისტორიიდან XV-XVIII სს., გვ. 116.

1764 წ. 4 იანვარს „ნალეკარი“ ოქრუა სამეფო კარზე სამართალს ითხოვს: „ჯავახეთიდან ვართ გარდმოსული საქართველოში, იქიდან ლეკში დავიკარგეთ, ოცი წელიწადი დაკარგულ ვიყავ და მოვედი დ-თს მადლით საქართველოში და ელიოზიშვილი იოანე მედავება ჩემი ყმა ხარო. ერთი ქალი მყვანდა, ისიც წამართო, სამართალი მაღირსეთო“.¹ 1783 წ. 12 თებერვალს რუსელი ბუზიაშვილი ფარემუზა ერეკლე II-სთან ციციშვილებს უჩივის: „მამა ჩვენი გერმანე მროელის დედის ნამზითვ მოახლის შვილი გახლდათ. იმას რომ მროელობა უბოძეთ ჩვენ სამნი ძმანნი იმასთან გახლდით. მერე ლეკში დავიკარგე. ოცი წელიწადი თურქმაილის ქვეყანაში ტყვეთ გახლდი. მარჯვენა ხელიც იქ დამიშავდა, ხანჯალი შემომკრა თათარმა. მერე რომ დავბერდი, სამსახური აღარ შემეძლო რა, თათარმა ეს აზატულობის წიგნი მომცა, რომელიც თქვენს სიმაღლეს მოერთვათ. მოვატანე ისევ თქვენს სახელს და თქვენს ქრისტიანობას ისევ რუსის გეახელი. ერთი შვილი დამხვდა ჩემი, ისიც მომიკვდა. რადგან რომ ტყვე განთავისუფლებული იყო თქვენი ბძანებით და დამტკიცებით ქვეყანაზედ ხმა გაისმა, ჩემს ძმისწულებთან აღარ დავდექ, რუსის ღვთაების კარზედ გახლავარ მუდამ თქვენი მლოცველი. სამადლოთ რომ ნახეს თქვენმა მწერლებმა, აღარაფერი დამწერეს, მაგრამ მაინც ციციანნი კიდევ მართმევენ და მაწუხებენ. გევედრები, როგორც სხვას ტყვეებს თქვენი წყალობის წიგნი აქვსთ, ჩვენც ერთი ამისთანა წიგნი გვიბოძოთ“.²

1788 წელს შიო მღვიმის ეკლესიის ყმას იაკობ ვარდუაშვილს, ლეკებში ტყვეობის გამო ვალი დასდებია და სიმართლის აღდგენას დარეჯან დედოფალს სთხოვდა: „მერმე ამას მოვახსენებ მათს სიმაღლეს. მამახემი ლეკებში დაკარგულა და ახალქალაქელს კაცს ხუთ თუმნად დაუხსნია და რამოდენიმე ხანი გამოსულა მასუკან, იასაული დაუყენებია იმ ახალქალაქელ კაცს და თავის თეთრი უთხოვია. ამდგარა სამი თუმანი და რვა მინალთუნი მიუცია და თორმეტი მინალთუნი დარჩომილა. იმ დროს დავით ხითარიშვილი დასწრებია იქა და შეხვეწია: ეს თორმეტი მინალთუნი გადამიწყვიტეო და ერთს წელიწადს გემსახურებო. იმასაც თორმეტი მინალთუნი მიუცია და ის ნასყიდობის სიგელი გამოურთმევია და გირაოთ მიუცია ...ახლა ყმობით დაგვიწყო დავა და ჯანდაგისშვილის ქალს ნიშანში აძლევს ჩემს თავს...“.³

¹ სახელმწიფო საისტორიო არქივი, ფ. 1450; დავთ. № 13; ს. 274.

² სახელმწიფო საისტორიო არქივი, ფ. 1449; ს. 2542.

³ ქართული სამართლის ძეგლები. ტ. VII; გვ. 792; დოკ. № 828.

1774 წ. 13 აგვისტოს სურამელი თომა ჯობაძე ერეკლესთან ჩხეიძეებს უწიოდა: „ამ მაისში ლეკებს დავხვდით, ერთი ლეკი მე დავიჭირე და ორი ლეკი სოფელმა დაიჭირეს. ერთი მაჩაბელმა აიყვანა, მეორე კიდევ მაჩაბელმა და სურამის მოურავმა აიყვანეს და მესამე ლეკი ჩვენ გვერგო. თქვენ ჩხეიძისათვის ოქმი გებოძებინათ. მოიტანა ოქმი, ჩვენ ლეკი გამოგვართო, გაყიდა ათ თუმნათ და არდაზიანი დაიხსნა. ჩემო ხელმწიფევე, იმ ლეკის დამჭერიც მე ვიყავ და ბელადიც, ნუ გვიზამთ, წყალობა გვიყავით, რომ დ-თი გაგიმარჯვებთ“.¹ ლეკებისაგან ტყვედ წაყვანილთა ნაწილი თვითონ ახერხებდა თავის დახსნას, მაგრამ მხოლოდ პიროვნული თავისუფლება მათთვის ბევრს არაფერს ნიშნავდა, ტყვედ ჩავარდნის ალბათობა ისევ დიდი იყო, თანაც მოსახლეობის ნაწილი ტყვეობაში რამდენიმეჯერ ხვდებოდა:

მაგ. 1780 წ. 31 მარტს გაცემული საბუთის მიხედვით, ფლავისმანელი ოქრუა ქიტესაშვილი თბილისში წასულა და მეკონდახეობა დაუწვია, მაგრამ ლეკს მოუტაცია და დაღესტანს წაუყვანია. ოქრუას გამოპარვა მოუხერხებია და თბილისს დაბრუნებულა, მაგრამ ლეკებს ხელმეორედ გაუტაციათ. უსახსრობის გამო ქიტესაშვილს თავის დახსნა ვერ მოუხერხებია, ბოლოს ყმობის საფასურად ერთ სომესს გამოუსყიდია, ხოლო სომხისაგან ივანე მუხრანბატონს უყიდა.²

ჯავახი კაცია ლომიტაშვილი ქართლში გადმოსულა და რევაზ მეღვინეთ-ხუციშვილთან ყმად დამდგარა. კაციას „ემშაკის საფრტვე“ მოსვლია, თავის პატრონი გაუძარცვავს და ისევ ჯავახეთში გაპარულა, მაგრამ საცხენისის მთაზე ლეკებს დაუტყვევებიათ. როგორც ჩანს, ჩრდილო-კავკასიელებს ლომიტაშვილი ეცოტავათ და ქარელიც წაუხდენიათ, თუმცა, ქარელელები დასდევნიებიან და ტყვეები გაუთავისუფლებიათ. მცირე თავგადასავლის შემდეგ, კაცია რუისს მისულა თავის ძველ ბატონთან, მაგრამ ისევ ტყვედ ჩავარდნილა და მეორე „ჯერზე“ ტყვეობაში შვიდი წელი გაუტარებია³ და სხვ.

ლეკებში სამჯერ დაკარგული ოსიაურელი ყმა – მახარა, 1775 წ. 29 მაისს ერეკლესთან თავის „უილაჯობაზე“ ჩივის: „...მერმე ამას მოგახსენებთ, რომ ამით სამჯერ დაგკარგულვარ, პირველათ რომ დავიკარგე, თავ დავიხსენ თხუთმეტ თუმნათ, ათი თუმანი რომ მივეც, ხუთი თუმანი ისევ მემართების, ერთხელ

¹ ხელნაწერთა ეროვნული ცენტრი. ფ. Hd, საბ. 1182.

² სახელმწიფო საისტორიო არქივი, ფ. 1450; დავთ. 5, ს. 75; 88.

³ ქართული სამართლის ძეგლები, ტ. V, გვ. 187-188, დოკ. 111.

ახალციხიდან გამოვიპარე, ოსიაური რომ აიღეს, შვილით დავსტყვევდი, ახლაც დავიხსენ თავ თორმეტ თუმნად, ერთი ვაჟი მყავს ცხრა წლის, ასე შეწუხებულ ვარ მევალებებისაგან, რომ გაქცევის მეტი გზა აღარ მაქვს, ყოვლად მოწყალეს კვლმწიფეს ამას მოვახსენებ, ან თქვენ დამიხსნათ, ან ერთის ოქმის წყალობა მიყოს რომ ვინმემ დამიხსნას თქვენი ოქმით. არავინ მიხსნის, თუ ამ ორში ერთის წყალობა არას დამემართა, აქ დგომის ილაჯი აღარა მაქვსო“.¹

ლეკთა თავდასხმებით გაბეზრებული მოსახლეობა იძულებული ხდებოდა მოძალადეთა წინააღმდეგ ბრძოლის ორიგინალური მეთოდები მოეფიქრებინა. ხოვლელ ზაქარია ბიჭიკაშვილის წისქვილს ლეკები შემოსწვევიან და ფქვილს იტაცებდნენ. „ღიად, შევღონდითო“, – წერდა ბიჭიკაშვილი ერეკლესთან საჩივარში. ზაქარიას ვაჟს, გამოსავლის მიზნით, ერთგვარი „კაკანათი“ მოუფიქრებია. წისქვილის კედელში ჩახმახზე შეყენებული თოფი ჩაუდგამს, იმდგვარად, „ალაში რომ ფქვილს ხელს ახლებდა, სწორედ იმას მოხვდებოდა“. მეთოდს გაუმართლებია და იმავე დამით თოფიც გავარდნილა. ადგილზე მისულ ბიჭიკაშვილს მხარში დაჭრილი ლეკი დახვედრია. სიცოცხლის სანაცვლოდ ლეკი ზაქარია ბიჭიკაშვილს დადესტანში დაკარგული შვილის გამოხსნას შეჰპირებია.²

ეს საქმე შემოსავლის წყაროდ გაიხადეს სომეხმა ვაჭრებმაც, რომლებიც ერეკლემ დიდი რაოდენობით ჩამოსახლა საქართველოში „ლეკიანობისაგან“ დაცლილ ტერიტორიებზე ეკონომიკის გაჯანსაღების მიზნით.³ მაგ. 1772 წლით დათარიღებულ ერთ ნასყიდობის წიგნში ვკითხულობთ: „ლეკმა დამატყვევა და ლეკისაგან სომეხმა დამიხსნა“, ან, „ამ ხორციელში წავკისს შვილი დამეკარგა ...ბელაქანში განჯელ სომეხს დაუხსნია ათ თუმნად და არ ვიცი თუ ახლა როგორ მამცემს“.⁴

მღვდელი იოანე სოხოშვილი ლეკს დაუტყვევებია და ტყვეობიდან სომეხს დაუხსნია, მაგრამ სასწრაფოდ ვალის დაბრუნება მოუთხოვია: „სომეხი ჩემი თავის სახსარს მთხოვდა და დიდად მაწუხებდაო“, მიუმართავს სომეხი მევალისაგან შეწუხებულ იოანე მღვდელს გიორგი ბატონიშვილისათვის, რომელ-

¹ *სახელმწიფო საისტორიო არქივი*, ფ. 1450; დავთ. 36; ს. 255.

² *ქართული სამართლის ძეგლები*, ტ. IV, გვ. 496, დოკ. 400.

³ მაგ. 1779 წელს, ერევანზე ლაშქრობისას ქართლ-კახეთის მეფემ რვა სომხური სოფლის მოსახლეობა აჰყარა და ქართლ-კახეთის სოფლებსა და ქალაქებში ჩაასახლა. სომეხი მემკვიდრის – ლეოს აზრით, ერეკლეს ეს ღონისძიება ეკონომიკური მოსაზრებით იყო ნაკარნახევი. (იხ. **ლიანა დავლიანიძე**. მათე ურპაელის ცნობები დავით აღმაშენებლის შესახებ. – *საქართველო რუსთაველის ხანაში*. თბ., 1966, გვ. 247-248.

⁴ **ავთანდილ კილასონია**. ტყვეთა გამოხსნის საშუალებები., გვ. 238.

საც ხელახლა გამოუსყიდა იოანე სომხისაგან.¹

გულშიჩამწვდომია ბაინდურაშვილი დათუნას მიერ ყორღანაშვილი ტერ-გრიგორასადმი 1791 წელს მიცემული ნასყიდობის წიგნი, რომელიც ტყვეობაში მოხვედრილთა უმძიმეს ხვედრს ასახავს: „ოსმალთაგან გამოქცეული ლეკებმა დამიჭირეს და დამატყვევეს და თავის დასახსნელი მთხოვეს ...თავის სახსარი არა მქონდა და ხელშეკრული მატარებდნენ ქალაქში ცემითა და ცოდვილებითა და მყიდნენ და არავინ დამიხსნა და არც ვინმე გამოიხსნა და მეც შეგეხვეწე და ლეკისაგან დამიხსენ და თეთრი მიეც, რითაც მათი გული შეიჯერე და შენმა დახსნილმა მეც ეს წიგნი და სიგელი დაგიწერე და მოგეც, დღეს და დღეის იქით არას კაცს ჩემთან ხელი არა ჰქონდეს, არავინ იყოს მოცილედ და მოდავედ თვინიერ ღვთისა მეტი“.²

სხვა საბუთი ტყვეობით გამოწვეულ და „სამადლო ლუკმის ფასად“ გადაქცეულ გაუსაძლის მდგომარეობას გადმოგვცემს: „...მე თავად, შვილებით და საცხოვრებლით ისე გაეფუჭდი, რომ შვილები ისევ ტყვედ მყვანან და მე სამადლოდ დამიხსნეს. ისე გიახელ, მაგრამ ვაი ამ პურის ჭამას, რომ ლუკმის თხოვნით ქვეყანას ვაწუხებ და ასე ვძლებო“.³

ასევე ცოლშვილიანად ჩავარდნილა ტყვედ სურამელი თამაზა ჯეგაძე. იგი ლეკებს დაღესტანში წაუყვანიათ და იქ გორელ შაფერაშვილ ბეყანას ოცდათერთმეტ თუმნად დაუხსნია. გორელი ღვთისნიერი კაცი გამომდგარა, ჯეგაძისათვის მის მიერ დახსნილი ცოლ-შვილის საფასურის მხოლოდ ნახევარი გამოურთმევია, ნახევარი „ჩემის სულის სახსრად გაჩუქეო“ და თანაც აზატობა უბოძებია.⁴

1724 წ. 25 აგვისტოს ლეკთა ტყვეობისაგან თავის დაღწევის სანაცვლოდ, გიორგი და სოლომონ კაციაშვილები, საკუთარი ცოლ-შვილით ბატონყმობის წიგნს აძლევენ ქეთევან შერმაზანაშვილს: „ლეკის ხელში ტყვედ ვიყავი, სხვა ილაჯი და ღონე აღარ მქონდა და ბატონის ჩემის ონოფრეს დასტურითა მოველ და თქვენ შემოგეხვეწეთ, მოგყიდეთ ჩვენი თავი ჩვენის ცოლშვილითა“.⁵

გორიჯვრელ გიორგი ლომაშვილსა და ბერუა ქიტიაშვილს მხოლოდ სიბერისას დაუღწევიათ თავი ტყვეობიდან, მაგრამ ცხოვრების სახსარს მთლიან-

¹ დოკუმენტები საქართველოს სოციალური ისტორიიდან, ტ. II, გვ. 124, დოკ. 195.

² აეთანდილ კილასონია. ტყვეთა გამოსხნის საშუალებები..., გვ. 237.

³ აეთანდილ კილასონია. ტყვეთა გამოსხნის საშუალებები..., გვ. 237.

⁴ სახელმწიფო საისტორიო არქივი, ფ. 1450; დავთ: № 50; ს. 13.

⁵ სახელმწიფო საისტორიო არქივი, ფ. 1449, ს. 2708.

ნად მოკლებულნი და უუნარონი გამხდარან და მათ შვილებს „მყრელობის“ საფრთხე დამუქრებიათ. გაჭირვებას იხინიც ერეკლესთან მიუყვანია: „ჩვენ ორნიც უძლური ბერიკაცი ვართ. ორიც ტყვეობილამ მოსული. თითო შვილი გვყავს უცოლშვილონი. ახლა სამ-სამ კოდს ფქვილსა გვთხოვენ. გვეშინია შვილები არსაით გაგვექცნენ. რომ მიცემა არ შეუძლიათ, არა გვაბადია რა ...გვედრებით, თქვენი მლოცველი გვამყოფეთ და ეს სურსათი გვაპატივეთ. ხვანა არა გვაქვს და თესვა, მთხოვლობთ და ისე ვრჩებითო“.¹

როგორც ზემოთ მოყვანილი საბუთები მოწმობენ, მხოლოდ ტყვეობიდან თავდახსნა ტყვედნამყოფთათვის ცხოვრების მძიმე ხვედრს დიდად არ ცვლიდა, ამიტომ მათი ნაწილი იძულებული ხდებოდა, გარკვეულ საფასურად ისევ რომელიმე მებატონეს ყმად დასდგომოდა. ნაწილი ძველ ბატონებთან დაბრუნებას ისევ ეკლესია-მონასტრებში თავშეფარებას არჩევდა და საეკლესიო ყმებად ეწერებოდა. ამ ფაქტს საეკლესიო პირებიც ხელს უწყობდნენ, ტყვედნამყოფთა ყოფილ თავადებთან „შუამდგომლობდნენ“ და ხშირად მიზანსაც აღწევდნენ.

1730 წ. 30 აგვისტოს ბეჟან არაგვის ერისთავს ურბნელი ეპისკოპოსის – ნიკოლოზ ხერხეულიძისათვის უბოძებია მისი ყოფილი ყმა – ტირძნისელი ბეჟან სამანდავლესშვილი: „ქ. ესე წიგნი მოგართვით ჩვენ არაგვის ერისთავმან ბატონმან ბეჟან, თქვენ, ურბნელ ეპისკოპოსს ბატონს ჰერჯეულიძეს ნიკოლოზს, ასე რომ ჩვენი ყმის შვილი ტრძნისელი სამანდავლეს შვილი ბეჟანა პატრას ობოლი რუის ყოფილიყო და ლეკებს წაეყვანა. ლეკებისაგან მოსულიყო და სხვაგან ფეხის ადგილი შემნახავი ვერსად ეშოვნა. თქვენს მონასტერში შემოსულიყო და თქვენ შეგეწყნარებინათ. რადგან თქვენ ამდენს გარჯილიყავთ, ჩვენცა თქვენს მონასტერს აღარ გამოვსწირეთ და თქვენ მოგართვით“.²

თავადაზნაურთა ნაწილი, გარკვეული მოსაზრებით, საკუთარ ყმებს ეკლესიებს თავისი სურვილითაც სწირავდა. 1739 წ. 24 აგვისტოს დავით ანდრონიკაშვილს ლეკებისაგან დაზარალებული წმ. სამების ეკლესიისათვის შეუწირავს ერთი კომლი – კოჭობასშვილი თევდორე ცოლ-შვილით: „ხედან რომ შენ წმინდის სამებას კაწარეთს ყმა ლეკსაგან ამოგიწყდა, მოვიდა თქვენი საჭეთმპყრობელი სამებელი ეპისკოპოსი იოანე და ერთს კომლს კაცს გვეაჯა, ახლა ჩვენც შემოგწირეთ შენ წმინდას სამებას ერთი კომლი კოჭობასშვილი

¹ ქართული სამართლის ძეგლები, ტ. VIII, გვ. 28-29, დოკ. 16.
² სახელმწიფო საისტორიო არქივი, ფ. 1449; ს. 2523.

თვედორე ცოლ-შვილით“.¹

1799 წ. 14 ივნისს მინბაშ ავთანდილ მელიქიშვილს ემიკადასბაშ ალექსანდრე მაყაშვილისათვის მიუყიდავს ლეკების მიერ მოკლული ფარსადან ფარსადანიშვილის ქვრივი ობლებით, იმავე წლის ოქტომბერში მაყაშვილს ნაყიდი ყმები ღვთისმშობლის ეკლესიისათვის დაუთმია იმ მოტივით, რომ „მღთის მშობლის მამულში იდგნენ და მათმა მაღალღირსებამ არქიმანდრიტმა იოაკიმაც მოინდომა და იმის ნებით მეც ხელი ავიდეო“.²

ასევე იყო ტყვედნამყოფთა კატეგორია, რომელიც თავისუფლებას „ღვთის წყალობად“ თვლიდა და აღთქმის მიხედვით, საკუთარი სურვილით საეკლესიო ყმად ეწერებოდა. 1786 წლის 1 აპრილით დათარიღებულ თავშეწირულობის სიგელით ფოცხვერაშვილი ანდრია აღთქმას დებს: „შენ დიდებულო ნათლისმცემლო... ოდეს დავტყვევდი უსჯულოთა ლეკთა მიერ, მაშინ შევავედრე თავი ჩემი მაღლსა შენსა დალოცვასა მისის მაღალღირსების წინამძღვრის ეფთვიმისასა და ალგითქვ: შემოწირვა თავის ჩემისასა. შემეწია ძალი შენი და გავთავისუფლდი მათგან და გამოვიპარე და ბორკილით ქიხიყს მოველ. ნაცვლად შეწვენისა შენისა მეცა ალგისრულე აღთქმა ჩემი და შემომიწირავს თავი ჩემი წმინდისა მონასტრისა შენისათვის და მომირთმევია თავი ჩემი შენის მონასტრისა მამის ეფთვიმისა და კრებულისა მისისათვის საუკუნოდ“.³

1793 წ. 14 მარტს ლეკების ტყვეობისაგან თავდაღწეული ძმები – გოგია და ივანე სეთურიძეები სარგებლობენ იმით, რომ ტყვეობიდან მოსული თავისუფალია და „საბატონოდ ხელი არავის აქვს“, საკუთარი სურვილით სვეტიცხოვლის ყმებად ეწერებიან, სამაგიეროდ ანტონ II კათალიკოსისაგან მამულის წყალობას იღებენ.⁴

1783 წ. 26 ივნისს გოგია და დავით ბერუაშვილები ტფილელ მიტროპოლიტს გერმანეს თავშეწირულობის წიგნს აძლევენ: „ჩვენ სიონთა ღვთის მშობლის ყმანი ვიყავით და ვართ. ეს ჩემი ძმა დავითა ლეკმა დაატყვევა. იქ სხვა ლეკს დაეხსნა და იმ დამხსნელმა ქალაქში (თბილისში – ი.ა.) მოიყვანა, ოცდარგათუმნად დაეხსნა, ამ თეთრის თხოვნა დაგვიწყო, ჩვენ გლეხები ვიყავით, არაფერი გვქონდა რა და ლეკს თუ თავისს თეთრს არ მივსცემდით, ჩემი ძმა ჭელშეკრული მიჰყვანდა. მოვედით, თქვენ შემოგეხვეწეთ, დიდად თავ გაწ-

¹ სახელმწიფო საისტორიო არქივი, ფ. 1449; ს. 2720.

² სახელმწიფო საისტორიო არქივი, ფ. 1449; ს. 2125.

³ სახელმწიფო საისტორიო არქივი, ფ. 1449; ს. 2456.

⁴ სახელმწიფო საისტორიო არქივი, ფ. 1449; ს. 2360.

ყინეთ, მრავალნი შუამავალი შემოგიყენეთ, შეგაწუხეთ და ეს დავით დაიხსენით თქვენ და ლეკს ეს ოცდარვა თუმანი სრულად თქვენ მიეცით და ტყვეობიდან დაიხსენით. ახლა ჩვენ ეს პირობა და წიგნი მოგვირთმევია, რომ თქვენი ყმა და თქვენგან დახსნილი მსახურად გახლდეთ, რასაც სამსახურში ვიმსახურო უარი ვერა ვთქვა, სადამდისინაც თქვენი ნება იყოს, თქვენი სამსახურიდან არ გავიდეთ და ერთგულობით გემსახუროთ. ორნი ძმანი ამ პირობასა ვდებთ და ჩვენის ნებით ეს წიგნი დავაწერინეთ“.¹

როგორც ვხედავთ, დოკუმენტი მრავალმხრივ ინფორმაციას იძლევა: პირველი – იგი ცხადად ასახავს საქართველოში დაბრუნებული ტყვეების უმძიმეს სოციალურ მდგომარეობას. გამოსყიდული ძმის სანაცვლოდ, გოგია ბერუაშვილი საკუთარი სურვილით იყენებს თავს კაბალურ მდგომარეობაში და რა სამსახურიც არ უნდა დაავალონ, „უარს ვერ იტყვის“;

მეორე – წარმოგვიდგენს ლეკების ახალ კატეგორიას, ასე ვთქვათ, ცოცხალ ტყვეთა ვაჭარ-გადამყიდველებს, რომლებიც დაღესტანში საქართველოდან წაყვანილ ტყვეებს ყიდულობენ და შემდეგ საქართველოში ძვირად ჰყიდიან (რა თქმა უნდა, ლეკ-გადამყიდველს დაღესტანში – დავით ბერუაშვილში, საბუთში დასახელებულ ოცდარვა თუმანზე ბევრად ნაკლები თანხა ექნებოდა გადახდილი);

და მესამეც, ცოცხალი ტყვეებით ვაჭრობა საქართველოშივე დაღესტნელების მიერ ხდება არა საიდუმლოდ, დაფარულად, არამედ „კანონიერი“ სახე აქვს მიცემული. წინააღმდეგ შემთხვევაში, ლეკი-გადამყიდველი, თანხის გადაუხდელობის გამო, ბერუაშვილს უკან „წველ შეკრულს“ ვერ წაიყვანდა. სხვა საბუთით, 1764 წელს დარჩია ბეჟანიშვილი აცხადებდა, რომ იგი ლეკებს გაუტაციათ, მერე სხვა ლეკს დაუხსნია და თბილისში ჩამოუყვანია, რათა იქ თავის პატრონს გამოესყიდა.² რა თქმა უნდა, ბეჟანიშვილის გამომსყიდველი ლეკის მთავარი ინტერესი, აქაც ფინანსურია და ისიც ლეგალურად მოქმედებს.

ქართველებიც ყიდულობდნენ თანამემამულეებს იმ პირობით, რომ ფინანსური სარგებელი ენახათ. 1788 წელს გავაზელი ფითიკაშვილი გოგია დატყვევებულია და კარდენახელ კაცს დაუხსნია, მაგრამ ვიდრე ვალს დააბრუნებდა, გოგია ცოლშილიანად გირათი აუყვანია. უილაჯო ფითიკაშვილი ერეკლეს ევედრება: „სანამ ამ ვალს მოვრჩებოდეთ, ერთი ოქმი მებოძოს, რომ არა მეთხოვებო-

¹ *სახელმწიფო საისტორიო არქივი*, ფ. 1449; ს. 2178.

² *ავთანდილ კილასონია*. ტყვის გამოსხნის საშუალებები., გვ. 236.

დეს რაო“.¹ გაბრიელ რამინიშვილსაც ამ საქმით გამდიდრება განუზრახავს, ოთხი წლით თუმანზე სამი შაურის სარგებლით ვალი აუღია და ჩვიდმეტი თუმანად კეხველი იორდანე ტყვეობიდან გამოუხსნია, მაგრამ იორდანეს ვალის გასტუმრება ვეღარ მოუხერხებია. გამდიდრების ნაცვლად, ვალებში ჩავარდნილი რამინიშვილი სამეფო კარზე ჩივის: „გევედრებით, ოქმი და იასაული მიბოძოთ, თავნი და სარგებელი სრულობით მამცეს, რომ მეც თავი გამოვიხსნაო“.²

ტყვეთა გამოსხნის საქმეში ყველაზე მეტად მაინც ეკლესია აქტიურობდა. 1774 წ. 3 ოქტომბრის განჩინების მე-3 და მე-5 მუხლებით, საქართველოს კათალიკოს-პატრიარქი ანტონ I ქვეშევრდომებისადმი მიმართვაში საგანგებოდ უსვამს ხაზს, რომ „თუ ტყვე ჰყავდეს დასახსნელი და მოწყალებას ითხოვდეს ...უნდა შეიწყნაროთ და მოწყალება მისცეთო“.³ საეკლესიო პირთა ნაწილი, ტყვეთა გამოსხნას, ღვთისა და ქვეყნის წინაშე უპირველეს ვალდებულებად თვლიდა იმდენად, რომ ეს საკითხი ანდერძის შინაარსშიც კი ხვდებოდა. 1788 წ. 18 აპრილს თეიმურაზ ჯავახიშვილი ერეკლე მეფეს აუწყებს: „ჩემს სიდედრს სიმონ მღუდლის თეთრი ემართა და სვიმონ რომ კუდებოდა, ჩემმა სიდედრმა მითხრა, მიდი, შეეხვეწე სარგებელი მაპატიოსო. მიველ, შეეხვეწე სარგებლის პატიობა ...ანდერძი დაეწერა: ამის ფულის სარგებელით ერთი ტყვე დაიხსენითო“. ჯავახიშვილს ანდერძი პირნათლად შეუსრულებია, ტყვე გამოუხსნია და სვიმონის საფლავზე მასთან ერთად შენდობა უთქვამს.⁴

თავის მხრივ, ხელისუფლებაც ცდილობდა გარკვეული შეღავათები დაეწესებინა იმ პირებისათვის, რომელთაც გამოსასყიდი თანხა ჰქონდათ გადასახდელი. მაგ. დარეჯან დედოფალი გაგაზის მოურავს, ნატყვევარი გოგიას ორი წლით სახელმწიფო და ადგილობრივი გადასახადებიდან გათავისუფლებას უბრძანებს: „თუ ნაილაჯი იყოს და მიცემა არათი შეეძლოს, ორი წლით გაგვიზატებია. არც საჩვენო სათხოვარში უნდა გარიოთ და არც სათქვენოში, რადგან თავი აქუს დასახსნელი, გამოსაღებში ნუღარ გარევეთ“.⁵ 1786 წ. 11 დეკემბერს ლეკებში დატყვევებული თათარაშვილის მეუღლე, ქმრის გამოსხნამდე დარეჯან დედოფალს ასევე გადასახადებიდან გათავისუფლებას სთხოვს: „ლეკი მყავს გაგზავნილი თქვენის ყმის დასახსნელად. და ახლა გევედრებით,

¹ დოკუმენტები საქართველოს სოციალური ისტორიიდან, ტ. II, გვ. 268, დოკ. 418.

² ქართული სამართლის ძეგლები, ტ. VIII, გვ. 605, დოკ. 609.

³ ქართული სამართლის ძეგლები, ტ. IV, გვ. 901-902, დოკ. 354.

⁴ ქართული სამართლის ძეგლები, ტ. VII, გვ. 755-756, დოკ. 797.

⁵ ქართული სამართლის ძეგლები, ტ. VIII, გვ. 35, დოკ. 22.

სანამ სახსარს შავასრულებდე და დაეხსნიდე, მანამ თქვენი წყალობა დამემართოს, რომ გასაღები როდესაც გაიხლოს, იმან თავისი გადაიხადოსო“.¹ დედოფალი გადასახადიდან ამ ქალბატონსაც ათავისუფლებს და მოხელეებისადმი მიწერილ ოქმში ხაზს უსვამს: „რადგან ტყვის პატრონი არის, ამისთვის ვაპტივეთო“.²

მუდმივი ძარცვა-რბევით მიყენებული ზარალის აღსადგენად მხოლოდ სახელმწიფო სახსრები არ კმაროდა და მისი „კომპენსაცია“ ძირითადად ისევ მოსახლეობის ხარჯზე ხდებოდა. ეს ფაქტი, ფიზიკურ შრომასთან ერთად, ფინანსებთანაც იყო დაკავშირებული, რაც მოსახლეობას ურთულეს მდგომარეობაში აყენებდა. 1799 წლის 30 მარტს გიორგი XII-სადმი მიწერილ წერილში იესე დიასამიძე წუხდა, რომ „შვიდი კომლი კაცი ლეკებში დაგვიხოცეს, იმათი ცოლ-შვილი დაატყვევეს და შვიდი კომლი ყმაღა დაგვრჩაო. ახლა ზაალ ყაფლანიშვილი და იასაულები გამოსაღებსა გვთხოვენ, ესენიც დამეკარგებიან და მე რიდათ უნდა დავრჩე. მუხალგა მომირთმევია, თუ ამაზედ მეტი მყვანდეს, ან მუშა, ან გუთანი, ან ყმა თქვენთვის მომირთმევია ჯარიმათ ...თუ მე ამას გარდა ერთი ხარი მყვანდეს რომ გუთანში შევაბა, თქვენი რისხვა მქონდესო“.³

გიორგი XII-ს იესე დიასამიძე გამოსაღებისაგან გაუთავისუფლებია, მაგრამ ცალკეული ღონისძიებები მხოლოდ დროებითი შეგება იყო ქვეყნისათვის. მთლიანობაში კი „ლეკიანობა“ „მოუშუშებელ იარად“ დარჩა ქართლ-კახეთისათვის.

ასეთია არასრული მიმოხილვა XVIII საუკუნესა და XIX საუკუნის პირველ მესამედში ქართლ-კახეთში შექმნილი სოციალ-პოლიტიკური და ეკონომიკურ-დემოგრაფიული მდგომარეობისა. მართალია, უმიწო და სუსტად განვითარებულ დაღესტანს მეზობელ საქართველოში გამუდმებული ძარცვა-თარეში ეკონომიკური პრობლემების გადაწყვეტის საშუალებას აძლევდა, მაგრამ პოლიტიკურად ეს პროცესი ორივე ქვეყანას (დაღესტანსა და საქართველოს) მნიშვნელოვნად ასუსტებდა. ყველაზე მეტად მეზობლების ქიშპით კი მესამე დიდმა ჩრდილოელმა მეზობელმა ისარგებლა.

რუსეთმა ჯერ საქართველო დაიპყრო, შემდეგ დაღესტანი და ჩრდილო-კავკასია, ხოლო „ლეკიანობის“ პრობლემა საიმპერატორო კარმა მნიშვნელოვანწილად ისევ ქართველების ხელით გადაწყვიტა.

¹ ქართული სამართლის ძეგლები, ტ. VII, გვ. 709, დოკ. 748.

² ქართული სამართლის ძეგლები, ტ. VII, გვ. 710.

³ სახელმწიფო საისტორიო არქივი. ფ. 1450. დავთ. 13 ს. 123.

დასკვნა

ამრიგად, ზემონათქვამზე დაყრდნობით შეიძლება დავასკვნათ, რომ „ლეკიანობა“, ძირითადად, სოციალური მოვლენა იყო და გამოკვეთილად ანტიქართულ ხასიათს არ ატარებდა. იგი, სადამდეც ხელი მიუწვდებოდა, ერთნაირად ემუქრებოდა, არა მარტო ქართლ-კახეთს, არამედ სხვა მეზობლებსაც: ჩრდილო-დასავლეთით სტავროპოლის მხარეს, სამხრეთ-აღმოსავლეთით – ჩრდილო-ირანის ერთმორწმუნე პროვინციებს და სომხეთს.

ჩრდ. კავკასიის გეოგრაფიული მდებარეობის, კერძოდ, მთის მკაცრი პირობების, მიწის სიმცირისა და მოუსავლიანობის გამო, მოსახლეობის გარკვეული ნაწილისათვის ცხოვრების „სახსრად“ სწორედ ძარცვა-თარეში და ტყვეებით ვაჭრობა იქცა, მიუხედავად იმისა, რომ სიცოცხლის რისკი ძალზე დიდი იყო. საგულისხმოა, რომ დაღესტნელები თანაბარი ხალისით მოდიოდნენ, არა მარტო ქართლ-კახეთის სათარეშოდ, არამედ ქართველი მეფეების დროშის ქვეშ – დაქირავებულთა სახით.

იმეორკავკასიელთა ლაშქრობებს საქართველოში ადამიანთა გატაცებისა და შემდგომ ახლობლების მიერ გამოსყიდვის მიზნით ადრეც (XV-XVI სს.) ჰქონდა ადგილი, მაგრამ, მას შემდეგ, რც ყირიმისა და სტამბოლ-კაიროს ტყვეთა ბაზრები ამოქმედდა და ადამიანებით ვაჭრობა გაცილებით სარფიან საქმედ იქცა, ამ პროცესმა შეუქცევადი ხასიათი მიიღო. საქართველოში იმ დროისათვის არსებული სოციალ-ეკონომიკური და პოლიტიკური სისტემა (სათავადობად დაშლილ-დაქუცმაცებული ქვეყანა, მძიმე დემოგრაფიული ვითარება, ეკონომიკის განვითარების დაბალი დონე, მუდმივი ჯარის არ არსებობა და სხვ.) ნოყიერ ნიადაგს ქმნიდა ლეკთა გამუდმებული თარეშისათვის და არ იძლეოდა ამ პრობლემის გადაჭრის საშუალებას. საკმარისი იყო ამ სისტემის თუნდაც რომელიმე სეგმენტი შეცვლილიყო (მაგ. XVIII ს. 70-იან წლებში, როცა ერეკლე II-მ გააუქმა ქსნისა და არაგვის საერისთავოები, გავლენის ქვეშ მოაქცია საამილახვრო-საბარათიანო, ხელი მიჰყო სამთამადნო წარმოებას, შექმნა „მორიგე ჯარი“), რომ მისი სასიკეთო შედეგი ქვეყანას უმაღლეს ეტყობოდა და ლეკთა შემოსევებიც მნიშვნელოვნად იკლებდა.

„ლეკიანობის“ პროცესი არანაკლებ წამგებიანი იყო თვით დაღესტნისათვის, რადგან იგი დამოკიდებული იყო მხოლოდ ტყვე-ნადავლიდან მიღებულ შემოსავალზე და ეკონომიკური განვითარების ობიექტურ შესაძლებლობებს

გამორიცხავდა.

მუდმივად მოუგვარებელი საგარეო პრობლემა ქართლ-კახეთში შინაგან დაპირისპირებებს წარმოშობდა და მისი გადაწყვეტის საშუალებას არ იძლეოდა, რაც ძლიერ მტერს ქვეყნის საშინაო საქმეებში ჩარევისათვის ნოყიერ ნიადაგს უქმნიდა.

„ლეკიანობამ“ მნიშვნელოვნად შეცვალა ქვეყნის სოციალური და დემოგრაფიული გარემო. დაცლილ ტერიტორიებზე მასიური ხასიათი მიეცა არაქართული მოსახლეობის ჩამოსახლების (ოსების, სომხების) შემთხვევებს. ეს ფაქტი ზოგჯერ ქართველ მეფეთა ინიციატივითაც ხდებოდა, რადგან გადასახადების გადამხდელუნარიანი მოსახლეობის გამრავლება ქვეყნის ფიზიკური არსებობისათვის აუცილებელი პირობა იყო. მოგვიანებით ამ ფაქტმა უცხო ძალის მხარდაჭერით ქვეყანაში ეთნოკონფლიქტების გაღვივებას მნიშვნელოვნად შეუწყო ხელი.

მიუხედავად ერეკლე II-ის დიდი ძალისხმევისა, ცხოვრების სხვადასხვა სფეროში (ეკონომიკური, ადმინისტრაციული, დემოგრაფიული, კულტურული) რეფორმების განხორციელების მიზნით, მუდმივი თავდასხმები რეფორმების სრულყოფილად განხორციელების შესაძლებლობებს გამორიცხავდა, ამიტომ ისინი განსაკუთრებულ ეფექტს ვერ იძლეოდნენ ქვეყნის ჩიხიდან გამოსაყვანად.

ერეკლე ასევე აქტიური იყო საფორტიფიკაციო ნაგებობების მშენებლობა-განახლების მხრივ, მაგრამ ეს ნაგებობები სტრატეგიული მნიშვნელობის და მასშტაბურნი არ იყვნენ, მხოლოდ თავდაცვით ხასიათს ატარებდნენ და სამხედრო თვალსაზრისით ქვეყნისათვის დიდ ეფექტს ვერ იძლეოდნენ;

„ლეკიანობამ“, მთლიანობაში უმძიმესი შედეგები მოიტანა ქართლ-კახეთისათვის, კრიზისმა საყოველთაო ხასიათი მიიღო და ერი ფიზიკური გადაშენების რეალური საფრთხის წინაშე დააყენა. ქართლ-კახეთის მეფეებმა „ლეკიანობის“ პრობლემის მოგვარება დამოუკიდებლად ვერ მოახერხეს, ამიტომ, ძლიერი გარე მხარდამჭერი ძალის ჩართვა პრობლემის მოგვარების მიზნით, ცხოვრებამ გარდაუვალი გახადა.

იმიერკავკასიელთა გამუდმებულმა მარბიელმა თავდასხმებმა ქართლ-კახეთის ხელისუფალთ (ერეკლე II, განსაკუთრებით გიორგი XII) საგარეო ორიენტაციის თვალსაზრისით არჩევანი აღარ დაუტოვეს. ოსმალეთისა და ირანის პროტექტორატის ქვეშ დაბრუნება ერს გადაგვარებას უქადდა, ამიტომ, შექ-

მნილ ვითარებაში სავსებით გასაგები და ბუნებრივი იყო მათი ორიენტაცია რუსეთზე, მაგრამ იმპერია დამოუკიდებელი ერთმორწმუნე ქვეყნის მფარველობას აღარ დასჯერდა და ქვეყნის ოკუპაცია განსაკუთრებული წინააღმდეგობის გარეშე განახორციელა.

დამოწმებული წყაროები და ლიტერატურა

ა) საარქივო მასალა ხელნაწერთა ეროვნული ცენტრი

1. ფონდი – საბ. 4036; 7872; 11420; 11706; 11909; 13714; 13715; 13709 14499; 14534^ბ, 14759; 14759^ა; 14759^ბ;
2. ფ. – საბ. 907; 920; 1146; 1182; 1230; 1327; 1362; 1443; 1410; 1563; 1760;
3. დიმიტრი მელვიანეთსუცესიშვილის პირადი საარქივო ფონდი № 30; -986;

საქართველოს ეროვნული საისტორიო არქივი

2. ფონდი – 1448.
საქმე 4325; 4657; 5124; 5602; 8719; 9376; 9392
3. ფონდი – 1449.
ს. 582; 877; 879; 2125; 2178; 2271; 2277; 2360; 2456; 2523; 2542; 2708; 2720; 2824; 2844; 2900
4. ფონდი – 1450.
დავთარი № 5. ს. 75; 88.
დავთ. № 12. ს. 63.
დავთ. № 13. ს. 17; 123.
დავთ. № 23. ს. 3.
დავთ. № 28. ს. 234; 235; 236.
დავთ. № 36. ს. 255.
დავთ. № 46. ს. 274.
დავთ. № 48. ს. 36.
დავთ. № 50. ს. 13.
5. ფონდი – 1451.
დავთ. № 1. წიგნი № 2^ა. ს. 1.
დავთ. № 1. წიგნი № 2^ა. ს. 55.
დავთ. № 1. წიგნი № 2^ა. ს. 297.

დავთ. № 2. მცხეთის სეკტიცხოვლის ეკლესიის წერილების რეესტრი. ს. 201.
დავთ. № 2. ს. 255.
დავთ. № 2. სიონის დეთისმშობლის ეკლესიის წერილების რეესტრი. ს. 44.
დავთ. № 2. ს. 55.

გორის ისტორიულ-ეთნოგრაფიული მუზეუმი

- გსიემ - 8375, ნაწილი 5, № 63, გვ. 343;
გსიემ – 7648, ნაწილი 6, გვ. 551;
გსიემ – 7648, ნაწილი 6, გვ. 603
გსიემ - 7782/3, ფ. № 145;
გსიემ 7782/3; ფ. № 146
გსიემ 7782/3; ფ. № 155
გსიემ - 7782/3, ფ. № 179;

გსიემ, 7782/4; ფ. № 355;
გსიემ 7782/4; ფ. № 385
გსიემ, 7782/6; ფ. 484

ბ) პ რ ე ს ა

6. გაზეთი „დროება“

- ა) 06. 06. 1875. № 63
- ბ) 08. 06. 1877. № 66.
- გ) 30. 06. 1876. № 66
- დ) 05. 10. 1877. № 159
- ე) 06. 10. 1877. № 160
- ვ) 19. 11. 1877. № 197
- ზ) 17. 12. 1877. № 219
- თ) 22. 08. 1878. № 169
- ი) 07. 06. 1879. № 118
- კ) 08. 06. 1879. № 119
- ლ) 24. 03. 1884. № 66

7. გაზეთი „ივერია“

- ა) 30. 04. 1886. № 93
- ბ) 01. 05. 1886. № 94
- გ) 30. 11. 1890. № 255
- დ) 12. 09. 1895. № 195

8. გაზეთი „ცნობის ფურცელი“

- 14. 08. 1897. № 2.

გ) გამოქვეყნებული წყაროები:

1. ამილახვარი ალექსანდრე. გეორგიანული ისტორია. თარგმნილი *გერონტი კიქოძის* მიერ. – *მნათობი*. 1939, №8.
2. ბაგრატიონი თეიმურაზ. ახალი ისტორია. ტექსტი გამოსაცემად მოამზადა, გამოკვლევა და საძიებლები დაურთო *ლელა მიქიაშვილმა*. თბ., 1983;
3. ბაგრატიონი იოანე. ქართლ-კახეთის აღწერა. ტექსტი გამოსაცემად მოამზადეს, გამოკვლევა და საძიებლები დაურთეს *თინა ენუქიძემ* და *გურამ ბედოშვილმა*. თბ., 1986.
4. ბარათაშვილი იესე. ცხოვრება-ანდერძი. – *ქართული პროზა*. ტ. V. თბ., 1983.
5. ბატონიშვილი ბაგრატ. ახალი მოთხრობა. *თამარ ლომოურის* გამოცემა. თბ., 1941.
6. ბატონიშვილი დავით. ახალი ისტორია. *თამარ ლომოურის* გამოცემა. თბ., 1941.
7. ბატონიშვილი დავით. მასალები საქართველოს ისტორიისათვის (1744-1840 წწ.). ტფ., 1906.
8. ბატონიშვილი ვახუშტი. აღწერა სამეფოსა საქართველოსა. – *ქართლის ცხოვრება* IV. ტექსტი დადგენილი ყველა ძირითადი ხელნაწერის მიხედვით *სიმონ ყაუხჩიშვილის* მიერ. თბ., 1973.
9. ბატონიშვილი იოანე. ხუმარსწავლა (კალმასობა). წიგნი I. თბ., 1990.
10. *გიულდენშტედტის მოგზაურობა საქართველოში*. ტ. I. გერმანული ტექსტი ქართული თარგმანითურთ გამოსცა და გამოკვლევა დაურთო *გია გელაშვილმა*. თბ., 1962.
11. *გიულდენშტედტის მოგზაურობა საქართველოში*. ტ. II. გერმანული ტექსტი ქართული თარგმანითურთ გამოსცა და გამოკვლევა დაურთო *გია გელაშვილმა*. თბ., 1966;
12. *გურჯი ზადე*. თბილისის დაპყრობის წიგნი. თურქული ტექსტი ქართული თარგმანით, შესავლითა და შენიშვნებით გამოსცა *ციხანა აბულაძემ*. თბ., 1975.
13. *დასტურლამალი*, ქართული სამართლის ძეგლები, ტექსტი გამოსაცემად მოამზადა, გამოკვლევები, ლექსიკონი და საძიებლები დაურთო *ივანე სურგულაძემ*, თბ., 1970
14. *დე გრაი დე ფუა საქართველოს შესახებ*. ფრანგულიდან თარგმნა, შესავალი, შენიშვნები და საძიებლები დაურთო *ჯუმბერ ოდიშელმა*. თბ., 1985.
15. *დოკუმენტები საქართველოს სოციალური ისტორიიდან*. ტ. I (XV – XVIII სს.), *ნიკო ბერძენიშვილის* რედ., თბ., 1940.
16. *დოკუმენტები საქართველოს სოციალური ისტორიიდან*, ტ. II, ბატონყმური ურთიერთობა (XV-XIX სს.), *ნიკო ბერძენიშვილის* რედ. თბ., 1953.
17. *ეგნატაშვილი ბერი*, ახალი ქართლის ცხოვრება, II. ტექსტი დადგენილი ყველა ძირითადი ხელნაწერის მიხედვით *სიმონ ყაუხჩიშვილის* მიერ. თბ., 1959.
18. *ედუარდ აიხვალდი საქართველოს შესახებ*. (XIX ს. პირველი მეოთხედი) გერმანულიდან თარგმნა, შენიშვნები და საძიებლები დაურთო *გია გელაშვილმა*. თბ., 2005.
19. *ერეკლე II-ის მიერ გაცემული საბუთები 1736-1797 წლები*. თბ., 2008
20. *თამარაშვილი მიქელ*. ისტორია კათოლიკოსობისა ქართველთა შორის. ტფ., 1902.
21. *თაყაიშვილი ექვთიმე*. საქართველოს სიძველენი. ტ. I. ტფ., 1920.
22. *თაყაიშვილი ექვთიმე*. საქართველოს სიძველენი. ტ. II. ტფ., 1909.
23. *თაყაიშვილი ექვთიმე*. საქართველოს სიძველენი. ტ. III. ტფ., 1910.
24. *იოანე ქართველიშვილის მემუარები*. *ავთანდილ იოსელიანის* გამოკვლევით, რედაქციითა და შენიშვნებით. თბ., 1952.
25. *იოსელიანი პლატონ*. ცხოვრება გიორგი მეცამეტისა. თბ., 1978.
26. *ისტორიანი და აზმანი შარავანდედთანი*. – *ქართლის ცხოვრება*. II. ტექსტი დადგენილი ყველა ძირითადი ხელნაწერის მიხედვით *სიმონ ყაუხჩიშვილის* მიერ. თბ., 1959.
27. *ისტორიებრიბი აღწერა ...თხზული საქართველოს მეფის ირაკლის ძის ვახტანგის მიერ*. *სარგის კაკაბაძის* გამოცემა. ტფ., 1914.
28. *კაკაბაძე სარგის*. საამილახვროს დავთარი მე-17 საუკუნის მეორე ნახევრისა. ტფ., 1925.
29. *კარბელაშვილი პოლიექტოს*. ამილახვართა საგვარეულოს ისტორიული გუჯრები, ძველი საქართველო. – *საქართველოს საისტორიო და საეთნოგრაფიო საზოგადოების კრებული*, ტ. II; ტფ., 1913.
30. *ლომსაძე შოთა*. გვიანი შუა საუკუნეების საქართველოს ისტორიიდან. *ახალციხური ქრონი-*

- კები. თბ., 1973.
31. **მაჭარაძე ვალერიან.** გეორგიევსკის ტრაქტატი. თბ., 1983.
 32. **მაჭარაძე ვალერიან.** მასალები XVIII საუკუნის მეორე ნახევრის რუსეთ-საქართველოს ურთიერთობის ისტორიისათვის. ნაწილი II. თეიმურაზ მეორის ელჩობა რუსეთში. თბ., 1968.
 33. **მაჭარაძე ვალერიან.** მასალები XVIII საუკუნის მეორე ნახევრის რუსეთ-საქართველოს ურთიერთობის ისტორიისათვის. ნაწილი III. რუსეთ-თურქეთის ომი 1768-1774 წლებში და საქართველო. თბ., 1988.
 34. **მეგრელაძე დარეჯან.** მასალები XVIII ს. -ოციანი წლების ქართლ-კახეთის ისტორიისათვის. – *მასალები საქართველოსა და კავკასიის ისტორიისათვის* (მსკი), ნაკვ. 33. თბ., 1960.
 35. **მროველი ლეონტი.** მეფეთა ცხოვრება, ქართლის ცხოვრება. I. ტექსტი დადგენილი ყველა ძირითადი ხელნაწერის მიხედვით *სიმონ ყაუხჩიშვილის* მიერ. თბ., 1955.
 36. **ორბელიანი გრიგოლ.** წერილები, ტ. I, *აკაკი გაწერელიას* რედ., თბ., 1936.
 37. **ორბელიანი ილია.** რვა თვე შამილის ტყვეობაში, თარგმნა, წინასიტყვაობა დაურთი და ტექსტი დასაბეჭდად მოამზადა *ელიზბარ უბილაყამ*, თბ., 1991.
 38. **ორბელიანი პაპუნა.** ამბავნი ქართლისანი. ტექსტი დაადგინა, შესავალი, ლექსიკონები და საძიებლები დაურთო *ელენე ცაგარეიშვილმა*. თბ., 1981.
 39. **რაინევი იაკობ.** მოგზაურობა საქართველოში. გერმანიიდან თარგმნა, შესავალი და საძიებლები დაურთო *გია გელაშვილმა*. თბ., 2002.
 40. *სამართალი ვახტანგ მეექვსისა. ისიდორე დოლიძის* რედ. თბ., 1981;
 41. *საქართველოს ისტორიის ქრონიკები XVI-XIX სს. ავთანდილ იოსელიანის* გამოკვლევით, რედაქციითა და შენიშვნებით. თბ., 1980.
 42. *ქართული სამართლის ძეგლები.* ტექსტები გამოსცა, შენიშვნები და საძიებლები დაურთო *ისიდორე დოლიძემ*. ტ. II თბ., 1965.
 43. *ქართული სამართლის ძეგლები*, ტ. III, საეკლესიო საკანონმდებლო ძეგლები (XI-XIX სს.). ტექსტები გამოსცა, შენიშვნები და საძიებლები დაურთო *ისიდორე დოლიძემ*. თბ., 1970.
 44. *ქართული სამართლის ძეგლები*, ტ. IV, სასამართლო განჩინებანი (XVI-XVIII სს.). ტექსტები გამოსცა, შენიშვნები და საძიებლები დაურთო *ისიდორე დოლიძემ*. თბ., 1975.
 45. *ქართული სამართლის ძეგლები*, ტ. VI, სასამართლო განჩინებანი (XVIII-XIX სს.). ტექსტები გამოსცა, შენიშვნები და საძიებლები დაურთო *ისიდორე დოლიძემ*. თბ., 1977.
 46. *ქართული სამართლის ძეგლები*. ტ. VII, სასამართლო არზა-ოქმები, ტექსტები გამოსცა, შენიშვნები და საძიებლები დაურთო *ისიდორე დოლიძემ*. თბ., 1981.
 47. *ქართული სამართლის ძეგლები*. ტ. VIII, სასამართლო არზა-ოქმები და კერძო-სამართლებრივი აქტები. ტექსტები გამოსცა, შენიშვნები და საძიებლები დაურთო *ისიდორე დოლიძემ*. თბ., 1985.
 48. *ქართული საბჭოთა ენციკლოპედია*. ტ. VII. *ირ. აბაშიძის* საერთო რედ. ,თბ., 1984.
 49. *ქრონიკები და სხვა მასალა საქართველოს ისტორიისა და მწერლობისა.* შეკრებილი, ქრონოლოგიურად დაწყობილი და ახსნილი *თედო ჟორდანიას* მიერ. წიგნი III (1700 წლიდან XIX ს.60 – იან წლებამდე). გამოსაცემად მოამზადეს *გივი ჟორდანიამ* და *შოთა ხანთაძემ*. თბ., 1967.
 50. **შენგელია ნოდარ.** XV-XIX საუკუნეების საქართველოს ისტორიის ოსმალური წყაროები. თბ., 1974.
 51. **ჩხეიძე სეხნია.** საქართველოს ცხოვრება. *ზაქარია ჭიჭინაძის* გამოცემა. ტფ., 1913.
 52. **ცინცაძე იასე.** კაპიტან ოთარ თუმანოვის მოხსენებითი ბარათები. თბილისის სახელმწიფო უნივერსიტეტის შრომები. ტ. XXVII. თბ., 1946.
 53. **ცინცაძე იასე.** 1783 წლის მფარველობითი ტრაქტატი. – *მასალები რუსეთ-საქართველოს ურთიერთობათა ისტორიისათვის*. თბ., 1960.
 54. **ცინცაძე იასე.** ორი საბუთი რუსეთ-საქართველოს ურთიერთობათა ისტორიიდან. – *ენიძის მოამბე*. 1940, №V-VI.
 55. **ხერხეულიძე ომან.** მეფობა ირაკლი მეორისა. ტექსტი გამოსაცემად მოამზადა, გამოკვლევა, ლექსიკონი და საძიებელი დაურთო *ლელა მიქიაშვილმა*. თბ., 1989.
 56. **ჯავახიშვილი ივანე.** საქართველოს ეკონომიკური ისტორიის ძეგლები (XIII-XIX სს.). წ. II.

- ობ., 1974.
57. *Адаты Даргийских обществ. – Сборник сведений о Кавказских горцах*, вып. VII, Тифл., 1873.
 58. *Адаты жителей кумыкской плоскости. – Сборник сведений о Кавказских горцах*, вып VI, Тифл., 1872.
 59. *Адаты Южно-Дагестанских обществ . – Сборник сведений о Кавказских горцах*, вып VII, Тифл., 1873.
 60. *Акты Собранные Кавказскою Археографическою Коммисиею*, т. I. ч. II. Тифл. 1866.
 61. *Акты Собранные Кавказскою Археографическою Коммисиею*, т. II. Тифл. 1868.
 62. *Акты Собранные Кавказскою Археографическою Коммисиею*, т. III. Тифл. 1869.
 63. *Акты Собранные Кавказскою Археографическою Коммисиею*, т. IV. Тифл. 1870.
 64. *Акты Собранные Кавказскою Археографическою Коммисиею*, т. V. Тифл. 1873.
 65. *Акты Собранные Кавказскою Археографическою Коммисиею*, т. VI. ч. II. Тифл. 1875.
 66. **Безсонов С. В.** Крепостные сооружения в бассейне большой Лиахви. – *Известия Юго-Осетинского научно-исследовательского института краеведения*, кн. I. Цхинвали 1933.
 67. **Белокуров С.** Сношения России с Кавказом в 1578-1613 г, вып. I.
 68. **Броневский С.** Новейшие географические и исторические известия о Кавказе, ч. I. М., 1823.
 69. **Броссе М.** Переписка на иностранных языках Грузинских царей с Российскими государями от 1659 г. по 1770 г. СПб., 1861.
 70. **Бурнашев С.** Картина Грузии или описание политического состоянія царств Карталинского и Кахетинского. Тифл., 1896.
 71. **Бутков П.** Материалы для новой истории Кавказа с 1722 по 1803 г. ч. II. СПб., 1869.
 72. **Иоселиани Пл.** Описание города Душета Тифлисской губернии. Тифл. 1860.
 73. **Иоселиани Пл.** Описание древностей города Тифлиса. Тифл. 1860.
 74. *Ингуши (их жизнь и обычаи). – Сборник сведений о Кавказских горцах*, вып. IX. Тиф., 1876.
 75. **Львов Н.** Домашняя и семейная жизнь дагестанских горцев. – *Сборник сведений о Кавказских горцах*, вып. III. Тифл., 1870.
 76. **Линевич И. П.** Бывшее елисейское султанство, *Сборник сведений о Кавказских горцах*, вып VII, Тифл., 1873
 77. *Сношения России съ Кавказом в XVI-XVIII столетиях*, проф. **А. Цагарели**. СПб., 1891.
 78. **Туманов Авт.** Описание грузинского города Гори. СПб., 1816.
 79. **Фонь-Плотто А. И.** Природа и люди Закатальского округа, в кн. *Сборник сведений о Кавказских горцах*, вып. IV. Тифл., 1870.
 80. **Эсадзе С.** Очерки историй горного дела на Кавказ. Тифл., 1903.
 81. **Цагарели А.** Грамоты и др. исторические документы относящиеся по Грузии. т. I. СПб., 1891.
 82. **Цагарели А.** Грамоты и др. исторические документы относящиеся по Грузии. т. II. вып. I. Груз. тексты с 1768-1801 гг. СПб., 1898.
 83. **Цагарели А.** Грамоты и др. исторические документы относящиеся по Грузии. т. II. вып. II. СПб., 1902.

დ) სამეცნიერო ლიტერატურა:

84. **აკოფაშვილი გულჩინა.** ეკონომიკური და სოციალური ცხოვრების განვითარება აღმოსავლეთ საქართველოში, XVIII ს. 40-80-იან წლებში. – *საქართველოს ისტორიის ნარკვევები*, ტ. IV. თბ., 1973.
85. **აკოფაშვილი გულჩინა.** სოციალური ურთიერთობის ისტორიიდან XV-XVIII სს. ქართლში (აზნაურთა ფენა). თბ., 1965.
86. **აკოფაშვილი გულჩინა.** ქართლ-კახეთის სახელმწიფოს საშინაო პოლიტიკა. – *საქართველოს ისტორიის ნარკვევები*, ტ. IV. თბ., 1973.
87. **ალიმბარაშვილი იოსებ (სოსო).** „კაკაბეთთან (ნიახურას) ბრძოლის) შეფასების საკითხისათვის. – *ახალი ტრენდები განათლებაში: კვლევა და განვითარება*. გორის სასწავლო უნივერსიტეტის მეოთხე საერთაშორისო კონფერენცია. თბ., 2011.
88. **ალიმბარაშვილი სოსო.** აღმოსავლეთ საქართველოს თავდაცვითი სისტემა XVIII საუკუნის

- II ნახევარში. თბ., 2008.
89. ალიმბარაშვილი იოსებ (სოსო). ლეკიანობა ადმოსავლეთ საქართველოში. თბ., 2011.
 90. ალიმბარაშვილი იოსებ. ერეკლე II-ის ურთიერთობა ოსმალეთთან XVIII ს.70-იან წლებში და რუსეთის დამოკიდებულება ამ საკითხისადმი. – *გორის სასწავლო უნივერსიტეტისა და შავი ზღვის საერთაშორისო უნივერსიტეტის პროფესორ-მასწავლებელთა ერთობლივი სამეცნიერო კონფერენციის მასალები*. 30.03.2012.
 91. ალიმბარაშვილი სოსო. ზედაველას ბრძოლები. – *განთიადი*, № 5-6. ქუთაისი, 2008.
 92. ალიმბარაშვილი სოსო. ომარ-ხანის თავდასხმები საქართველოზე. თბ., 2007;
 93. ალიმბარაშვილი იოსებ. ქართული ჯარის ისტორიიდან (შიდა ქართლის სამდევროები), გორის სასწავლო უნივერსიტეტის ისტორიისა და არქეოლოგიის ცენტრის შრომათა კრებული, № 3. თბ., 2012.
 94. ალიმბარაშვილი იოსებ. შამილის „ნიზამი“ და დავით ბატონიშვილის „სამართალი“. – *ისტორიული რეპრეზენტაცია: თეორიული მიმართულებები და კონკრეტული კვლევები*. აკადემიკოს მარიამ ლორთქიფანიძის დაბადებიდან 90-ე წლისთავისადმი მიძღვნილი საერთაშორისო კონფერენცია 16-17, XI, 2012. თბ., 2012.
 95. ანთელავა ირაკლი. XVIII საუკუნის საქართველოს სოციალ-ეკონომიკური განვითარების ხასიათის საკითხისათვის (სოფლის მასალების მიხედვით), თბ., 1977.
 96. ანჩაბაძე გიორგი. თანამედროვე საქართველოსთვის ჩრდილოკავკასიური ფაქტორის ჩამოყალიბების ისტორიული წინაპირობები (2008 წლამდე), კრებულში: „*ჩრდილო კავკასია და საქართველო*“, ნაწ. I, თბ., 2012.
 97. ანჩაბაძე გიორგი. სამხედრო ისტორია (ლექციების კურსი), თბ., 2002.
 98. ანჩაბაძე გიორგი. საქართველოს სამხედრო ისტორიის საკითხები (1921 წლამდე), თბ., 2010.
 99. ასათიანი ნოდარ. *საქართველოს ისტორია*. თბ., 1995.
 100. ასათიანი ნოდარ, ლორთქიფანიძე მარიკა, *საქართველოს ისტორია*. თბ., 2001.
 101. აფციაური ჯემალ. თეიმურაზი. თბ., 1991.
 102. ახლოური დავით. ახალგორის ისტორია. უძველესი დროიდან ქსნის საერისთავოს გაუქმებაამდე (1777 წ.) თბ., 2006.
 103. ბენდიანაშვილი ალექსანდრე. გლეხთა კლასი და გლეხთა მოძრაობა საქართველოში. თბ., 1989.
 104. ბერიძე ვახტანგ. ძველი ქართული ხუროთმოძღვრება, თბ., 1974.
 105. ბერიძე ვახტანგ. XVI-XVIII საუკუნეების ქართული ხუროთმოძღვრება, ტ. I. თბ., 1983.
 106. ბერძენიშვილი ნიკო, ჯავახიშვილი ივანე, ჯანაშია სიმონ. საქართველოს ისტორია. ნაწ. I. უძვ. დროიდან XIX საუკუნის დამდეგამდე. თბ., 1948.
 107. ბერძენიშვილი ნიკოლოზ. XVIII ს. საქართველოს ისტორიიდან. – *საქართველოს ისტორიის საკითხები*. ტ. II თბ., 1965.
 108. ბერძენიშვილი ნიკოლოზ. საქართველოს ისტორია. თბ., 1966.
 109. ბერძენიშვილი ნიკოლოზ. საქართველოს ისტორიის საკითხები. ტ. III. თბ., 1966.
 110. ბერძენიშვილი ნიკოლოზ. საქართველოს ისტორიის საკითხები. ტ. VI. თბ., 1964.
 111. ბერძენიშვილი ილია. გორის ციხე. თბ., 1961.
 112. ბერძენიშვილი მამისა. მასალები XVIII საუკუნის ბოლო წლების საქართველოს ისტორიიდან (ეპისტოლარული მასალა) – *ქართული წყაროთმცოდნეობა*. ტ. I. თბ., 1965.
 113. ბესიკი. თხზულებანი. ტექსტი შენიშვნები, ლექსიკონი *ალექსანდრე ბარამიძისა და ვარლამ თოფურაძის* რედ. თბ., 1962
 114. ბოცვაძე თეიმურაზ. საქართველო-დაღესტანის ურთიერთობის ისტორიიდან (XV-XVIII სს.) თბ., 1968.
 115. ბოცვაძე თეიმურაზ. საქართველო-ყაზარდოს ურთიერთობის ისტორიიდან (XVI-XVIII სს.) თბ., 1968.
 116. ბოცვაძე თეიმურაზ. ჩრდილო კავკასიის ხალხები საქართველოს საგარეო პოლიტიკაში. XV-XVIII სს. თბ., 1990.
 117. ბოცვაძე თეიმურაზ. დაღესტანი XVIII ს. წიგნში: *ზურაბ ანჩაბაძე, თეიმურაზ ბოცვაძე, გიორგი თოგოშვილი, მარინე ცინცაძე*. ჩრდილო კავკასიის ხალხთა ისტორიის ნარკვევები,

- ნაკვ. I. თბ., 1969.
118. **ბროსე მარი.** საქართველოს ისტორია. ნაწილი მეორე. ნათარგმნი და განმარტებული *სიმონ ლოლობერიძის* მიერ. ტფ., 1900.
 119. **გელეიშვილი პავლე.** ერთი აჯანყების კლასობრივი სახე. (XVIII ს-ში საქართველოში კლასთა ბრძოლის ისტორიის მასალებიდან). – *მეცნიერების მოამბე*. 1936.
 120. **გერმანელი დოქტორი იაკობ რეინგესი.** *ზაქარია ჭიჭინაძის* გამოცემა, ტფ., 1920.
 121. **გიგინეიშვილი ოთარ.** ნარკვევები ოსმალეთის ისტორიიდან. თბ., 1982.
 122. **გვრიტიშვილი დავით.** გორის ისტორია. თბ., 1954.
 123. **გვრიტიშვილი დავით.** ფეოდალური საქართველოს სოციალური ურთიერთობის ისტორიიდან (ქართლის სათავადოები). თბ., 1955.
 124. **გვრიტიშვილი დავით.** ნარკვევები საქართველოს ისტორიიდან. ტ. III. თბ., 1968.
 125. **გოგოლაძე დერმიშა.** სამთამადნო, სამთო-საქარხნო მრეწველობა საქართველოში და კაპიტალიზმის გენეზისის ზოგიერთი საკითხი (XVIII-XIX სს.) თბ., 1982.
 126. **გონიკაშვილი მიხეილ.** ბაგრატიონთა გადასახლება და მოღვაწეობა რუსეთში. თბ., 2002.
 127. **გურამიშვილი დავით.** დავითიანი. ქართული მწერლობა. ტ. VII. თბ., 1984.
 128. **გუჩუა ვიქტორ.** კახეთის სამეფოს ურთიერთობა რუსეთთან, საქართველოს ისტორიის ნარკვევები, ტ. IV, თბ., 1973.
 129. **დონდუა ვარლამ.** დავით გურამიშვილი და საქართველოს ისტორია. თბ., 1959.
 130. **დონდუა ვარლამ.** საისტორიო ძიებანი. III თბ., 1985.
 131. **დუმბაძე მამია.** აღმოსავლეთ კახეთის (საინგილოს) ისტორიიდან (XIX ს. რეფორმამდელი პერიოდი). თბ., 1953.
 132. **დუმბაძე მამია, ქორთუა ნიკოლოზ.** კლასობრივი ბრძოლის გამწვავება. – *საქართველოს ისტორიის ნარკვევები*. ტ. IV. თბ., 1973.
 133. **დუმბაძე მამია.** ქართლ-კახეთის სახელმწიფოს გაუქმება და რუსეთთან შეერთება. – *საქართველოს ისტორიის ნარკვევები*, ტ. IV. თბ., 1973.
 134. **ვანჩაძე მერაბ, გურული ვახტანგ, ბახტაძე მიხეილ.** საქართველოს ისტორია (უძვ. დროიდან 1801 წლამდე). თბ., 2001.
 135. **ზაქარაია პარმენ.** ქართული ციხე-ქალაქები, ციხე-სიმაგრეები, ციხე-დარბაზები, ციხე-გალაენები კოშკები. თბ., 2004.
 136. **თბილისის ისტორია.** ტ. I (უძვ. დროიდან XVIII საუკუნის ბოლომდე). *მამია დუმბაძისა და ვიქტორ გუჩუას* რედ. თბ., 1990.
 137. **კაკაბაძე სარგის.** კრწანისის ომი. თბ., 1991.
 138. **კაკაბაძე სარგის.** საქართველოს ისტორია. ახალი საუკუნეების ეპოქა (1500-1810 წწ.) ტფ. 1922.
 139. **კარბელაშვილი პოლიექტოს.** მეფე ერეკლე და მადანჩა. – გაზ. „*საქართველო*“, 04. 07. 1916 წ. № 123.
 140. **კიკვიძე აბელ.** საქართველოს ისტორია. 1801-1890 წ.წ. თბ., 1974.
 141. **კილასონია ავთანდილ.** ადამიანებით ვაჭრობა საქართველო-კავკასიაში XVI-XVIII საუკუნეებში. თბ., 2006.
 142. **კილასონია ავთანდილ.** ტყვეთა გამოსხნის საშუალებები და მისი სამართლებრივი რეგულირება საქართველოში XVIII საუკუნეში. – *საისტორიო ძიებანი*, III წელიწადული, ექვთ. თაყაიშვილის სახელობის საისტორიო საზოგადოება, აფხაზეთის ორგანიზაცია, თბ., 2000.
 143. **კლიმიანოვი აკაკი.** მასალები XV-XVIII სს. ქართლისა და კახეთის სადროშოების ისტორიისათვის. *კრებულში: XIV-XVIII სს. რამდენიმე ისტორიული დოკუმენტი*, თბ., 1964
 144. **კლიმიანოვი აკაკი.** საარტილერიო მშენებლობა აღმოსავლეთ საქართველოში XVIII ს. II ნახევარში. – *საქართველოს მეცნიერებათა აკადემიის ხელნაწერთა ინსტიტუტის მოამბე*, IV. თბ., 1962.
 145. **ლომაშვილი ფარნაოზ.** საქართველოს ისტორია, 1918-1981 წწ. თბ., 1999.
 146. **ლომსაძე შოთა.** სამცხე-ჯავახეთი. (XVIII საუკუნის შუაწლებიდან XIX საუკუნის შუა წლებამდე). თბ., 1975.
 147. **ლორთქიფანიძე იასე.** მასალები საქართველოს ისტორიისათვის (მე-18 საუკ.). – *მასალები*


- საქართველოსა და კავკასიის ისტორიისათვის (მსკი)*, ნაკვ II. თბ., 1940.
148. **მაისურაძე გურამი**. ქართველი და სომეხი ხალხების ურთიერთობა XIII-XVIII სს. თბ., 1982.
 149. **მაკალათია სერგი**. ფრონეს ხეობა, თბ., 1963.
 150. **მამისთვალიშვილი ელდარ**. ამილახვრები. გორი. 1996.
 151. **მამისთვალიშვილი ელდარ**. გორის ისტორია. ტ. I. თბ., 1994.
 152. **მამისთვალიშვილი ელდარ**. საქართველოს საგარეო პოლიტიკური ურთიერთობანი XV საუკუნის მეორე ნახევარსა და XVI საუკუნეში (ევროპული წყაროების მიხედვით). თბ., 1981.
 153. *მასალები საქართველოს ისტორიისათვის, შეკრებილი დავით გიორგის ძისა და მისი ძმების. მოსე ჯანაშვილის* გამოცემა. ტფ., 1905.
 154. **მაჭარაძე ვალერიან**. ასპინძის ბრძოლა. თბ., 1957.
 155. **მეგრელაძე დარეჯან**, აღმოსავლეთ საქართველო XVIII ს. პირველ ნახევარში. – *საქართველოს ისტორიის ნარკვევები*, ტ. IV. თბ., 1973.
 156. **მეგრელაძე დარეჯან**. დაღესტან-საქართველოს ურთიერთობის ისტორიიდან. – *მაცნე*. საქართველოს მეცნიერებათა აკადემიის საზოგადოებრივ მეცნიერებათა განყოფილების ორგანო, ისტორიის სერია. თბ., 1967. № 6, 39.
 157. **მეგრელაძე დარეჯან**. საქართველოს გლეხობა XVI-XVIII სს. (აღმოსავლეთ საქართველოს მასალების მიხედვით). სადოქტორო დისერტაცია. თბ., 1988.
 158. **მეგრელაძე დარეჯან**. რკინის ადგილობრივი წარმოებისა და მისი შემოხიდევის შესახებ XVIII ს. საქართველოში. – *აკად. ივ. ჯავახიშვილის სახ. ისტორიის ინსტიტუტის შრომები* VII, თბ., 1964.
 159. **მესხია შოთა**. აღმოსავლეთ საქართველოს ქალაქების გარეგანი სახე, *საისტორიო ძიებანი*. ტ. III. თბ., 1986.
 160. **მეტრეველი როინ**. მეფე თამარი. თბ., 1991.
 161. **ნატროშვილი გიორგი**. ისტორიულ-ლიტერატურული ძიებანი. – *მნათობი*, № 1, 1976.
 162. **ოთხმეზური გიორგი**. შიდა ქართლის მცირე სათავადოები (XV-XVY სს.), დისერტაცია ისტორიის მეცნიერებათა დოქტორის სამეცნიერო ხარისხის მოსაპოვებლად. თბ., 1999.
 163. **ოთხმეზური გიორგი**. შიდა ქართლში ოსთა ჩამოსახლების საკითხისათვის. – *კავკასია და კავკასიელები*. სამეცნიერო კონფერენცია (მოსხენებათა მასალები). თბ., 2009.
 164. **ოთხმეზური თამარ**. აღმოსავლეთ საქართველო 1723-1735 წწ. „ოსმალობა“. ნაშრომი ისტორიის მეცნიერებათა კანდიდატის სამეცნიერო ხარისხის მოსაპოვებლად. თბ., 1975.
 165. **ორბელიანი ალექსანდრე**. ასპინძის ომი 1770-სა. – *ქართული პროზა*. ტ. VII. თბ., 1984.
 166. **ორჯონიკიძე ეთერ**. რუსული მმართველობის დამყარება საქართველოში (XIX ს. I ნახევარი). თბ., 1992.
 167. **პაიჭაძე გიორგი**. ვახტანგ VI. თბ., 1981.
 168. **პაიჭაძე გიორგი**. რუსეთ-საქართველოს ურთიერთობის ისტორიისათვის (XVIII ს. I მეოთხედი). თბ., 1960.
 169. **პაიჭაძე გიორგი**. ქართლ-კახეთისა და რუსეთის ურთიერთობის განახლება 80-იანი წლების დასაწყისში. 1783 წ. ხელშეკრულება. – *საქართველოს ისტორიის ნარკვევები*, ტ. IV. თბ., 1973.
 170. **პაპაშვილი მურმან**. დაღესტნის როლი რუსეთ-საქართველოს პოლიტიკურ ურთიერთობაში 1722-1724 წწ. – *საქართველო და ევროპის ქვეყნები* (პოლიტიკური, ეკონომიკური, კულტურული ურთიერთობები) თბ., 1991.
 171. **პაპუაშვილი თენგიზ**. ჭარ-ბელაქანი. თბ., 1972.
 172. **რობაქიძე ალექსანდრე**. თოფისწამლის წარმოება პირაქეთა ხევსურეთში. – *ანალები*, ტ. I 1947.
 173. **სამსონაძე მიხეილ**. საქართველოს გაერთიანების პრობლემა და საგარეო ორიენტაცია XVIII საუკუნეში. თბ., 1988.
 174. **სამსონაძე მიხეილ**. ამიერკავკასიის სახანოებთან ქართლ-კახეთის სამეფოს ურთიერთობის ისტორიიდან XVIII საუკუნის 80-იან წლებში. – კრებ. „*ქართული სამეფო-სამთავროების საგარეო პოლიტიკის ისტორიიდან*“, ტ. II. თბ., 1973.
 175. *საქართველოს ისტორია*. ტ. II. მთავარი რედაქტორი **მარიამ ლორთქიფანიძე**, ტომის რედაქტორები: **ნოდარ ასათიანი** და **გივი ჯამბურია**. თბ., 2008.

176. *საქართველოს ისტორიისა და კულტურის ძეგლთა აღწერილობა*. ტ. V. თბ., 1990.
177. *საქართველოს სახელმწიფო მუზეუმის ისტორიული დოკუმენტები და არქივები*. II. ისტორიული დოკუმენტები. წიგნი I. იმერეთის სამეფოს პოლიტიკური საბუთები (1784-1810). ტექსტი შენიშვნებითა და საძიებლებითურთ გამოსაცემად მოამზადა *შოთა ბურჯანაძემ* თბ., 1981.
178. **სვანიძე მიხეილ**. ატენის ბრძოლის ზოგიერთ საკითხის დაზუსტებისათვის. თურქული წყაროების მიხედვით. – *საქართველოს ისტორიის აღმოსავლური მასალები*. წიგნი II. თბ., 1979.
179. **სვანიძე მიხეილ**. საქართველო-ოსმალეთის ისტორიის ნარკვევები. (XIV–XVIII სს.) თბ., 1990.
180. **სოსიაშვილი გიორგი**. ნარკვევები ლიახვის ხეობის ისტორიიდან. თბ., 2011.
181. **სოსიაშვილი გიორგი**. სამახაბლოს ისტორიიდან (XV-XIX სს.) თბ., 2005.
182. **ტაბატაძე კარლო**. ქართველი ხალხის ბრძოლა უცხოელ დამპყრობთა წინააღმდეგ XIV-XV საუკუნიეთა მიჯნაზე. – *საქართველოს ისტორიის ნარკვევები*, ტ. III, თბ., 1979.
183. **ტლაშაძე იესე**. ბაქარიანი. გამოსაცემად მოამზადა *სოლომონ ყუბანეიშვილმა*. თბ., 1962.
184. **ტუხაშვილი ლოვარდ**. ქართლ-კახეთის სამეფოს ურთიერთობა კავკასიასა და მახლობელ აღმოსავლეთის ხალხებთან მე 18 საუკუნის მეორე ნახევარში. – *მნათობი*, 1971, № 1.
185. **ტუხაშვილი ლოვარდ**. პოლიტიკური ვითარება XVIII ს. პირველ ოცწლეულში. – *საქართველოს ისტორიის ნარკვევები*, ტ. IV. თბ., 1973.
186. **ფრონელი ალექსანდრე**. მთის არწივი შამილი. ტფ., 1914.
187. *ქართული ხალხური პოეზია*. საგმირო ლექსები. ტ. II. ნაკვ. I. თბ., 1974.
188. *ქართული ხალხური საუნჯე*. ტ. I. პოეზია თბ., 1991.
189. **ქიქოძე გერონტი**. ერეკლე მეორე. თბ., 1958.
190. **ქიქოძე მანანა**. სოციალური ურთიერთობის მოწესრიგების ცდები, კლასობრივი ბრძოლა XVIII ს. პირველ მეოთხედში. *საქართველოს ისტორიის ნარკვევები*, ტ. IV. თბ., 1973.
191. **შაველიშვილი აბრამ**. საქართველო-ჩეჩნეთ-ინგუშეთის ურთიერთობა XVI-XVIII სს.-ში. თბ., 1980.
192. **შარაშენიძე ზურაბ**. ირანი XVIII საუკუნის მეორე ნახევარში. თბ., 1970.
193. **შენგელია ნოდარ**. ოსმალო ისტორიკოსი ჩელები ზადე თბილისისა და გორის ციხეების დაპყრობის შესახებ. აკად. *სერგი ჯიქიას* 70 წლისთავისადმი მიძღვნილი საიუბილეო კრებული. – *აღმოსავლური ფილოლოგია*. ტ. III. თბ., 1973.
194. **შველიძე დიმიტრი**. ერეკლე მეფის უკანასკნელი ცდა. – *ისტორიანი*, მიძღვნილი *როინ მეტრეველის* დაბადებიდან 70 წლისთავისადმი, თბ., 2009.
195. **ჩანგაშვილი გიორგი**. საინგილო თბ., 1970.
196. **ჩოლოყაშვილი კოტე**. ქართული საჭურველი – ჯაჭვი. – აკად. ს. ჯანაშიას სახ. საქართველოს სახელმწიფო მუზეუმის მოამბე. თბ., 1956, ტ. XIX- .
197. **ცინცაძე იასე**. აღა-მაჰმად ხანის თავდასხმა საქართველოზე (1795). თბ., 1969.
198. **ცოტნიაშვილი მიხეილ**. ცხინვალის ისტორიისათვის. სტალინირი, 1961.
199. **ცქიტიშვილი ზურაბ**. გარსევან ჭავჭავაძის სახელმწიფოებრივი მოღვაწეობა (საქართველოს საგარეო პოლიტიკური ისტორიიდან XVIII ს.უკანასკნელ მეოთხედში). თბ., 1982.
200. **ხანთაძე შოთა**. მასალები ალექსანდრე ბატონიშვილის ბიოგრაფიისათვის. – აკად. ს. ჯანაშიას სახელობის საქართველოს სახელმწიფო მუზეუმის მოამბე, ტ. XXII. თბ., 1961
201. **ჯაგოდნიშვილი თემურ**. ერეკლეს ეპოსი. თბ., 2005.
202. **ჯავახიშვილი ივანე**. დამოკიდებულება რუსეთსა და საქართველოს შორის მე-XVIII-ე საუკუნეში. თბ., 1919.
203. **ჯავახიშვილი ნიკოლოზ** ნარკვევები ქართველი და ადიღელი ხალხების ურთიერთობის ისტორიიდან. თბ., 2005.
204. **ჯავახიშვილი ნიკოლოზ**. ხუნძეთის ნუცალი უმა V და საქართველო. – *ისტორიანი*. კრებული მიძღვნილი *როინ მეტრეველის* დაბადებიდან 70 წლისთავისადმი. თბ., 2009.
205. **ჯამბაკურ-ორბელიანი ალექსანდრე**. დაღესტნიდან ლეკების გამოსვლა და სხვა ამბები. გამოცემული *სარგის კაკაბაძის* მიერ. ტფ., 1914.
206. **ჯანაშვილი მოსე**. საქართველოს ისტორია. მეორე გამოცემა *ზაქარია ჭიჭინაძისა*. ტფ., 1894.
207. **ჯანელიძე დავით**. საქართველო და აღმოსავლეთი. XVIII ს. თბ., 1984.
208. **ჯაოშვილი ვახტანგ**. საქართველოს მოსახლეობა XVIII-XX საუკუნეებში, თბ., 1984.


209. ჯორჯაძე ირაკლი. ნარკვევები საქართველოს სამხედრო ხელოვნების ისტორიიდან, თბ., 1990.
210. Авваловъ З. Присоединение Грузии къ Россiи. СПб., 1901.
211. Алимбарашвили И. Кровная месть горцев на Северном Кавказе. – *კავკასიის არქეოლოგია, ეთნოლოგია, ფოლკლორისტიკა*. საერთაშორისო სამეცნიერო კონფერენციის მასალები, ქ. ახალციხე, 26-30.07.2012.
212. Анчабадзе Г. Источниковедческие проблемы военной истории Грузии, Тб., 1990.
213. Гамрекели В. Вопросы взаимоотношения Восточной Грузии с Северным Кавказом в XVIII веке, автореферат докт. диссертации. Тб., 1972.
214. Далгат У. Фольклор и литература народов Дагестана. М., 1962
215. Дубровин Н. История войны и владычества Русских на Кавказе, т. II. СПб., 1886.
216. Дубровин Н. История войны и владычества русских на Кавказе, т. III. СПб., 1886.
217. Джевдет паша. Описание собитии в Грузии и Черкасии по отношению к Оттоманской империи от 1192 года по 1202 год хиджри. (1775-1784). Перевод на русск. язык М. А. Гамазова. – *Русский Архив*. кн. I. #3. М., 1888.
218. Маркова О. Россия, Закавказье и международные отношения в XVIII веке. Москва 1966;
219. Маркова О. Феодалная реакция на прогрессивную политику единодержавия Грузии (Выступление князя Александра Грузинского 1766-1783 гг.). – *კავკასიის ხალხთა ისტორიის საკითხები*. თბ., 1966.
220. Накашидзе Н. Грузино-Русские политические отношения в первой половине XVII века. Тб., 1968.
221. Петрушевский И. Джаро-белаканские вольные общества в первой трети XIX столетия, Тифл., 1934
222. Полиевктов М. Материалы по истории Грузино-Русских взаимоотношении 1614-1640 г. Тб. 1937
223. Потто В. Кавказская война въ отдельныхъ очеркахъ эпизодахъ легендахъ и биографияхъ. т. I. от древнейшихъ времянь до Ермолова. вып. I. СПб., 1885.
224. Смирнов. С. Политика России н Кавказ XVI-XIX века. М., 1958.
225. Хашаев Х. Общественный строй Дагестана в XIX веке, М., 1961.

შინაარსი

შესავალი	2
თავი I. ლეკიანობის არსი, ბუნება და ექსპანსიის მიზეზები	
1. ლეკიანობის არსი და ბუნება	15
2. ქართლ-კახეთისა და იმიერ-კავკასიის ხალხთა ურთიერთობა XV-XVIII საუკუნეებში. ლეკთა ექსპანსიის მიზეზები	28
თავი II. ლეკიანობა ქართლ-კახეთში (XVIII ს. - XIX ს.30-იანი წლები)	
1. ლეკიანობა ქართლ-კახეთში XVIII საუკუნის I ნახევარში	41
2. ლეკიანობა ქართლ-კახეთში XVIII საუკუნის II ნახევარში, იმიერ-კავკასიელ მთიელთა ექსპანსიის გაძლიერება	54
3. ლეკიანობა ქართლ-კახეთში რუსული ხელისუფლების დროს (XIX ს. დასაწყისი - 30-იანი წლები)	79
თავი III. ქართლ-კახეთის სამხედრო-თავდაცვითი სისტემა ლეკიანობის წინააღმდეგ	
1. ადმინისტრაციული ღონისძიებები ქვეყნის თავდაცვისუნარიანობის განმტკიცების მიზნით	93
2. საფორტიფიკაციო ნაგებობები	122
თავი IV. ლეკიანობის შედეგები	142
დასკვნა	175
დამოწმებული წყაროები და ლიტერატურა	178
დანართი რუკები	
1. იმიერკავკასია XVIII საუკუნეში.	189
2. ლეკთა შემოსევების ძირითადი მიმართულებები ქართლ-კახეთში	190
3. ლეკიანობა ქართლში (XVIII ს. - XIX ს. 30-იანი წლები)	191
4. ლეკიანობა კახეთში (XVIII ს. - XIX ს. 30-იანი წლები)	192
5. შიდა ქართლის სამდევროები ერეკლე II-ის 1772 წ. 28. 08. ბრძანების მიხედვით	193
6. ქართლ-კახეთის მთავარი ციხე-სიმაგრეების სასიგნალო სისტემა XVIII ს-ში	194



ლექთა შემოსევების ძირითადი მიმართულებები ქართლ-კახეთში



სამდეგროების რუკა ერეკლე II-ს 28.08.1772 წ. ბრძანების მიხედვით

